


---

This is a reproduction of a library book that was digitized by Google as part of an ongoing effort to preserve the information in books and make it universally accessible.

Google<sup>TM</sup> books

<https://books.google.com>





## A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

## Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

## À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



314227



2480

réimpression dans le tome 2 des Mém. de Comines,  
Paris 1747, in 4.<sup>o</sup> (B. de Lyon, n.<sup>o</sup> 24817 ter). =

hist. G. 2 p. 977 +

S. m. [... Jean de Broges]

+  
the greffier du C. Hotel de ville

+  
Chronique

CHRONIQUE  
SCANDALEVSE  
OV HISTOIRE

DES ESTRANGE FAICTS

arriuez soubs le Regne de

LOVYS XI.

ROY DE FRANCE.

*Depuis l'an 1460 insques à 1483.*

Escrite par vn Greffier de l'Hostel de ville  
DE PARIS.

*in-80*

*2283*



IMPRIMEE

Sur le vray Original, M.DC.XX.

THE JOURNAL

OF THE

ROYAL SOCIETY OF LONDON

AND OF THE


ROYAL SOCIETY OF MEDICINE

AND OF THE

ROYAL SOCIETY OF PHYSICS

AND OF THE

ROYAL SOCIETY OF ARTS




AND OF THE

ROYAL SOCIETY OF MEDICINE

---

## A V LECTEUR.



MY LECTEUR, Je te donne ceste Chronicque en sa pureté, tant pour le langage que pour l'Histoire: Je l'ay Conferé sur diuers Manuscrits dignes de foy; ce que tu recognoistras aisement par la lecture d'icelle. Elle n'a besoin de recommandation, les faiçts qu'elle traite luy donnent son passeport, tu y trouueras assez dequoy contenter ton esprit, & remercier celuy qui a mis la peine de te la donner, non à moitié comme du Haillan, & quelques autres ont faiçt, mais entiere & sans alteration; Portant sur le front la verité. A Dieu.








# TABLE DES MATIERES

## CONTENUES EN CETTE

### Chronique.

	<i>Bas merueil-</i> <i>leux d'une</i> <i>ieune fille de</i> <i>18. ans en la</i> <i>ville du Mans, soy disant</i> <i>estre possedee du malin es-</i> <i>prit. 9. sa tromperie descou-</i> <i>uerte.</i>	<i>Bourbonnois.</i>	264
	<i>Accord de Charles frere</i> <i>du Roy avec le Duc de Bre-</i> <i>tagne.</i>	<i>Alliance du Roy avec</i> <i>le Roy d'Angleterre.</i>	160
	<i>Accouchement de la Roy-</i> <i>ne, d'un beau fils nommé</i> <i>Charles a Amboise.</i>	<i>Alliance iuree entre le</i> <i>Roy &amp; le Roy de Castille.</i> <i>298. &amp; la ioye qui en fut</i> <i>faite.</i>	ibid.
	<i>Aduertissement au Roy</i> <i>tres-important, de ne cou-</i> <i>cher au bois de Vinciennes:</i> <i>il l'accorde.</i>	<i>Alliance de l'Empereur</i> <i>et du Roy.</i>	218
	<i>Agnez de Bourgongne</i> <i>Duchesse de Bourbonnois</i> <i>et Auvergne, meurt au</i> <i>chasteau de Moulins en</i>	<i>Alliance du Roy avec le</i> <i>Roy d'Espagne.</i> <i>Ambassadeurs et Egli-</i> <i>ses auoient tous les presens</i> <i>du Roy.</i>	150 338
		<i>Amiens reduit à l'obeis-</i> <i>sance du Roy.</i>	165
		<i>Amitié grãde du Roi en-</i> <i>uers ses gens de guerre.</i>	207
		<i>Angers &amp; autres ter-</i> <i>res appartenans au Roy de</i> <i>Cecille, mises sous la main</i> <i>du Roy.</i>	209

## Table des Matieres.

<i>Anthoine bastard de Bourgogne vient à Paris en habit mesconu, Et les soupçons qu'il y laissa par une telle arriuee.</i>	7	<i>en armes deuant la maison de ville.</i>	55
<i>Anthoine de Chabanes Compté de Dampmartin, prisonnier en la Bastille, eschapé.</i>	22	<i>Arriuee du Roy à Angers &amp; pont de See, Et pourquoy.</i>	23
<i>Anthoine Fradin Cordelier, est banny à perpetuité de France.</i>	295	<i>Arriuee de Damoiselle Marguerite d'Autriche à Paris, &amp; son honorable reception.</i>	329. 330
<i>Anthoine de Chasteauneuf, Seigneur de Laugräd mignon du Roy Louys XI.</i>	121.	<i>Armee redoutable du Roy contre les Bourguignons.</i>	221
<i>a receu dudit Roy en dons plus de quatre cës mille escus d'or.</i>	ibid.	<i>Armee du Duc de Bourgogne desfaite par les Suisses.</i>	250. 251
<i>Anthoine Seigneur du Lau eschappe des prisons de Luffon en Auvergne.</i>	133.	<i>Armee la plus belle qui fut oncques veüe.</i>	29
<i>celuy qui le gardoit, decapité.</i>	ibid.	<i>Armignat mis entre les mains du Roy sans effusion de sang.</i>	151
<i>Appanage de Charles, frere du Roy.</i>	128	<i>Arson, lieu de retraicte pres de Roye, d'un grand nombre de voleurs Bourguignons.</i>	213
<i>Appointemens fait entre les gens de la chambre des Aydes, &amp; l'Uniuerité de Paris.</i>	6	<i>Arras refuse de se rendre au Roy.</i>	272. est finalement pris.
<i>Archers &amp; Arbalestiers</i>		<i>Arragon cemetiere des François.</i>	208
		<i>Article d'importance</i>	

## Table des Matieres.

presenté à Charles.	91	memorable faite par les
Artillerie portant boulet		Suisses deuant Morat, sur
de 500. liures pesant. 300.		le Duc de Bourgongne l'an
maux qu'elle fit.	ibid.	616.256.257
Artillerie de Tours toute		Beaujeu frere du Duc de
te, fut amenee au chasteau		Bourbon est mis par trahi-
du Louvre à Paris.	162	son és mains du Comte
Asne enuoyé en present		d'Armignac.
par le Roy au Roy d'An-		189
gleterre.	211	Beaulieu pris par les
Assemblée des trois		Bourguignons, sur le Roy.
Estats en la ville de Tours.	28	
127		Beaulne rendu au Roy
		par composition.
		294
		Belle & tres-honora-
		ble reception de la Royne
		au terrain de Paris.
		112
		Belles ordonnances fai-
		tes par le Royle lendemain
		de son sacre.
		18
		Biens du Comte d'Eu
		donnez au Conestable, &
		non à son frere le Comte de
		Neuers.
		170
		Biens de Pierre Morin
		Thresorier du Duc de Ber-
		ry, pris par inuentaie, &
		mis en la main du Roy.
		22.
		Biens du Duc de Bour-
		gongne mis & arrestez és

### B

**B** Aron en Angleterre  
eut la teste trenchee  
par le Comte de Uaruuich.  
159

Barons, Cheualiers, Es-  
cuyers & gens de guerre,  
d'environ neuf à dix mille  
combatans morts en la def-  
faicte du Duc d'Yorth.  
10

Barons escartelez à Lon-  
dres, contre la foy promise.  
6

Bataille & desconfiture

## Table des Matieres.

<i>main du Comte de Uar-</i>		<i>Bourguignons entrent</i>	
<i>uich.</i>	161	<i>par trahison au pays de Ni-</i>	
<i>Bled fort cher uniuerfel-</i>		<i>uernois.</i>	198
<i>lement par la France.</i>	319	<i>Bourguignons deffaits</i>	
<i>Bleds, vins, et toutes</i>		<i>par le Roy dans Tronquoy.</i>	
<i>sortes de biens, sans sortir</i>		220. <i>Et le lieu abbatu.</i>	
<i>croissent en abondance au</i>		<i>ibid.</i>	
<i>Royaume de France.</i>	2	<i>Bourguignons deffaits</i>	
<i>Bled vendu à Paris.</i>		<i>Et tuez deuant Beauuais.</i>	
1460. <i>le septier vingtqua-</i>		178	
<i>tre sols Parisis.</i>	3	<i>Bourguignons quittans</i>	
<i>Bourgeois de Paris se de-</i>		<i>honteusement le siege de</i>	
<i>fendent vaillamment con-</i>		<i>Beauuais, mettent le feu par</i>	
<i>tre les rusez assauts des</i>		<i>tous les bleds et villages.</i>	
<i>Bourguignons.</i>	33	184	
<i>Bourguignons font mon-</i>		<i>Bourguignons chassiez</i>	
<i>tre entre Charenton Et</i>		<i>d'Eu, sortent un baston à</i>	
<i>Paris. Le Roy avec trois</i>		<i>la main, payent dix mille</i>	
<i>Seigneurs, sans estre co-</i>		<i>escus, etc.</i>	187
<i>gneu les void.</i>	81	<i>Bonne et agreable res-</i>	
<i>Bourguignons mettent Et</i>		<i>ponce donnee par Anthoi-</i>	
<i>asseent un pont pour passer</i>		<i>ne Bastard de Bourgongne</i>	
<i>au port à l'Anglois.</i>	59	<i>aux Ambassadeurs.</i>	7
<i>Bourguignons reuien-</i>		<i>Bon desir et intention</i>	
<i>nent brauer deuant Paris.</i>		<i>de l'Autheur du present li-</i>	
<i>Bourguignons logez à</i>		<i>ure en la recherche des sin-</i>	
<i>Monlebery avec leur ar-</i>		<i>gularitez des vies des Roys</i>	
<i>tillerie, sont deffaits par le</i>		<i>de France.</i>	2
<i>Roy, ayant fort peu de</i>		<i>Bretons et Bourguignons</i>	
<i>gens.</i>	36	<i>estās fort miserables et af-</i>	
		<i>famez</i>	



## Table des Matieres.

famez, sont benigne <sup>m</sup> et secourus de viures par les habitans de Paris au commandement du Roi.	76	à l'Estore pour trahison, enterré avec beau service.	193
Bretons & Bourguignons escarmouchent Paris.	52	Calabriens & Bourguignons tous nuds en nombre de 24. vendus au butin, quatre pour un escu. 66. qui reuient à six deniers Paris par homme.	66
Bretons en grand nombre prennent les villes de Caen & de Bayeux contre le Roy.	119	Capdet Remonnet Capitaine Gascon pendu contre la foy promise et vengeance faite de sa mort par le Roy.	309
Bretons chassez de Bayeux.	134	Canons & grand quantité de pouldres faites à Paris.	164
Butin fort grand gaigné sur les Bourguignons.	37.	Cardinal d'Angers pris & mené prisonnier à Monbason, ses biens saisis en la main du Roy, & distribuez à son plaisir.	148. et 149
de plus de deux cens mille escus d'or.	ibid.	Cardinal d'Yorth accompagnant le Legat de Rome contre Henry de Lancastre Roy d'Angleterre.	5
Butins tres-grands & riches conquis par les gens du Roy en la Duché de Bourgongne, Contez de Charolois, et Masconois.	166	Casin Cholet sergent, traicté comme il meritoit	ẽ
<b>C</b>			
Caen & autres villes de Normandie reduites en l'obeyssance du Duc de Berry.	82		
Cadet d'Albret decapité			

## Table des Matieres.

dans un ortombereau, par  
le bourreau de Paris. 49

Cent mille hommes de  
cheual & leurs cheuaux  
deuant Paris, fournis et  
nourris de biens long temps  
par ceux de Paris mesme.  
77. sans rien encherir. *ibid.*

Cerfs, biches et grues,  
tant qu'on en peut trouuer  
dans Paris, pris et portez  
à Amboise. 142

Chandelles ardentes aux  
fenestres, & chiens en-  
fermez de nuict sur peine  
de la hart. 31

Chaleurs excessiues, non  
ueües telles de vie d'hom-  
me. 197

Chancelier, Admiral,  
Mareschal, premier Presi-  
dent, Preuost de Paris, &  
autres desapointez par le  
Roy à sa venue à la Cou-  
ronne. 16

Chancelier de France,  
& le general des finances  
detenus en arrest à Molins  
par le Duc de Bourbon. 21

Changemens d'offices  
establis par le Roy estant à  
Orleans. 89

Choses remarquables  
sur la porte saint Denis à  
l'entree du Roy. 15. 16. &  
par la ville. *ibid.* et 17

Charles 7. mourut au  
Chasteau de Meun sus  
Yeure de maladie incurra-  
ble le 22. Juillet 1461. 10  
Charles de Meleun est  
decapité au chasteau de Lo-  
ches. 133

Charles est espouse pour  
Duc par ceux de Roüen,  
et luy donnent l'anneau.  
91

Charles 7. amené mort  
en l'Eglise nostre Dame des  
Champs, sa pompe fune-  
bre, accôpagnée de grands  
dueils et plusieurs. 12. 13.  
14

Charles de Meleun,  
fait grand Maistre d'hostel  
du Roy, auparavant, estoit  
son Lientenant. 49

Charlet le Tonnelier,  
criminel se coupe la langue

## Table des Matieres.

<i>pour ne rien confesser.</i>	145	<i>parce qu'il pleuvoit.</i>	60
<i>Charlotte fille naturel-</i>		<i>Comte d'Eureceux Lieute-</i>	
<i>le de Charles 7. femme du</i>		<i>nant de Roy à Paris.</i>	
<i>Seneschal de Normandie</i>		<i>Comte de Vuaruich</i>	
<i>surprise en adultere est tuee</i>		<i>Capitaine de Calais, fai-</i>	
<i>par son mary, avec son pail-</i>		<i>sant pour Richard Duc</i>	
<i>lard.</i>	255	<i>d'Yorth contre le Roy son</i>	
<i>Chartreux mis hors de</i>		<i>maistre.</i>	5
<i>leurs cellules et oratoires</i>		<i>Comté de Montfort re-</i>	
<i>par les gens de guerre.</i>	65	<i>baillee au Duc de Bretagne.</i>	
<i>Chaumont sur Loyre</i>			81
<i>mis à feu &amp; rasé.</i>	95	<i>Comté de Dunois bien</i>	
<i>Cinq dames presentees</i>		<i>guerdonné du Roy.</i>	75
<i>au Roy sous beau mystere</i>		<i>Comté de Dampmartin</i>	
<i>pres l'Eglise saint Ladre.</i>		<i>reçoit de grands dons du</i>	
	15	<i>Roy.</i>	75
<i>Cinq cens Bourguignons</i>		<i>Comté de saint Pol créé</i>	
<i>à Gransson pendus en la</i>		<i>Conestable de France: fait</i>	
<i>place de cinq cens Alle-</i>		<i>le serment sur la table de</i>	
<i>mands qui en furent ostez.</i>		<i>marbre.</i>	76
	251	<i>Comte de Vaudemont</i>	
<i>Clocher de sainte Ge-</i>		<i>prisonnier.</i>	195
<i>neufue à Paris bruslé de</i>		<i>Comte de Vuaruich</i>	
<i>foudre qui auoit duré neuf</i>		<i>tué en la bataille contre</i>	
<i>cents ans.</i>	335	<i>Edouart.</i>	168
<i>Comte de Sommerfet</i>		<i>Comte de Vuaruich</i>	
<i>Anglois, vient parler au</i>		<i>poursuit avec grosse armee</i>	
<i>Roy en la Bastille, le Roy</i>		<i>le Roy Edouart, dans l'An-</i>	
<i>le fait boire et luy donne</i>		<i>gleterre.</i>	159
<i>sa cape de velours noir,</i>		<i>Comte de Roussi &amp; son</i>	

## Table des Matieres.

armee se campe sans resistance en la Comté de Tonnerre, gaste & destruiet tout iusqu'à Joigny et Troyes.	188	nobles de s'armer pour empêcher l'entree aux Anglois.	99
Comte Dauphin d'Auvergne, fait des dommages irreparables en Bourgogne.	188	Commandement du Roy d'abbatre le pont sainte Maixance.	43
Comte d'Armignac tué en l'assault de Lestore par les gens du Roy.	191	Commandement de tenir un seau d'eau deuant chasque porte de maison.	27
Comté de Roussillon de-rechef mise és mains du Roy.	212	Condé mis en la main du Roy.	289
Comette apparüe à Paris.	68	Conduite et prudence d'Anthoine de Chabanes Comte de Dampmartin.	95
Comette chet sur Paris le 18. Novembre. 1465. & faisoit sembler toute la ville en feu. ibid. un homme voyant cette Comette en deuint fol de frayeur. ibid.		Confirmation faicte par le Roy des priuileges à eux donnez durant la guerre.	85
Comette tres-longue tourant merueilleusement veüe au Ciel le 23. Iuillet 1461. dont Paris sembloit tout en feu.	12	Conspiration de Guillaume de la Marche, dit le Sanglier d'Ardaine contre Louys de Bourbon Euesque de Liege. 324. sa grande cruauté.	ibid.
Commandement aux		Communication faite de 21. personnages pour reformer la iustice.	100
		Couronne ne peut estre	

## Table des Matieres.

<p><i>baillie ny desmembree par le Roy.</i> 65</p> <p><i>Coursier le plus beau de l'escurie du Roy enuoyé en present à Edoüart Roy d'Angleterre.</i> 211</p> <p><i>Cruauté des Bretons et Bourguignons en Normandie.</i> 134</p> <p><i>Cruauté inhumaine des Bourguignons contre ceux de la ville de Nesle.</i> 176</p> <p style="text-align: center; margin: 20px 0;"><b>D</b></p> <p><b>D</b> <i>Ebat fort grand arriué à Paris, entre les gens &amp; Officiers du Roy en sa chambre des Aydes à Paris, et vn des Bedeaux de l'Vniuersité.</i> 6</p> <p><i>Deliberation du Roy pour faire la guerre au Duc de Bourgongne et son fils le Comte de Charolois.</i> 104</p> <p><i>Deliuance de tous les prisonniers de Paris, par le Roy, le iour saint Denis.</i> 284</p> <p><i>Deliuance de monsieur</i></p>	<p><i>de Beauuen.</i> 192</p> <p><i>Defence fort ancienne de faire aucune assemblee dans Paris sans la licence du Roy.</i> 292</p> <p><i>Deffence à tous marchands de vendre aucuns draps de soye aux gens de guerre, ny camelots.</i> 201</p> <p><i>Defense de se baigner en la riuere de Seine.</i> 27</p> <p><i>Deux grandes clarteZ espouuentables descendent du Ciel.</i> 190</p> <p><i>Drapz de laine taxeZ à trente deux sols parisis l'aune aux gens de guerre seulement.</i> 211</p> <p><i>Desloyauté du Conestable.</i> 231</p> <p><i>Dessain du Roy sur la Comté d'Armignac.</i> 150</p> <p><i>Dinan ville de Liege prise par trahison, pillée &amp; saccagee.</i> 103</p> <p><i>Dix mille escus donnez au Seigneur qui pris prisonnier le Prince d'Orenge.</i> 225</p> <p><i>Dole battue d'artillerie</i></p>
--	---



## Table des Matières.

<p> <i>Et prise d'assaut.</i> 304  <i>Domaine du Roy pour la</i>  <i>pluspart aliené à son trespas</i>  <i>338</i>  <i>Dons du Roy à l'Eglise</i>  <i>de la victoire pres Senlis.</i>  <i>295</i>  <i>Douze grosses bombar-</i>  <i>des faites à Paris, Orleans,</i>  <i>Tours, &amp; Amiens.</i> 285  <i>Duché de Normandie</i>  <i>donné par le Roy à son fre-</i>  <i>re Charles au lieu de Berry.</i>  <i>74</i>  <i>Duc d'Yorth vient af-</i>  <i>saillir le Roy Henry de</i>  <i>Lancastre en son parc, en</i>  <i>main armée &amp; le prend</i>  <i>prisonnier.</i> 5  <i>Duc de Bourgogne n'en</i>  <i>pouvant plus, pratique hô-</i>  <i>mes pour empoisonner le</i>  <i>Roy.</i> 198  <i>Duc de Bourgogne fau-</i>  <i>se ordinairement sa foy du-</i>  <i>rant les treues.</i> 208  <i>Duc de Bourgogne mis</i>  <i>à sa croix de par Dieu par</i>  <i>l'Empereur.</i> 224  <i>Duc de Calabre meurt</i> </p>	<p> <i>de peste à Nancy en Lor-</i>  <i>raine.</i> 195  <i>Duc d'Alençon pris pri-</i>  <i>sonnier par Tristan l'Ermi-</i>  <i>te Preuost des Mareschaux</i>  <i>191</i>  <i>Duc de Calabre bien re-</i>  <i>compensé du Roy.</i> 75  <i>Duc de Bourbon peu re-</i>  <i>compensé.</i> 75  <i>Duc de Bretagne à son</i>  <i>appointment avec le Roy.</i>  <i>81</i>  <i>Duc de Berry fait homa-</i>  <i>ge au Roy de la Duché de</i>  <i>Normandie, au bois de</i>  <i>Vinciennes.</i> 84  <i>Duc de Guienne &amp; le</i>  <i>Roy son frere mis en bonne</i>  <i>paix et amitié.</i> 149. la  <i>ioye qui en fut faite.</i> <i>ibid.</i>  <i>Duc de Clairance frere</i>  <i>d'Edouart Roy d'Angle-</i>  <i>terre executé d'un mer-</i>  <i>veilleux &amp; inusité supplice.</i>  <i>285. 286</i>  <i>Duc d'Albanie frere du</i>  <i>Roy d'Ecosse vient à refu-</i>  <i>ge au Roy.</i> 306  <i>Duc de Bourgogne</i> </p>
---	--

## Table des Matieres.

meurt à Bruges : & inhumé aux chartreux de Dijon 108.

Duc d'Alençon criminel de leZe Maïesté condamné à mort en la ville de Vendosme. 120. sauf le plaisir du Roy : il est prisonnier à Loches, deliuré & pardonné. ibid.

Duc d'Alençon faulx se foy au Roy. 120

Duc d'Yorsh paye sa trahison, est tué & ses gens par le Duc de Sommerset cousin du Roy d'Angleterre. 9. sa teste mise au bout d'une lance, & autour d'icelle vne couronne de feurre par moquerie. 10

Duc de Berry frere du Roy mené secrettement en Bretaigne par les Ambassadeurs. 21

Duc de Bourbon fait guerre au Roy, prend toutes ses finances, fait pendre le Seigneur de Crussel, mignon du Roy. 21

Duc de Bretagne renonce à toutes alliances, & seclez. 231

Duc de Nemours mené prisonnier à Vienne en Daulphiné. 252. Sa femme accouche d'enfant & meurt. ibid. mené de Vienne à Pierre assise à Lyon. ibid.

Duc de Milan tué par un gentilhomme dans la grande Eglise de Milan : vengeance incroyable sur le meurtrier. 263. 264.

Duc de Bourgongne trouué mort tout nud apres la bataille perduë deuant Nancy. 269. 270

Duc de Bourgongne porte la iartiere & croix rouge d'Angleterre. 153. se declare ennemy capital du Roy de France. ibid.

Duc de Bourgongne assié en son parc par les gens du Roy. 166. est reduit en extresme misere, sans latreue. ibid.

Duc de Calabre quitte

## Table des Matieres.

sa femme fille du Roy pour  
esposer la fille du Duc de  
Bourgongne, & tres-in-  
grat se rend ennemy du Roy.

173

Duc de Bourgongne  
rompt la treue entre luy &  
le Roy.

174

Duc de Bourgongne en-  
tre à cheual en l'Eglise de  
Nesle dans le sang des  
meurtris, & sabouffonne-  
rie.

176

Duc de Bretagne plus  
craint par le Roy pour ses  
rufes que le Duc de Bour-  
gongne par sa cruauté.

186

Duché de Bourgongne  
est mis en la main du Roy  
apres la mort du Duc de-  
uant Nanci.

271

Duché de Guerles assie-  
gé par le Duc de Bourgon-  
gne.

196

## E

**E**doüard Roy d'Angle-  
terre meurt d'Apople-

xie. 333. autres, de trop  
boire.

ibid.

Edoüart Roi d'Angle-  
terre somme le Roi de lui  
rendre les Duchez de  
Guienne & de Norman-  
die.

211

Edoüart rentré en An-  
gleterre aidé du Duc de  
Bourgongne avec puissante  
armee, occupe la couronne  
par trahison.

168

Edoüart Roi d'Angle-  
terre s'enfuit vers le Duc  
de Bourgongne son beau-  
frere.

161

Eglise nostre Dame de  
Cléry pres Orleans presques  
toute bruslee par mesgarde.

174

Eglises & maisons brus-  
lees en la ville de Dinan par  
les Bourguignons.

103

Empereur vient à Mets  
pour penser mettre le Duc  
de Bourgongne, mais en  
vain.

197

Emprunts tres-grands  
faits sur Paris, pour le re-  
couurement d'Arras &  
autres

# Table des Matieres.

autres.	272	onzains.	246
Entreprise faite sur la personne du Roi.	82	Escus ayans un croissant au lieu de la couronne, etc.	247
Eudementieres ville d'Alençon mise és mains du Roi.	127	Estoille accompagnant le Roy.	119
Enuoy des quatre ordres de Paris au Duc de Berry.	53	Etablissement de la fe- ste, touchant l'ordre du Roy nouvellement institué.	163
Epitaphe honteux ap- posé par escrit sur le corps mort de l'Euesque de Paris, & pourquoy 172. &	173	Estienne Cheualier, Thre- sorier des finances du Roi Charles 7. vn des execu- teurs du testament dudit Roi.	11
Epitaphes & escrits dif- famatoires contre le Roi apposez à saint Innocent, & hostel de ville.	167	Eu rendu aux Bourgui- gnons.	185
Eschange du Chastel de Blancaffort en Gascongne fait par le Roy.	95	Euesque de Constances fait prisonnier en la Con- ciergerie de Paris: tous ses biens temporels mis en la main du Roi.	311
Esclair merueilleux & tonnerre effroyable.	119	Eureux baillé & livré aux Bretons.	82
Escus mis à trente sols, trois deniers tournois.	202		
Escus d'or du Roi va- lants vings et quatre sols parisis, trois tournois mis au prix de trente cinq			

## F

**F** Amine extresme dans  
Nancy pour le siege.  
265

## Table des Matieres.

*Faulse accusation punie.*  
286.287

*Femmes et filles de Dinan contraintes apres le sac de leur ville de s'abandonner pour gagner leur vie.* 103

*Fertilité & tres-grande abondance du Royaume de France.* 2

*Feu mis par cas de fortune aux poudrès à canon sur la porte du Temple.* 60

*Fille aisnee du Roy mariée au Seigneur de Beaujeu.* 198

*Fille naturelle du Roy fiancée au bastard de Bourbon.* 86

*Fouldre terrible en l'Eglise de Fescamp en Normandie ou les cloches furent toutes fenduës & mises en masse.* 9

*Francs Archers tous cassez en France, & les Suisses mis en leur lieu.* 313

*François prisonniers en Angleterre tous deliurez & renuoyez libres en France.* 161

*François de Frâce, Duc de Berry, fils du Roi meurt au chasteau d'Amboise.* 195

G

*Gauvain Manniel decapité au pôt de l'Arche: sa teste au bout d'une lance: son corps jetté en la riuere.* 26

*Gens de guerre du Duc de Bourgongne somment les Prelats & populaire de Beauuais à se rendre.* 80

*Gens du Roy enleuent tout le bled de Bourgongne et Picardie, bestail, prisonniers &c. & le tout amené à Amiens & Beauuais.* 216

*Gesors demande secours au Roy.* 72

*Gouuernemēt de Champagne donné à monsieur de Chastillon.* 105

*Gouuernement de Normandie donné au Comte de saint Pol, au parauant ennemy du Roy.* 105



## Table des Matieres.

Grandes desconfitures faites sur les Flamans &c/	païs du Roi, sont attrapez & chastiez.	178
Picards par les gens du Roi.	Habitans de saint Cloud rendent le pont aux Bour- guignons par composition.	
166		
Grands blancs mis à onze deniers tournois.	202	34
Grand Conseil tenu en l'hostel de ville à Paris, pour se resoudre des An- glois.	35	Henri de Lancastre fait prisonnier par le Comte Uaruuich.
Grande iustice faite l'an 1460. à Paris, sur plusieurs larrons, sacrileges, pipeurs & crocheteurs.	3	Henri de Liures presente les clefs de la porte saint Denis au Roy.
Grands Princes & Sei- gneurs tuez en la proditoi- re prise de Henry de Lan- castre Roy d'Angleterre.	4	15
5		Henri Cousin executeur de la haute Iustice à Paris l'an 1460. en la nouvelle execution de supplice nou- veau de Perette Mauger.
Guerre tres-grande en- tre les Liegeois & le Duc de Bourgogne.	102	4
Guillaume de Corbie fait premier President de Dau- phiné par le Roi.	18	Heraux enuoiez à Paris par le Duc de Berri aux ha- bitans, à l'Vniuersité, à l'E- glise, & à Messieurs de la Cour.
		53
		Histoire merueilleuse d'un franc archer de Meu- don.
		214
		Homage de la princi- pauté d'Orange au Roi.
		225
Habitans d'Auxerre pensans picorer les		Honteuse fuite du Duc i ij

## Table des Matieres.

de Bourgongne deuant la ville de Tours pour tra-  
NuZ. 227 hison. 189

Hontense fuite & perte Jean Hardi entreprend  
du Duc de Bourgongne de d'empoisonner le Roi. 199.

uant Beauuais. 184 200. son proceZ & execu-  
tion. 201. 203. 204

Hollande & Zelande Jean Marceau se pend,  
presques noiez. 145 est porté au gibet de Paris.

Huict entrees de parc ou 25

Henri de Lancastre Roi Jean Petit coupe la gorge  
d'Angleterre fut trahi par à sa femme. 25

huict Barons qui gardoient Jean de Bourges & son  
chacun son entree. 3 compagnon pour s'estre re-  
tirez du Roi, noiez dans la

Huie, ville au Liege gai- Seine, par sentence du Pre-  
gnee apres long siege. 116 nost des Mareschaux.

### I

44  
I Jacques Fournier Con- Jeanne du Bois, s'en va  
seiller du Roi se precipi- à ses plaisirs laissant son  
te d'une fenestre. 100 mari, qui la rameine a-  
vec lui & lui pardonne.

Jacques d'Armignac 19

Duc de Nemours, Comte Jeanne de France femme  
de la Marche descapité es de Jean, Duc de Bourbon-  
halles de Paris. 279. 280 nois & d'Auvergne meurt

Jean Bon natif du pais à Molins, & y gist, en l'E-  
de Galles, conspire d'em- glise de nostre Dame.

poisonner monsieur le Dau- 320

phin, il a les yeux creueZ Images de pierre de  
pour supplice. 263 saint Louis & Charle-

Iean Deimer estartelé en

## Table des Matieres.

*magne, changees en la sale receleuse à Paris, d'estre en-*  
*du Palais. 265 fouie en terre toute viue. 3*

*Imposition d'un escu*  
*sur chasque piece de vin.*

L

249

*Imposition foraine ostee*  
*à ceux de Paris. 20*

*Impositions ostees sur Pa-*  
*ris, exceptées denrees de*  
*six fermes, &c. 45*

*Impudente subscription*  
*de lettres. 67*

*Ingratitude tres-grande*  
*du Cardinal d'Angers en-*  
*uers le Roi. 146*

*Iustices, maux & vio-*  
*lences faites par le Roi.*  
*337. pource son peuple pres-*  
*ques mis à bas. ibid. pres-*  
*que au desespoir à son tres-*  
*pas. ibid.*

*Insolences estranges des*  
*assiegeZ dans Arras contre*  
*le Roi & son armee.*

273

*Ioustes faites à Paris de-*  
*uant les Tournelles. 130*

*Jugement estrange en*  
*l'an 1460. donné contre*  
*une femme larronnesse &*

**L** *Arrons fouïetteZ, (e-*  
*stans ieunes) publique-*  
*ment au cul de la charette*  
*l'an 1460. 3*

*Laurens de Mory gen-*  
*tilhomme, pour sa trahison*  
*condamné d'estre escartelé*  
*aux halles de Paris, mais fut*  
*pendu seulement. 41*

*Legat de Rome vient en*  
*Angleterre. 4*

*Legat enuoyé de Rome*  
*esmeut le peuple à sedition*  
*contre son Roy legitime*  
*Henry de Lancastre et de*  
*la Roynie sa femme. 4*

*Legat du Pape, nommé*  
*le Cardinal saint Pierre*  
*ad Vincula, enuoyé en*  
*France, receut fort honora-*  
*blement. 311*

*L'Estore bruslee, &*  
*renuersee dans les fosseZ.*

192

*Liberté grande donnee*  
*ï ij*

## Table des Matieres.

par le Roy en tout le pays de Normandie aux Anglois *et* Anglischés de pouuoir demeurer *et* trafiquer audit pays sans sauf conduit. 10

Lifreloufres Allemands *et* Calabrois enragez de faim courent aux viures. 76

Leheac Lieutenant du Roy à Paris. 104

Longueuille, fay, *et* plusieurs lieux *et* villages bruslez par les Bourguignons au Baillage de Caux. 185

Loüanges de Charles 7.

11

Loup enuoyé en présent par le Roy, au Roy d'Angleterre. 211

Louys XI. se fait frere *et* compagnon de la grand Confrairie aux Bourgeois de Paris en l'Eglise de la Magdelaine, le 8. de Sept. 1465. 63

Louys Sorbier, traistre à son Roi *et* les Bretons dās

Ponthoise. 66. *et* 67

Louys onziésme, Daulphin, apres la mort de son pere Charles 7. fit plusieurs officiers en la chambre des Comptes. 11

Louys onziésme fils de Charles septiésme, duquel est faite la presente histoire. 2

Louys de Luxembourg Conestable de France fait prisonnier: mené en la Bastille: son procez fait. 233. 234. 237. 238. 239. *et* 240.

*M*

**M**achination des Anglois pour venir rauager le France. 153

Marchans François sur les terres du Duc de Bourgogne perdent tous leurs biens qui leur furent saisis. 156

Marguerite de Bourbon Comtesse de Bresse meurt ethique. 333

## Table des Matieres.

<i>Maladie, fiebure, et</i>	<i>de Paris. 3. son entrefuite</i>
<i>rage de teste par tout le pais</i>	<i>avec Montfaulcon. ibid.</i>
<i>• qui en fit mourir grand nō-</i>	<i>Mort du Roy Louys</i>
<i>bre. 320. 321</i>	<i>XI. à Montils lez Tours.</i>
<i>Mariage traicté de mō-</i>	<i>337. gist à nostre Dame de</i>
<i>sieur le Dauphin avec la fil-</i>	<i>Clery, par son ordonnance.</i>
<i>le du Duc d'Autriche. 328</i>	<i>ibid.</i>
<i>Menaces des Bourgui-</i>	<i>Mort du Comte d'Eu.</i>
<i>gnons à ceux de Paris. 32</i>	<i>170</i>
<i>Merueilles aduenues au</i>	<i>Mort accidentelle de</i>
<i>Royaume d'Angleterre,</i>	<i>Louys de Tillieres, Notaire</i>
<i>l'an 1460. 4</i>	<i>et. Secretaire du Roy. 27</i>
<i>Meschanceté d'un ser-</i>	<i>Mule sauue son mai-</i>
<i>gent de Paris, et des maux</i>	<i>stre. 65</i>
<i>qu'il fit. 33</i>	
<i>Montdidier reduit à</i>	<b>N</b>
<i>l'obeyssance du Roy. 165</i>	
<i>Montdidier donné à</i>	<b>N</b> <i>Ancy reuiens en l'o-</i>
<i>monsieur de Charolois en</i>	<i>beyssance de son Duc</i>
<i>butin &amp; heritage perpetuel</i>	<i>et. Prince, &amp; les Bour-</i>
<i>75. &amp; autres choses. ibid.</i>	<i>guignons chassez bagues</i>
<i>Molins en Gibers au</i>	<i>saules. 259</i>
<i>pays de Niurnois, pris par</i>	<i>Nauires du Duc de</i>
<i>rusé par les Bourguignons.</i>	<i>Bourgongne assiegeant la</i>
<i>211</i>	<i>ville de NuZ rompuës et.</i>
<i>Monstres faites à Pa-</i>	<i>mises en pieces dans le Rhin</i>
<i>ris, des officiers, bourgeois,</i>	<i>&amp; environ sept mille Bour-</i>
<i>manans &amp; habitans d'i-</i>	<i>guignons tuez en icelles &amp;</i>
<i>celle ville. 204</i>	<i>noyez. 215</i>
<i>Montigny ancien gibet</i>	<i>Nesle ville prise par le</i>

## Table des Matieres.

<i>Duc de Bourgogne.</i>	175	<i>de Charles son frere.</i>	92
<i>Nesle mis a feu &amp; rasé.</i>	177	<i>Office d'Admiral donné</i>	
<i>Neuf Chastel de Nicourt belle ville de guerre et grande, bruslee par les Bourguignons.</i>	185	<i>au bastard de Bourbon.</i>	99
<i>Noms de quatre bombardes du Roy, à scavoir, Londres: Brabant: Bougen Bresse: &amp; saint Omer.</i>	219	<i>Ordonnances tres-belles pour la fortification de Paris.</i>	179
<i>Nopces de monsieur le Dauphin &amp; de madame Marguerite de Flandres.</i>	335	<i>Ordonnance du Roy en faueur du Duc de Bourgogne.</i>	141. & 142
<i>en la ville d'Amboise.</i>	ibid.	<i>Ordonnances tres-belles faites en la maison de ville de Paris par le commandement du Roy pour la defense &amp; tuition de ladite ville.</i>	22
<i>Notable procession à Paris.</i>	219	<i>Ordonnance à tous habitans d'auoir armes.</i>	28
<i>d'enuiron cent mille personnes.</i>	ibid.	<i>Ordre du Roy nouuellement mis et créé est enuoyé par le Roy en present au Duc de Bretagne pour le porter, &amp;c.</i>	152
<i>Noyon resiste vaillamment &amp; enuoye au loin les Bourguignons.</i>	186	<i>Ordre tenu au sacre de Louys XI.</i>	14. 15
<i>Nuz ville d'Allemagne assiegee par le Duc de Bourgogne.</i>	207		

O

**O**fficiers en Normandie executez, pour les questions du Roy et.

P

**P**ain de deux deniers à Beaunais vaut trois sols

# Table des Matieres.

<i>sols parisis en l'armee des</i>	<i>stre Dame de Haulx.</i>	139
<i>Bourguignons assaillans.</i>	<i>Pelerinage du Roy, à</i>	
179	<i>Sainct Michel.</i>	158
<i>Pain de douleur &amp; eau</i>	<i>Pelerinage du Roy à S.</i>	
<i>de tristesse ordonnez à</i>	<i>Claude &amp; avec luy bien six</i>	
<i>Thomas Louecte Religieux</i>	<i>mille combatans.</i>	319
<i>pour le meurtre par luy</i>	<i>Perone prise &amp; le Comte</i>	
<i>commis.</i>	<i>de Neuers qui estoit dedans.</i>	
110. & 111		
<i>Pardon fait au Conesta-</i>		79
<i>ble par le Roy.</i>	<i>Peronne donné à mon-</i>	
207	<i>sieur de Charolois en butin</i>	
<i>Parpignan mis en la main</i>	<i>perpetuel &amp; heritage.</i>	75
<i>du Roy.</i>	<i>Permission à tous Anglois</i>	
218	<i>de traffiquer librement en</i>	
<i>Parpignan abandonné à</i>	<i>France sauf au Roy Edou-</i>	
<i>Philippe Monsieur de Sa-</i>	<i>art de la Marche, ses alliez</i>	
<i>uoye.</i>	<i>&amp; complices.</i>	160
192	<i>Permission du Roy à tou-</i>	
<i>Parpignan pris par le Roy</i>	<i>tes gens de quelque nation</i>	
<i>d'Arragon: non le chasteau.</i>	<i>qu'ils fussent à venir demeu-</i>	
193	<i>rer à Paris pour le repeu-</i>	
<i>Paix entre le Roy &amp; les</i>	<i>pler.</i>	109
<i>Flamens dont fut chanté à</i>	<i>Pestilence tres grande à</i>	
<i>Tours te Deum laudamus.</i>	<i>Paris &amp; enuiron.</i>	108
328	<i>Petit Picart Capitaine</i>	
<i>Paix entre le Roy &amp; les</i>	<i>pour le Roy à Nesle, avec de</i>	
<i>Princes, publiee en Cour de</i>	<i>ses gens pendu par comman-</i>	
<i>Parlement.</i>	<i>dement du Duc de Bour-</i>	
83	<i>gongne.</i>	176
<i>Pelerinage du Roy à pied</i>	<i>Picards ingrats se moc-</i>	
<i>à Sainct Denys, &amp; en che-</i>		
<i>min il donne grace à trois</i>		
<i>ribaux voleurs.</i>		
116		
<i>Pelerinage du Roy à No-</i>		

## Table des Matieres.

quent du Roy.	77	Presens tres-grands faits	
Picards & Flamens ac-		par le Roy au Comte de	
cusent le Roy à tort d'auoir		Vuaruich.	108
voulu faire prendre prison-		Prince d'Orenge prison-	
nier le Duc de Charolois.	20	nier du Roy.	225
Pierre fort grosse tombe		Princes de Galles tué en	
sur la manche du Roy sor-		la Bataille contre Edouart.	
tant du chasteau d'Alen-			168
çon.	196	Prisonniers deliurez à la	
Pirre de Gueroult natif		venue de madame la Daul-	
de Lesignen escartelé aux		phine.	334
halles pour trahison.	46	Prisonniers detenus és	
Pierre de Moruillier des-		prisons de Paris, deliurez	
appoincté de son office de		par le Prince de Piedmont.	
Chancelier.	87		133
Pierre Puy desapoincté		Procession Generale de	
de son office de maistre des		tous les Estats de Paris va à	
Requestes de l'hostel du		Sainct Denys.	333
Roy.	87	Procession Generale &	
Prebstres, religieuses, an-		notable de Paris.	25
ciens hommes, femmes, &		Procession Generale à	
enfants tueZ cruellement en		Paris en l'Eglise Saincte Ca-	
la ville de Liege.	140	therine du Val des Escoliers	
Present fait au Roy d'An-			31
gleterre par le Roy.	229	Processions commandee	
Present du Duc du Maine		par le Roy durât trois iours	
au Duc de Berry.	60	pour la deliurance de Hen-	
Presens tres-beaux du		ry de l'Anclastre Roy d'An-	
Roy faits aux Ambassa-		gleterre & son restablisse-	
deurs d'Angleterre.	310	ment. 161. le mesme par	



## Table des Matieres.

<p>toutes les villes du Royau- me. 162</p> <p>Promesse de fidelité &amp; service fait au Roy par le Duc de Bourgogne. 137</p> <p>Promesse solemnelle faite au Roy par les Ducs de Ne- mours, de Bourbon, et Si- res d'Armignac &amp; d'Al- bret, de ne porter iamais les armes contre luy. 30</p> <p>Pont des Arhes assiégué par le Roy. 92</p> <p>Pont Sainte-Maixance rendu par composition &amp; argent. 28</p> <p>Pont des Bourguignons au port à l'Anglois coupé. 59</p> <p>Ponts de Chamois, de Beaumont Sur-Oise, &amp; autres, abbatu par le com- mandement du Roy. 25</p> <p>Portes S. Martin, Môt- martre, le Temple, S. Ger- main Desprez, S. Victor, et S. Michel furent toutes murées. 26</p> <p>Pourparlé du Roy &amp; d'Edouart Roy d'Angleter- re pres de Piquigny. 227</p> <p>Pourparlé du Roy avec le Conestable, un pont entre deux fait expres. 206</p> <p>Punition exemplaire d'un Normant. 63</p> <p>Punition d'un Normand qui ayant eu plusieurs en- fans de sa fille propre, les tuoit aussi tost qu'ils estoient nés. 105</p> <p>Punition d'un de l'hostel du Roy qui auoit falsifié son signet &amp; celui d'un des Se- cretaires. 277. 278</p> <p>Puissance de Paris inesti- mable. 76</p>	<p>Q</p>
---	----------

**Q** Vatrevingts nauires  
de Flandres pris pour  
le Roy, par Coulon, &c. 309  
le grand Butin pris sur eux  
ibid.

Questions & noises tres  
grandes en Angleterre. 168

## R

**R** Eception du Roy de  
Portugal à Paris. 260

o ij

## Table des Matieres.

Recompense faite au Duc de Lorraine par les Suisses deuant Morat.	257	le Roy d'Angleterre Edoüard.	228
Regne de Charles septiesme.	2	Richard Duc d'Yorth fait guerre à son Roy pour le Royaume où il pretend droit premier.	5
Regnault de Veloux Gentilhomme de Poictou escartelé aux halles de Paris.	232	Riuieres de Marne & Seine fort grandes & leurs dommages en diuers lieux.	8.
Religieux faux accusateur, puny & noyé par sentence.	109	notamment à Claye. <i>ibid.</i>	
Religieux d'entre les Moines noirs en Auvergne trouué masle & femelle, se seruant des deux, & gros d'enfant.	298	Riuieres de Seine, Marne, Yonne, & autres si tres-fort geleees que tous charrois, gens & bestes passoient par dessus la glace.	314.
Remerciments du Roy à ceux de Paris pour leur loyauté.	30	ponts rompus par le degel d'icelles.	<i>ibid.</i>
Remuemens merueilleux par les Bourguignons és prises de Dampmartin, Nantouillet, Villemonble & autres.	28. et 29	Robert Destouteuille remis en son office de Preuost.	84
Retraicte du Roy au chasteau de Monlehery, cause de grand perte & accident.	39	Robert Destouteuille, Cheualier Preuost de Paris, prisonnier en la Bastille, & depuis au Louure pour iniustices & abus dont on l'accusoit.	8
Reuerence par trois fois sur un genoüil au Roy par		Rouën repousse vaillamment le Duc de Bourgongne & le met à honteuse fuite.	

# Table des Matieres.

186

Rouën pris par le Duc de Bourbon.

74

Roy de Cecille, le Duc du Maine, et 20. ou 30. mille combatâs accompagnans le Roy à Angers & pont de See.

23

Roy de Portugal vient à la ville de Tours demander secours au Roy : duquel il est fort honorablement receu.

260

Roy en diuerses fois pour un iour en grand danger de sa personne contre les Bourguignons à Monlehery. 38. ou se trouuerent trois mille six cents hommes morts. ibid.

Roy d'Escoffe & d'Angleterre ont grand guerre ensemble.

329

Royne d'Angleterre arriue à Paris, avec tous les siens, est receuë fort honorablement par le commandement du Roy.

162

Royne accouche à Nogent le Roy, d'une fille.

19

Royne d'Angleterre, prisonniere, racheptee de sa rançon de cinquante mille escus d'or.

254

Royne de France accouche d'un beau fils, appelé Monsieur de Berry, qui vescu peu.

188

Roye donné à Monsieur de Charolois en butin perpetuel & hereditaire.

75

Roye & Mondidier pris sur le Roy par le Bastard de Bourgogne.

25

Roye, reduicte à l'obeissance du Roy.

165

Roye rendu au Duc de Bourgogne.

177

Rudeſſes faictes tres-grandes en la maison du Prenoſt de Paris par Jean Aduim, durât son emprisonnement.

8

S

Sage responce du Roy au Procureur du Chastellet.

63. & 64

Sage-Femmes d'aujour d'huy appelée autresfois, & iij

## Table des Matieres.

<i>ventrieres.</i>	4	<i>trahison.</i>	222
<i>SalleZart &amp; son equipage.</i>		<i>Seditieux puny &amp; pendu</i>	
79		<i>pres le pont de Charenton.</i>	
<i>SalleZart capitaine à Beau-</i>	78	<i>Seigneurs accompagnans</i>	
<i>uais emporte une grande</i>		<i>le Roy faisant son entree à</i>	
<i>despouille des Bourguignös</i>		<i>Paris.</i>	15
<i>dans la ville assiegee.</i>	182	<i>Sept Bourguignons tueZ</i>	
<i>Sanglier enuoyé, en pre-</i>		<i>d'un seul coup, &amp; plusieurs</i>	
<i>sent, par le Roy, au Roy</i>		<i>blessez d'une tiree de Ser-</i>	
<i>d'Angleterre.</i>	211	<i>pentine.</i>	74
<i>Sainct Quentin rendu au</i>		<i>Sepulture honorable du</i>	
<i>Roy.</i>	230	<i>Duc de Bourgongne, à luy</i>	
<i>Sainct Valery, leZ le Cro-</i>		<i>donnee par le Duc de Lor-</i>	
<i>toy rendu aux Bourgui-</i>		<i>raine à Nancy.</i>	271
<i>gnons.</i>	184	<i>Sergens fustigeZ par les</i>	
<i>Sainct Valery paye six</i>		<i>carrefours de Paris &amp; ban-</i>	
<i>mille escus pour se deliurer</i>		<i>nis.</i>	106
<i>du siege.</i>	187	<i>Simon Courtois decapité à</i>	
<i>Sainct Quentin en Ver-</i>		<i>Tours.</i>	299
<i>mandois pris pour le Roy,</i>		<i>Siege deuant Sainct Mo-</i>	
<i>sans resistance.</i>	163	<i>rise, et sa reddition par</i>	
<i>Saincte Ampoule appor-</i>		<i>composition.</i>	27
<i>tee à Paris &amp; de la à Tours.</i>		<i>Siege mis deuant Rion en</i>	
335. & 336		<i>Auuergne par le Roy contre</i>	
<i>Sauetier d'Auxerre en-</i>		<i>le Comte d'Armignac, Duc</i>	
<i>uoyé pour Ambassadeur</i>		<i>de Nemours, de Bourbon &amp;</i>	
<i>aux gens du Roy, &amp; leur</i>		<i>autres.</i>	29
<i>refus de se rendre.</i>	165	<i>Six Chanoines &amp; le Doyen</i>	
<i>Scales herault d'Angleter-</i>		<i>de l'Eglise de Roüen, bannis</i>	
<i>re surpris, portant lettres de</i>			

## Table des Matieres.

de Normandie.	96	les deuant Tournay.	279
Six choses descouvrirent		Te Deum laudamus chan-	
le Duc de Bourgogne tout		té à Paris pour la paix et	
nud apres sa mort.	270	alliance entre le Roy et le	
Sommaton à ceux d'Au-		Duc de Bourgogne, &	
xerre de se rendre au Roy.		l'allegresse publique.	138
165		Terremouuant & trem-	
Soudaine maladie au Roy,		blant merueilleusement en	
au Plessis pres de Tours.	315	Auvergne.	299
& aussi tost apres à Touars.		Therouenne rudement as-	
ibid.		siegee par les Picards &	
Sternay general de Nor-		Flamens qui n'y eurent que	
mandie habillé en Cordelier		la honte & la fuite.	307.308
Observantin est pris &		Tonnerres, vents, pluyes	
conu au pont Sainct Pierre.		gastent tout au pays de Soif-	
90 est noyé en la riniere Du-		sons.	102
re avec son Augustin.	92	Trahisons estranges du Co-	
Subiects du Roy de quelle		nestable saint Paul contre	
qualité qu'ils fussent le re-		le Roy.	243. & 244
doubtoyent extremement.		Tremblement de terre, à	
338		Tours, Amboise, & autres	
		lieux en Touraine.	133
T		Trois cents escus d'or pro-	
<b>T</b> ables rondes mises par		mis aux denonciateurs des	
les ruës pour donner à		auteurs des libelles diffa-	
boire à tous venants.	113	matoires affichez contre S.	
Targes de 12. deniers, mis		Innocent & ailleurs.	169
à unze deniers.	202	Tromperies execrables des	
Te Deum laudamus chan-		Officiers de l'Euesque du	
té à Paris pour la vctoire		Mans.	9
du Roy sur le Duc de Guer-			

## Table des Matieres.

Treue marchande entre le Roy & le Duc de Bourgogne 235. pour le temps de neuf ans.	ibid.	par les gens du Duc de Bourgogne.	251
Treues d'un an entre le Roy & le Duc de Bourgogne.	167	Verges de moyse et d'Aron.	336
Treues entre le Roy & les Bretons & Bourguignons.	61	Vicomte de Villars en Poictou fait le Roy son heritier.	154
Treues, crieë et publieë à tousiours entre le Roy & les Princes.	75	Vin, pommes, choux & raues enuoyez au Duc de Berry par le Duc du Maine	60
Treues de 22. mois avec les Anglois. 99. tant par mer que par terre.		Vin de l'annee aux Bourguignons.	62
V		Vingt & deux mille sept cëts hommes Bourguignons deffaits deuant Morat.	257
Vaine & fole menace des Bretons & Bourguignons à ceux de Paris.	64	Ville de Liege bruslee & saccagee.	140
Vaisselle d'argent saisie par tout Paris, & pourquoy.	296	Ville & Chasteau de S. Amant Lalier prise d'assault.	24
Verdun, Monsauion & Semur en Lauxois pristant par assault que par composition, mis es mains du Roy.	294	Vsson en Auuergne donnë au bastard de Bourbon.	100
Verdun en Lorraine pris		Vuaruich est fait Gouverneur du Royaume d'Angleterre.	161
		Vuaruich-Comte portant l'espee nuë deuant le Roy qu'on menoit prisonnier à Londres.	5

F I N.









LES  
CHRONIQUES  
DV TRES-CHRESTIEN  
ET TRES-VICTORIEUX



LOYS DE VALOIS, FEV ROY

de France ( que Dieu absolue )

Vnziesme de ce Nom,

*AVEC QUES PLUSIEURS AVLTRES*

*aduentures aduenües tant en ce Royaulme de*

*France, comme es pays voisins, depuis*

*l'an mil quatre cens soixante, iusques*

*en l'an mil quatre cens quatre*

*vingts & trois inclusiuement.*



L'HONNEVR & loüange de Dieu  
nostre doulx Saulueur & Redempteur,  
& de la Benoitte, glorieuse Vierge &  
pucelle Marie, sans le moyen delquels  
nulles bonnes ceüures ou operations ne peüent  
estre conduictes. Et pource aussi que plusieurs Roys,  
Princes, Comtes, Barons, Prelats, nobles hom-  
mes, gens d'Eglise, & autre populace, se sont  
souuent delictes & delictent à ouyr & escouter

A

des histoires merueilleuses, & choses aduenües en diuers lieux, tant de ce Royaulme que d'autres Royaulmes Chrestiens. Au trentecinquiesme an de mon aage me delectay en lieu de passer temps & descheuer oyssiueté à escrire & faire memoire de plusieurs choses aduenües au Royaulme de France, & autres Royaulmes voisins, ainsi qu'il m'en est peu souuenir. Et mesmement depuis l'an mil quatre cens soixante, que regnoit a Roy de France Charles septiesme de ce nom, iusques au trespas du Roy Loys vnzieme de ce nom, fils dudit Roy Charles, qui fut le penultiesme iour du mois d'Aoust, l'an mil quatre cens quatre vingts & trois, combien que ie ne vueil ne n'entens point les choses cy apres escriptes estre appellees dictes ou nommees Chroniques, pource que à moy n'appartient, & que pour ce faire n'ay pas esté ordonné & ne m'a esté permis: Mais seulement pour donner aucun petit passe-temps aux lisans, regardans, ou escoutans icelles. En leur priant humblement excuser & supployer à mon ignorance, & adresser ce que y seroit mal mis, ou escript: car plusieurs desdites choses & merueilles sont aduenües en tant de diuersitez & façons estranges, que moult penible chose auroit esté à moy, ou aultre, de bien au vray & au long escrire la verité des choses aduenües durant ledit temps.

Et premierement, touchant le faict & vtilité de la terre durant ladicte annee mil quatre cens soixante. Au regard & en tant que touche le terroier & finaige du Royaulme de France, il y creut compectamment de blez, qui furent bons & de garde, & n'en fut point

vendu au plus chier temps de ladicte annee que vingt-quatre sols parisis le septier : mais il n'y creust que bien peu de fruit. Et au faict des vignes il y eut bien peu de vin, & par especial en l'Isle de Frâce, comme d'un muid de vin pour chascun arpent, mais il fut bien bon : & se vendit chier le vin creués bons terroüers d'entour Paris, comme de dix & vnze escus chascun muid.

En ce temps fut faicte iustice & grande execution audit lieu de Paris, de plusieurs pources & indigentes creatures, comme de larrons, sacrileges, pipeurs, & crocheteurs. Et pour lesdits cas plusieurs en furent batus au cul de la charrette pour leurs ieunes âges & premier meffait : Et les aultres pour leur mauuaise coustume & perseuerance furent pendus & estranglez au gibet de Paris, nommé Montigny, nouuelle creë & estably pour la grand vieillesse, ruyne & decadence du precedent & ancien gibet nommé Montfaulcon.

Audit temps fut fait mourir & enfouye toute viue audit lieu de Paris vne femme nommée Perrette Manger, pour occasion de ce que ladicte Perrette auoit fait & commis plusieurs larrecins, & en ce faisant par long temps continuë, & aussi fauourisé & recellé plusieurs larrons, qui aussi faisoient & commectoient plusieurs & diuers larrecins audit lieu de Paris, lesquels larrecins pour lesdits larrons vendoit & distribuoit, & l'argent que de ce elle recepuoit en bailloit & deliuroit ausdits larrons leur portion, & pour elle en retenoit son butin. Pour lesquels cas & aultres par elle confessez fut condamnée par sentence donnée du Preuost de Paris, nommé Messire Robert Destouteuille Cheualier, à

A ij

souffrir mort & estre enfouye toute viue deuant le gibet, & tous ses biens acquis & confisquees au Roy : de laquelle sentence & iugement elle appella formellement en la Cour de Parlement, pour reuerence duquel appel fut differé à executer. Et apres que par ladicte Court le procez d'icelle eut esté veu & visité, fut dit par Arrest d'icelle, & en confirmant ladicte sentence, que ladicte Perrette auoit mal appellé & l'amenderoit, & que ladicte sentence seroit executée : ce qui fut dit à icelle Perrette, laquelle declaira lors qu'elle estoit grosse, parquoy fut de rechief differé del' executer. Et fut faict visiter par ventrières & matrones, qui rapporterent à Iustice qu'ellen'estoit point grosse. Et incontinent ledit rapport fait fut enuoyee executer aux champs deuant ledit gibet, par Henry Cousin executeur de la haulte Iustice audit lieu de Paris.

### MERVEILLES ADVENUES AU *Royaume d'Angleterre en ladicte année.*



N ce temps passa la mer en Angleterre un Legat de Rome, Legat de par le Pape, qui illec prescha le peuple du pays. Et par especial en la ville de Londres, maistresse ville dudit Royaume, là où il fist plusieurs remonstrances aux habitans dudit lieu, & aultres d'environ, contre & au preiudice du Roy Henry d'Angleterre, lesquelles remonstrances le Cardinal d'Yorth qui accompaignoit ledit Legat apres ladicte

exposition par luy exposé en leur langage. Et tantost apres ladicte exposition faite, ledit peuple qui estoit assez de legiere creance se esmeut pour faire guerre allencôtre dudit Roy Henry de Lancastre & de la Roynne sa femme, fille du Roy René de Cecille & de Iherusalem, & du Prince de Galle leur fils. Et print ledit populaire pour leur Capitaine le Comte de Vvarvuich, qui estoit Capitaine de Calais, pour & au lieu de Richard Duc d'Yorth, qui vouloit & pretendoit a estre Roy dudit Royaulme, qui maintenoit à luy duyre & compecter ledit Royaulme d'Angleterre, côme prochain heritier de la lignee & du cousté du Roy Richard. Et peu de temps apres ledit Duc d'Yorth qui auoit apres luy grant nombre de populaire en armes, se misrent aux champs & vindrent en vn parc où estoit illec ledit Roy Henry avec plusieurs Ducs, Princes, & aultres Seigneurs, aussi tous en armes. Et auquel parc y auoit huit entrees, qui estoient gardees par huit Barons dudit Royaulme, qui tous estoient traistres audit Roy Henry. Lesquels huit Barons quant ils sceurent venir le Duc d'Yorth deuers ledit parc, le laisserent entrer en icelluy avec le Comte de Vvarvuich & aultres, qui vindrent tout droit où estoit ledit Roy Henry, lesquels ils prindrent & faisirent. Et incontinent ce fait, vindrent tuer plusieurs Princes & aultres grands Seigneurs de son sang qui estoient autour de luy. Et ces choses faictes ledit Comte de Vvarvuich print ledit Henry & l'amena tout droit en la ville de Londres, & portoit l'espee nue deuant ledit Henry comme son Conneftable. Et quant icelluy Roy Henry de Lanca-

estre fut audit lieu de Londres, il le mena tout droit deuant la Tour dudit Londres, dedans laquelle Tour estoient quatre Barons dudit pays pour ledit Henry. Aufquels ledit Henry & Vvarvuich parlerent par belles paroles, les tirerent hors de la Tour, apres ce qu'ils leur profinirent qu'ils ne auroient nul mal de leurs personnes, & qu'ils les asseuroient : lesquels sous vmbre de leursdictes promesses yssirent hors de ladicte Tour. Et ainsi qu'on menoit lesdits quatre Barons apres ledit Henry & Vvarvuich, plusieurs de ladicte ville de Londres s'esmeurent & vindrent tuer l'un desdits quatre Barons, nommé le seigneur Descalles, & luy baillerent plusieurs cops orbes. Et le landemain ils firent escarteller lesdits autres Barons deuant ladicte Tour de Londres, nonobstant lesdictes promesses ainsi à eux faictes. Et s'y fie qui voudra.

Audit temps aduint en la Cité de Paris vn grant debat entre les gens & Officiers du Roy en sa Chambre des Aides à Paris, & vn des bedeaux de l'Vniuersité d'icelle Ville, pour vn exploict fait par icelluy Bedeau à l'encontre de deux Conseillers de ladicte Chambre des Aydes, pour lequel exploict ledit Bedeau fut constitué prisonnier en la Conciergerie du Palais Royal audit lieu de Paris. Dont ceulx de ladicte Vniuersité furent moult desplaisans : & pour le rauoir firent cefations en ladicte Ville, de preschier, lire, & estudier. Et apres furent appointez, & fut tout restably & demourerent contens.

Audit temps aduint à Paris aussi, qu'un nommé Anthoine le Bastard de Bourgogne vint & entra en la-

dicté ville de Paris en habit mescongn, & n'y seiourna que vn iour & vne nuit & puis s'en retourna. Et quant il fut sceu qu'il estoit ainsi venu en ladicte ville, plusieurs Officiers du Roy & gens de façon d'icelle, furēt fort imaginatifs comment ne pourquoy il estoit ainsi venu que dit est. Et de ladicte venue en furent portees les nouvelles au Roy par aucuns qui en parlerent à la charge de ladicte Ville, qui n'y auoient aucune coulpe. Et pour ceste cause & a grant haste le Roy enuoya audit lieu de Paris son Marechal seigneur de Loheac, & Maistre Iehan Bureau Threforier de France, pour pourcoir & donner prouision audit donné à entendre. Et affin que le Roy n'eust aucune imagination que ceulx de ladicte ville de Paris eussent aucune coulpe ou charge à ladicte venue, luy fut enuoyé de par ladicte Ville vne Ambaxade, ou estoient Maistre Iehan [de Loliue Docteur en Theologie & Châcelier de l'Eglise de Paris, Nicolas de Louuiers, sire Iehan Clerebourg general maistre des Monnoyes, sire Iehan Luihier Cler de ladicte Ville, Iaques Rebours Procureur d'icelle, Iehan Volant Marchant, & aultres: tous lesquels le Roy receut benignement. Et apres leur propos fait seruant à leur excusation fut le Roy tres-content d'eulx, & leur fist bonne & gracieuse responce, & s'en retournerent ioyeusement à Paris dont ils estoient partis.

En ce temps Messire Robert Destouteuille Cheualier, qui estoit Preuost de Paris, fut mis & constitué prisonnier en la Bastille saint Anthoine à Paris. Et depuis au Louure par l'ordonnance desdits seigneurs de

Loheac, maistre Iehan Bureau, pour aucunes iniustices ou abus qu'on luy mettoit sus, qu'il faisoit en exerçant sondit office, dont de ce ne fust point attainct. Et lors par maistre Iehan Aduin Conseillier lay en la Court de Parlement, furent faits plusieurs exploicts en l'ostel dudit Destouteuille: comme de cercher boistes, cofres, & aultres lieux, pour sçauoir se on y trouueroit nulles lettres, & fist plusieurs rudesses audit hostel à Dame Ambroise de Lore femme dudit Destouteuille, qui estoit moult saige, noble & honneste Dame. Dieu de ses exploicts le vueille pugnir: car il le a bien defferuy.

En ladite annee furent les riuieres de Seine & Marne moult grandes, tellement que en vne nuit ladicte riuere de Marne creust & deuint si grande à l'enuiron de saint Mor des Fosse, comme de la haulteur d'vng homme, & fist plusieurs grands dommages en diuers lieux. Et entre les aultres dommages ladicte riuere vint si grande à vn villaige nommé Claye, & en vn hostel illec estant qui est à l'Euesque de Meaulx, qu'elle en emporta toute la massonnerie du deuant dudit hostel, ou il auoit deux belles tours nouuellement basties: dedas lesquelles y auoit de belles chambres bien natees, voires bien garnies de lits, tapisseries, & aultres choses qui tout en emporta ladicte riuere.

En ce temps aduint en Normandie que le corps de l'Eglise de Fescamp, par malle fortune & feu d'auenture qui vint de la mer de deuers les Marches de Cornoualle se bouta au clochier d'icelle Abbaye, qui fut tout brulé & ars, & furent les cloches d'icelle Abbaye  
toutes



toutes fonduës & mises en vne masse, qui fut moult grant pitié en ladiëte Abbaye.

Audit temps furent grandes nouuelles par tout le Royaulme de France & en aultres lieux, d'une ieune fille del'aage de dixhuiët ans, ou enuiron, qui estoit en la ville du Mans, laquelle fist plusieurs folies & grandes merueilles, & disoit que le diable la tourmentoit, & failloit en l'air, crioit & escumoit, & faisoit moult d'aultres merueilles, en abusant plusieurs personnes qui l'aloient voir: mais en fin on trouua que ce n'estoit que tout abus, & qu'elle estoit vne meschante folle, & faisoit lesdictes folies & diableries par lenonrrement, conduicte & moyen d'aucuns des officiers de l'Euesque dudit lieu du Mans, qui la maintenoient & en faisoient tout ce que bon leur sembloit, & que ausdits folies faire l'auoient ainsi duiëte.

Audit temps aduint de rechief audit Royaulme d'Angleterre apres que la desconfiture deuant dite ait esté faite par le Conte de Vvarvuich, que le Duc de Sômerfet cousin dudit Roy Henry d'Angleterre, accompagné de plusieurs aultres ieunes Seigneurs parens & heritiers des aultres Princes & Seigneurs qui estoient, & auoient esté tuez à la prise dudit Roy Henry de Lancastre, firent de grans amas de gens d'armes & vindrent tenir les champs à l'encôtre dudit Duc d'Yorth, & tant firent qu'ils le vindrent trouuer en vn champ luy & sa compaignie, qui furent tuez. Et audit champ nommé les plaines sainët Albons fut tué ledit Duc d'Yorth. Et apres qu'il eut esté tué luy coupperent la teste, laquelle ils mirent au bout d'une lance. Et au-

B

tour d'icelle teste luy mirent vne Couronne de feurre, en figure de Couronne Royale, en derision de ce qu'il se vouloit faire Roy dudit Royaulme. Et auecques luy moururent audit champ bien six vingts Barons, Cheualiers, Escuyers, & gens de nom dudit Royaulme, & grant nombre d'autres gens de guerre, que bien on estimoit de neuf à dix mil combatans.

Et le mecredy tiers iour de Feburier audit an mil quatre cens soixante, furent leuës & publices à Roüen & en diuers aultres de la Duché de Normendie és lieux publicques & à son de trompe, les lettres patentes du Roy. Par lesquelles il declairoit son plaisir estre tel, que par tout ledit pays de Normendie & les ports de mer d'icelluy, feussent laissez paisiblement descendre tous Anglois & Anglesches; de quelque estat qu'ils feussent, & en tel habit que bon leur sembleroit, tenans & adurans le party du Roy Henry d'Angleterre & de la Roïne sa femme, sans aucun sauf-conduit auoir de luy, & de les laisser conuerser par tout son Royaulme.

En l'an mil quatre cens soixante & vn au mois de Iuillet, aduint que le Roy Charles fut malade au Chasteau de Meum sus Yeure, d'une maladie qui luy fut incurable, dont & de laquelle maladie il ala de vie à trespas audit lieu de Meum, le mecredy vingt-deuxiesme iour dudit mois de Iuillet, feste de la Benoisie Magdaleine, entre vne & deux heures apres midy dudit iour, dont fut grant pitié & dommaige. Au Royaulme des Cieulx puisse estre l'ame de luy en bon repos: Car quant il viuoit c'estoit vng moult saige &

vaillant Seigneur, & qui laissa son Royaulme bien vny & en bonne iustice & tranquillité.

Et incontinant apres ladicte mort, & qu'elle fut manifestee, la pluspart des Officiers dudit lieu de Paris & plusieurs aultres du Royaulme s'en partirent & alerent au pays de Henault & de Picardie par deuers Monseigneur le Daulphin, qui illec estoit avec Monseigneur le Duc de Bourgongne. Lequel Monseigneur le Daulphin par le decès de son feu pere venoit à la Couronne, pour sçauoir de luy quel estoit son plaisir & comment ils se auroient à gouuerner sous luy, & pour estre de luy confermez en leurs Offices. Auquel lieu apres icelle mort fist plusieurs Officiers en sa Chambre des Comptes à Paris, & aultres. Et entre aultres y fist & crea Maistre Pierre L'orfeure seigneur Dermenonuille, & Nicolas de Louuiers, Conseilliers en ladicte Chambre, & Maistre Iehan Baillet Maistre des Requestes & Rapporteur en sa Chancellerie. Et y conferma en icelle Chambre Messire Symon Charles, qui aussi se fist porter audit pays en vne litiere, & les aultres Officiers requerans estre confermez furent renuoyez à Paris, pour illec a attendre la venue du Roy.

Et le vingt-quatriesme iour de Iuillet audit an soixante & vn, Maistre Ethienne Cheualier qui auoit esté Tresorier des finances dudit feu Roy Charles, & lequel il auoit nommé vng des executeurs de son testament, & aussi Maistre Dreux Bude Audiencier de la Chancellerie de France, se partirent de la ville de Paris pour aler au corps dudit deffunct audit lieu de

B ij

Meum : mais le seigneur d'Aigreuille Capitaine de Montargiis par le pourchas d'vng Gentilhôme nommé Vualte de Morpedon, furent arrestez audit lieu de Montargiis lesdis Cheualier & Bude, & illec furent vne espace de temps: Et iusques à ce que le Roy les enuoya faire deliurer, eulx & leurs biens, & depuis furent par luy entretenus en leurs Offices de Tresorier & Audiencier.

Et est assauoir que le ieudy vingt-troisiesme iour de Iuillet audit an soixante & vn, qui fut le landemain de ladiète mort enuiron heure de nuit, fut veüe au Ciel courir bien fort vne tres-longue comete qui iettoit en l'air grant resplendisseur & grande clarté, tellement qu'il sembloit que tout Paris feust en feu & en flambe, Dieul'en vueille bien preferuer.

Et le ieudy 6. iour d'Aoult quatre cens soixante & vng, le corps dudit deffunct arriua & fut amené reposer en l'Eglise de nostre Dame des Champs hors Paris, où il fut amené dudit lieu de Meum. Et le landemain fut alé querir audit lieu, & apporté à Paris en moult grande & belle conduicte, ordonnance & reuerence qui fut faicte audit corps, comme bien le valloit: C'est assauoir du Clergié, des nobles personnes, Officiers, Bourgois & populaire. Et y auoit pour luminaire porté deuant ledit corps deux cens torches de quatre liures de cire chascune piece, toutes armoyees en double aux armes de France, & estoient portees par deux cens pources personnes, tous reueustus de robes & chapperons de dueil. Et estoit ledit corps porté en vne litiere par les Henouars de Paris. Laquelle litiere estoit

couuerte & assemblee d'vng moult riche drap d'or, qui bien pouoit valoir mille ou douze cens escus d'or. Et dessus ladicte litiere estoit la pourtraicteure faite dudit deffunct Roy Charles, reuestu d'un bel aby Royal, vne Couronne en la teste, & en l'une de ses mains tenoit vng ceptre, & en l'autre le baston Royal. Et en ce estat fut porté en la grant Eglise nostre Dame de Paris: Et tous deuant aloyent tous les Crieurs de corps de ladicte ville, pareillement vestus de dueil, & armoyez deuant & derriere desdictes armes de France. Et apres eulx estoient portees deuant icelle litiere lesdictes deux cens torches, ainsi armoyees en double que dit est. Et apres icelle litiere aloyent faisans le dueil Messieurs les Duc d'Orleans, Conte d'Angolessme, freres: les Contes d'Eu & de Dunois, Messire Jehan Iouuenel \* des Voisins Cheualier Chancelier \* de France, & le grant Escuyer, tous reuestus de dueil & montez à cheual. Et puis apres icelle litiere aloyent à pied deux & deux tous les Officiers de l'Ostel dudit deffunct, aussi tous vestus de dueil angoisieux, lesquels il faisoit moult piteux veoir: Et de la grant tristesse & courroux que on leur veoit porter pour la mort de leurdit Maistre, furent grans pleurs & lamentations faictes parmy toute ladicte ville. Et aussi y auoit au ioingnement de ladicte litiere six des Paiges dudit deffunct, houssez & esperonner sus six courriers tous vestus & couuers de veloux noir, & lesdits Paiges audit habit de dueil. Et Dieu scet le douloureux & piteux dueil qu'ils faisoient pour leurdit Maistre. Et disoit on lors quel vng desdits Paiges auoit esté par qua-

<sup>Je croy qu'il faut des Vrsins.</sup>

tre iours entiers sans boire & sans manger, pour cause de ladicte mort: Et le lādemain qui fut le vendredy septiesme iour d'Aouſt audit an ſoixante & vn, ledit corps d'iceluy deffunſt fuſt tiré hors de ladicte Eglise de noſtre Dame de Paris enuiron trois heures apres midy, & mené & accompagné comme deuant eſt dit en l'Eglise ſainſt Denis en France, & là il fut inhumé & y giſt: noſtre Dieu ait mercy de ſon ame. Et vers la fin dudit mois d'Aouſt noſtre ſouuerain ſeigneur le Roy de France Loys, lors eſtant Daulphin de Viennois & ainſné ſils dudit deffunſt ſucceda à ladicte Couronne, fut ſacré Roy à Reims par l'Arceueſque Iouuenel, auquel lieu il fut moult noblement accompagné par la plus part des Seigneurs de nom de ſon Royaulme en moult grant & notable nombre.

Et le dernier iour dudit mois d'Aouſt il partiſt d'vng hoſtel eſtant aux faulxbourgs de la porte ſainſt Honnoré, nommé les Porcherons, appartenant à Meſſire Iehan Bureau qui fut fait Cheualier audit ſacre à Reims, pour venir faire ſon entree en ſa bonne ville de Paris. Au deuant de laquelle entree yſſirent hors de la ville tous les eſtats d'icelle, & par belle ordre, pour illec trouuer le Roy & luy faire la reuerence & bien viengnant. En laquelle aſſemblée eſtoit l'Eueſque de Paris nommé Chartier, l'Vniuerſité, la Court de Parlement, le Preuoſt de Paris, Chambre des Comptes & tous Officiers, le Preuoſt des Marchans & Eſcheuins tous veſtus de robes de damas fourrees de belles martres. Et leſquels Preuoſt des Marchans & Eſcheuins vindrent aux champs rencontrer & faire la

reuerence au Roy, & propofa deuant luy pour ladicte ville ledit Preuoſt des Marchans nommé Maiftre Henry de Liures qui luy bailla & presenta les clefs de la porte ſainct Denis, par où il fiſt ſadicte entree. Et ce fait chaſcun ſe tira à part: & au meſme lieu le Roy fiſt ce iour grant nombre de Cheualiers. Et en venant le Roy par ladicte porte ſainct Denis, il trouua près de l'Egliſe de ſainct Ladren vn Herault monté à cheual reueſtu des armes de ladicte ville, qui eſtoit nommé Loyal Cueur, qui de par ladicte ville luy presenta cinq Dames richement aournees, lesquelles eſtoient montees ſur cinq cheualx de pris, & eſtoit chaſcun cheual couuert & habillié de riches couuertes toutes aux armes d'icelle ville: Lesquelles Dames & chaſcune par ordre auoient tous perſonnages tout compillez à la ſignification de cinq lettres faiſans Paris, qui toutes parlerent au Roy ainſi que ordonné leur eſtoit.

Et en icelle entree faiſant le Roy, eſtoit moult noblement accompaigné de tous les grans Princes & nobles ſeigneurs de ſon Royaulme, comme de Meſſeigneurs les Ducs d'Orleans, de Bourgongne, de Bourbon, & de Cleues, le Comte de Charrolois fils vnicque dudit Duc de Bourgongne, des Contes d'Angoulefme, de ſainct Pol, & de Dunois, & aultres pluſieurs Contes, Barons, Cheualiers, Capitaines, & aultres Gentilshommes de grant façon, qui pour honneur luy faire en ladicte entree auoient de moult belles & riches houſſeures dont leurs cheualx eſtoient tous couuers, lesquelles houſſeures eſtoient de diuerſes fortes & façons, & eſtoient les vnes d'icelles de fin

drap d'or, fourrees de martres febelines, les aultres de veloux fourrees de pennes d'ermes, de drap de damas, d'orfeurerie, & chargees de grosses campanes d'argét, blanches & dorees, qui auoient cousté moult grant finance, & si y auoit sur lesdits cheuaulx & couuertes de beaulx ieunes enfans Paiges, & bien richement vestus. Et sur leurs espaulles auoit de belles escharpes branlans sur les croques desdits cheuaulx, qui faisoient moult bel & plaissant veoir.

Et à l'entree que fist le Roy à ladicte ville de Paris par ladicte porte saint Denis il trouua vne moult belle nef en figure d'argent, portee par hault contre la maçonnerie de ladicte porte dessus le pont leuis d'icelle, en signifiante des armes de ladicte ville, dedens laquelle nef estoient les trois Estats, & aux Chasteaulx de deuant & derriere d'icelle nef estoient Iustice & Equité, qui auoient personages pour ce à eulx ordonnez, & à la hune du mast de la nef qui estoit en façon d'un lis yssoit vng Roy abillé en habit Royal que deux Anges conduisoient.

Et vng peu auant dedens ladicte ville estoient à la fontaine du Ponceau hommes & femmes sauuages, qui se combatoient & faisoient plusieurs contenance: & si y auoit encores trois belles filles faisans personages de Seraines toutes nuës, & leur veoit on le beau tetin droit separé, rond & dur, qui estoit chose bien plaissant, & disoient de petits motets & bergerettes. Et près d'eulx ioüoient plusieurs bas instrumens qui rendoient de grandes melodies. Et pour bien rafraeschir les entrans en ladicte ville y auoit diuers conduits



conduits en ladicte fontaine gettans l'aict, vin, & ypocras, dont chacun buuoit qui vouloit: & vng peu au dessoubz dudit Ponceau à l'endroit de la Trinité, y auoit vne passion par personaiges, & sans parler Dieu estendu en la Croix, & les deux larrons à dextre & à fenestre. Et plus auant à la porte aux Paintres auoit aultres personaiges moult richement habillez. Et à la fontaine saint Innocent y auoit aussi personaiges de chasseurs, qui accueillirent vne bische illec estant, qui faisoient moult grant bruit de chiens & de trompes de chasses. Et à la boucherie de Paris y auoit eschauf-faulx figurez à la bastille de Dieppe. Et quant le Roy passa il se liura illec merueilleux assaut de gens du Roy à l'encontre des Anglois estans dedens ladicte bastille, qui furent prins & gaignez, & eurent tous les gorges coppees. Et contre la porte de Chastellet y auoit de moult beaulx personaiges. Et oultre ledit Chastellet sur le pont aux changes y auoit aultres personnaiges, & estoit tout rendu par dessus: & à l'heure que le Roy passa on laissa voler parmy ledit pont plus de deux cens douzaines d'oyseaulx de diuerfes sortes & façons, que les oyselleurs de Paris laisserent aler, comme ils sont tenus de ce faire: pource qu'ils ont sur ledit pont lieu & place à iour de feste pour vendre lesdits oysseaulx. Et par tous les lieux en ladicte ville par ou le Roy passa celle iournee, estoit tout rendu au long des ruës bien notablement: & ainsi s'en ala faire son oraison en l'Eglise nostre Dame de Paris, & puis s'en retourna souper en son Palais Royal à Paris en la grant salle d'icelluy: lequel souper fut moult bel & plantu-

C

reux, & coucha celle nuit audit Palais. Et le landemain premier iour de Septembre audit an soixante & vn, il se deslogea dudit Palais, & s'en ala logger en son Hostel des Tournelles près de la Bastille de saint Anthoine, où il sejourna depuis par aucun temps : Et là il fist & ordonna plusieurs choses touchant les affaires de son Royaulme, & illec fist plusieurs ordonnances, & desappointa les plus grans & principaulx Officiers de fondit Royaulme : Comme le Chancelier Iuuenel, le Marechal, l'Admiral, le premier President de Parlement, le Preuost de Paris, & plusieurs aultres.

Et en leurs lieux y en mist d'aultres tous nouueaulx. Pareillement aussi desappointa plusieurs Maistres des Requestes, Secretaires, Conseilliers & Clerks des Comptes, de la Court de Parlement, des Generaulx des Aydes, de la Chambre du Tresor, des Generaulx des Monnoyes & aultres. Et en leurs lieux y en mist de nouueaulx.

Et le tiers iour de Septembre mil quatre cens soixante & vn, le Roy avecques les Seigneurs & aucuns Gentilshommes de sa maison soupperent en l'ostel de Maistre Guillaume de Corbie lors Conseillier en la Court de Parlement. Et celle nuit le Roy le fist & crea premier President du Daulphiné : & là y furent plusieurs Damoiselles & honnestes bourgeoises dudit lieu de Paris. Et en ce temps le Roy estant audit lieu de Paris, fist de grandes, honnestes & bonnes chieres en diuers lieux & hostels de Paris.

Et si aduint en ce temps audit lieu de Paris, que vne belle ieune femme nommee Jehanne du Bois, femme

d'un Notaire de Chatellet de Paris, se partit & absenta hors de la maison de sondit mary & s'en ala ou bon luy sembla. Et apres sondit mary bien conseillé de ses principaulx amis la reprint, & se contint de là en auant avecques sondit mary bien & honnestement.

En l'annee mil quatre cens soixante & deux ensuiuant, ne suruindrent gueres de nouualleres qui feussent de grant memoire, pourquoy n'en est icy faicte aucune mention. Et au regard de l'annee ensuiuant mil quatre cens soixante trois, pareillement que dit est, ne suruint riens que doye estre mis en grant memoire: mais l'hyuer fut court sans estre froit, & fut l'esté long. Il creust en ladicte annee assez de vin & assez bon. Et au regard des autres biens de terre n'en fut pas grant habundance.

En l'an 1464. à vn iour de mardy quinziesme iour de May le Roy vint & arriua en sa ville de Paris, qui venoit de Nogent le Roy, où illec la Royne s'estoit deliuree d'une belle fille. Et ce iour il souppa en l'ostel de Maistre Charles d'Orgemont seigneur de Mery, & puis s'en partit audit mois de May de ladicte ville de Paris pour aler és marches de Picardie, cuidant illec trouuer les Ambassades du Roy Edouart d'Angleterre, que on luy auoit dit qu'ils y deuoient venir par deuers luy, qui ny vindrent point. Et à ceste cause s'en partit dudit pays de Picardie & s'en ala à Roüen & aultres lieux de Normendie. Aduint que vng Balenier fut prins sur mer és marches de Hollande, dedens lequel estoit avecques aultres vng nommé le Bastard de Rubempré, lequel Balenier & ceulx que dedens estoient

furent prins tous prisonniers par les nauires de Flandres: Et apres ladicte prise faicte plusieurs Picards & Flamans disoient & publioient que dedens icelluy le Roy les auoit enuoyez pour prendre prisonnier Monseigneur de Charrolois, dont il n'estoit riens.

En ce temps le Roy qui estoit en Normendie s'en partit pour retourner audit lieu de Nogent. Et puis de là s'en ala à Tours, à Chinon, & de là à Poictiers. Auquel lieu de Poictiers ala & fut par deuers luy vne Ambassade de Paris, luy requerir aucunes franchises pour ladicte ville, dont riens ou que peu ne leur accorda, sinon que l'imposition foraine n'auroit plus de cours en ladicte ville, qui n'estoit pas grand chose: mais ils n'en iouyrent point nonobstant leur dit don, pource que les gens des Comptes à qui leurs lettres s'adrescoient, ne leur voulurent bailler d'icelles leur expedition. Et aussi furent deuers le Roy audit lieu de Poictiers les Ambassadeurs du Duc de Bretagne, qui par luy furent oys sur aucuns articles qu'ils luy exposerent touchant le fait du Roy & dudit Duc: Lesquels articles ou la plus part d'iceulx furent par le Roy accordez, & en iceulx articles accordant lesdits Ambassadeurs promirent de faire venir ledit Duc de Bretagne audit Poictiers ou ailleurs, pour confermer iceulx articles accordez. Et à tant se departirent dudit lieu de Poictiers lesdits Ambassadeurs, faignans eulx retourner audit pays de Bretagne: mais ils firent tout le contraire, comme cy apres sera dit: car ils partirent dudit Poictiers à vng iour de Samedy, & ce iour ne firent que quatre lieues, & illec demourerent ius-

ques au lundy ensuiuant que Monseigneur le Duc de Berry frere du Roy s'en partit aussi dudit lieu de Poictiers, & vint iusques ausdits Ambassadeurs qui le recueillirent & l'en emmenerent audit pays de Bretaigne à bien grant haste & diligence, pour paour que le Roy n'en eust nouuelles & qu'ils feussent suiuis. Et desia estoit audit pays alé par deuers icelluy Duc Monseigneur le Comte de Dunoy. Et si s'en alerent audit pays de Bretaigne apres ledit partement aucuns particuliers par deuers mondit seigneur de Berry.

Et tantost apres ledit partement ainsi fait que dit est, Monseigneur le Duc de Bourbon porta guerre au Roy & à ses pays, & print toutes les finances qui estoient au Roy estans en ces pays, & si y fist prendre & arrester le seigneur de Crussol, qui estoit fort familier du Roy. Et lequel seigneur de Crussol passoit lors par les pays de mondit seigneur de Bourbon, menant avecques soy femme & plusieurs de ses biens, tous lesquels furent en arrest en la ville de Cosne en Bourbonnois.

Et apres les choses dessusdictes furent aussi arrestez prisonniers en la ville de Molins, le seigneur de Traynel parauant Chancelier de France, & maistre Pierre Doriolle General des finances du Roy, lesquels furent longuement detenus en arrest en ladicte ville de Molins: Et puis apres par mondit seigneur le Duc furent deliurez, & s'en retournerent par deuers le Roy.

Et le Dimanche douzieme iour de Mars audit an quatre cens soixante quatre, apres ledit partement de Monseigneur de Berry dudit lieu de Poictiers, An-

thoinc de Chabannes Comte de Dampmartin, qui estoit constitué prisonnier en la Bastille saint Anthoine, s'en partit & eschappa dudit lieu & s'en ala en Berry & en Bourbonnois : où illec il fut recueilly par les gens de mesdits seigneurs de Bourbon & Berry. Et pour occasion dudit eschapement en furent plusieurs constituez prisonniers.

Et le mercredy ensuiuant quinziesme iour du mois, Messire Charles de Meleum Lieutenant du Roy, Maistre Jehan Balue Esleu Euesque d'Eureux, & Maistre Jehan le Preuost Notaire & Secretaire du Roy, vindrent & arriuerent à Paris en l'ostel de la ville, où illec fut faicte lecture d'aucuns articles dont le Roy leur auoit baillé charge. Et apres ladicte lecture ainsi faicte, furent faictes en l'ostel de ladicte ville plusieurs belles Ordonnances pour la tucion, garde, & seureté d'icelle ville : comme de faire guet & de garder les portes d'icelle, & les aultres fermer & murer : & mettre les chesnes de fer des ruës de ladicte ville en estat, pour seruir quant mestier en seroit : & plusieurs aultres qui longues seroient a escrire, que ie passe cy pour cause de briefueté.

En ce temps furent prins par inuentoire & mis en la main du Roy, tous & chascun les biens de Pierre Morin trouuez & estans à Paris, pource que ledit Morin qui estoit Tresorier de Monseigneur de Berry tenoit pour ledit seigneur contre le Roy, la Ville & Tour de Bourges : & à ceste cause le Roy donna l'Office de Huissier du Tresor qui estoit audit Morin, à vng nommé Iacques Testeclere.

Et apres le partement dudit Dampmartin, il trouua façon & moyen de prendre & auoir sur Gieffroy Cueur, fils de feu Iacques Cueur, les places de sainct Forgeau & sainct Morice, où il print ledit Gieffroy a son prisonnier, & auecques auffi print tous les biens qu'il auoit esdits lieux.

Et apres ces choses le Roy s'en tira deuers Angiers & le pont de See, pour sçauoir le vouloir de ceulx qui ainsi s'estoient mauuoisement de luy departis & alez audit pays de Bretagne. Et auoit le Roy auecques luy pour le accompagner, le Roy de Cecille & Monseigneur du Maine: Et si le suiuirent plusieurs gens de guerre de son Royaulme, & en grant nombre, qu'on estimoit estre de vingt à trente mil combatans. Et apres que le Roy eut ainsi esté illec vne espasse de temps, voyant qu'il n'y faisoit gueres s'en ala & tira au pays de Berry vers Yssouldun, Viarron, le bourg de Dreux, & aultres places enuiron: & mena auecques luy grant quantité de ses gens de guerre & de son artillerie, & laissa lefdits Roy de Cecille & seigneur du Maine bien accompagnez de gens de guerre, pour garder & deffendre que lefdits de Bretagne n'entras- sent en Normendie ne en aultres lieux de ce Royaulme, pour le dommaiger.

Et quant le Roy fut ainsi venu audit pays de Berry que dit est, il sejourna illec vng peu de temps, & puis s'en partit pour aller au pays de Bourbonnois: & laissa la ville de Bourges sans y aler, pource qu'il y auoit grant garnison dedens ladicte ville, dont estoit conducteur & Capitaine Monseigneur le Bastard de

Bourbon pour mondit seigneur de Berry : & vint entrer audit pays de Bourbonnois, ou illec enuiron le iour del'Ascension nostre Seigneur, la Ville & Chastel de saint Amant Lalier fut prinse d'assault, & peu de temps apres luy fut rendue la Ville & Chastel de Molucon par composition, dedens laquelle estoient Iaques de Bourbon & trente cinq lances, qui s'en alerent eulx & leurs biens saufs, & iurerent que iamais ne s'armeroient contre le Roy.

Et la veille dudit iour d'Ascension Nostre Seigneur arriuerent à Paris Monseigneur le Chancelier Trainel, Maistre Estienne Cheualier, Nicolas de Louuiers, Maistre Jehan de Molins : par lesquels le Roy escripuoit à ses bons bourgeois, manans & habitans de Paris, en les merciant de leurs bons vouloirs & loyautez, en les priant & enhortant de bien en miculx continuer : Et par iceulx leur mandoit qu'il leur enuoyeroit la Roynne pour accoucher à Paris, comme à ville du monde que plus il aimoit.

Et le ieudy penultiesme iour de May l'an mil quatre cens soixante cinq, aduint que à vng moulin qui est par delà Moret en Gastinois, nomme le moulin basset, en vne hostellerie illec estant se vindrent loget Jehan de la Hure marchant de la ville de Sens, vng sien nepueu & aultres en sa compaignie : & en ladicte hostellerie enuiron minuit vindrent de trente à quarante hommes à cheual tous en armes, qui estoient venus desdits lieux de saint Maurice & saint Forgeau, qui emmenerent prisonniers esdits lieux lesdits la Hure & ceulx de ladicte compaignie, ensemble tous leurs biens



biens & bagues: & audit temps le Roy ordonna de rompre & abbatre les ponts de Chamois, de Beaumont sur Oise, & aultres.

Et le ieudy sixiesme iour de Iuing audit an mil quatre cens soixante cinq, aduint à Paris en la rue saint Denis deuant la barbe d'or, que vng ancien homme, Bonnetier nommé Iehan Marceau, se pendit & estrangla en sa maison, & fut le corps trouué mort. Si fut despendu & apporté au Chastellet de Paris, pour estre illec visité: & apres ladieste uisitation faicte fut enuoyé & porté pendre ledit corps au gibet de Paris. Et en ce mesme iour y eut vng laboureur demourant à Clignencourt nommé Iehan Petit, qui couppa la gorge à sa femme.

En ce temps le Bastard de Bourgongne & le Marechal de Bourgongne accompagnez de grant quantité de gens de guerre de la compagnie dudit Monseigneur de Charrolois, commencerent à courir sus aux villes & subjects du Roy par port d'armes, & vindrent prendre sus le Roy Roye & Montdidier. Et lors Monseigneur le Conte de Neuers & Iouachin Rouault Marechal de France, se estans pour le Roy dedens la ville de Peronne a tout bien quatre mil combatans, se retrayerent à Noyon & à Compiengne: & laisserent audit lieu de Peronne pour la garde d'icelle, des nobles de France, & cinq cens francs archiers.

Et le Dimenche vnziesme iour dudit mois de Iuing fut faicte à Paris vne moult belle & notable procession generale, ou furent portees moult de saintes reliques, & entre aultres saintes choses furent portees

D

les chasses de Madame sainte Genevieve & saint Marcel : Et par belle ordonnance vindrent en la grant Eglise de Paris, où illec fut chantee vne haulte Messe de nostre Dame. Et illec prescha au peuple Maistre de Lohue Docteur en Theologie, qui declara que ladicte assemblee & congregacion se faisoit pour la santé & bonne prosperité du Roy, & aussi de la Roynie & du fruct qui estoit autour d'elle, & pour la paix & bonne vnion estre mise entre le Roy & les Princes : & pour les biens de terre.

Audit temps le Roy estant en Bourbonnois s'en tira à saint Pourfain, auquel lieu Madame la Duchesse de Bourbonnois & d'Auvergne sa sœur s'en ala pour parler à luy, comme desplaisante du discord qu'elle veoit estre entre le Roy son frere & Monseigneur de Bourbon son mary. Et pour y quider trouuer bon moyen ce qui ne se peut faire lors : & cependant ledit Monseigneur le Duc vuida hors de Moulins, & s'en ala à Ryon.

Audit temps fut ordonné en l'ostel de la ville de Paris, que les portes de saint Martin, Montmartre, le Temple, saint Germain Desprez, saint Victor, & saint Michel, seroient toutes murées, & qu'on feroit guet de nuit dessus les murs d'icelle ville.

Audit temps fut enuoyé mettre la siege deuant saint Morise, tenu & occupé par l'adversus dudit Contre de Dampmartin : A tenir lequel siege y estoit le Bailly de Sens nommé Messire Charles de Melun, & plusieurs gens de commune avecques luy. Et encôres y fut de rechief enuoyé Anthoine Bailly de Melun, qui y me-

na avecques luy aucuns archiers & arbalestriers dudit lieu de Paris : & tantost apres que ledit de Meleun & iceulx archiers & arbalestriers furent ainsi arriuez deuant ladicte place, ceulx dudit saint Morise se renderent par composition, & baillerent ladicte place.

Audit temps aussi aduint que vng nommé maistre Loys de Tillieres, Notaire & Secretaire du Roy & Tresorier de Carcassonne & Grenetier de Selles en Berry, qui estoit seruitour de messire Anthoine de Chasteauneuf seigneur du Lau, fut tue par malle fortune d'vng archier qui essayoit vn arc duquel il tiroit vne fiesche contre vng huys qui estoit deuant luy, que à l'eure ledit maistre Loys ouuroit, & luy vint passer la fiesche tout au trauers du corps : & incontinent s'en ala gecter dessus vne couchette estant en la chambre : dessus laquelle il rendit l'ame à Dieu incontinent apres.

Et le iour saint Iehan Baptiste vingt-quatriesme iour de Iuing, aucuns qui se baignoient à leurs plaisances en la riuiere de Seine par malle fortune se noyerent : & pour cause de ce fut crié par les carrefours de Paris, que de là en auant nul ne feust si hardy de soy aler plus baigner en ladicte riuiere : & que chascun teint de iour deuant son huys vng seau d'eauë, sur peine de prison & de soixante soulds parisis d'amende.

Et le landemain vingt-cinquesme iour dudit mois de Iuing, fut ordonné en ladicte ville de Paris que toutes les chesnes des rues de ladicte ville seroient abatuës & laissees gesir sur terre, és lieux ou elles sont ordonnees, pour estre toutes prestes, & regarder ou il y au-

D ij

roit faulte pour les amender & y pourueoir à les trouuer toutes prestes quant besoing en seroit: ce qui fut fait. Et si fut aussi ordonné & enjoingt à vng chascun de ladicte ville qu'ils se武装assent, & eussent prouision d'armes chascun selon son estat, pour la garde de ladicte ville, & pour estre tous prests quant mestier en seroit. Et ce par cedulles enuoyees de par ladicte ville à vng chascun particulier.

Audit temps tous Bourguignons, Picards, & autres nations de l'obeyssance & sous la conduicte dudit monseigneur de Charrolois, marcherent tant en France qu'ils vindrent & arriuerent iusques à Ponts sainte Maixance, qu'ils trouuerent moyen d'auoir, & que vng nommé Madre qui en estoit Capitaine pour maistre Pierre L'orscure seigneur Dermenonuille, leur bailla par composition & argent qu'il en print dudit seigneur de Charrolois. Et à ceste cause vindrent & passerent parmy l'Isle de France, qui par les dessusdits fut fort dommaigé: nonobstant qu'ils disoient par tout ou ils passioient qu'ils venoient pour affranchir le pays de France, & pour le bien publicq.

Et incontinent apres ledit passaige fait audit Ponts sainte Maixance, lesdits Bourguignons eurent la place de Beaulieu qui longuement atoit esté tenu contre iceulx Bourguignons par aucuns de la charge & compagnie de Iouachin Rouault, qui s'en alerent par composition eulx & leurs biens saufs.

Et lesdits Bourguignons ainsi venus en ladicte Isle de France, s'espandirent en diuers lieux en icelle, & y prindrent Dampmartin, Nantoulet, Villemonble,

& aultres menuës places. Et puis à Laigny fur Marne où ils firent plusieurs exploicts, comme de ardre & brusser tous les papiers qu'ils trouuerent sur le fait des Aydes, & ordonnerent en ladicte ville que tout y seroit franc: & si ordonnerent que le sel qui estoit au grenier dudit lieu pour le Roy fust baillé & distribué à tous ceulx qui en vouldroient auoir, en payant le droit du marchand seulement.

Et le Dimenche dernier iour dudit mois de Iuing audit an soixante & cinq, Iouachin Rouault Marechal de France a tout cent & dix lances, vindrent & arriuerent en la ville de Paris pour la garde d'icelle, combien qu'il n'en estoit gueres de mestier: car les habitans d'icelle qui tous estoient bien vnis & loyaulx au Roy, estoient assez souffisans pour la garde d'icelle ville.

Audit temps le Roy qui estoit au pays de Bourbonnois mist le siege deuant Rion en Auuergne, dedens laquelle y estoient monseigneur le Duc de Bourbon, le Duc de Nemours, le Comte d'Armignac, le seigneur d'Albret, & aultres. Et auoit le Roy deuant ladicte ville la plus belle & noble armee que oncques fut guere veüe: car il auoit de bonnes gens de guerre & de grant façon, vingt-quatre mil hommes combatans & mieulx.

Et apres que ledit siege eut esté ainsi mis deuant ladicte ville de Ryon, & voyant à Paris que lesdits Bourguignons approuchoient de ladicte ville, fut ordonné & estably en icelle ville de Paris vng grant guet à cheual, qui aloit toutes les nuits sur les murs & en ladicte ville, depuis l'eure de minuit iusques au iour apparant:

D iij

Pour la conduicte duquel guet y auoit Capitaines ordonnez par icelle ville par chascune nuit, de gens de façon d'icelle. Auquel guet estoient ordinairement de huit vingts à deux cens cheuaux, ou mieulx.

Et le lundy second iour de Iuillet audit an, maistre Iehan Balue Euesque d'Eureux, fist le guet de nuit parmy ladicte ville, & mena avecques luy la compaignie dudit Iouachin avecques clars, trompettes & aultres instrumens, sonans par les ruës & sur les murs, qui n'estoit pas accoustumé de faire à gens de guet.

Et le mercredy quatriesme iour dudit mois de Iuillet audit an soixante-cinq, le Roy estant deuant ledit lieu de Ryon escripuit à messire Charles de Meleun son Lieutenant audit Paris, audit Iouachin & ausdits habitans de Paris, par sire Charles de Charlay son Cheualier de guet audit lieu de Paris, par lesquelles lettres le Roy mercioit moult fort lesdits habitans de Paris de leurs bonnes loyaultez, en les priant & exhortant de tousiours y continuer & perseuerer, & que dedens quinze iours ensuiuans luy & toute son armee seroit à Paris: Et si leur mandoit de bouche par ledit de Charlay certain accord qu'il auoit fait avec lesdits Ducs de Bourbon & Nemours, & les sires d'Armignac & d'Albret. Et comment en faisant ledit accord chascun d'eulx auoit promis au Roy de bien & loyaument le seruir, & de viure & mourir pour luy. Et par lesdits appoinctemens iceulx seigneurs de Bourbon & aultres dessus nommez, promettoient de faire tout deuoir, de faire faire la paix au Roy par les aultres seigneurs avecques eulx aliez contre luy. Et que pour ce

faire seroient enuoyez de par lesdits quatre seigneurs certains Ambassadeurs deuers le Roy à Paris dedens le iour & feste de my Aoust ensuiuant, pour traicter de ladicte paix. Et que ou lesdits aultres seigneurs avec eulx aliez contre luy ne voudrent entendre à icelle paix, ils promirent & iurerent que d'oresnauant a iamaïs ils ne s'armeroient contre le Roy, & qu'ils viuroient & inouroient pour luy & son Royaulme. Et fut tout ce que dit est ainsi promis par lesdits quatre seigneurs, au lieu de Moissiat près dudit Ryon. Et pour plus ample promesse ils s'en obligerent es mains de deux Notaires Apostoires, voulans & accordans estre incontinent excommuniez se par eulx, ou l'vng d'eulx estoit fait le contraire. Et pour les nouuelles desusdictes fut ordonné & deliberé que le vendredy ensuiuant en seroient faictes processions generales en l'Eglise de saincte Katherine du Val des Escolliers à Paris, laquelle y fut faicte bien honneste & solempnelle, & y prescha ledit iour maistre Jehan Pain & Chair Docteur en Theologie.

Et le mecredy fut publié & fait sçauoir par les carrefours de Paris, que en chascun hostel d'icelle ville y eut vne lanterne & vne chandelle ardente dedens durant la nuit: que chascun mesnaige qui auroit chien l'enfermast en sa maison, & sur peine de la hart.

Et le vendredy ensuiuant la compaignie, ou la pluspart desdits Bourguignons vindrent & arriuerent à S. Denis en France eulx loger illec. Et ce iour venoit à Paris trente cheuaux de marce, dont lesdits Bourguignons en prindrent les vingt & deux, les autres huit

cheuaux se sautuerent & vindrent à Paris. Et bien tost apres que lesdits Bourguignons eurent esté ainsi arriuez audit lieu de sainct Denis, partie d'eulx s'en alerent deuant le pont de sainct Clout pour le cuider auoir, ce qu'ils ne peurent pour ceste fois, & a tant s'en retournerent.

Et le Dimenche septiesme iour de Iuillet audit an soixante-cinq, lesdits Bourguignons vindrent voullter deuant Paris & n'y gaagnerent riens, sinon qu'il en y eut aucun d'eulx tuez de l'artillerie, estant dessus les murs d'icelle ville, & puis s'en retournerent audit lieu de sainct Denis.

Et le lundy ensuiuant huitiesme iour dudit mois de Iuillet, lesdits Bourguignons vindrent de rechief deuant Paris, & deslogerent tous dudit sainct Denis, & en amenerent avec eulx toute leur artillerie. Et pour grande cautelle & subtilité enuoyerent auant qu'ils se montraissent quatre de leurs Heraulx aux portiers de la porte sainct Denis, de laquelle estoient Commissaires & Capitaines pour le iour, maistre Pierre L'orfeure seigneur Dermenonuille, & maistre Iehan de Pompaincourt seigneur de Cereelles, & vindrent desdits quatre Heraulx demander des viures pour leur ost, & aussi que on leur donnast passaige parmy ladicte ville, & dirent que se on leur bailloit ledit passaige & lesdits viures qu'ils entreroient dedens ladicte ville au des-honneur & grande confusion d'icelle ville.

Et ainsi que on escoutoit lesdits quatre Heraulx sur les choses dessusdictes, & auant que on eust peu auoir loisir de leur rendre aucune responce, lesdits Bourguignons



gnoient cuidans prendre à despourueu les habitans de ladicte ville, & mesmement ceulx qui gardoient ladicte porte de S. Denis, vindrent à grant faueur grosse compaignie & armee passer iusques à saint Ladre & plus auant, cuidans gagner les barrieres qui aux faulxbourgs de ladicte ville deuant ladicte porte auoient esté faictes, & venir iusques à ladicte porte & dedens ladicte ville, en jettant par eulx canons, serpentines, & autres traits: A quoy leulx fut moult asprement & vaillamment resiste par les bourgeois de Paris, & autres illec de par ladicte ville, & aussi par les gens de Iouachin & de luy mesmes qui s'y vindrent trouuer. Ety eut lors desdits Bourguignons tuez & haurez: & puis s'en retournerent aux champs sans aultre chose faire, & se misrent en bataille deuant ladicte ville: & lors y eut beau martillibilis de canons, vulgaires, serpentines, couleures, & aultre trait qui leur fut enuoyé de ladicte ville, & dont y eut aucuns de tuez & haurez. Et durant ladicte escarmouche y euvng paillant sergent à verge du Chastellet de Paris nommé Casin Chollet, qui en courant fort eschauffé par plusieurs des rues de Paris cria à haulte voix ces mots, boutez vous tous en vos maisons & fermez vos huis, car les Bourguignons sont entrez dedens la ville. Et à cause de l'effroy qu'il fist y eut plusieurs femmes grosses qui en accouchèrent auant terme, & d'autres en moururent & perdirent leur entendement.

Le mardy ensuiuant ne fut riens fait deuant Paris, sinon que le Conte de saint Pol qui estoit audit lieu de saint Denis avecques ledit seigneur de Charrolois,

E

se partit dudit lieu de saint Denis avecques aucuns Picards & Bourguignons estans audit lieu de saint Denis, pour s'en aler au pont saint Cloud, & pour le prendre & auoir, ce qu'il ne peust pour ce iour: Et le mercredy ensuiuant fut menee audit de saint Pol certaine quantite d'artillerie dudit seigneur de Charrolois, comme de cinquante à soixante chariots. Et ce mesme iour aucuns de la compagnie de messire Pierre de Breze yssirent hors de Paris pour aler à leur auenture dessus lesdits Bourguignons, qui ainsi aloient audit saint Cloud; desquels Bourguignons en fut par eulx tue deux; & en fut prins cinq: dont l'vng d'iceulx fut fort nauré, & tellement que tout le douant de son visage luy fut abatu d'vng coup d'espee, & luy pendoit le visage à sa peau sur sa poitrine: Et par iceulx Bourguignons fut prins vng Archer seruiteur de Messire Jehan Noyer Cheualier de la compagnie dudit Breze. Et ledit iour de mercredy enuiron six heures de nuit lesdits Bourguignons baillerent vne escarmouche terrible & merueilleuse au bouleuart dudit saint Cloud, qui fort espouuenta ceulx de dedens qui le tenoient pour le Roy: tellement qu'ils prindrent composition de rendre ledit pont à l'heure presente: ce qu'ils firent & s'en reuindrent à Paris, eulx & leurs biens saufs: & si promirent de liurer & bailler lesdits cinq Bourguignons prins ledit iour. Et pour ce faire demourerent pour ostages Jaques le Maire bourgeois de Paris, qui estoit Capitaine dudit saint Cloud, & vng homme d'armes de la compagnie dudit de Breze, estant audit pont de saint Cloud.

Le vendredy ensuiuant fut tenu en l'Orfel de la  
 ville de Paris vng grand Conseil, pour deliberer &  
 scauoir quelle responce seroit tendue ausdits Bourgui-  
 gnonis sur ce qu'ils auoient requis que de ladicte ville  
 fussent enuoyez aucuns deleguez par icelle ville, par  
 deuers ledit seigneur de Charrolois pour leur estre dit  
 par eulx, de bouche & en secret, les causes pour les-  
 quelles ils estoient ainfr venus en armes audit pays de  
 France: A quoy fut conclud que on feroit scauoir au-  
 dit de Charrolois qu'il enuoyast bon sauf conduit à  
 Paris, pour ceulx qui seroient ordonnez estre enuoyez  
 par deuers luy: & ce fait on y enuoyeroit gens pour  
 les ouyr & escouter tout ce qu'ils voudroient dire,  
 pour au surplus le faire assauoir au Roy qui estoit près  
 de Orleans, ou à son Conseil estant audit lieu de Pa-  
 ris, pour leur faire telle responce qu'il seroit aduisé de  
 fair: Et ce mesme iour vindrent à la porte saint Ho-  
 noré enuiron cinq heures ausdits deux Heraulx de par  
 ledit seigneur de Charrolois, pour auoir la responce  
 de ce que dit est: Ausquels fut dit comme deuant est  
 dit, & que ledit de Charrolois approchast en aucun  
 lieu près Paris, & enuoyast ledit sauf conduit & que  
 on yroit à luy pour l'escouter, & autre chose n'eurent.  
 Et apres ces choses ils acquerent auoir pour argent du  
 papier & percheuain auant de l'entre, dont il leur fut  
 baillé: & si demanderent à auoir du sacre & aultres  
 drogues pour aucuns Gentilshommes qui estoient  
 malades en leur Orfel, dont on leur fit robes, qui s'en  
 rindrent à bien mal contents de ceulx de ladicte ville.  
 Et à tant s'en retournerent iceulx deux Heraulx.

Et le Dimenche ensuiuant quatorziesme iour dudit mois de Iuillet audit an soixante & quiaze, atriberent à Paris bien matin Monseigneur de la Borde & Messire Guillaume Cousinot, qui apportèrent lettres de par le Roy aux Bourgois, manans & habitans de ladicte ville, par la teneur desquelles le Roy les mercioit comme deuant de leurs bons voulders qu'ils auoient eueuers luy, & de la bonne & grande resistance qu'ils auoient faicte à l'encontre d'edits Bourguignons. Et qu'ils voulsissent rader luy foy ausdits de la Borde & Cousinot de tout ce qu'ils leur diroient de par luy. Laquelle credence estoit en effet que le Roy les mercioit moult de fois de leurs grandes loyaultez, & si leur prioit iouir de tousiours de bien en mieulx continuer. Et que dedens le mardy ensuiuant il seroit à Paris, comme au lieu du monde que plus il desiroit estre, pour donner remede & provision par tout, & qu'il aimeoit mieulx auoir pour lui la mort de son Royaume que mal ne insouuenient venist en ladicte ville, ou possible luy seroit de y podrircoir. Aussi dit & pria le dit Cousinot de par le Roy, que ceulx de Paris pouruissent au logis des gens d'armes & de trair, que le Roy auoit & mendoit avecques luy : & aussi de mettre pris raisonnable sur les viures. A queoy luy fut respondu par maistre Henry de Liure Procureur des Marchans, que aussi feroit on.

Et le lundy ensuiuant cesdits Bourguignons qui estoient deslogez dudit saint Cloud's en allerent loger à Montlehery, eulx & toute leur artillerie, cuidans aller eulx ioindre avec les Compaignies des Ducs de Berry

& de Bretagne, le Conte de Dunois & aultres qui s'en venoient audit de Charrolois. Et de ce en furent portees les nouuelles au Roy qui estoit deça Orléans pour s'en venir à Paris: Lequel & à toute diligence vint & arriua le mardy matin fixiesme iour dudit mois de Iuillet à Chastres soubs ledit Montlehery. Et d'illec sans soy retraischie ou que bien peu, & sans attendre toute sa compaignie qui estoit pour gens à cheual la plus belle & mieulx en point que oncques auoit esté venue parauant, pour autant de gens qu'il y auoit. Se vint frapper & bouter dedens l'armée desdits Bourguignons, & illec à l'aborder y eust fait des plus beaulx faits d'armes que iamais furent veus pour vng peu de gens: car aussi c'estoient tous nobles hommes, vaillans & de grant eslite, qui tellement besongnerent que le Roy gaigna & mist en fuite toute l'auangarde desdits Bourguignons, & y eust d'iceulx Bourguignons à la dicter rencontre grant quantité de morts & pris. Et d'icelle desconfiture en vint incontinant le bruit à Paris: de laquelle ville en yssit aux champs plus de trente mil personnes, partie desquels s'en alerent à cheual à l'escart, & trouuerent moult desdits Bourguignons qui furent prins & desconfis par eulx, & aussi de ceulx des villaiges d'entour d'icelle ville, comme de Vanures, Yssi, Seure, saint Cloud, Suresnes, & aultres lieux. Et en ce faisant fut gaigné bien grant butin sur lesdits Bourguignons, tant en chariots, bahus, malles, boistes, que autrement: & tant y perdirent lesdits Bourguignons que on disoit lors que leur perte en toutes choses montoit plus de deux cens mil escus d'or. Et

après que ladicte auangarde eust esté ainfi desconfite, le Roy non content de ce, mais cuidant tousiours perfeuerer & auoir le bout d'iceulx Bourguignons, & sans loy refreschir ne prendre aucun repos, ne luy ne ses gens, se rebouta luy, sa garde, & environ quatre cens lances de sa compaignie dedens lesdits Bourguignons, qui s'estoient fort raliez par le moyen dudit Conte de saint Pol, qui moult bien seruiſt ledit de Charrolois celle iournee: lesquels Bourguignons recueillirent vigoureuſement le Roy & ladicte compaignie, car ils s'estoient ferrez en bataille & par ordre, & leur artillerie apprestee, de laquelle ils greuerent fort les gens du Roy, & en tuerent plusieurs gens de bien, & aussi de ceulx de la garde du Roy qui moult vaillamment se porterent & feruirent bien le Roy, qui eust illec beaucoup affaire, & en grant dangier par diuerſes fois de sa personne: car il n'auoit que vng peu de gens, & sans artillerie. Et tellement y fut oppresse le Roy qui tousiours estoit des premiers dedens, qu'il ne ſçauoit que faire. Et posé ores qu'il n'auoit que vng peu de gens, si maintenoient plusieurs, que s'il eust eu d'auantage cinq cens francs archiers à pié pour illec expedier les Bourguignons, qui illec furent iettez par terre qui apres se releuoient, qu'il eust mis en telle subiection iceulx Bourguignons, que iamais n'eust esté memoire d'eulx en armées. Ledit seigneur de Charrolois y perdit toute sa garde. Et aussi fist le Roy beaucoup de la sienne. Et fut tellement fuiuy ledit de Charrolois que par deux fois fut prins par Geuffroy de S. Belin & Gilbert de Grassay, & puis fut rescoux. Et

durant ladicte iournee y eust grant occision de hommes & de cheualx, dont plusieurs en furent tuez par les ribaulx pietons du costé dudit de Bourgongne, qui de picques & aultres ferremens les tuoient, & y mourut de gens de nobles maisons de costé & d'aultre.

Et apres que tout fut fait on trouua que audit champ y estoient mors trois mil six cens hommes, Dieu en ait les ames. Et vers la nuit les Escossois de la garde du Roy, voyans & confiderans le grant dangier ou le Roy estoit & la grant perte de leurs gens: aussi que lesdits Bourguignós poursuuiuoient fort & asprement, prindrent le Roy qui moult estoit las & afflicte, & qui n'auoit cessé de combattre & faire grans armes toute la iournee, sans boire & sans menger, & le menerent dedens le Chasteau dudit Montlehery. Et pource que plusieurs gens de l'armee du Roy n'auoient point veu qu'il eust ainsi esté mené audit Montlehery & ne le sçauoient où trouuer, cuidoient qu'il feust mort ou pris, & à ceste cause la pluspart d'iceulx semirent en fuite: Et lors Monseigneur du Maine, Monsieur l'Admiral de Montaulban, le seigneur de la Barde & aultres Capitaines qui bien auoient de sept à huiet cens lances se retrahirent, & s'en alerent & habandonnerent ainsi le Roy. Et à ladicte iournee nul des dessusdits ny frappa vng seul coup, & à ces moyens le champ demoura ausdits Bourguignons, & en icelle rencontre au nombre des mors y furent trouuez de gens de façon & de bonnes maisons: C'est assauoir Messire Pierre de Breze Cheualier Seneschal de Normendie, Geufroy de saint Belin dit la Hyre, Bailly de Chaumont,

Floquet Bailly d'Eureux, & plusieurs aultres Cheualiers & Escuyers de nom de la compagnie du Roy: Et aussi de la compagnie desdits Bourguignons y eurent beaucoup de mors, & de pris plus que de ceulx du Roy. Et apres que le Roy eut esté vng peu refreschy audit Chasteau de Montlehery, fust mené & conduit d'illec iusques en la ville de Corbueil, où il y sejourna iusques au iedy ensuiuant dixhuietieme iour dudit mois de Iuillet qu'il arriua sur le tarden la ville de Paris: & souppa cedit iour en l'ostel de son Lieutenant general Messire Charles de Meleun, & avecques luy y soupperent aussi plusieurs seigneurs, damoiselles, & bourgoises: auquel lieu il recita son aduenture tout ainsi aduenue audit Montlehery. Et en ce faisant dist & declaira de moult beaux mors & piteux, dequoy tous & toutes plorèrent bien largement. Et si dist plus que au plaisir de Dieu le lundy ensuiuant il retourneroit de rechief à l'encontre de ses ennemis, & qu'il mourroit en la poursuite, ou que brief en auroit le bout, dont il ne se fist riens: pource qu'il fut conseillé pour le mieulx du contraire, avecques ce qu'il fut lâchement seruy de ses gens de guerre, & ne tint point à luy, car il estoit assez & trop vaillant.

Et le vendredy ensuiuant dixneufieme dudit mois de Iuillet audit an soixante-cinq, vng Gentilhomme nommé Laurens de Mory près de Mictry en France, qui auoit esté constitué prisonnier en la Bastille saint Anthoine, pour occasion de ce qu'il auoit favorisé lesdits Bourguignons, & les auoit incités & menés en diuers lieux, en plusieurs maisons assises en diuers villaiges



villaiges d'entour Paris appartenans à aucuns bourgeois dudit lieu de Paris, pour icelles maisons pillier & prendre les biens desdits bourgeois de Paris. Et que en ce faisant avec plusieurs larrecins fut fait son procez sur lesdits cas audit lieu de la Bastille, par aucuns Commissaires à ce faire ordonnez. Par lesquelles fut dit & declairé audit de Mory qu'il estoit crimineux de crime de leze Majesté, & comme tel le condempnerent à estre escartellé es Halles de Paris, & ses biens & heritaiges acquis & confisqueés au Roy, dont & dequoy il appella en la Court de Parlement: par reuerence duquel appel fut differé d'estre executé pour ledit iour: Et le samedi ensuiuant par la Court de Parlement fut vuidé ledit appel, en corrigannt icelluy fut dit par Arrest de ladicte Court que ledit Laurens de Mory seroit pendu & estranglé au gibet de Paris. Et fust executé cedit iour.

Et cedit iour de samedi l'Euesque de Paris nommé Maistre Guillaume Chartier & aultres Conseilliers & gens d'Eglise de ladicte ville, furent deuers le Roy en son hostel des Tournelles. Et là fut proposé deuant luy par ledit Euesque & dictes de moult belles paroles, qui toutes tendoient affin que le Roy conduisist de là en auant toutes ses affaires par bon conseil, ce que le Roy accorda. Et fut lors ordonné que de là en auant iroient au Conseil du Roy avecques le Conseil ordinaire: c'est assauoir six Conseilliers bourgeois de ladicte ville, six aultres Conseilliers de la Court de Parlement, & six Clercs prins en l'Vniuersité de Paris. Et aussi pource que le Roy vit qu'il auoit moult d'ennemis en son

F

Royaume, mist en deliberation de trouuer des gens de guerre avecques ceulx que desia il auoit, & aussi combien on en trouueroit à Paris. Et à ceste cause fut ordonné que tous ceulx de Paris feroient prins par escrit & par dixenes, pour en prendre de chascune dixene dix hommes, mais il ne s'en fist riens.

Et au moyen de la venue du Roy à Paris, il conuient que plusieurs gens de guerre qui le suiuiroient feussent logez es villaiges d'antour Paris & de Brie, & aultres lieux voisins, lesquels gasterent & desconfirent tous lesdits villaiges, & prirent de fait & sans riens payer tous viures qu'ils y trouverent, & aultres choses qui appartenoyent tant aux habitans desdits villaiges que d'aultres demourans à Paris. Et aussi quant le Roy se trouua à Paris il se trouua fort chargé des gens de guerre, pour lesquels payer de leursdits gaiges & soldes, luy conuint finer de grans sommes de deniers, car il ne recepuoit riens d'aucunes villes sur lesquelles lesdits gaiges estoient assignez, qui estoient tenues & usurpees par aucuns Princes qui ne vouloyent riens souffrir estre cueilly dudit payement en leur pays, fut contraint de faire emprunt d'argent sur plusieurs Officiers & aultres de la ville de Paris, ausquels de par luy fut demandé argent à prester, de quoy ils furent refusans, au moins de si grant somme que on leur demandoit. Et pour leur refus à aucuns d'eulx fut dit & declaire de par le Roy que de luy ils estoient priuez de toutes Offices Royaux, comme à maistre Jehan Cheneau Greffier de Parlement, maistre Martin Picard, Conseillier des Comptes, & aultres.

Et le mecredi ensuiuant vingtquarriesme iour de Iuillet audit an soixante cinq, le Roy fist bailler commission au Preuost forain de Senlis pour aler abatre les arches de pont sainte Maixances, pource qu'il estoit grant bruit que le seigneur de Saucuses avec grant nombre de gens de guerre, venoient audit lieu pour le prendre sus ceulx qui le tenoient pour le Roy. Et ce mesme iour le Roy en auoit donne la Capitainerie à Iehan L'orfeure Chastellain dudit lieu, & luy donna charge d'aler garder ladicte place, & luy deffendit bien fort queriens n'en feust rompu dudit pont. Et le vendredy ensuiuant le Roy ordonna qu'il demourroit deux cens lances à Paris, sous la charge & conduite dudit Bastard d'Armignac Conte de Comminge, de messire Gilles de saint Symon Bailly de Senlis, le sire de la Barde, de Charles des Mares, & dudit messire Charles de Meleun, que le Roy continua Lieutenant pour luy en ladicte ville, à la relation & requeste d'aucunes gens d'Eglise, & des Preuosts des Marchans & Escheuins de ladicte ville.

Et le samedy ensuiuant vingt-septiesme iour dudit mois de Iuillet audit an soixante cinq, vng nommé Iehan de Bourges qui auoit esté Clerc & seruiteur de maistre Iehan Berard Conseillier du Roy nostre sire en la Court de Parlement, qui auoit esté mis & constitué prisonnier avec Gacion Meriodeau & François Meriodeau son frere, pour occasion de ce qu'ils & aultres, s'estoient tirez de Paris en Bretagne par deuers mondit seigneur de Berry, en conspirant contre le Roy: fut icelluy Iehan de Bourges tiré hors de la

Bastille, & ledit François Meriodeau. Et par la sentence du Preuost des Mareschaux furent noyez en la riuierẽ de Seine par le bourreau de Paris, deuãt la tour de billy : & le mardy ensuiuant vingt-neufiesme iour d'icelluy mois ledit Gadien qui estoit Notaire du Roy au Chastellet de Paris, & pour ledit cas fut pareillement tiré dudit lieu de la Bastille, comme les aultres dessus nommez, & noyé au lieu dessusdit. Et pareillement y fut aussi noyé vng pource ayde à Maçon qui auoit esté enuoyé de Paris à Estampes de par la femme d'vng nommé maistre Odo de Bucy, pour porter lettres audit de Bucy son mary, qui lors estoit Aduocat au Chastellet de Paris, & qui estoit audit lieu d'Estampes avec le frere dudit seigneur de saint Pol, dont il estoit seruiteur, estant audit Estampes avec les aultres Princes & Seigneurs estans contre le Roy, comme dir est. Et lequel ayde à Maçon rapporta responce desdictes lettres à ladite femme de maistre Odo, qui auoit gaigné par chascun iour qu'il auoit vacqué à aler audit lieu d'Estampes & retourner à Paris, par chascun iour deux sols parisis. Pour lequel cas ledit ayde à Maçon fut aussi condempné à mourir, & fut noyé au deuant dit lieu apres les aultres dessus nommez. Et le lendemain fut fait commandement à icelle femme dudit maistre Odo de vider hors de la ville de Paris, ce qu'elle fist & s'en ala à saint Anthoine des champs hors Paris : ou depuis tousiours s'est tenuë, iusques à ce que l'appointement fut fait entre le Roy & les Princes & Seigneurs, qui depuis vindrent à saint Mon, Conflans, & deuant Paris.

Et apres que ladiete rencontre eust esté ainsi faicte audit lieu de Montlehery, lesdits Princes tous ensemble ainsi estans contre le Roy que dit est, furent & demourerent ensemble, semirent audit lieu d'Estampes & s'y tindrent par l'espace de quinze iours: Et apres se deslogerent & prindrent le chemin par deuers sainct Mathurin del'Archant, Moret en Gastinois, Prouins & le pays d'enuiron. Et quant le Roy en eut ouy les nouuelles, il enuoya à Meleun, Monstereau, à Sens, & aultres villes d'enuiron, des gens de guerre, & de l'artillerie pour garder lesdits lieux, & pour faire des sailles sur les dessusdits quant ils verroient leur auantage.

Et le samedi tiers iour d'Aoust audit an soixante-cinq, le Roy ayant singulier desir de faire des biens à sa ville de Paris & aux habitans d'icelle, remist le quatriesme du vin vendu à detail en ladiete ville au huitiesme: & veult que tous preuillegez peussent ioyr de leurs preuilliges, tout ainsi qu'ils auoient fait durant la vie dudit deffunct Roy Charles.

Et en oultre ordonna toutes les impositions qui anoient cours en ladiete ville estre abatuës, hors & excepté les denrees de six fermes vendues en gros en icelle ville: c'est assauoir les fermes de la busche, du pie fourchié, le drap vendu en gros, le poisson de mer. Et ce mesme iour ces choses furent publiees à son de trompe par les carrefours de Paris, en la presence de sire Denis Hesselin Esleu sur le fait des Aydes à Paris: Et incontinant apres ledit cry tout le populaire oyant icelluy, crioient de joye & de bon vouloir, Noel, Noel: Et en furent faits les feux parmy les rues de ladiete ville.

Et le Dimenche ensuiuant quart iour d'Aoust, Reuerend Pere en Dieu maistre Iehan Balue fut sacré a Euesque d'Eureux en l'Eglise nostre Dame de Paris, & ce mesme iour le Roy souppa en l'ostel de son Tresorier des finances, maistre Estienne Cheualier : & le mardy ensuiuant fut executé es Halles de Paris vng ieune compaignon nommé maistre Pierre de Gueroult natif de Lesignen, & illec escartellé par la sentence du Preuost des Mareschaulx, pour occasion de ce qu'il auoit confessé estre venu de Bretaigne à Paris, & illec enuoyé de l'ordonnance du Duc de Bretaigne pour dire & aduertir le Roy que plusieurs Capitaines, & chefs de guerre de son ordonnance & retenue estoient à luy contraires, pour & affin de mettre dissension entre le Roy & lesdits gens de guerre, & aussi pour accuser plusieurs notables personnes de Paris, de non estre à luy feaulx, & avecques ce pour espier & regarder quels gens de guerre & puissance le Roy auoit pour tout ce que dit est, & rapporter ausdits Princes & seigneurs au Roy contraires, pour mieulx & plus aisément executer contre luy leur dampnee entreprise. Et pour ledit cas fut ainsi executé que dit est, ses biens & heritaiges au Roy acquis & confisquez.

Audit temps lesdits Bretons & Bourguignons passerent les riuieres de Seine & Yonne par basseaulx qu'ils trouuerent à Moret en Gastinois & ailleurs. Et audit passaige faisant se y trouua Salezart & aucuns de la compaignie de Iouachin Rouault pour cuider empescher ledit passaige, mais ils n'estoient que peu de gens & sans artillerie. Et les ennemis du Roy en auoient lar-

gement, parquoy les conuint recueillir & retraire: & audit passaige fut tué par lesdits Bretons contre lesdits gens du Roy d'une serpétine, qui d'vng coup emporta le bras d'un Paige, & apres vint frapper vn gentilhomme nommé Pamabel parent dudit Iouachin Rouault, parmy le petit ventre, & apres en tua trois aultres hommes de guerre.

Et le ieu dy ensuiuant huietiésme iour d'Aoust, Monseigneur de Pretigny Conseillier du Roy nostre Sire & President en sa Chambre des Comptes à Paris, & Chrystoffe Paillart aussi Conseillier dudit seigneur en ladicte Chambre, que le Roy auoit enuoyez par deuers le Duc de Calabre qu'ils trouuerent au pays de l'Auxerrois, pour luy porter lettres de par le Roy, s'en retournerent à Paris par deuers le Roy a toute la response qu'ils auoient eue dudit de Calabre. Et le samedi ensuiuant dixiesme iour dudit mois le Roy se partist de Paris pour aler à Rouen, Eureux, & aultres lieux en Normendie, & ala ce iour à Ponthoise: & à son parlement de Paris ordonna plusieurs francs archiers qui estoient venus dudit pays de Normendie, & enuiron quatre cens lances des compaignies de feu Floquet, du Conte de Boulongne, de feu Geuffroy de saint Belin, du seigneur de Craon & du seigneur de la Barde, estre & demourer à Paris pour la garde & tuton de ladicte ville.

Et ledit iour du parlement du Roy se tint & assembla vn grant conseil en l'ostel de ladicte ville de Paris, & en icelluy tenant vint & arriva audit conseil vng Gentilhomme de par le Roy nommé le seigneur de

CHANDOS

Buiffet qui vint dire à tout le conseil ainſi aſſemblé, que le Roy leur mandoit de par luy qu'il auoit changé propos, & que le mardy enſuiuant il feroit de ſon retour audit lieu de Paris: & au regard deſdits francs archiers de Normendie qui eſtoient des Bailliages de Caën & Alençon, ils furent logez par diſtribution: c'eſt aſſauoir ceulx de Caën qui auoient iacquectes ou eſtoit eſcript deſſus la broderie Caën, furent mis & logez tout dedens l'oſtel & pourpris dudit Temple: & les aultres dudit Bailliage d'Alençon qui auoient iacquectes ou eſtoit deſſus eſcript auſſi de broderie, *Audi partem*: furent logez au quartier dudit Temple, ou ils peurent eſtre logez oultre l'ancienne porte dudit Temple.

En ce temps maïſtre Iehan Berard Conſeillier du Roy en ſa Cour de Parlement, ſ'en partiſt & ala audit pays de Bretagne par deuers monditz ſeigneur de Berry, pource qu'il diſoit qu'on auoit arreſtee priſonnierre ſa femme à Paris, & fait vuidier hors de ladicte ville, pource que on la chargeoit d'auoir fauoriſé monditz ſeigneur de Berry & aultres ſes ſeruiteurs contre le Roy.

Audit temps fut publié & crié par les carrefours de Paris, que tous ceulx de ladicte ville qui auoient marests aux chāps d'icelle ville, feiſſent couper & abatre tous les faulx & aultres arbres eſtans en iceulx; & tout ce dedens deux iours, ou autrement tous iceulx faulx & aultres arbres eſtoient habandonnez à tous ceulx qui les voudroient abatre. Et ce meſme iour vint & arriua à Paris monsieur le Conte d'Eu, comme Lieutenant



tenant du Roy. Et comme tel y fut receu ledit iour qui estoit le treiziesme iour d'Aoust mil quatre cens soixante cinq.

Et le mardy ensuiuant quatorziesme iour dudit mois d'Aoust, ledit Casin Chollet dont deuant est parlé, pour le cas dessusdit de auoir crié en courant par les ruës de Paris, boutez vous en vos maisons & fermez vos huis, car les Bourguignons sont dedens Paris. Et qui à cause de ce auoit esté depuis constitué prisonnier par sentence du Preuost de Paris fut condempné à estre batu par les carrefours de ladicte ville, & priué de toutes Offices Royaux, & estre vng mois encores en prison au pain & à l'eauë. Et fut ainsi mené que dit est battre par lesdits carrefours dedens vng ord, villain & paillard tumbereau, dont on venoit de porter la bouë en la voirie. Et en le batant par lesdits carrefours comme dit est, le Roy crioit à haulte voix au bourreau, batez fort & n'espargnez point ce paillard, car il le a bien pis desseruy. Et ce mesme iour arriua à Paris deux cens archiers tous à cheual, dont estoit Capitaine Mignon: tous lesquels estoient assez bien en point, au nombre desquels y auoit plusieurs cranequiers, voulgiers & couleuriniers à main. Et tout derriere icelle compaignie aloient à cheual huiët ribauldes & vng moine noir leur confesseur.

En ce temps messire Charles de Meleun qui auoit esté Lieutenant pour le Roy audit lieu de Paris durant le temps dessusdit fut desappoincté de sa charge, & fut baillee audit seigneur d'Eu, & au lieu dudit estat de Lieutenant le Roy le fist son grant maistre d'hostel; &

G

si luy bailla le bailliage & la Capitainerie d'Eureux, & la Capitainerie de Honnefleu.

En ce temps aucuns desdits Bourguignons & Bretons qui s'estoient rafreschis en la ville de Prouins, s'en retournerent à Laigny sur Marne le iour & feste de my-Aoust. Et le vendredy ensuiuant vindrent logger à Creteil maison sur Seine, Cheelle Sainte, Bapteur, & aultres lieux illec enuiron. Et pource qu'on doubtoit fort lesdits Bourguignons & Bretons retourner deuant Paris, & qu'il fut rapporté que maistre Girauld canonnier s'estoit venté de asseoir & assortir de son artillerie à la voirie deuant la porte saint Denis & celle de saint Anthoine pour fouldroyer aucuns lieux de ladicte ville, & au long des meurs fut ordonné ce iour en ladicte ville que chascune personne alast le landemain en ladicte voirie garni de pics & de pelles, pour ruer & espendre icelle voirie, ou ce que on en pourroit faire, & ainsi fut fait : mais on ny fist que peu ou neant, & fut tout laissé. Et à ceste cause furent faits dessus lesdits murs plusieurs tauldis, bouleuers, & tranches au long desdits murs, pour la seureté & defence de ladicte ville & des habitans d'icelle, & aussi de ceulx qui se employeroient à la garde & deffence d'icelle. Et le samedi ensuiuant plusieurs notables personnes & de diuers estats de ladicte ville furent par deuers mondit seigneur le Conte d'Eu Lieutenant pour le Roy en ladicte ville, auquel ils firent de moult belles remonstrances qui concludoient qu'il luy pleust pour le bien, prouffit & vtilité du Roy, de ladicte ville & des subiects d'icelle, & du Royaulme, de aduiser façon &

moyen par deuers lefdits seigneurs de Berry, Bourgonne, Bretagne & aultres deuant nommez, d'auoir avec eulx aucune bonne pacification de paix ou accord à l'honneur du Roy & au soulagement & bien dudit Royaulme: A tous lesquels ledit monsieur d'Eu fist responce telle que le Roy l'auoit mis & laissé à Paris pour y estre son Lieutenant, & en son absence pour donner de tout son pouoir, prouision à tout ce qui seroit necessaire tant au Roy que au fait dudit Royaulme, & que à ce faire estoit bien tenu & obligé, & que à tout ce que possible luy seroit il mettroit toute possibilité de pourchasser ledit accord & bonne vnion avec les seigneurs dessusdits; & que si mestier estoit luy mesmes se offroit d'y aler en personne, & plusieurs aultres choses luy fut dit de par mondit seigneur d'Eu & maistre Jehan de Ponpaincourt son Conseillier.

Et le lundy ensuiuant lefdits Bretons & Bourguignons & aultres de leurdicte compaignie vindrent deuant le pont de Charenton, auquel lieu ils assirent plusieurs pieces d'artillerie, & d'icelles tirerent aucuns coups contre la tour dudit pont. Et incontinent ce fait ceux qui auoient la garde dudit pont l'abandonnerent & s'en vindrent à Paris, parquoy & qu'ils n'eurent nulle resistance, passerent incontinent par dessus ledit pont avecques leurdicte artillerie. Et ce mesme iour enuiron vespres iceulx Bretons & Bourguignons vindrent voulder pardeuant Paris, & là y eust deux francs archiers de Caën qui y furent tuez, & aussi y eut aucuns d'iceulx Bretons & Bourguignons prins & amenez à Paris: & celle nuit aucuns des dessusdits Bretons

& Bourguignons s'alerent loger dedens le parc du bois de Vincennes enuiron de trois à quatre mil hommes. Et le mardy ensuiuant mondit seigneur d'Eu enuoya deuers lesdits seigneurs vng nommé le seigneur de Rambures pour sçauoir de leur intention & qu'ils vouloient dire. Et le landemain ledit seigneur de Rambures retourna à Paris : mais de ce qu'il fist par deuers lesdits seigneurs en fut peu de bruit, & ce iour vindrent voulster deuant Paris : & aussi yffit aulx champs des gens de guerre de Paris; mais il n'y eust riens fait sinon qu'il y eust vng franc archier d'Alençon qui fust tué par lesdits Bourguignons.

Et le iedy ensuiuant vingt & deuxiesme iour dudit mois d'Aoust lesdits Bretons & Bourguignons vindrent escarmoucher, & il yffit de Paris plusieurs gens de guerre aux champs, & là y eut vng Breton archier du corps de monsieur de Berry qui estoit habillié d'vnes brigandines couuertes de veloux noir à cloux dorez, & en sa teste vng bicoquet garny de bouillons d'argent dorez qui vint frapper vng cheual sur quoy estoit monté vng homme d'armes de l'ordonnance du Roy par les flans & la cuisse, tellement que ledit homme d'armes en s'en retournant à Paris ledit cheual cheut sous luy tout mort deffous les galleries des Tournelles : Et incontinent que ledit Breton eut ainsi nauré ledit cheual, vint à luy vn archier de la compagnie dudit Monsieur d'Eu, qui le trauersa tout oultre le corps d'vne demie lance, & incontinent cheut à terre tout mort, & fut son cheual amené & habillement prins pour apporter à Paris, & le corps laissé mort en chemi-

se. Et bien tantost apres vint vng Herault à la porte S. Anthoine qui requist auoir ledit corps mort: ce qui luy fust octroyé, & le fist porter à S. Anthoine des champs hors Paris, où illec fut inhumé & son seruice fait.

En cedit iour mondit seigneur de Berry qui estoit logié à Beaulce avecques plusieurs desdits seigneurs de son sang, enuoya ses Heraulx à ladicte ville de Paris qui apporterent de par luy quatre lettres, les vnes aux bourgeois, manans & habitans d'icelle ville, vnes à l'Vniuersité, les aultres aux gens d'Eglise, & les aultres à la Court de Parlement. Qui contenoient en effect que luy & ceulx de son sang avecques luy tous assemblez, estoient illec venus pour tout le bien vniuersel du Royaulme de France, & que par ladicte ville luy feussent enuoyez cinq ou six hommes notables pour ouyr les causes pourquoy luy & ceulx de son dit sang estoient ainsi venus que dit est. En obtemperant auxquelles lettres & pour icelles oyr & escouter furent esleuz & deleguez pour ladicte ville, maistre Iehan Choart Lieutenant Ciuil au Chastellet de Paris, maistre François Hasle Aduocat en Parlement, & Arnault Luillier Changeur de Paris. Pour l'Eglise de Paris maistre Thomas de Courcelles Doyen de Paris, maistre Iehan de Loliue Docteur en Theologie, & maistre Eustace Luillier Aduocat en ladicte Court de Parlement. Et pour ladicte Court de Parlement, maistre Iehan le Boulengier, maistre Iehan le Sellier Archidia-cre de Brie, & maistre Iaques Fournier. Et pour l'Vniuersité maistre Iaques Ming lisant pour la faculté des Ars, maistre Iehan Luillier pour Theologie, mai-

stre Jehan de Montigny pour Decret, & maistre Anguerrant de Parenti pour Medecine. Tous iceulx nommez dessus estoient menez & conduits par Reuerend Pere en Dieu le deuant nommé Guillaume Euesque de Paris, qui eut la charge de presenter, mener & conduire tous iceulx nommez.

Ledit iour y eut vng archier du seigneur de la Barde monté à cheual, armé & deliberé d'aler à son auenture, vint à la porte saint Anthoine: auquel archier le Bastard du Maine qui gardoit la porte saint Anthoine dist & deffendit qu'il n'y alast point, lequel archier luy respondit que si feroit, & qu'il n'estoit point à luy ne sous luy: mais estoit audit de la Barde son maistre & Capitaine. Et lors pour son refus ledit Bastard du Maine tira son espee pour frapper icelluy archier, & ledit archier tira aussi la sienne pour se reuencher. Et alors ledit Bastard du Maine cria à ses gens & aultres estans à ladicte porte, prenez ce ribault & le tuez. Et incontinent fut couru sus audit archier, & illec le tuerent tout mort. Ce iour aussi vint nouvelles que maistre Pierre Doriolle general des Finances du Roy, l'auoit delaisé & s'en estoit alé rendre à monseigneur de Berry. Cedit iour aussi les Ambassadeurs de Paris qui ainsi estoient alez à Beaulce par deuers les seigneurs deuant dits, s'en retournerent à Paris & vindrent arriuer en l'ostel des Tournelles, où ils trouuerent mondit seigneur d'Eu: auquel ils dirent ce qui leur auoit esté dit & proposé.

Et le samedi ensuiuant furent tous les dessus nommez Ambassadeurs en l'ostel de ladite ville, ou estoient

assemblez plusieurs notables personnes pour oyr ce qu'il leur auoit esté dit par les dessusdits Princes & seigneurs, à quoy ne fut riens conclud pour la matinee: mais fut ordonné que ledit iour apres disner seroient assemblez en ladicte ville, l'Vniuersité, l'Eglise, la Court de Parlement, & aultres Officiers, & le corps de ladicte Ville, tous lesquels s'y trouuerent: & conclurent qu'au regard des trois Estats que requeroient estre tenus lesdits Princes & Seigneurs dirent que la requeste estoit iuste. Et en oultre que passaige leur seroit baillé à Paris, & des viures en les payant, & aussi en baillant par eulx bõne caution, que nul mal ou esclandre ne seroit faict par eulx ou leurs gens en ladicte ville ne aux habitans d'icelle, sauf sur tout le bon plaisir du Roy. Et a tant iceulx Ambassadeurs retournerent par deuers lesdits Princes leur dire leurdicte deliberation. Et est assauoir que durant que ledit Conseil fut en ladicte ville a ladicte heure d'apres disner, furent tous les archiers & arbalestiers de Paris en armes deuant ledit hostel, pour garder d'oppresser les oppinans audit Conseil. Et ledit iour de samedi les gens d'armes de l'ordonnance du Roy estans en icelle ville, firent leurs monstres au long de ladicte ville, & tous marchans les vngs apres les aultres par ordre, ce qui faisoit bien bon veoir. Et premierement aloient les archiers à pié dudit Normendie, & puis les archiers à cheual, & en apres les hommes d'armes des compaignies de mondit seigneur d'Eu, de monseigneur de Craon, de monseigneur de la Barde, & dudit bastard du Maine, & pouoient bien estre en tout de quatre à cinq cens lances

bien en point, sans ceulx de pied, qui bien estoient quinze cens homes & mieux. Et ce mesme iour le Roy escriuist lettres à ceulx de Paris, par lesquelles leur mandoit qu'il estoit à Chartres avecques son oncle monseigneur du Maine a tout bien grant nombre des gens de guerre, & que dedés le mardy ensuiuant il feroit à Paris. Et ce mesme iour vint & arriua à Paris l'Admiral de Montauban & grant quâtité de gens de guerre avecques luy. Ce iour se deslogea de Beaulce mondit seigneur de Berry pour aler à S. Denis, & puis s'en retourna audit lieu de Beaulce pour ce qu'on luy dist qu'il seroit plus seurement audit lieu de Beaulce, ou près d'illec estoient logez lesdits ennemis, que d'estre seul audit lieu de saint Denis, & aussi que on luy ala dire que le Roy venoit & retournoit audit lieu de Paris. Et le mercredy ensuiuant le Roy retourna à Paris, & amena avecques luy son oncle monseigneur du Maine, monseigneur de Panthieure & aultres, & ramena son artillerie qu'il auoit amenee avecques luy, & grant nombre de pionniers prins au pays de Normendie, qui tous furent logez à l'ostel du Roy à saint Pol. Et de ladicte venuee que fist le Roy en ladicte ville de Paris, fut le populaire d'icelle moult fort resioüy en criant à haulte voix par tout où il passoit par ladicte ville, Noel. Et le landemain bien matin lesdits Bourguignons & Bretons vindrent bailler vne reuerdie deuant le bouleuert de la Tour de billy, & auoient avecques eulx trompettes, clerons, hauts menestriers, & aultres instrumens, dont ils faisoient grant bruit. Et illec & deuant la Bastille saint Anthoine vindrent faire



faire vng grand bruit & cry, en criant à l'assault & à l'arme dont chascun fut fort espouuenté, & s'en ala chascun sur les murs & en sa garde. Et ledit iour vindrent lesdits Bretons & Bourguignons voulster deuant Paris, dessus lesquels yssirent grant nombre de gens de guerre de l'ordonnance du Roy, & tant par port d'armes que de grosses serpentines du Roy qui fort tirerent, y eut de iour plusieurs desdits Bretons & Bourguignons tuez. Et le vendredy ensuiuant vindrent & arriuerent à Paris des farmes & aultres vitailles du pays de Normendie. Et entre les aultres choses y fut amené de la ville de Mante deux cheuaulx chargez de pastez d'anguilles de gort, qui furent vendus deuant le Chastellet de Paris en la place à la volaille. Et ce mesme iour apres disner yssirent dehors Paris Poncet de Riuiere & ceulx de sa compaignie, qui bien pouoient estre de trois à quatre cens cheuaulx, cuidans trouuer lesdits Bretons & Bourguignons, mais point ne s'y trouuerent, & ne fut lors riens fait: Et la nuit les Bourguignons qui estoient logez à la grange aux Merciers s'en deslogerent, pource que l'artillerie du Roy portoit de Paris iusques en ladicte grange: & au desloger abatirent toute la couuerture dudit lieu, & en emporterent tout le preparatif, comme huis, fenestres & aultres bois pour eulx taudir & pour ardoir. Et ce iour le Roy fist dire à cinq des deuant nommez qui auoient esté a Beaulce deuers lesdits Princes, apres la deliberation ainsi faicte que dit est, deuant audit hostel de la ville qu'ils vuidaissent hors de la ville: desquelles cinq personnes les noms ensuiuent: C'est assauoir

H

maistre Iehan Luillier Curé de sainct Germain Lau-  
xerrois, maistre Eustace Luillier, & Arnaud Luillier  
ses freres, maistre Iehan Choart, & maistre François  
Hasle Aduocat en Parlement.

Et le samedy ensuiuant dernier iour d'Aoust y eut  
moult belles faillies faictes par les portes de sainct An-  
thoine & sainct Denys. Et du costé de ladicte porte  
sainct Denys y eut vng archier de l'Ostel du Roy tué:  
& du costé desdits Bretons & Bourguignons en y eut  
aussi de tuez & naurez. Et si aduint que vng gentil-  
homme nommé le seigneur de sainct Quentin fut en  
ladicte faillie ou escarmouche abbatu de dessus vng  
bon courfier sus lequel il estoit monté: & apres fut re-  
coux, mais il perdit son dit courfier & deux aultres  
beaulx cheuaulx. Et du costé de ladicte porte sainct  
Anthoine ny fut riens fait. Et ce iour le Roy faillit aux  
champs du costé de son boieuart de la Tour de billy,  
& illec fist passer au trauers de Seine de l'autre costé, de  
trois à quatre cens pietons pionniers, qui estoient ve-  
nus du pays de Normendie pour aler pionner à l'en-  
droit du port à l'Anglois, & deuant Conflans tout de-  
uant le siege desdits Bourguignons à l'endroit de la ri-  
uiere: car on disoit que lesdits Bourguignons auoient  
intention de faire vng pont pour passer ladicte riuiere.  
Et audit lieu le Roy ordonna certain nombre de gens  
de guerre pour garder & deffendre de faire ledit pont  
& passer ladicte riuiere, & apres lesdits pionniers ainsi  
passez que dit est, le Roy aussi passa apres eulx ladicte  
riuiere tout à cheual dedens vng bac sans descendre de  
dessus ledit cheual.

Et le Dimenche ensuiuant premier iour de Septembre lesdits Bourguignons mirent & assirent vng pont pour passer ladicte riuiere audit port à l'Anglois. Et aduint que à l'eure qu'ils auoient delibéré de passer par dessus ledit pont arriua audit port à l'Anglois certain grant nombre de francs archiers & aultres gens de guerre pour le Roy, qui vindrent asseoir engins au bout dudit pont, dont ils tirerent à l'encontre desdits Bourguignons, & en tuerent & naurerent, & leur conuint reculer. Et de l'autre costé de la riuiere du costé desdits Bourguignons passa à nage vng Normant, qui ala coupper les chables ordonnez à porter ledit pont, & partant ledit pont s'en ala aual l'eauë. Ce iour aussi fut tiré grant quantité d'artillerie dedens l'ost desdits Bourguignons, pourquoy les conuint reculler plus arriere. Ce iour aussi lesdits Bourguignons tirent de leur artillerie aux gens du Roy estans audit port à l'Anglois, & y eut vn Gentilhomme de Normandie qui eut la teste emportee d'vng coup de serpentine. Aussi vindrent & arriuerent à Paris par deuers le Roy deux Ambassades, l'vne pour le Duc de Nemours, l'autre pour le Conte d'Armignac. Ledit iour aussi fut faicte belle saillie aux champs par messire Charles de Meleun & Malortie, & ceulx de leur compaignie qui faillirent tous bien en point pour escarmoucher sus lesdits Bretons & Bourguignons. Et ledit iour aussi arriua à Paris les vouldiers & cranequiniars du pays & Duché d'Anjou qui bien pouoient estre quatre cens hommes qui aussi ledit iour furent menez aux champs pour escarmoucher lesdits Bretons &

Bourguignons, & y eut à ceste fois deux archiers de l'ordonnance du Roy tuez, & vng prins: & les gens du Roy prindrent sept Bourguignons & en tuerent deux. Ledit iour encores fut à Paris à seureté par deuers le Roy le Conte de Sommerfet du Royaulme d'Angleterre qui estoit de l'ost desdits Bourguignons, & parla au Roy qui estoit en la Bastille saint Anthoine, assez longuement, & puis luy fut donné à boire, & print congie du Roy, qui au partir pource qu'il plouuoit luy donna sa cappe qui estoit de veloux noir.

Et le lundy ensuiuant le second iour de Septembre audit an soixante cinq monseigneur du Maine qui estoit logé à Paris deuant l'ostel du Roy, enuoya à monseigneur le Duc de Berry deux muids de vin vermeil, quatre demies queues de vin de Beaulne, & vng cheual chargé de pommes, de choul & de raues. Et le mardy ensuiuant furent nommez & esleus Ambassadeurs pour le Roy & lesdits Bourguignons, pour communiquer sur leurs differens; C'est assauoir pour le Roy furent esleuz mondit seigneur du Maine, le seigneur de Précigny President des Comptes, & maistre Jehan Dauuier President du Parlement de Thoulouse. Et du costé desdits Princes & seigneurs contraires, furent nommez le Duc de Calabre, le Conte de saint Pol, & le Comte de Dunois. Et ce iour aussi par cas de fortune fut mis & bouté le feu dedens la pouldre à canon qui estoit à la porte du Temple qui en emporta le comble de ladicte porte, & fist descharger huit pieces d'artillerie estans à ladicte porte, qui à ladicte heure estoient toutes chargées. Et incontinent que lesdits

seigneurs Ambassadeurs furent aussi esleuz & nommez, pourparlerent ensemble sur l'accord & pacification d'entre eulx, & fut fait treue iusques au iedy ensuiuant. Pendant laquelle treue ne fut faicte aucune guerre de costé ne d'aultre: mais durant icelle chacun mist peine de sa part de soy fortifier. Et durant icelle treue y eut plusieurs alces & venues faictes de costé & d'aultre, & iusques audit iour de iedy que ladicte treue denoit faillir que mondit seigneur du Maine en retournant del'ost desdits Bourguignons dist aux portiers de ladicte porte saint Anthoine qu'ils feissent tous bonnes chieres, & que au plaisir de Dieu auant qu'il feust hui & iours hors à aduenir, tous auroient cause de ioye & de crier Noël. Et ce dit iour ladicte treue fut continuee iusques au mercredy ensuiuant. Et le vendredy apres furent tous iceulx seigneurs consulter ensemble en la granche aux Merciers, dessoubz vng pambon pour ceste cause illec ordonné: & cependant lesdits Bretons & Bourguignons en grant nombre comme deux mil ou enuiron, & des plus honnestes venoient en grant pouce eulx monstrer deuant Paris, iusques au fosse de derrière S. Anthoine des champs. Et aussi y fut hors de Paris plusieurs personnes pour les aller voir & parler à eulx, nonobstant que le Roy s'eust desseingné, & en fut bien mal content, & voyant ces choses fut meue de leur faire jecter plusieurs canons & serpentines qui estoient chargees en la Tour de Billy, & près d'illéc. Et quant lesdits de Paris retournèrent en la ville il en fut prendre les noms de plusieurs par escrit. Et le Dimenche ensuiuant huietiesme

iour de Septembre feste de Nostre Dame, le Roy partit de son hostel des Tournelles pour aler en la grant Eglise Nostre Dame : & en y allant passa par l'Eglise de la Magdelene, où illec il se fist frere & compaignon de la grant Confrairie aux bourgeois de Paris, & auecques luy s'y mirent l'Euesque d'Eureux & aultres. Et le lundy ensuiuant neufiesme iour dudit mois de Septembre, lesdits Bretons & Bourguignons furent es terroüers de Clignencourt, Montmartre, la Courtille & aultres vignobles d'entour Paris, prendre & vendengier toute la vendange qui y estoit, jaçoit-ce qu'elle n'estoit point meure, & en firent du vin tel quel pour le boire. Et à ceste cause furent ceulx de Paris contrainctz de vendanger les aultres vignes par tout autour de Paris, qui n'estoient pas à demy meures, & aussi le temps leur fut fort contraire : Et fut la plus meschante annee & poure vignece qui long temps fut sceüe en France, & l'appelloit on le vin de l'annee des Bourguignons.

En ce temps vindrent à Paris plusieurs des nobles de Normendie, pour seruir le Roy en ses guerres : tous lesquels furent logez aux faulxbourgs de saint Marcellez Paris. Entre lesquels en y auoit aucuns particuliers qui firent moult de maux & larcins, & de ce en furent deux reprins par aucuns des bourgeois de ladite ville, & qui contre leur gré & volenté y vouloient entrer. Et pour le reffus qui leur en fut fait par lesdits bourgeois, leur dirent ceulx de Normendie plusieurs iniures & mauuaises parolles, en eulx rebellant à l'encontre d'eulx & en les appelant traistres Bourguignons,

& qu'ils les mettroient bien en point, & qu'ils n'estoient venus dudit pays de Normendie à Paris, que pour les tuer & piller. Desquelles choses information fut faicte à la plainte de ceulx dudit Paris, qui desdites paroles se sentirent fort iniuriez. Et veüe icelle le principal malfaicteur & prononceur desdictes parolles, fut condempné à faire amende honorable deuant l'ostel de ladicte ville au Procureur d'icelle pour toute ladicte ville, teste nuë, desseint, vne torche au poing, En disant par luy que faulusement & mauuaisement il auoit menty en disant lesdictes parolles: En priant & requerrant icelles luy estre remises & pardonnées, & apres eut la langue percee, dont il auoit proferé lesdictes parolles, & ce fait fut banny.

Et le lundy ensuiuant les Bourguignons se vindrent monstrier deuant Paris, entre lesquels y estoit monseigneur de saint Pol, pour parler auquel le Roy yssit de hors Paris & parlerent ensemble bien deux heures. Et pour s'en retourner seurement le Roy bailla pour luy en hostaige monseigneur le Conte du Maine, qui demeura en l'ost desdits Bourguignons iusques au retour de mondit seigneur de saint Pol: & ce mesme iour le Roy en retournant des champs dist à plusieurs de Paris estans à ladicte porte saint Anthoine, que lesdits Bourguignons ne leur donoeroient plus tant de peine qu'ils auoient fait, & qu'il les en garderoit bien: & lors vng Procureur de Chastellet nommé Pierre Beron luy respondit, Voire Sire: mais ils vendent nos vignes & mangent nos raisins sans y sçauoir remedier. Et le Roy repliqua qu'il valloit mieux qu'ils

vendangeassent lesdictes vignes, & mengeassent lesdits raisins que ce qu'ils venissent dedens Paris prendre leurs tasses & vaillant qu'ils auoient mis & mussez dedens leurs caues & celliers. Et le vendredy ensuiuant vint & arriua es Halles de Paris deux cens cheuaux tous chargez de marec & de toutes manieres & sortes, & y vint aussi plusieurs faulmons, esturgons, & du harenc frais, en despir & malgré de tous lesdits Bourguignons, Bretons & autres, ainsi estans deuant Paris, qui auoient menassez ceulx de ladicte ville de leur faire mengier leurs chats & leurs rats par famine. Et depuis fut ladicte treue continuee par deux ou trois fois iusques au dixhuitiesme iour de Septembre, pendant laquelle lesdits Bretons & Bourguignons se autrailerent fort en leur ost, à la grant charge & foule du pays & du peuple. Et n'est point à doubter que quant le Roy eust voulu dire auant, & qu'il eust esté bien seruy des gens de guerre prenans les gaiges & souldées, avecques les nobles & peuple de Paris, qui bonne deuotion auoient au saint: il eust subiugué & mis tous lesdits ennemis en tel estat que iamais ne feussent retournez dont ils estoient partis, pour venir deuant ladicte ville de Paris.

Et ledit iour de mercredy dixhuitiesme iour dudit mois de Septembre, nonobstant le pourparlé desdits Ambassadeurs de costé & d'autre, fut tout rompu & perdu le bon espoir que on auoit eu parauant.

Et cedit iour de mercredy fut desmeparé le siege que le Roy auoit fait audit port à l'Anglois, auquel siege auoient esté faictes de belles tranchées & boulleuers, tentes



tehtes & pauillons : & apres ledit desemparement tous les gens de guerre estans audit siege s'en vindrent retraire & loger aux Chartreux près Paris, dedens lequel lieu des Chartreux furent logez six cens hommes de guerre & leurs cheuaulx. Et tellement en fut remply ledit lieu, que les saincts hommes Religieux de leans en furent dechassez & bouttez hors de leurs celles & lieux de deuotion. Et le landemain iour de icudy lestdits Bretons & Bourguignons passerent ladicte riuere audit port à l'Anglois, & vindrent au point du iour escarmoucher lestdits gens de guerre du Roy ainsi logez à saint Marcel, les Chartreux, & saint Victor, & en y eut de costé & d'autre de mors, naurez & pris. Et ce mesme iour se fist vng grant Conseil & assemblee en la Chambre des Comptes, auquel furent assemblez avecques aultres les seize Quarteniers d'icelle, les Cinquanteniers, & de chascun desdits Quarteniers six hommes notables avec aucuns Conseilliers de la Court de Parlement, Officiers & aultres. Et illec monseigneur le Chancelier Moruillier dist & exposa de par le Roy comment il s'estoit grandement mis en son deuoir, d'auoir offert aux Princes & seigneurs qui estoient deuant Paris aux demâdes qu'ils luy faisoient pour l'appanaige de monseigneur le Duc de Berry, pour lequel ils demandoient auoir la Duché de Guyenne, Poictou, & le pays de Xainctonge, ou de la Duché de Normendie. A quoy leur fut dit & respondu par ledit Conseil ainsi assemblez, que le Roy ne leur pouoit pas bailler aucun membre de la Couronne. Et depuis le Roy leur offrit bailler le pays de Champai-

gne & Brie, reserue à luy Meaulx, Montereau & Meleun, pour ledit appanaige. Et ausdits de Charrolois & aultres seigneurs fist de grans offres pour leurs desfrayemens, ce qu'ils ne deuoienc point refuser: mais riens ne voudrent accepter, & demoura tout iusques au vendredy matin ensuiuant: Auquel iour le ieune Seneschal de Normendie yffit hors de Paris a tout bien six cens cheuaux pour escambucher, & soy monstrer deuant les dessusdits. Et pareillement se monstrerent de l'autre costé de la riuere grant quantité de gens de guerre deuant lesdits Bourguignons, qui fort tirerent engins celle iournee, dont ils tuerent vng Gentilhomme de Poictou de la compaignie de monseigneur de Panthieure, qui se nommoit Iehan Chancreau seigneur de Pampelie. Et dedens les vignes pres saint Anthoine des champs, furent prins bien vingt ou vingt-quatre paillars Calabriens & Bourguignons, tous nuds & mal en point, qui tous furent vendus au batin, & en donnoit-on quatre pour vng escu, qui est audit prix six sous six deniers parisis la piece.

Et le samedi ensuiuant au point du iour vng nommé Loys Sorbier, qui estoit à Ponthoife Lieutenant de Iouachin Rouault Marechal de France, par faulce & mauuaise trahison qu'il fist & conspira contre le Roy son souuerain seigneur, broua dedens ladicte ville les Bretons & aultres ennemis du Roy, & en faisant par luy ladicte trahison mist en son appointement que ceulx qui estoient audit lieu de Ponthoife de la compaignie d'audit Iouachin qui ne voudroient demourer, s'en yroient franchement eulx & leurs biens

faufs. Et incontinent qu'il eut ainsi baillie ladicte ville de Ponthoise, il s'en partit luy & aucuns de sa compaignie, & alerent deuant Meulanc porter & monstrier l'enseigne dudit Louachin, affin que ceulx estans audit lieu les brouassent dedens sans en faire difficulté, en cuidant par luy qu'ils n'eussent point encores esté aduertis de ladicte trahison : mais auant qu'il vint ceulx dudit Meulanc estoient bien aduertis d'icelle trahison, & incontinent qu'il fut apperceu par lesdits de Meulanc qui ja estoient en armes dessus les murs, crièrent à haulte voix, alez faulx & mauuais traistre, & leur jetterent des engins dudit lieu. Et partant fut contraint de soy en retourner audit lieu de Ponthoise a toute sa honte. Et cedit iour ledit Sorbier escripuit vnes lettres audit Louachin, par lesquelles luy mandoit qu'il auoit mis & bouteré lesdits Bretons & aultres audit Ponthoise, & qu'il auoit esté conseillé de ainsi le faire pour le mieulx, & que de la faulte qu'il auoit faicte, luy & le Roy luy pardonnoient. Et fut la superscription desdites lettres estoit escript. A vous & au Roy. Et ce iour fut faicte saillie de Paris sur lesdits Bretons & Bourguignons, & y eut de prins, haurez & tuez de costé & d'aultre, & si y eut vng cheual de pris qui estoit tout bardé de cuyr bouilly, qui fut tué d'vng coup de coulourine que luy baillerent lesdits Bourguignons. Et le Dimanche ensuiuant au point du iour les dessusdits ennemis vindrent faire vng reueil deuant ladicte ville du costé de ladicte porte saint Anthoine, vindrent bien grant nombre iusques audit saint Anthoine des champs : & pout les faire despla-

cer leur furent jectez d'icelle ville plusieurs traicts de canons, serpentines, & aultre artillerie d'icelle porte saint Anthoine & de ladicte Bastille, & aultre chose ny fut faicte. Et le lundy ensuiuant de nuit apparut à ceulx qui faisoient le guet & arriereguet en ladicte ville, vne comecte qui vint des parties dudit ost cheoir dedens les fossez d'icelle ville à l'enuiron de l'ostel d'ardoise, dont plusieurs furent espouuentez, non sçachans que c'estoit: mais cuidans que ce eust esté vne fuzee ardant, illec jettée & enuoyee par lesdits Bourguignons.

Si en furent portees les nouuelles au Roy en son hostel des Tournelles qui incontinent monta à cheual & s'en ala dessus les murs au droit dudit hostel d'ardoise, & y demoura grant espace de temps, & fist assembler tous les Quarteniers de Paris pour aler chascun en sa garde dessus lesdits murs. Et à ceste heure courut bruit que lesdits ennemis ainsi estans deuant Paris s'en aloient & deslogeioient, & que à leur dit parlement mettoient peine de bruler & endommager ladicte ville par tout ou possible leur seroit: & fut trouué que tout ce il n'estoit rien. Audit temps lesdicts ennemis ainsi logez deuant Paris firent plusieurs ballades, rondeaulx, libelles diffamatoires, & aultres choses pour diffamer aucuns bons seruiteurs estans autour du Roy, afin que à ceste cause le Roy les print en sa mal-veillance, & les dechassast de son seruice. En ce temps les gens de guerre de l'ordonnance du Roy estans logez à Paris, y firent de grandes & bonnes chieres. Et en lieu de passe-temps y seduirent plusieurs

femmes & filles, qui par leur moyen en debaufferent & deguerpirent leurs menaiges & enfans, & les aultres ieunes filles seruans leurs maistres & seruices pour suire iceulx gens de guerre. Et entre aultres y eut vne ieune fille qui estoit fille d'vng Procureur de Chastellet de Paris nommé Eustache Fernicle qui auoit prins habit de damoiselle & grant estat, pource qu'elle auoit fiancé vng nommé le Chien natif de Carentem en Normendie, & seruiteur d'vng nommé le seigneur de sainte Marie dudit pays de Normendie. Laquelle ieune fille pource que ledit le Chien mettoit trop à l'espouser, se acointa d'vn archier de l'ordonnance du Roy, qui avecques luy l'emmena & accorderent leurs vielles ensemble, & en fut couroucé ledit le Chien, & n'y sceut remedier: mais le pere & la mere de ladicte ieune fille tres-mal contens de ce que dit est, s'en alerent faire grans plaintes par deuers le Roy, mais ils n'en eurent aultre chose. Et cedit iour au soir enuiron deux heures de nuit monseigneur l'Euesque d'Eureux Baluë fut guetté & accueilly par aucuns ses ennemis en la ruë de la barre du bec, & fut fait à l'enuiron de la porte de derriere de feu maistre Bureau Boucher, lesquels chargerent sus luy, & de premiere arriuee vindrent oster & souffler deux torches que on portoit deuant luy, & apres vindrent audit Baluë qui estoit monté sus vne bonne mule, qui le sauua & gaigna à fuyr: car tous ses gens à l'effroy l'abandonerent pour paour des horions, & en emporta ladicte mule sondit maistre Baluë iusques au cloistre Nostre Dame en son hostel, dont elle estoit partie. Et auant ladicte fuite il ot

deux coups d'espee, l'un au plus hault de ses biens & au milieu de sa couronne, & l'autre en l'un de ses doits. Et feldites gens qui ainfi s'en aloient courans aual la rue, crioient à l'arme & au meurtre affin que le peuple faillist pour donner secours à leur maistre. Et dudit cas le Roy en fut courroucié & ordonna que on en fist information, & que la chose feust sceue : mais tout en demeura ainfi sans en sçauoir aultre chose, combien que aucuns disoient depuis que ce auoit fait faire monseigneur de Villers le boscaige, pour l'amour de ladite Iehanne du Bois dont il estoit amoureux. Celle nuit aucuns Bretons & Bourguignons furent à Seure où ils trouuerent aucuns Escossois de la compagnie Robert de Conychan, lesquels ils tuerent & leur copperent à tous les gorges. En ce temps vng nommé Alexandre Lorget natif de Paris, qui estoit homme d'armes de l'ordonnance du Roy nostre Sire, sous la charge & compagnie du seigneur de la Barde, s'en ala & absentra de Paris pour soy aler rendre à saint Denys à monseigneur de Berry qui illec estoit, & s'y en ala luy cinquiesme, & avecques luy en emporta toutes ses bagues & sa malle. Et le ieudy ensuiuant vindrent en l'ostel de ladiète ville plusieurs grandes plaintes par aucuns des bourgeois de ladiète ville, de plusieurs mauuaises paroles mal sonnans, que disoient & publioient plusieurs gens de guerre estans en ladiète ville, contre lesdits bourgeois, manans & habitans d'icelle, pour y donner prouision. Et estoient lesdites parolles telles, proferées & dictes par iceulx gens de guerre. Le regny Dieu, les biens qui sont à Paris, ne aussi la ville, ne

sont point ne appartiennent à ceulx qui y sont demourans ne residens, mais à nous gens de guerre qui y sommes:& voulons bien que vous sçachiez que malgré vos visaiges nous porterons les clefs de vos maisons, & vous en bouterons dehors vous & les vostres: Et ce vous en caquetez, nous sommes assez pour estre maistres de vous. Et ce mesme iour y eut vng fol Normant qui dist à la porte saint Denis que ceulx de Paris estoient bien fols de penser que leurs chesnes de fer tenduës au trauers de leurs ruës, leur peult valoir alencontre d'eulx. Pour lesquelles parolles ainsi mal sonnans que dit est, fut soudainement ordonné par aucuns en l'ostel de ladicte ville à qui lesdictes parolles furent ainsi dictes & rapportees, que ceste nuit chascun Quarternier de Paris feroit faire beaulx & grans feux par toutes les dizaines de son quartier, & que vng chascun seroit en armes & sur la garde deuant lesdicts feux. Et si furent ordonnees toutes les chesnes des ruës foraines estre renduës, ce qui fut fait: & veilla chascun iusques au point du iour. Et ceste mesme nuit fut grant bruit que la Bastille saint Anthoine fut laissée ouuerte, pour laisser entrer dedens Paris ceulx qui estoient deuant. Et si trouua l'en ceste nuit aucuns canons près dudict lieu, dont les chambres estoient enclouez affin qu'ils ne peussent seruir quant mestier en seroit. Et desdits feux & du grant guer qui y fut fait & ainsi ordonné que dit est, furent lesdits Capitaines qui estoient à Paris moult esbahys, & dont aucuns s'en alerent en la Chambre du Roy en son hostel des Tournelles, sçauoir à luy se c'estoit de son ordonnance & commande-

ment que lesdits feux & guet estoient ainsi faits & ordonnez, ou de par qui. Lequel dist & respondit que non. Et tout incontinent il manda venir à luy sire Jehan Luillier Clerc de ladicte ville, qui y vint & luy certifia que lesdits feux & guet estoient faits à bonne fin, & de ce assoura le Roy & lesdits Capitaines. Et ce nonobstant ordonna à messire Charles de Meleun qu'il alast en l'ostel de la ville, & par tous les quartiers d'icelle dire que on laissast lesdits feux, & que chascun s'alast coucher, dont riens ne voudrent faire, mais demourerent ainsi armez iusques au iour, & maintenoient plusieurs depuis que ce fut grace de Dieu, & que si s'en feussent alez & departis ladicte ville estoit perdue & destruite. Et que lesdits de deuant Paris y feussent entrez par ladicte bastille, & par ce demouree ladicte ville destruite & du tout desolee.

Et le vendredy ensuiuant vindrent à Paris deux poursuiuans, l'vng de Gisors qui vint dire au Roy qu'il enuoyast secours en ladicte ville, & que deuant y auoit bien cinq ou six cens lances, & que dedens icelle ny auoit nulles gens de guerre de par le Roy. Et si n'auoient aussi artillerie, pouldres, ne aultres deffences; & l'autre poursuiuant estoit aussi enuoyé au Roy de par Hue des Vignes, Escuyer homme d'armes de l'ordonnance dudit seigneur, sous la charge & compagnie du seigneur de la Barde, lequel Hue estoit lors à Meulanc : par lequel poursuiuant estoit mandé au Roy que ledit de Vignes auoit sceu par gens de foy, que les Bretons & aultres auoient entrepris d'entret à Rouën tout ainsi qu'ils auoient fait à Ponthoïse, &  
par



par dedens le Chastel ou Palais de ladicte ville, affin qu'il y pourueust. Et cedit iour de vendredy lesdits Ambassadeurs ordonnez de chascun costé disnerent à sainct Anthoine des champs dehors Paris. Et là leur fut enuoyé de par le Roy, pain, vin, poisson, & tout ce que mestier leur estoit pour ledit disner. Et fut illec aussi porté en vne charrete plusieurs des comptes rendus en la Chambre des Comptes à Paris, des pays & villes de Champagne & Brie. Et le samedi ensuiuant lesdits Ambassadeurs de costé & d'autre furent de rechief assemblez en deux parties, c'est assauoir monsieur du Maine & ceulx de la compaignie pour la partie du Roy, avec les aultres Princes & Seigneurs, estans dehors tous en la granche aux Merciers. Et pour le Roy audit sainct Anthoine des champs y estoient ordonnez maistre Ethienne Cheualier Tresorier de France, maistre Arnauld Bouchier, & Crystofle Pailard Conseillier des Comptes. Et les Commissaires de l'autre partie estoient Guillaume de Bisfche, maistre Pierre Doriolle, maistre Iehan Berart, maistre Iehan Compaing, vng aultre Licencié escumans Latin, & maistre Ythier Marchant, & ce iour ne firent que peu de chose. Cedit iour le Roy receut lettres de la vefue messire Pierre de Breze, par lesquelles luy mandoit qu'elle auoit fait prendre le seigneur de Broquemont, Capitaine du Palais de Rouen, pource qu'elle se soufpeçonnoit dudit cas, & qu'il n'eust aucune doubte de ladicte ville de Rouen, du bout du pont du Paluis, & des habitans d'icelle, & que tous ils se trouueroient bons & loyaulx enuers luy. Et le Dimenche ensuiuant

K

au point du iour se vindrent rendre au bouleuart de la Tour de Billy sept hommes qui estoient eschappez prisonniers de l'ost desdits Bourguignons, dont il en y auoit quatre facteurs de Marchans de Orleans, deux autres facteurs de Marchans de Paris, & vng Flament, qui tous auoient esté condempnez à estre pendus par lesdits Bourguignons, pource que depuis leur prise n'auoit eu personne qui les eust pourchassez. Et rapporterent que le mecredi precedent fut tiree vne serpentine de la Tour de Billy dedens l'ost desdits Bourguignons, laquelle d'vng seul coup rua sept Bourguignons & en blessa plusieurs. Ce iour apres dîner vindrent nouvelles au Roy que Rouën estoit pris par monseigneur le Duc de Bourbon, qui y entra par le Chastel de Rouën du costé des champs. Le vendredy au soir preecedent, par le moyen de la vesue messire Pierre de Breze à qui le Roy auoit fait moult de biens, & ou il auoit grant fiance, & conduisoit le fait d'icelle vesue, l'Euesque de Bayeux & ledit maistre Jehan Herbert & aultres : Et au moyen de ladiète prise quant les seigneurs de dehors Paris sceurent icelle, ils donnerent responce au Roy que monseigneur Charles frere du Roy, qui parauant se fust contenté de Champaigne & Brien auroit point d'aultre appanaige que de la Duchie de Normendie, laquelle chose le Roy par force & contraincte. Et pource qu'il n'y pouoit remedier bailla à mondit seigneur Charles pour son dit appanaige ladiète Duchie de Normendie, & reprint à luy la Duchie de Berry. Et apres que le Roy eust baillé ladiète de Normendie audit monseigneur Charles, il fut

apres contrainct de recompenser tous lesdits Princes & seigneurs de leurs armées & interests qu'ils auoient fait contre luy, qui tous le butinerent ainsi qu'il s'enfuit: C'est assauoir monsieur de Charrolois eut pour son butin les villes de Peronne, Roye, & Mondidier, pour estre siennes & demourer en perpetuel heritaige. Et si luy laissa aussi le Roy durant le cours de la vie d'icelluy Charrolois les villes & terres qu'il auoit nouvellement degaigees de quatre cens vingt mille escus d'or de monsieur de Bourgongne son pere. Et oultre luy bailla & laissa les Contez de Guyennes & de Boulongne sur la mer aussi en perpetuel heritaige. Et apres fut baillée au Duc de Calabre certaine grant somme de deniers & de gens de guerre au Roy, souldoyez à ses despens, pour les exploicter à son plaisir. Et à monsieur de Bourbon fut baillé & laissé sa pension, celle qu'il auoit du temps du Roy trespasé, & les gens de guerre qu'il tenoit audit temps, & assigné du payement à luy deu pour la reste de son mariage, & aultre chose ne eut du Roy. Et au Conte de Dunois fut touttendu ce qui luy auoit esté osté durant la diuision, & retenu à grant pension. Et au Conte de Dampmartin fut fait de beaulx dons de par le Roy, & restituer en toutes ses terres qu'il auoit perduës & confisquées par Arrest de Parlement. Et au regard des aultres Seigneurs chascun en emporta sa piece. Et le mardy premier iour d'Octobre ensuiuant, fut crüe & publicc la treue à tous iours entre le Roy & lesdits Princes, & le lendemain monsieur de saint Pol vint à Paris & disna ce iour avecques le Roy, & ala en la salle dudit Palais: & là à

la table de marbre fut créé Connestable de France, & fist le serment en tel cas accoustumé de faire. Et cedit iour fut crié à Paris de par le Roy que chascun portast des viures & aultres choses pour auitailler & reuestir lesdits Bourguignons & Bretons, laquelle chose fust faicte. Et incontinent que ledit cry fut fait plusieurs Marchans de Paris y porterent grant foison de viures aux champs deuant sainct Anthoine, lesquels viures y furent incontinent bien recueillis par lesdits de l'ost, qui y vindrent de toutes parts, & achetoient iceulx viures ce que on leur faisoit par especial pain & vin: car lesdits de l'ost estoient tant affamez, les iouës veluës & si pendans de maleurete qu'ils auoient longuement endure que plus n'en pouoient, & la plupart estoient sans chausses & foulliers, plains de poulx & de ordure.

Et entre aultres vindrent & arrinerent ausdits viures plusieurs lifrelofres, Calabriens & Suisses qui auoient telle raige de fain aux dets qu'ils prenoient fromaiges sans peler, & mordoient à mesmes, & puis buuoient de grans & merueilleux traits en beaulx pots de terre. Et Dieu scet en quels nopces ils estoient, mais ils ne leur estoient pas franchises, pource qu'ils payent bien leur escot, & plusieurs aultres choses y eust faictes ce iour qui sont cy passees pour cause de briefueté: mais chascun peult sçauoir que c'est chose incomprehenfible & inestimable que la puissance de Paris: car lesdits Bourguignons, Bretons, Calabriens, Bourbonnois, Picars, & aultres, ainsi estans deuant Paris que dit est, que on estimoit à bien cent mille cheualx apres l'ap-

poinctement fait, & ceulx de Paris qui estoient trois fois plus furent tous fournis & nourris des biens de ladicte ville par moult grant espace de temps & sans riens encherir. Et apres leur partement y fut encores beaucoup meilleur marché que deuant n'auoit esté, & le ieudy ensuiuant ne fut riens fait sinon que tousiours on auitailloit lesdits del'ost: & aussi ce mesme iour le Roy à priuee meismee ala iusques au ioingnant de Conflans parlant à mondit seigneur de Charrolois, laquelle chose sembla à toutes personnes voulans son bien estre simplement fait à luy. Et de ceste farsoient & mocquoient les Picars & aultres de leur party, qui en disoient tels mots. Et reuoitiez vo Roy qui parle à no seigneur de Charrolois, & a passé à deux heures qu'ils y sont, & par foy se voulions il est à no commandement.

Et le vendredy ensuiuant quart iour dudit mois, le Roy ordonna de ladicte porte saint Anthoine que on laissast entrer lesdits Bourguignons en icelle ville, dont plusieurs y vindrent à ceste cause & en grant nombre, qui y firent plusieurs excez & maistrises, ce qu'il ne leur eust pas esté souffert, qui bien eust sceu que le Roy ne s'en feust point courroucié. Et à cause de la permission d'icelle entree y eut vng Bourguignon entre les aultres qui voulüst entrer en icelle ville par ladicte porte saint Anthoine, contre le gré des portiers illec estans, & mesmement d'vng de la compagnie dudit bastard du Maine qui gardoit le guichet de ladicte porte saint Anthoine. Et pour le reffus que fist ledit archier audit Bourguignon d'entrer dedens ladicte

porte & en icelle ville, ledit Bourguignó bailla à iceluy archier en entrebaillant ledit guichet d'une dague dedens le ventre, & incontinent ledit Bourguignon fut prins & merueilleusement batu & nauré, & le voulurent plusieurs tuer, ce qui leur fut deffendu: mais on fist assaouir ces choses au Roy qui ordonna que on le menast audit seigneur de Charrolois pour en faire iustice, lequel y fut incontinent mené. Et tout aussi tost qu'il fut vers luy arriué & qu'il fut aduertty des choses dessusdictes, le fist prendre & estrangler à la iustice estant près du pont de Charenton.

Ce iour aussi le Roy ordonna que en chascun quartier de Paris feust fait des feux, & ceulx desdits quartiers de ladicte ville estre illec en armes, & que en chacun desdits carrefours y eust vn notable homme esleu pour parler aux passans parmy les ruës, & sçauoir que ils estoient & où ils aloient: & ce iour fut eclisse de Lune.

Et le Dimenche ensuiuant plusieurs des Seigneurs de l'ost vindrent soupper à Paris avec le Roy, en l'ostel de sire Jehan Luillier Clerc de ladicte ville de Paris. Et là s'y trouuerent plusieurs Dames & Damoiselles, & aultres nobles femmes d'icelle ville. Et ce dit iour Sallezart Capitaine & vingt hommes d'armes de sa compagnie, furent aux champs dehors Paris, & yssirent par la Bastille de saint Anthoine, pource que la porte estoit gardée, & deffendu de par le Roy que homme n'y fust hors d'icelle ville, mais à les bouier dedens on n'y en mettoit que dix à vne fois: car on leuoit le pont leuis deuers ladicte place, & les menoit on aux

champs , & puis remenoit on querir les aultres dix pour aussy faire passer aux champs. Tous lesquels vingt hommes d'armes estoient vestus & habillez de hocquetons de camelot violet à grans croix blanches , & auoient belles chesnes d'or autour du col , & en leurs testes cramignolles de veloux noir à grosses houppes de fil d'or de chippre dessus , & tous leurs cheuaulx estoient couuers de campanes d'argent. Et au regard dudit Sallezart pour difference de ses gens il estoit monté dessus vng beau coursier a vne moult belle houffure, toute couuerte de tranchouers d'argent, dessus chascun desquels y auoit vne grosse campane d'argent doree , & tout deuant ladiète compaignie aloit la trompette dudit Sallezart monté dessus vng cheual grison , lequel en courant au long des fossez d'entre ladiète porte saint Anthoine & le bouleuert de la Tour de Billy, lediét cheual cheut dessoubs ladiète trompette , si tres-lourdement que icelle trompette se rompit le col. Et le lundy ensuiuant vint nouuelles à Paris que le seigneur de Halbourdin & le seigneur de Saueuzes auoient prins Peronne , & le Conte de Neuers qui y estoit dedens. Et cedit iour eschapperent trois prisonniers des prisons de Tizon , dont l'vng auoit esté cause avecques Loys Sorbier de bouter les Bretons & aultres dedens Ponthoïse , & estoit de la compaignie Iouachin Rouault. Ce iour aussy se print le feu à Paris en vne maison en champ-gaillard , dont le Roy en eut vng peu de paour. Et ordonna pour ceste cause que on en fist faire des feuz par tous les quartiers de Paris , & les habitans armez deuant iceulx &

le guet feust renforcié, ce qui fut fait.

Audit mois d'Octobre furent aucunes gens de guerre du party dudit de Bourgongne deuant la ville de Beauuais, pour fommer les Prelat & populaire d'icelle de eulx rendre & mettre és mains dudit seigneur de Bourgongne & ladicte place aussi, lesquels Prelat & habitans prindrent ladicte sommation par escript & l'enuoyerent au Roy, qui incontinent l'enuoya au seigneur de Charrolois avec lequel il auoit fait paix & treue. Lequel Charrolois rendit responce que ce n'estoit point de par luy qu'on faisoit lesdictes sommations, en disant que le diable peust emporter ceulx qu'ils faisoient tels, & qu'ils faisoient plus que on ne leur commandoit. Et dist le Roy audit seigneur de Charrolois que puis que appoinctement auoit esté fait entre eulx, qu'il ne faillloit plus vser de telles voyes: & si luy dist plus le Roy qu'il luy donneroit ladicte ville de Beauuais, s'il vouloit. Et le mercredy ensuiuant neufiesme iour dudit mois fut ordonné de par les Preuost des Marchans & Escheuins de ladicte ville, que chascun Quartenier & Dizenier d'icelle ville feissent faire des feux és lieux accoustumez de les faire, & que toutes les chesnes des ruës foraines feussent tenduës, & que chascune personne feust veillant deuant lesdits feux, laquelle chose fut faicte. Et le ieudy ensuiuant vint ledit seigneur de Saueuzes & arriua en l'ost desdits Bourguignons a tout grant puissance de gens, qui amenoient certaine grosse somme d'or & d'argent, pour faire le payement des gens de guerre dudit seigneur de Charrolois. Et ce iour aussi le Duc de Bretagne



Bretagne eut son appointment avecques le Roy nostre Sire de ses vaccations, frais & mises de luy & son armee, pour estre venu contre luy & son Royaulme deuant Paris avecques les aultres Princes & seigneurs dessus nommez, & en faisant ledit appointment luy fut rebaillee la Conté de Montfort & aultres, avecques grant somme de deniers. Et le vendredy ensuiuant vint en l'ostel de ladicte ville maistre Jehan le Boulengier President en Parlement, dire illec de par le Roy nostre Sire que on fist assauoir aux Quarteniers & Dizeniers de ladicte ville, & de main en main au populaire d'icelle que on ne se esbahyst point se on veoit la puissance des Bourguignons venir ce iour deuant Paris, & que ce seroit pour illecques faire leurs monstres. Et nonobstant ce ny vindrent point ce iour: mais les firent depuis le pont de Charenton iusques au bois de Vinciennes, & se monstrent grant puissance: & là le Roy se trouua pour veoir icelles monstres bien simplement, comme de luy quatriesme seulement, c'est assauoir le Roy, le Duc de Calabre, le seigneur de Charrolois, & monsieur de sainct Pol. Et quant lesdictes monstres furent faictes le Roy s'en retourna par eauë à Paris, & auant son parlement & en sa presence ledit seigneur de Charrolois dist à tous lesdictes gens de guerre ces mots, Mes seigneurs vous & moy sommes au Roy mon souuerain seigneur qui cy est present, pour le seruir toutes les fois que mestier en aura. Et le samedi ensuiuant douzieme iour dudit mois d'Octobre quatre cens soixante cinq, vint nouvelles que la ville d'Eureux auoit esté baillee & liuree

L

aux Bretons par vng nommé messire Iehan le Beuf Cheualier, qui les bouta en ladicte ville le mercredy precedent iour de sainct Denys, ainsi que les bourgeois & habitans de ladicte ville aloient en procession hors d'icelle ville. Et ainsi qu'ils yssioient par l'une des portes d'icelle en alant à ladicte procession, lesdits Bretons entroient en ladicte ville par une autre porte. Et le sixiesme iour d'icelluy mois d'Octobre aduint que on aduertit le Roy qu'il y auoit entreprise faicte sus sa personne par aucuns ses ennemis, de le prendre ou tuer dedens ladicte ville : & pour foy en garder & dormir seurement ordonna expressement que on fist grant guet & garde en ladicte ville tant sur la muraille que dedens, & que par chascun quartier & rue feussent faits les feux, ce qui fut fait : & vint aussi nouuelles que la ville de Caën & aultres de Normendie s'estoient remises & reduictes en l'obeyssance de mondit seigneur de Berry. Et depuis ce le Roy enuoya en la ville de Mante grant quantité de gens de guerre & de francs archiers.

En ce temps le Roy fist aler la Royne à Orleans, qui lors estoit à Emboise. Et le ieudy ensuiuant dix-huictiesme iour dudit mois le Roy souppa en l'ostel du seigneur de Armenonuille où il fist grant chere, & y mena avecques luy le Conte du Perche, Guillaume de Bische, Guiot Durie, Jaques de Creuecueur, monsieur de Craon, messire Yues de Fau, messire Gastonnet du Leon, Vuaſte de Monpedon, Guillaume le Cointe, & maistre Renault des Dormans. Et pour femmes y estoient madamoiselle Dermenonuille, la

longue joye , & la Duchesse de Longueil . Et pour bourgoises , Eltiennette de Paris , Perrete de Chaalon , & Iehan Baillete . Et le mardy vingt-deuxiesme iour dudit mois le Roy ala par deuers lesdits Princes à priuee meisme sans sa garde , iusques à la granche aux Merciers , sauf que monsieur de Berry n'y estoit point : & le ieudy ensuiuant monsieur le Duc de Bourbon vint parler au Roy en la place deuant Paris par de çà la fosse de la granche de Ruilly . Et estoit le Roy ce iour le plus honnestement habillé qu'on ne l'auoit point veu deuant : car il estoit vestu d'une robe de pourpre desfeinte & toute fourree d'ermes , qui luy seioit beaucoup mieux que ne faisoient les cours habits qu'ils auoit portez parauant . Et le samedi ensuiuant mondit seigneur de Charrolois se departit de son ost & fist crier par tout icelluy sur peine de la hart , que tous ceulx de son armee & compaignie feussent incontinent prests pour aler seruir à l'encontre des Liegeois , qui gastoient & mettoient à feu & à l'espee tout ce qu'ils trouuoient es pays dudit seigneur de Charrolois . Et les Dimenche , lundy & mardy ensuiuans , monsieur de Berry qui estoit logé à sainct Mor des fosses fut vng peu malade d'une fièvre , qui le tint durant lesdits trois iours & puis fut guery . Et pareillement que deuant le Roy fist ledit iour de lundy les feux & le guet parmy ladicte ville , & tendre les chesnes de toutes les rues foraines .

Et le mercredi ensuiuant trentiesme & penultiesme iour d'Octobre audit an , furent leuës & publiees les lettres de la paix , ou treue faicte entre le Roy &

lesdits Princes en la Court de Parlement, où illec fut enregistré. Et ce mesme iour le Roy partit de Paris pour aler au bois de Vinciennes par deuers lesdits Princes, & là mondit seigneur de Berry luy fist hommaige de la Duché de Normendie, qui baillee luy auoit esté pour fondit appanaige. Et cedit iour fut ladicte ville de Paris fort gardee, & fist on armer tous les archiers & les arbalestriers d'icelle & aultres, pour garder les portes de ladicte ville iusques à ce que le Roy fust retourné en icelle de deuers lesdits Princes, où il s'en estoit ainsi simplement alé. Et delibera le Roy cedit mesme iour de coucher la nuit audit lieu du bois, & enuoya querir son liect à Paris : mais le Preuost des Marchans & Escheuins de ladicte ville luy enuoyerent message exprez, luy humblement prier & requerre qu'il n'y couchast point pour moult de causes, ce qu'il leur accorda & s'en retourna au giste audit lieu de Paris : & le ieudy ensuiuant monsieur de Berry, monsieur de Charrolois & aultres se despartirent de deuers Paris & s'en alerent en diuers lieux, c'est assauoir mondit seigneur Charles s'en ala en Normendie, & le conuoya le Roy bien loing sur le chemin de Ponthoife, & puis s'en tira luy & ledit de Charrolois vers Villers le bel, où ils furent deux ou trois iours, & puis s'en ala ledit de Charrolois au pays de Picardie, & de là s'en ala faire guerre aux Liegois. Et le lundy ensuiuant messire Robert Destouteuille Cheualier seigneur de Beine, qui auoit esté Preuost de Paris du temps du feu Roy Charles, & que le Roy l'auoit ostee & baillee à Iaques de Villers seigneur de l'Isle Adam, fut remis &

restitué audit Office de Preuost de Paris. Et ce mesme iour fut en l'ostel de ladicte ville pour les affaires du Roy, & là luy fut baillee le nom de la nuit comme à Preuost de Paris. Et le mardy ensuiuant le Roy souppa en l'ostel d'icelle ville, ou il y eut moult beau seruice de chair & poisson, & y soupperent auecques luy plusieurs gens de grant façon, inuitez & mandez auecques leurs femmes. Et auant ledit soupper le Roy proposa à aucuns Quarteniers, Dizeniers, pource aussi mandez, disant qu'il les mercioit tous en general & particulier de la grande feaulté & loyaulté qu'il auoit trouuee en eulx : & que pour eulx il estoit du tout disposé de faire tout ce que possible luy seroit, & que pource que durant la guerre & diuision qui auoit esté deuant ladicte ville il auoit donnez & conferez à icelle aucuns preuilliges, & que aulcuns pourroient auoir imagination qu'il auroit ce fait pour la necessité où il s'estoit trouué de auoir d'eulx secours, & que apres ladicte paix ou accord les leur pourroit oster, il leur declaira pour ceste cause deslors & des maintenant pour lors à tousiours, il le les leur auoit donnez & laissez, sans iamais auoir esperance de les rappeler ne venir contre, & se mieulx vouloient auoir de luy qu'ils le demandassent & il le leur octroyeroit. Et leur dist encores qu'il laissoit en ladicte ville le seigneur de Beyne comme Preuost de ladicte ville de Paris, auquel il vouloit qu'ils obeyssent comme à luy, & leur dist qu'il auoit moult bien seruy à la iournee de Montlehery, & pour aultres causes qu'il declaira audit Preuost des Marchans & Escheuins de ladicte ville de Paris, en le

priant d'estre tousiours bons & loyaulx enuers luy & à la Couronne de France, sans ce que aucune parcialité soit trouuee en ladicte ville. Et illec ce iour fut fiancée la fille naturelle du Roy à monsieur le bastard de Bourbon, & apres soupper y furent faictes plusieurs ioyeufetez, dances & aultres plaissances : & là mondit seigneur le Bastard y dança & y fist grande & bonne chiere.

Et le lundy ensuiuant septiesme iour de Novembre audit an quatre cens soixante-cinq, ledit messire Robert Destouteuille fut amené au Chastellet de Paris par messire Charles de Meun & maistre Jehan Dauuet premier President au Parlement de Thoulouse, auquel President le Roy mandoit qu'il auoit receu le serment dudit Destouteuille a Preuost de Paris, au lieu de Iacques de Villers seigneur del'Isle Adam, auquel il auoit donné ladicte Preuosté à son ioyeux aduenement, & qu'il le mist & institua en possession & saisine dudit office de Preuost de Paris. Et apres que les lettres de don dudit office furent leuës au grant parc du Chastellet de Paris, icelluy Destouteuille fut mis & institué en possession dudit office, sans preiudice du cas d'appel dudit de Villers.

Et tantost apres ces choses ainfi faictes le Roy manda venir à luy les Presidents de sa Court de Parlement, ausquels il dit telles ou semblables parolles. Il est vray que apres que ie vins à mon ioyeux aduenement à la Couronne, ie feis le premier President en ma Court de Parlement messire Helye de Thorretes, qui tantost apres ala de vie à trespas. Et à l'eure que ie le feis i'auoye

mon affection singuliere de y mettre en son lieu maistre Iehan Dauuet nostre premier President à Thoulouse qui cy est present : mais tant par importunité de requerans que aussi à la priere & requeste de messire Iehan Bureau, nous y mismes le President de Nanterre, qui depuis y a esté iusques à la venuë de nostre ville de Paris d'aucuns seigneurs de nostre sang, qui nous firent dire & remonstrer que en nostre Royaulme auoient esté faictes plusieurs grandes iniustices, & mesmement en nostre Court de Parlement : Pourquoy & aultres causes qui nous meuent, declairons que ledit de Nanterre ne sera plus nostre premier President en nostre Court de Parlement, & que pour & en son lieu y auons mis & creons ledit maistre Iehan Dauuet, pour y estre & demourer.

Et le samedy ensuiuant neufiesme iour dudit mois de Nouembre, messire Pierre de Moruillier Cheualier qui auoit esté Chancelier de France fut desappointé dudit office, & y fut mis en son lieu messire Iehan Iuuenel des Vrsins, qui aussi auoit esté Chancelier de France, & qui encores estoit au iour du trespas dudit feu Roy Charles. En ce temps aussi le Roy desappointa messire Pierre Puy de l'office de Maistre des Requestes ordinaire de son hostel, & donna ledit Office à maistre Regnault des Dormans.

Après ces choses le Roy se partit de Paris pour aler à Orleans, & en emmena avecques luy Arnault Luilier Changeur & bourgeois de Paris, auquel il chargea tres-expressément de le suiure & estre tousiours près de luy, & si y mena aussi maistre Iehan longue joye le ieune,

nouuellement marié à Damoiselle Geneuiefue fille de maistre Iehan Baillet pour estre de son grant Conseil. Et à l'eure dudit partement il crea Tresorier de France maistre Charles, d'Orgemont seigneur de Mery, & fist ledit Arnault Luillier Tresorier de Carcassonne, & maistre Pierre Ferteil mary de Terteau Maistre des Requestes de son Hostel, sans gaiges & interest.

Et le lundy ensuiuant dixhuietiesme iour dudit mois aduint à Paris à six heures de matin que vne comete y cheyt en resplendisseur de feu, qui dura longuement: & estoit telle qu'il sembloit que toute la ville feust en feu & en flambe. Et de ceste espouuentable & merueilleuse chose vng homme en la place de Greue, qui à ladicte heure aloit ouyr Messe au saint Esperit, fut de ce si tres-espouuenté qu'il en deuint fol, & perdit son sens & entendement.

Et apres toutes ces choses mondit seigneur Charles qui ainsi estoit party de Paris pour aler en Normandie, s'en ala iusques à sainte Katherine de mont de Rouën, où il sejourna illec par diuerfes iournees en attendant que ceulx de Rouën eussent preparé ce qu'ils auoient intention de faire pour son entree, mais cependant se meust noise entre mondit seigneur Charles, le Duc de Bretagne & le Conte de Dampmartin, dont fut dit audit monsieur Charles que ledit Duc de Bretagne & Conte de Dampmartin auoient entrepris de le prendre & ramener en Bretagne, pour laquelle cause Iehan monsieur de Lorraine qui de ce fut aduertty, ala incontinent dire ces nouuelles en l'ostel de ladicte ville de Rouën, qui incontinent y pourueurent



rent & firent arriuer tous ceulx de ladicte ville.

Et a grant port d'armes ledit monsieur Iehan de Lorraine à l'aide desdits de Rouën ala en la place dudit lieu de saincte Katherine ou on ne le vouloit laisser entrer. Et illec malgré ledit Duc de Bretaigne & Conte de Dampmartin, sans solempnité garder, fist monter mondit seigneur Charles sur vng cheual garny de selle & harnois simplement, sans aucune houffure, & auoit vestu à ceste heure vne robe de veloux noir, & en cest estat le menerent en ladicte ville de Rouën, tout droit en l'Eglise nostre Dame, où chanté fut le *Te Deum laudamus*, & de là au Chasteau dudit lieu.

En ce temps le Roy estant à Orleans fist plusieurs ordonnances & establissemens, & desappointa plusieurs Capitaines de guerre, & entre les aultres il osta les cent lances, dont Poncet de Riuiere auoit la charge, & le fist Bailly de Montferrant, & à d'autres osta aussi les charges & mist d'autres en leurs lieux.

Et quant ledit Poncet de Riuiere se vit ainsi desapointé de ladicte charge, il s'en ala oultre la mer au S. voyage de Iherusalem, & de là à saincte Katherine du mont de Sinay, & si remist & fist le Roy le seigneur de Loheac Marechal de France, comme aultre fois l'auoit esté, & fut mis au lieu du Conte de Comminge bastard d'Armignac. Et apres ces choses ainsi faictes le Roy se part d'Orleans & s'en ala en Normendie à toute son armee francs archiers, & son artillerie grosse & menuë, & s'en tira vers Argenten, Exmes, Falaize, Caën, & aultres places dudit pays, pour les prendre, saisir, & mettre en ses mains. Et là il trouua le Duc de

LOUIS XI.

Bretagne, qui furent ensemble vne espace de temps.

Et d'aultre part audit pays de Normendie y estoit par le Roy monsieur de Bourbon qui ala deuant Eureulx pour l'auoir, qui n'y obeyrent point de premiere venuë, mais depuis traicterent avecques luy & le bouterent dedens ladicte ville, luy & ses gens. Et apres d'illec se partist & s'en vint deuant Vernon sur Seine, ou semblablement luy fut fait reffus de premiere venuë, & puis le mirent dedens. Et d'une aultre part estoit messire Charles de Meleun grant maistre d'ostel du Roy, qui aussi prenoit & faisoit villes & places, comme Gisors, Gournay, & aultres : & si rua ius enuiron six vingts Escossois qui s'en aloient au seigneur de Bueil pour mondit seigneur Charles. Et fut la rencontre faicte desdits Escossois à vng villaige du Bailliage de Caulx nommé Cailly.

En ce temps le seigneur de Sternay qui estoit General de Normendie, qui s'en estoit party hors de la ville de Rouën pour la doubte & fureur du Roy, & affin qu'il ne feust cogneu se abilla en Cordelier de l'obseruance, fut rencontré par aucuns gens de guerre de la compaignie dudit grant maistre, au pont saint Pierre, qui est à quatre lieues de Rouën, & auoit avec luy vng Augustin. Lesquels apres qu'ils eurent esté saisis furent cerchez par lesdits gens de guerre, & trouuerent sur eulx plusieurs bagues & or monnoyé contant, qu'ils prindrent & saisièrent. Et apres mondit seigneur Charles qui s'en estoit alé à Rouën s'en ala à Louuiers, cuidant y trouuer mon seigneur de Bourbon, lequel il n'y trouua point, & incontinent s'en retourna audit lieu de Rouën.

Et apres son retour audit lieu de Rouen, ceulx de ladicte ville le receurent & le menerent en l'ostel de ladicte ville, où illec l'espouserent à leur Duc: & en ce faisant luy baillerent vng anneau qu'ils luy mirent au doigt, que à ce faire est ordonné. Lequel depuis mondit seigneur Charles porta, & promist lors ausdits de Rouen de les entretenir & garder en leurs franchises & libertez, & leur ordonna à ceste heure la moitié de tous les aydes que parauant sa reception ils auoient payez. Et ces choses faictes luy fut dit & remonsté par les gens d'Eglise, les nobles, bourgeois & populaire d'icelle ville, qu'ils se rendoient & demouroient du tout ses vrais & loyaux subjects, tous bien deliberez de viure & mourir pour luy, & iusques au dernier homme: & puis luy firent lire vng article contenu en vne Chronique qui estoit en icelle maison de la ville, publicquement deuant tous, qui contenoit en effect que iadis y ot vng Roy de France qui mourut, & apres son trespass demoura deux fils, dont l'un par ainesse succeda à la Couronne: & à l'autre fut baillé pour son appanage la Duchie de Normandie, qui depuis ledit Roy de France voulut rauoir & en print guerre contre son frere pour la rauoir. Et oultre pour leurdit Duc guerroyerent tellement ledit Roy de France, que par leur puissance d'armes ils mirent en exil ledit Roy de France, & firent leurdit Duc Roy. Et apres ladicte lecture luy dirent qu'il ne se souciait de riens, & que de là en auant ceulx de ladicte ville le fourniroient dedens icelle & dessus leurs murs d'engins & aultres choses defensables, & de tout ce que necessité leur seroit d'a-

M ij

uoir : tellement que aucun dommaige ou esclandre ne viendroit audit seigneur, ne à eulx, ne à leurdicte ville.

Et le lundy penultime iour de Decembre audit. an, le Roy. en retournant dudit bas pays de Normendie vint au Ponthaudemer, & de là en la Champaigne du Neufbourg près Conches, & enuoya môdit seigneur de Bourbon deuant la ville de Louuiers. Et le mercredi ensuiuant premier iour de Ianuier ladicte ville de Louuiers fut renduë à mondit seigneur de Bourbon pour le Roy, & ce mesme iour le Roy entra dedens ladicte ville de Louuiers apres disner. Et en ce mesme iour aussi fut mené par les gens dudit grant maistre d'ostel, le seigneur Sternay qui aussi en icelluy iour fut noyé en la riuere Dure, & aussi ledit Augustin auecques luy par les gens du Preuost des Mareschaux. Et puis fut le corps dudit de Sternay retiré hors de ladicte riuere & mis en terre en l'Eglise nostre Dame de Louuiers, où illec fut fait son seruice.

Audit temps furent plusieurs personnes, officiers & aultres dudit pays de Normendie executez & noyez par le Preuost des Mareschaux, pour les questions du Roy & monseigneur Charles son frere. Et apres le Roy se partit dudit Louuiers, & vint mettre le siege deuant la ville du pont des Arches, qui est à quatre lieues de ladicte ville de Rouen.

Et le iedy sixiesme iour dudit mois de Ianuier fut crié en la ville de Paris, que tous marchans accoustumez de porter viures en ost, portassent viutes en l'ost du Roy qui estoit deuant ladicte ville du pont des Ar-

ches, & aussi que tous pionniers feussent tous prests à partir le landemain pour aler audit lieu, sous sire Denis Giber l'un des quatre Escheuins de ladicte ville à la conduite d'iceulx ordonné. Et le mercredi ensuiuant les gens du Roy qui estoient alez à leur auantaige sur les champs, prindrent quatre hommes d'armes de la compagnie & estans sous ledit monseigneur Charles, & qui autresfois auoient esté en l'ordonnance du Roy, & l'un d'iceulx estoit nommé le petit Bailly, qui aultrefois auoit esté de la compagnie de Iouachin Rouault Mareschal de France, & qui auoit esté cause de la prinse de Pontoise contre le Roy: Furent menez deuers le Roy, & incontinent fut ordonné qu'on leur couppast les testes, & lors ils requirent au Roy que il leur sauuaist la vie & ils luy feroient rendre ledit pont des Arches: ce que le Roy leur accorda, à la requeste de mondit seigneur de Bourbon & de plusieurs autres Princes & Seigneurs.

Et ce mesme iour le Roy & sa compagnie entrerent dedens ledit pont des Arches, & ceulx qui estoient dedens ladicte ville se retirerent dedens le Chasteau. Entre lesquels y estoit maistre Iehan Hebert General des finances du Royaulme de France: & trois iours apres fut rendu au Roy le Chasteau dudit pont des Arches.

Et apres que ladicte ville & Chasteau eurent esté ainsi renduës au Roy, ceulx de Rouen enuoyerent par deuers luy pour parler d'appointement, lequel encharga hault & bas les Ducs de Bourbon & de Bretagne. Et pour ledit appointement auoir vindrent de

ladiçte ville de Rouen aucuns Commissaires ordonnez de par icelle pour luy faire plusieurs requestes & remonstrances, & entre aultres que quelque chose qu'ils eussent fait le Roy voulüst estre content d'eulx, & qu'il luy pleust declairer qu'ils n'auoient point faillily ne fait chose contre luy dont il leur voulüst donner pardon, grace, ou remission, & que le Roy de là en auant les affranchüst en la maniere qu'il auoit fait ceulx de sa ville de Paris: & plusieurs aultres requestes firent au Roy, qui leur rendit responce que sur le tout il auoit son aduis.

Et durant ces choses plusieurs des gens du Roy aloient & venoient en ladiçte ville, & les vngs avecques les aultres. Et cependant mondit seigneur Charles, luy & plusieurs aultres de sa compaignie sortirent dehors de ladiçte ville de Rouen, & s'en tirerent à Honnefleu & à Caen, où ils furent depuis certaine espace de temps. En ces entrefaictes Iehan monseigneur de Lorraine se cuida eschapper pour aler en Flandres, mais il fut rencontré par les gens du Roy, qui le prirent & menerent vers le Roy. Et donna le Roy la pluspart des offices de ladiçte Duchie de Normendie, & y fist de nouveaulx officiers, & en debouta les aultres. Et apres ledit partement dudit monseigneur Charles de ladiçte ville de Rouen, elle fut remise & reduicte au Roy. Et ce fait le Roy renuoya tous ses francs archiers, & leur donna congé iusques au premier iour de Mars ensuiuant, & renuoya aussi son artillerie à Paris, & puis print son chemin pour aler au bas pays de Normendie, & vers le mont saint Mi-

chiel. En ce temps Anthoine de Chabannes Conte de Dampmartin dont dessus est faicte mention, se tint avecques le Roy, & y eut gouuernement & charge de gens d'armes de cent lances, dont auoit la conduicte messire Charles de Meleun grant Maistre d'ostel du Roy, & si luy osta l'office de grant Maistre & le bailla à monseigneur de Craon. Iasoit que moult de gens estoient assez d'opinion que ledit de Meleun eust bien seruy le Roy & fait de moult grans seruices, mesmement à la grant diligence qu'il print à la garde de la ville de Paris en l'absence du Roy, & luy estant en Bourbonnois, où tant & si bien se gouuerna & maintint, que plusieurs estoient d'opinion que se n'eust esté sa grant diligence & bonne conduite que ladicte ville eust eu beaucoup à souffrir, au grant dommaige du Roy & du Royaulme.

Et en ces choses faisant, le Roy fist eschange avecques ledit Conte de Dampmartin, d'un sien Chastel qu'il auoit en Gascongne nommé Blancaffort, & alencontre le Roy luy bailla tout le demaine & souueraineté qu'il auoit és villes de Gonneffe, Gournay sur Marne, & Crecy en Brie. Et de ce luy bailla lettres adressans à la Court de Parlement, pour icelles estre par eulx expediez, & pour les ioindre avecques ladicte Conté de Dampmartin.

Audit temps le Roy ordonna que la place de Chaumont sur Loire qui appartient à messire Pierre d'Amboise seigneur dudit lieu de Chaumont, feust mise en feu & en flambe arrasee, ce qui fut fait.

Et le lundy tiers iour de Feurier vng nommé Gau-

uain Manniel, qui estoit Lieutenant general du Bailly de Rouen, fut prins en ladicte ville & mené prisonnier au pont del' Arche. Et là par le Preuost des Marefchaulx dessus le pont dudit lieu fut drecié vng eschauffault, dessus lequel ledit Gauuain fut decapité pour aucuns cas de crimes à luy imposez. Et dessus ledit pont fut sa teste mise au bout d'vne lance, & son corps jetté en la riuere de Seine.

Et en ce temps le hault Doyen de l'Eglise de Rouen & aultres Chanoines de ladite Eglise iusques au nombre de six, furent enuoyez hors icelle, & leur fut ladicte ville interdicte, & furent enuoyez demourer hors de la Duchie de Normandie.

Après ce le Roy se partit de Rouen & s'en ala à Orléans ou la Roïne estoit, & y demoura par long temps & puis s'en ala à largeau, & illec enuiron. Et pendant qu'il y fut arriuerent deuers luy plusieurs Ambassades de diuerses contrees, & de diuers cas: & durant ce le Roy delibera enuoyer Ambassade au Royaulme d'Angleterre pour aucunes causes. Et pour ce faire esleut le Conte de Roussillon bastard de Bourbon & Admiral de France, le sire de la Barde, l'Euesque & Duc de Langres, maistre Jehan de Ponpaincourt seigneur de Sercelles, maistre Oliuier le Roy Conseillier & maistre des Comptes, & aultres. Et partirent pour aler audit Royaulme d'Angleterre au mois d'Auril mil quatre cens soixante six.

Et audit temps par la Iustice ordinaire de Paris furent prins plusieurs poures creatures, larrons, crocheurs, & aultres malfaiteurs, qui pour lescds cas furent



furent les aucuns pendus & estranglez au gibet de Paris à Montfaucon, & les aultres en furent batus au cul de la charrette par les carrefours de ladicte ville.

En ce temps Damoiselle Ysabeau de Cambray femme de sire Guillaume Coulombel puissant & riche homme, fut mise & constituee prisonniere en la Conciergerie du Palais Royal à Paris, à la requeste & pourchas de fondit mary, qui principalement la chargeoit de trois choses. La premiere, qu'elle s'estoit forsaicte & habandonnee à aultre qu'à luy. La seconde, qu'elle l'auoit desrobé de ses biens en grans sommes de deniers. Et aussi qu'elle auoit fait & compilé plusieurs poisons pour l'empoisonner & faire mourir. Et sur ces choses auoit fondit mary fait faire ses informations: apres lesquelles veuës & pour lesdits cas demoura longuement prisonniere, & fut sur ce gehainee. Et finalement veu par la Court de Parlement lesdictes charges & informations sur ce faictes, & sa confession prise: par Arrest & Iugement definitif d'elle, fut dit & prononcé que lesdictes charges par ledit Columbel imposees à ladicte femme, estoient souffisamment prouuees, Pourquoy fut declairé par ledit Arrest priuee de toute communaulté de biens & douaire avecques fondit mary. Et au regard des poisons furent appoinctez contraires, dequoy elle proposa erreur, & consigna six vingts liures parisis.

Le dixiesme iour de May audit an soixante six, messire Anthoine de Chasteauneuf seigneur du Lau, qui auoit eu congé du Roy long temps parauant, fut trouué pas cas d'aenture par le seigneur de Chabest-

N

nais & aultres, és plaines de Clery près Orleans. Et pource que luy & les gens furent apperceus en habits mescoigneus, fut prins prisonnier & mené au Roy, qui l'enuoya avecques ses gens prisonnier en vng Chastel près Mehun. Et le mercredy veille d'Ascension nostre Seigneur, par l'ordonnance du Roy maistre Jehan le Preuost Notaire & Secretaire du Roy entra dedens la Bastille saint Anthoine par moyens subtils, & d'illec en mist & iecta hors vng nommé Marc, qui en estoit Lieutenant pour monsieur de la Borde, & lequel Marc auoit nouuellement espousé la fille naturelle dudit messire Charles de Meleun, qui estoit fils dudit de la Borde. Et apres ledit Marc & sadiete femme & menaige s'en retournerent a refuge par deuers ledit messire Charles en la ville de Meleun.

Et le samedi veille de Penthecouste vingtquatriesme iour dudit mois, audit an mil quatre cens soixante six, furent leués & publiees en ladicte ville de Paris par les carrefours d'icelle, à son de trompe & à cry publique, le mandement du Connestable de France, dedens lequel estoit inferé le mandement du Roy, qui contenoit que le Roy estoit dehiement informé que les Anglois ses anciens ennemis, en grosse & merueilleuse armee estoient deliberez d'entrer & descendre au Royaulme de France, pour destruire & gaster icelluy. Et que pour ce faire auoient desia fait grant amas de nauires. Et pource le Roy voulant resister à leur mauuaise & dampnee entreprise, & pour les greuer & nuire en tout ce que possible seroit, mandoit audit Connestable que par toutes villes, pays, & lieux dudit

Royaulme, és places où on a accoustumé de faire cry publique, il fîst assaouir que tous nobles tenans du Roy en fief & arriere-fief, de quelque estat ou condition qu'ils feussent, feussent en armes & habillement dedens le quinziesme de Iuing ensuiuant, sur peine de confiscation de corps & de biens. Et aussi à tous francs archiers à estre tous prests audit iour.

En ce temps le Roy qui ainsi auoit desappoincté le dit seigneur de la Borde de la Capitainerie de la Bastille saint Anthoine, donna ladicte Capitainerie au seigneur de Blot Seneschal d'Auuergne, que on disoit estre homme de grant conduicte. En ce temps ledit seigneur de Montaulban qui auoit esté Admiral, grant maistre Administrateur & general Reformateur de toute la noïse aduenüe en Bretagne, & par cōsequent au Royaulme de France, & qui auoit eu des biens du Royaulme & argent inestimable, mourut à Tours & ne fut point pleuré. Et apres sa mort le Roy donna ses offices: C'est assaouir l'office d'Admiral à monseigneur le Bastard de Bourbon, qui auoit espousee vne sienne fille naturelle. Et l'office de grant maistre des Eauës & Forests, fut donnée au seigneur de Chastillon frere du Marechal de Loheac.

Audit temps furent prises treues avecques lesdicts Anglois durant vingt-deux mois, tant par mer que par terre, & furent lesdictes treues publiees, & aussi audit temps monseigneur du Maine pour aucunes causes qui meurent le Roy fut desappoincté du gouuernement de Languedec, & fut baillé à monseigneur de Bourbon.

N ij



Et apres ledit mariage fait dudit monseigneur l'Admiral, le Roy luy donna le Chastel & place de Vifson en Auvergne, qu'on dit estre la plus forte place du Royaulme, avecques les Capitaineries de Honneflet & aultres places de Normendie. Audit mois de Iuing que les feues flourissoient & deuient bonnes, aduint que plusieurs hommes & femmes perdirent leur bon entendement, & mesmement à Paris: il y eut entre aultres vng ieune homme nommé maistre Marcial d'Auvergne Procureur en la Court de Parlement, & Notaire au Chasteller de Paris, lequel apres qu'il eut esté marié trois sepmaines avecques vne des filles de maistre Iacques Fournier Conseillier du Roy en sadite Court de Parlement, perdit son entendement en telle maniere, que le iour de monseigneur sainct Iehan Baptiste enuiron neuf heures de matin, vne telle frenaisie le print qu'il se ietta par la fenestre de sa chambre en la rue & se rompit vne cuisse, & froissa tout le corps & fut en grant dangier de mourir.

Au mois de Iuillet ensuiuant vindrent & arriuerent à Paris plusieurs Prelats, Seigneurs, Cheualiers, gens d'Eglise, & aultres gens de conseil que le Roy ordonna venir, & que on disoit qu'ils estoient ordonnez pour mettre ordre & police en la Iustice, & refformer en toutes choses, & leur fut baillé moult grant pouoir: & par icelluy estoient nommez vingt & vng Commissaires, dont monseigneur Charles de Orléans Comte de Dunois & de Longueuille estoit l'un & premier. Et duquel nombre de vingt & vng ne pouoit estre riens fait qu'ils ne feussent treize, ledit Comte de Du-

nois tousiours deuant & le premier : & les appelloit-on lors les refformateurs du bien publicque. Et sur ladicte commission ainsi à eulx baillée, commencerent à besoigner le mardy seizeiesme iour dudit mois de Iuillet audit an mil quatre cens soixante six. Et pour y bien commencer & mettre tousiours en leurs faits Dieu deuant, fut fait par eulx chanter vne belle Messe du S. Esperit en la sainte Chapelle du Palais Royal à Paris. Laquelle Messe fut chantée & celebrée par l'Arceuevesque de Reims Iuuenel, qui estoit esleu & nommé l'un desdits Commissaires. Et a cedit iour de mardy auoit eu vng an que le Roy rencontra monseigneur de Charrolois à Montlehery.

Et le landemain qui fut le mercredy seizeiesme iour de Iuillet, aduint en la Court dudit Palais que plusieurs des paiges des Conseilliers de ladicte Court illec attendans leurs maistres, prindrent noise & question aux paiges desdits seigneurs tenans le conseil dudit bien publicque, & se meut la noise d'entre lesdits paiges du Palais contre lesdits paiges du bien publicque, sur ce qu'ils n'auoient point payé leurs bien venues à iceulx du Palais, & de ce auoient esté reffusans : & demoura tant ladicte noise iusques à landemain qui fut ieudy, que tous lesdits paiges d'un costé & d'autre retournerent en icelle Court, & remirent sus leurdicte question. Et en pourparlant d'icelle lesdits paiges du bien publicque coururent sus ausdits paiges du Palais, qui se reuencerent & baillerent les vngs aux autres de terribles & merueilleux coups, tant de poings, de pierres, bastons, couteaulx & dagues, que il y en eut

plusieurs naurez, batus, & les yeulx creuez, & falut fermer les portes, & que gens de bien s'en messassent pour les desmeller & appointer. Et de ce fut dit par plusieurs que ces choses signifoient le bout de l'an de la rencontre de Montlehery. Ladicte annee fut fort moiste, & en diuers lieux en France y creust de bons blez, & en aultres lieux ne valurent gueres, & estoient nuillez, & y eut de grans tempestes en diuers lieux, tât de clair que de tonnoire, vents, pluyes & aultres tempestes, qui firent moult de maulx & de dommaiges en diuers lieux dudit Royaulme, & par especial au pays de Soixonnois, ou elle gasta les blez, les vignes & aultres fruiçts, & destruisit plusieurs belles maisons, manoirs, couuertures d'Eglises, & fist plusieurs aultres maulx.

En ce temps s'esmeust grànde guerre entre les Liegois & le Duc de Bourgongne, qui pour ceste cause se mist en armes & leur ala faire guerre, & s'y feist porter en vne litiere, & y mena avecques luy son fils ledit seigneur de Charrolois, avecques tous les nobles hommes, gens de guerre & aultres qu'il peust recouurer, & tous les bahus & artillerie, & fist mettre le siege deuant la ville de Dynan, contre laquelle y fut incontinant fait grans approuches, & si y furent faictes de belles faillies & grandes escarmouches de costé & d'autre, & au commencement lesdits de Dynan firent de grans maulx & dommaiges ausdits Bourguignons, & y en demoura plusieurs morts, qui gueres ne furent plains: mais en la fin ceulx de ladicte ville de Dynan par trayson & autrement furent surprins, & entrerent lesdits

Bourguignons dedens icelle ville, qui d'icelle en ieterent & bouterent dehors, hommes, femmes & enfans, & retindrent prisonniers les plus notables gens d'icelle ville, & puis la pillerent tellement qu'il n'y demoura rien. Et apres bouterent le feu parmy toutes les Eglises & maisons, & y firent meschief & dommaige irreparable. Et apres que tout fut brulé & consommé, emplirent les fossez des murs d'icelle, & à cause d'icelle destruction deuindrent les pources habitans d'icelle mandiens, & aucunes ieunes femmes & filles habandonnées à tout vice & peché pour auoir leur vie.

En ladicte année es mois d'Aoult & Septembre fut grande & merueilleuse chaleur, au moyen de laquelle s'en ensuiuit grande mortalité de pestilence, & autres maladies, dont & dequoy il mourut tant en la ville, villaiges voisins, Preuosté & Viconté de Paris, quarante mil creatures & mieulx, Entre lesquels y mourut maistre Arnoul Astrologien du Roy, qui estoit fort homme de bien, saige & plaissant, & aussi y mourut plusieurs Medecins & Officiers du Roy en ladicte ville de Paris. Et si grant nombre de creatures furent portez enseueillir & enterrer au cymetiere des saincts Innocens en ladicte ville de Paris, que tant des morts en ladicte ville que de l'ostel Dieu tout y fut remply: & fut ordonné que de là en auant on porteroit les morts au cymetiere de la Trinité, qui est & appartient à l'ostel de la ville de Paris. Et continua ladicte mort iusques au mois de Novembre, que pour la faire cesser & prier Dieu il luy pleust de le faire, furent faïctes de moult belles processions generalles à Paris, par toutes

les parroisses & Eglises d'icelle, où furent portees toutes les chasses & saintes Reliques, & mesmement les chasses de nostre Dame, de sainte Geneuiefue, & S. Marcel, & lors cessa vng petit ladicte mort. Et en ce temps fut grant bruit à Paris de larrons & crocheteurs alans de nuit, crocheter huis, fenestres, caues & celliers. Et pour lesdits cas en furent aucuns batus au cul de la charrette, & les aultres pendus & estranglez au gibet de Paris.

Audit temps fut pendu & estranglé audit gibet de Paris vng gros Normant natif de Constantin en Normendie, pource qu'il auoit longuement maintenüe vne sienne fille, & en auoit eu plusieurs enfans que luy & sadicte fille incontinent qu'elle en estoit deliuree meurdriſſoient. Et pour ledit cas fut pendu comme dit est, & sadicte fille fut arſe à Maigny près Pontoise où ils estoient venus demourer dudit pays de Normendie. En ce temps furent apportees à Paris les chasses de saint Crespin & saint Crespinien, pour trouuer remede à ladicte maladie de pestilence, & aussi pour eulx queſter affin d'auoir de quoy recouurer l'Eglise desdits Saints audit lieu de Soixons, que ladicte fouldre & tempeſte auoit ainſi deſtruite & abbatuë comme dit est deuant : & durant ce temps le Roy & son Conseil se tindrent à Orleans, Chartres, Bourges, Mehun, Amboise, & aultres lieux, & durant qu'il y fut vindrent plusieurs Ambassades de diuerſes nations, comme d'Angleterre, de Bourgongne & aultres, & delibera lors le Roy de faire guerre ausdits Duc de Bourgongne & Conte de Charrolois son fils. Et  
pour



pour ceste cause fist crier és villes de son Royaulme, ban & arriereban, & ordonna & crea plusieurs francs archiers oultre le nombre ordinaire.

Après ce que dit est, le Roy fist plusieurs ordonnances & establissemens pour la tuton & garde de ses pays & villes, & ordonna monseigneur le Marechal de Loheac son Lieutenant en la ville de Paris, & en l'Isle de France. Et à monseigneur de Chastillon fut baillé le pays de Champagne, & la garde du pays de Normendie fut baillée à monseigneur le Conte de S. Pol Connestable de France, qui auparauant auoit esté ennemy du Roy avecques le Duc de Bourgongne & mondit seigneur de Charrolois.

En apres au mois de Feurier mil quatre cens soixante six, arriua vne Ambassade de Bretagne pardeuers le Roy, lesquels apres qu'ils eurent par luy esté ouys les receut tresbien, & puis apres s'en alerent en Flandres deuers ledit Duc de Bourgongne & monseigneur le Conte de Charrolois son fils. Et lors fut grant bruit par tout qu'il y auoit appointment fait entre le Roy & monseigneur son frere, dont plusieurs gens de bien furent moult joyeux. Et auant ce le Roy auoit enuoyé son Ambassade au pays du Liege, entre lesquels y estoit ledit maistre Iehan Helbert, monseigneur l'Euesque de Troyes & aultres. Et en icelluy temps aduint en la ville de Paris, que trois sergens à verge du Chastellet, qui estoient bien mal renommez, furent de nuit prendre vng Prestre de l'Eglise monseigneur saint Pol à Paris: Lequel Prestre estoit paisiblement couché en sa chambre, en laquelle par force & vio-

O

lence entrèrent dedens lesdits sergens, & illec le battirent & mutilerent, & puis l'en emmenerent en la rue & le trainerent au long d'icelle, & le naurerent en plusieurs lieux & puis le laisserent. Et apres ledit Prestre les en poursuuiuit par iustice, & tellement qu'ils en furent constituez prisonniers au Chastellet, ou leur procez fut fait, & furent illec condampnez à estre bannis du Royaulme de France, & leurs biens & heritages confisquez, & à faire amende honorable. Dont & dequoy ils appellerent en la Court de Parlement, dont aussi en appella le Procureur du Roy de ce qu'ils auoient esté trop peu iugiez. Et depuis par Arrest d'icelle Court fut dit que auecques le iugement de sentence du Preuost de Paris, qu'ils seroient batus par les carrefours de Paris: ce qui fut fait.

Et le ieudy vingt-troisiesme iour d'Auril mil quatre cens soixante sept, Anthoine de Chabannes Conte de Dampmartin qui ainsi estoit eschappé de la Bastille sainct Anthoine, & qui depuis fist moult de maux au Roy & à ses subiects en Auuergne & ailleurs, venu deuant Paris auecques les aultres Princes, fut fait & créé grant Maistre d'ostel du Roy au lieu du seigneur de Crouy, en deboutant de ce ledict de Crouy messire Charles de Melun & tous aultres, & luy en furent baillées lettres par le Roy, qui certifioit que ledit de Chabannes luy auoit fait serment de loyaulment le seruir à l'encontre de tous. Depuis toutes ces choses, au mois de Iuing audit an quatre cens soixante sept, le Roy se partit de Paris & ala en Normandie à Rouen & ailleurs: & luy estant à Rouen fist

venir à luy le Conte de Vvarvuich hors du Royaulme d'Angleterre, pour aucunes causes qui le murent, & & illec se mist en bateaulx luy & sa compaignie, & vindrent iusques à la Bouille, assis sur la riuere de Seine, à cinq lieuës près de Rouen; à vng famedy septiesme iour du mois de Iuing à l'eure de disner, lequel trouua illec son disner tout prest. Et le Roy qui estoit illec ainsi arriué pour le receuoir, & y fut moult fort festyé & tous ceulx de sadiète compaignie, & puis apres disner rentra ledit Vvarvuich esdits bateaulx, & s'en ala par la riuere de Seine, & le Roy s'en ala par terre luy & sa compaignie iusques audit Rouen. Et alerent alencontre ceulx de ladiète ville par la porte du cay S. Eloy, où le Roy luy fist faire moult grant recueil & honorable: car de toutes les parroisses & Eglises de ladiète ville furent portees au deuant de luy les croix, bannieres, & eauë benoïste, & tous les Prestres reuestus en chappes. Et ainsi fut conduit iusques à la grant Eglise nostre Dame de Rouën où il fist son offrande, & apres s'en ala en son logis qu'on luy auoit ordonné aux Iacobins dudit lieu. Et apres vindrent en ladiète ville la Royne & ses filles, & demoura illec le Roy avecques ledit Vvarvuich par l'espace de douze iours: Et apres ledit de Vvaruich s'en departit & retourna en Angleterre, & renuoya le Roy avecques luy monseigneur l'Admiral, l'Euesque de Laon, maistre Jehan de Ponpaincourt son Conseillier, maistre Oliuier le Roux, & aultres.

Et est assauoir que durant le temps que ledit de Vvarvuich & ceulx de sadiète compaignie furent &

O ij

sejournerent à Rouën, que le Roy leur fist de moult grans dons, comme de belles pieces d'or, vne coupe d'or toute garnie de pierreries, & monseigneur de Bourbon aussi luy donna vng moult beau riche diamant, & d'autres choses: Et si fut du tout deffrayé de toute la despence que luy & tous les gens auoient faicte depuis qu'ils descendirent de la mer à terre, iusques à ce qu'ils remontassent en mer. Et après ledit parlement de Rouën le Roy s'en retourna à Chartres, où illec il demoura par aucun temps. Audit mois de Iuing audit an le Duc de Bourgogne mourut en la ville de Bruges, & fut son corps porté en la ville de Dijon, & inhumé aux Chartreux. Et aussi fist & ordonna le Roy audit lieu de Chartres, que toutes personnes estans & residens à Paris feroient des banieres, & que en chascune desdictes banieres auroit des Gouverneurs qui feroient nommez Principaulx, & sous Principaulx, qui auroient la conduicte & gouvernement desdictes banieres. Et que tous les subiects estans sous icelle feroient armez de iaques, de brigandines, fallades, & harnois blancs, voulges, haches, & autres choses qui y appartiennent, pour estre bien armez, tant de mestier, officiers, nobles, marchans, gens d'Eglise, que autres: laquelle chose fut faicte.

Et en ce mesme an au mois de Iuing, le Roy manda aler par deuers luy au Mellay prez de Chartres plusieurs gens notables de Paris, entre lesquels y fut maistre Jehan le Boulengier President en Parlement, maistre Henry de Liures Conseillier de ladicte Court, sire Jehan Clerbourt general maistre des Monnoyes, la-

ques Rebours Procureur en ladicte ville de Paris, maistre Eustache Milet aussi Conseillier en ladicte Court, Nicolas Laurens, Guillaume Roger, Iehan de Hacqueuille, & plusieurs aultres bons Marchans que le Roy enuoya à Chartres deuers le Conseil, qui depuis y furent par aulcun temps, durans lequel vng nommé Robert de la Mote & Iehan Raoul, qui auoient longuement esté tenus prisonniers par l'accusation d'vng Religieux de saint Lo de Rouën, nommé maistre Pierre le Marechal qui les auoit accusez d'estre ennemis du Roy, & conspiré contre luy, & avec eulx en auoit accusé plusieurs aultres, ce qui ne peust monstrier ne enseigner, mais fut trouué qu'il auoit menty de tout ce qu'il auoit dit : & comme faulx accusateur fut iugé à mort & fut noyé le quatorziesme iour du mois de Iuillet audit an. Et apres ce furent despechez lcsdits de la Mote, Iehan Raoul & aultres, & renuoyez en leurs maisons. Et apres ce le Roy enuoya à Paris vng mandement pour y estre scellé, & fut signé Michel de Ville-chartre, par lequel le Roy vouloit que pour bien repeupler sa ville de Paris, qui disoit auoir esté fort depopulee, tant pour les guerres, mortalitez, & autrement, que quelque gens de quelque nation qu'ils feussent peussent de là en auant venir demourer en ladicte ville & es faulxbourgs & banlieuë, ils peussent joyr de toutes franchises de tous cas par eulx commis, comme de meurdre, furt, larrecins, piperies, & tous aultres cas, reserué crime de leze Majesté : & aussi pour resider illec en armes pour seruir le Roy contre toutes personnes, lesquelles lettres furent leuës & publiees

par les carrefours de Paris à son de trompe, & tout selon le preuillege donné à tous bannis, residens & demourans es villes de saint Malo & Valenciennes. Et ce mesme mois aussi le Roy fist crier & publier que tous nobles tenans fiefs & arrierefiefs, feussent tous prests & en armes, & mesmement ceulx de l'Isle de France, tant en la ville de Paris que ailleurs, au quinzieme iour d'Aoust, pour le seruir & estre tous prests quant mestier en auroit.

Et le lundy tiers iour d'Aoust audit an, aduint à Paris que l'vng des Religieux du Temple nommé frere Thomas Louecte, qui estoit Recepueur dudit Temple, eust la gorge coupee audit lieu du Temple par vng de ses freres & compaignons nommé frere Henry, pour aucunes noises qu'il auoit conceu contre le dit frere Thomas. Et pour raison dudit cas ledit frere Henry se absenta & ne peult estre trouué qu'il ne feust le dixieme iour dudit mois, que enuiron dix heures de nuit vng Examineur du Chastellet de Paris, nommé maistre Jehan Potin, accompagné de trois sergens en fist telle diligence qu'il le trouua mucié en l'ostel de saint Pol à Paris dedens vne aumoiere, en habille-ment d'vng rocquet blanc de toille & vng chapeau noir, & en cest estat fut mené prisonnier en Chastellet, & puis rendu en la Court de Parlement, pource qu'il estoit appellant de sa prise, & disoit que le lieu ou il auoit esté pris estoit lieu de franchise, & que on luy deuoit remettre. Et puis fut requis par les Religieux du Temple leur estre rendu: ce qui fut fait, & fut mené es prisons dudit lieu du Temple. Le mercredy dou-

ziesme iour d'Aoust audit an mil quatre cens soixante sept, & le ieudy ensuiuant le grant Prieur de France pour ledit cas, accompaigné de plusieurs aultres seigneurs de leurdit ordre pour faire le procez dudit frere Henry, qui depuis fut par eulx condempné à demourer prisonnier en lieu tenebreux, & d'auoir illec pour pitance tant qu'il y pourroit viure, le pain de douleur & eauë de tristesse. En ce temps retournerent du Royaulme d'Angleterre monsieur l'Admiral & aultres dessus nommez, qui ainsi s'en estoient alez avec ledit de Vvarvuich audit pays d'Angleterre, lesquels y demourerent longuement & n'y firent riens. Et par eulx ledit Roy d'Angleterre enuoya au Roy des trompes de chasse & des bouteilles de cuyr, à l'encontre des belles pieces d'or, coupe d'or, vaisselle, pierreries, & aultres belles besongnes que le Roy & aultres seigneurs auoient donnez audit de Vvarvuich à son partement de Rouën. Et le vendredy dixhuiëtiesme iour du mois d'Aoust le Roy arriua à Paris enuiron huiët heures de soir, & estoit avecques luy monsieur le Duc de Bourbon & plusieurs aultres seigneurs.

Et le mardy premier iour de Septembre la Roïne aussi arriua à Paris en bateaulx par la riuere de Seine, & vint arriuer au terrain nostre Dame, & illec à l'arriuer qu'elle fist trouua tous les Presidens & Conseilliers de ladicte Court de Parlement, l'Euesque de Paris, & plusieurs aultres gens de façon, tous honnestement vestus & habillez. Et à l'entree dudit terrain y auoit fait de moult beaulx personnaiges, illec richement mis & ordonnez de par la ville de Paris : & si est assa-

uoir que auant que ladicte Royne se mist esdits bateaulx pour venir à Paris, furent au deuant d'elle & pour la recepuoir les Conseilliers & Bourgeois de ladicte ville en grant & notable nombre, ausli tous en bateaulx, qui estoient tous richement couuers de belle tapisserie & draps de soye. Et dedens iceulx estoient les petits enfans de chœur de la saincte Chappelle, qui illec disoient de beaulx virelais, chançons, & aultres bergerettes moult melodieusement. Et si y auoit aultre grant nombre de clarons, trompettes, chantes haulx, & bas instrumens de diuerses sortes, qui tous ensemble iouoyent chascun en droit soy moult melodieusement, à l'eure que ladite Royne, ses Dames & Damoiselles entrèrent en leur bateau, dedens lequel par lesdits bourgeois de ladicte ville luy fut présenté vng beau cerf fait de conficture, qui auoit les armes d'icelle noble Royne penduës au col: & si y auoit plusieurs aultres drageouers tous plains d'espiceries de chambre & belles confictures, grant quantité ausli y auoit de fruiçts nouveaulx de moult de sortes, violettes fort odorans gettees & semees tout parmy le bateau, & vin à tous venans y fut baillé & distribué, tant que on en vouloit auoir & prendre. Et apres qu'elle eut faicte son oroison à nostre Dame de Paris, elle se rebouta en son bateau & s'en vint descendre à la porte deuant l'Eglise des Celestins, où ausli elle trouua dessus ladicte porte de moult beaulx personaiges, & elle descendit à terre, monta & ses Dames & Damoiselles sus cheuaulx, belles hacquenees & palefrois, qui illec les attendoient, & puis s'en ala iusques en l'ostel du  
Roy



Roy aux Tournelles. Et deuant la porte dudit hostel trouua aultre moult beau personnage. Et icelle nuit furent faits à Paris les feux par les ruës d'icelles, & illec mises aussi tables rondes & donné à boire à tous venans: & le ieudy ensuiuant quatriesme iour dudit mois de Septembre ensuiuant maistre Nicole Balue frere de monsieur l'Euesque d'Eureux fut marié à la fille de maistre Jehan Bureau Cheualier seigneur de Montglat, & fut la feste desdites nopces faictes en l'ostel de Bourbon, laquelle fut moult belle & honneste, & luy fut illec fait grant honneur ce iour: car le Roy & la Roynes, monsieur de Bourbon & madame sa femme, monsieur de Neuers, madame de Buil, & toute leur noblesse qui les suiuoient y furent & s'y trouuerent, & y fut fait moult grant chiere, & si leur fist on de moult grans, beaulx & riches dons. Et depuis ce le Roy & la Roynes firent de grans chieres en plusieurs des Hostels de leurs seruiteurs & officiers en ladicte ville. Et entre les aultres le ieudy dixiesme iour dudit mois de Septembre audit an quatre cens soixante-sept, la Roynes accompagnee de madite Dame de Bourbon & mademoiselle Bonne de Sauoye sœur de la Roynes, & plusieurs aultres dames de sa compaignie soupperent en l'ostel de maistre Jehan Dauuet premier President en Parlement, & illec furent receuës & festoyees moult noblement & à grant largesse, & y eut faits quatre moult beaulx bains, & richement aornez, cuidant que la Roynes se y deust baigner, dont elle ne fist riens, pource qu'elle se sentit vng peu mal disposee, & aussi que le temps estoit dangereux: mais en l'vng desdits

P

baings se y baignerēt madiete Dame de Bourbon, madamoiselle Bonne de Sauoye: & en l'autre baing au ioignant se baignerent madame de Montglat, & Perrette de Chalon bourgoise de Paris, & là firent bonne chiere.

Et le ieudy ensuiuant quatorziesme iour dudit mois de Septembre, le Roy qui auoit ordonné mettre sus les banieres de Paris, comme dit est deuant, fist publier que audit iour ils feussent toutes prestes pour estre aux champs dehors Paris, en faisant scauoir à rous de quelque estat ou condition qu'ils feussent, depuis l'aage de seize ans iusques à soixante ans yssissent hors de ladiete ville en armes & habillement de guerre, & s'il en y auoit aucuns qui n'eussent harnois, que neantmoins ils eussent en leurs mains vng baston defensible, & sur paine de la hart: ce qui fut fait. Et yssit hors de ladiete ville la pluspart du populaire d'icelluy, chascun sous estendart ou banniere, qui faisoit moult beau veoir, car chascun y estoit en moult belle ordonnance, & sans noise ne bruit: & estoient bien de soixante à quatre vingts mille testes armées, dont il en y auoit bien trente mille tous armez de harnois blâcs, iaques ou brigandines. Et tous estans en belle bataille, le Roy, la Roynie & leur compaignie qui les suiuiot les vindrent veoir, laquelle chose leur pleust moult: car oncques n'auoient veu y estre de ville du monde à beaucoup près, telle ne si grant armee, & se trouuerent soixante sept banieres des mestiers, sans les estendarts & guidons de la Court de Parlement, de la Chambre des Comptes, du Tresor, des Generaulx, des Aydes,

des Monnoyes, du Chasteller & Hostel de la Ville, lesquels il se trouua autant & plus de gens de guerre, que fous toutes lesdictes bannieres: & hors Paris en aucuns lieux ordonnez leur fist porter & conduire plusieurs tôneaulx de vin, qui illec furent deffoncez pour faire boire & raffreschir tous ceulx de ladicte monstre, qui tenoient moult grant pays: car ils estoient tous en bataille à commencer au bout de la voirie d'entre la porte saint Anthoine & celle du Temple, depuis les fossez de Paris en montant contre mont iusques à vng pressoeur deuant ladicte voirie, & de là en bataille au long des vignes iusques à saint Anthoine des champs: & puis apres iusques au long des meurs dudit saint Anthoine des champs iusques à la granche de Rully, & d'icelle granche iusques à Conflans: & dudit Conflans en reuenant par la granche aux Merciers, tout au long de la riuere de Seine iusques au bouleuart du Roy de la tour de Billy. Et d'icelluy bouleuart tout au long des fossez de ladicte ville par dehors iusques à la Bastille, & à la porte saint Anthoine. Et brief c'estoit merueilleuse chose à voir le monde qui estoit en armes dehors Paris, & si maintenoient plusieurs qu'il en estoit à peu près demouré autant dedens Paris qu'il y en auoit dehors. Et le mardy ensuiuant vingt & deuxiesme iour de Septembre audit an quatre cens soixante sept, le Roy partit de Paris apres disner pour aler à pié iusques à saint Denis en France, & auoit auecques luy aussi à pié mondit seigneur d'Eureulx, monsieur de Crussol, Phelippe Luillier & aultres.

Et entre Paris & saint Denys le Roy alant à son

P ij

pelerinaige trouua trois ribaulx qui luy vindrent requierir grace & remission de ce que tout leur temps ils auoient esté larrons, meurdriers, & espieurs de chemins, laquelle chose le Roy leur accorda benignemét. Et tout ce iour demoura audit lieu de sainct Denis iusques au lendemain vespres qu'il s'en retourna en son hostel des Tournelles, & d'illec s'en ala soupper en l'ostel de sire Denys Hesselin son Pannetier & Esleu de Paris, qui nouuellement estoit deuenue compere du Roy, à cause d'une sienne fille dont sa femme estoit accouchee que le Roy fist tenir pour luy par maistre Iehâ Balue Euesque d'Eureux : & pour comeres y estoient madame de Bueil & madame de Montglat. Et audit hostel le Roy y fist grât chiere, & y trouua trois beaulx baings honnestement & richement attintelez, cuidant que le Roy deust illec prendre son plaisir de se baigner, ce qu'il ne fist point pour aucunes causes qui en raison le mirent : c'est assauoir tant pource qu'il estoit enrumé, que aussi pour ce que le temps estoit dangereux.

En ce temps s'esmeut grande guerre entre les Liegeois & monsieur de Bourgogne, & leur Euesque cousin de mondit seigneur de Bourgogne & frere de monsieur le Duc de Bourbon, lequel Euesque lesdits Liegeois alerent assieger dedens une ville nommée Huye. Et apres que iceulx Liegeois eurent bien longuement esté deuant icelle ville, ils la prindrent & gagnèrent, & en ce faisant eschappa leur dit Euesque estant en icelle. Et durant ce que dit est le Roy ordonna aler au secours & ayde desdits Liegeois quatre cens

lances de son Ordonnance, dont auoient la charge le Conte de Dampmartin, Sallezart, Robert de Cony-chan, & Steuenot de Vignolles avec six mil francs archiers, prins & esleuz en Champaigne, Soixonnois & aultres lieux en l'Isle de France. Et apres ce que ledit de Bourgongne eut bien sceuë la gaigne que lesdits Liegeois auoient faicte de ladicte ville de Huye, & qu'ils y auoient tué plusieurs Bourguignons, il assembla tout son ost en soy deliberant d'aler aux armes sus les chāps, en intention de tout destruire & mettre à feu & à sang lesdits Liegeois. Et ainsi le fist crier & publier par tous ces pays: & ceulx qui faisoient lesdictes publications en icelles publiant tenoient en vne main vne espee toute nuë, & en l'autre vne torche alumee, qui signifioit guerre de feu & de sang.

Audit temps au mois de Septembre le Roy bailla ses lettres à vng Legat venu de Rome de par le Pape, pour la rompture de la pragmatique sanction: lesquelles lettres furēt leuës & publices au Chastellet de Paris sans y faire aucun contredit ou opposition. Et le premier iour d'Octobre ensuiuant maistre Iehan Balue fut & ala en la salle du Palais Royal à Paris, la Cour de Parlement vaccant, pour illec aussi faire publier lesdites lettres, où il trouua maistre Iehan de saint Romain Procureur General du Roy nostre Sire, qui formellement s'opposa à l'effect & execution desdites lettres, dont ledit Balue fut fort desplaisant. Et pour ceste cause fist audit de saint Romain plusieurs menasses, en luy disant que le Roy n'en feroit point content, & qu'il le desappointeroit de son office, dequoy ledit saint

Romain ne tint pas grant compte: mais luy dist & respondit que le Roy luy auoit donné & baillé ledit office, laquelle il tiendroît & exerceroit iusques au bon plaisir du Roy. Et que quant son plaisir feroit de la luy oster que faire le pourroit, mais qu'il estoit du tout delibéré & bien resolu de tout perdre auant que de faire chose qui feust contre son ame, ne dommaige au Royaulme de France & à la chose publique, & dist audit Balue qu'il deuoit auoir grant honte de poursuiure ladicte expedition. Et en apres le Recteur de l'Vniuersité de Paris & les Supposts d'icelle alerent par deuers ledit Legat, qui de luy appellerent, & de l'effect desdictes lettres au sainct Concile, & par tout ailleurs où ils verroient estre à faire, & puis vindrent audit Chastellet, ou pareillement autant en firent, & dirent illec enregistrer leur opposition. Audit temps le Roy enuoya par deuers ledit de Charrolois lesdits Legat & Euesque d'Eureux, qui nouuellement auoit esté Cardinal à Rome, maistre Iehan de Ladriesche Tresorier de France & aultres, pour faire de par luy aucunes choses dont il leur auoit donné charge.

Et le iedy huictiesme iour d'Octobre audit an mil quatre cens soixante sept, vng nommé Seuestre le Moynenatif de la ville d'Auxerre pour aucuns cas & delits par luy commis & imposez, & qui par aucun temps auoit esté constitué & tenu prisonnier és prisons de Thyron, fut ledit iour tiré hors desdictes prisons & fut mené noyer en la riuere de Seine près de la granche aux Merciers, par la sentence & iugement de messire Tristan l'Ermite Preuost des Mareschaulx de l'ostel

du Roy. Et le Dimenche vnziesme iour dudit mois d'Oct. fut vng grant & merueilleux escler & tonnoirre, enuiron huit heures de soir: & auât & depuis durant ledit mois furent faictes grandes & merueilleuses chaleurs, & les plus extremes que homme eust veu en sa vie, qui sembloit chose estrange & desnaturee. Et le lundy douziesme iour dudit mois d'Octobre audit an soixante-sept, le Roy se partist de son hostel des Tournelles à Paris pour aler en l'Eglise nostre Dame, où il oyt les Vespres, & apres icelles dictes fut faicte procession par l'Euesque & Chanoines dudit lieu, & puis s'en ala reposer en l'ostel de son premier President, maistre Iehan Dauuet, où il fut certaine espace de temps, & puis s'en partit pour s'en retourner en son dit hostel des Tournelles: & à l'eure de son partement qui estoit heure de noire nuit il vit & apperceut au ciel vne estoille au dessus de l'ostel dudit President, laquelle incontinant que le Roy commença à marcher pour s'en retourner, ladicte estoille le suiuiot, & fut tousiours apres luy, iusques à ce qu'il fut entré en son dit hostel: & incontinant qu'il y fut entré elle se disparut, & depuis ne fut veüe.

Et le ieudy ensuiuant quinziemesme iour dudit mois, vint nouuelles au Roy que certain grant nombre de Bretons estoient venus eulx bouter dedens le Chastel & en la ville de Caen, & puis s'en alerent d'illec à Bayeux, & tindrent lesdictes villes contre le Roy, dont de ce il fut courroucié: & en renuoya pour ceste cause le Marechal de Loheac qui lors estoit avecques le Roy, & qui auoit cent lances de Bretagne sous sa

charge esdictes villes de par le Roy, pour y pourueoir & mettre prouision : & ausquels Bretons le Duc d'Alençon qui cōme crimineulx de leze Majesté du temps du Roy Charles dernier trespasé, auoit esté constitué prisonnier pour aucuns crimes qu'il auoit machinez contre luy, & à la faueur des Anglois anciens ennemis du Royaulme en la ville de Vendosme, le lit de Iustice illec feant, auquel lieu apres ses confessions prises, & procez fait, fut condempné à mourir, sauf surce le bon plaisir du Roy. Et lequel d'Alençon depuis le temps deslors iusques au trespas dudit feu Roy Charles, fut tenu prisonnier au Chasteau de Loches : & apres icelluy trespas que le Roy vint à sa Couronne le bouta hors desdictes prisons & luy pardonna tout, en voulant que dudit procez ne feust iamais nouuelles : & puis aduint que vng boiteux qui auoit accusé ledit d'Alençon audit deffunct Roy, craignoit fort que ledit d'Alençon ne luy fist quelque grant desplaisir, se tira par deuers le Roy, en luy suppliant qu'il luy fist auoir assurance dudit d'Alençon, laquelle chose il fist & ordonna : & commanda le Roy de sa bouche audit Duc d'Alençon que sur sa vie il ne luy meffist ne fist meffaire, en luy disant qu'il le mettoit en sa main, protection & sauuegarde, en semble sa famille & ses biens : laquelle chose ledit d'Alençon luy promist, mais tantost apres ledit d'Alençon en alant contre sondit serment fist prendre ledit boiteux & amener deuant luy : & nonobstant les deffences ainsi à luy faictes de par le Roy, fist incontinent icelluy boiteux meurdrir & mettre à mort. Pour laquelle mort la femme dudit boiteux se tira



se tira deuers le Roy luy faire sçauoir ces choses, & pour estre son iniure reparee, dont & dequoy le Roy depuis empescha les villes & terres dudit d'Alençon, mais bien tost apres tout luy fut deliuré, & par luy tout pardonné comme deuant. Et puis apres le Duc d'Alençon pour bien le remunerer de toutes ses graces & biens faits, bailla, ou offrit bailler toutes ses villes & pays ausdits Bretons & à monsieur Charles, contre la voulenté du Roy, & à sa grant desplaissance. En ce temps aussi messire Anthoine de Chasteauneuf Cheualier seigneur du Lau, grant Bouteillier de France & Seneschal de Guyenne, qui estoit grant Châbellan du Roy, & de luy plus aimé que oncques n'auoit esté aultre, & à qui le Roy fist de moult grans biens, tant qu'il fut autour de luy & en son seruice: car en moins de cinq ans il amenda des biens du Roy, de trois à quatre cens mil escus d'or, qui auoit esté fait prisonnier du Roy & mis au Chateau de Sully sur Loire, de l'ordonnance du Roy fut enuoyé audit lieu au mois d'Octobre messire Tristan l'Ermite Preuost des Mareschaulx de l'ostel du Roy, & maistre Guillaume Cerisay nouvellement Greffier Ciuil de Parlement, pour illec tirer hors ledit seigneur du Lau & le mener prisonnier au Chateau de Hufson en Auuergne: mais lors qu'il fut amené au dehors dudit lieu il fut grant bruit que ledit seigneur du Lau auoit esté noyé, & fut ce que dit est longuement continué.

Et le mardy vingtiesme iour dudit mois d'Octobre, le Roy se partit de sa bonne ville de Paris pour aler au pays de Normendie, & ala cedit iour au giste à Ville-

Q

pereur, & le landemain à Mante. Et auant son partement en enuoya plusieurs Capitaines qu'il auoit avecques luy, querir tous les gens de guerre qui estoient fous leurs charges pour venir apres luy audit pays de Normendie, ou aultre part, quelque lieu qu'il feust. Et le iour de sondit partement il fist & ordonna certaines lettres & ordonnances, par lesquelles il voulust & ordonna que de là en auant son plaisir estoit que tous les Officiers de son Royaulme demourassent paisibles en leurs Offices, & que nulle Office. ne feust dict vaccant, sinon par mort, resignation, ou confiscation: Et s'il donnoit nulles aultres au contraire, par importunité de requerans ou aultrement, vouloit qu'il n'y feust aucunement obtempéré: & que de là en auant toute Iustice feust faicte & ordonnee à vng chascun, & puis s'en partit dudit lieu de Mante & s'en ala à Vernon sur Seine, où il demoura illec depuis par certain temps: durant lequel vint & arriua deuers luy monsieur le Connestable, lequel trouua moyen que le Roy bailla & donna treue entre luy & monsieur de Charrolois iusques à six mois lors apres ensuiuans, sans en ce y cōprendre les villes & pays de Liege, qui desia estoient mis sus & en armes à l'encontre du seigneur de Charrolois, en esperance d'auoir l'aide & secours du Roy, ainsi que promis leur auoit esté, & à ceste cause demourerent du tout habandonnez. Et puis apres ce que dit est ainsi fait, ledit monsieur le Connestable s'en retourna par deuers ledit monseigneur de Bourgongne luy porter les nouuelles desdites treues.

Et ce fait, maître Jehan Baluc Cardinal d'Eureulx,

maistre Iehan de Ladriesche, & maistre Iehan Preuost, retournerent deuers le Roy audit lieu de Vernon, qui estoient alez en Flandres de l'ordonnance du Roy par deuers ledit de Bourgongne: & tantost apres ledit retour fait le Roy se partit dudit lieu de Vernon & s'en ala à Chartres, où il fist illec venir & arriuer la plus grant partie de son artillerie qui lors estoit à Orleans, pour enuoyer à Alençon & aultres villes du pays, pour les auoir & mettre en ses mains. Et apres le Roy enuoya ledit maistre Iehan Preuost audit lieu de Flandres par deuers ledit de Bourgongne, pour luy porter & bailler les lettres desdites treues.

Et apres vint & arriua à Paris le seiziesme iour du mois de Novembre, ledit monsieur le Cardinal, ledit Tresorier de Ladriesche, maistre Iehan Berart, & maistre Geuffroy Alnequin, pour faire les monstres des bannieres de Paris par deuant eulx, & pour faire aultres charges qui leur estoient donnez de par le Roy. Et apres s'en partist dudit lieu de Chartres pour aler à Orleans, Clery, & aultres villes près d'illec, & puis à Vendosme, & de là iusques au mont saint Michiel, & avecques luy fist mener grande quantité de sadiete artillerie, & si aloient avecques luy grant nombre de ses gens de guerre. Et en ces entrefaictes les Bretons yssirent tous en armes hors de leur pays, & vindrent en Normendie iusques à la cité d'Auranches, & aultres villes dudit pays. Et apres iceulx Bretons s'espandirent par ledit pays de Normendie, comme iusques à Caen, à Bayeux, Constances, & aultres lieux. Audit temps ledit seigneur de Bourgongne au moyen desdites tre-

ues à luy baillées par le Roy, esquelles n'estoient aucunement comprins lesdits Liegois, entra audit pays du Liege avecques toute son armee, en presentant lesdits Liegois: Tous lesquels pource que le Roy leur faillit de secours, & qu'ils veirent clerement leur destruction aduenüe, se rendirent audit de Charrolois, ensemble toutes leurs villes: avec lequel ils prindrent composition. Et pour ce faire & auoir luy donnerent & baillèrent grant somme d'or, & si eurent vne partie de leurs portes & murailles abatuës.

En apres ledit Cardinal Balue & Commissaires deuant nommez, procederent à faire les monstres des bannieres desdits mestiers par deuant iceulx Commissaires en diuers lieux de ladicte ville, tant dessus les murs d'icelle d'entre les portes du Temple & saint Martin, en la cousture du Temple sur les murs d'entre la tour du Bois & la porte saint Honnoré, deuant le Louure, au marché aux brebis, & sur les murs, iusques à ladicte porte saint Honnoré. Et le samedi ensuiuant vingt & deuxiesme iour dudit mois de Nouembre, le Roy fist crier par les carrefours de Paris que toutes gens qui auoient accoustumé de suiure la guerre, & qui auoient esté cassez de gaiges, se trayssent par deuers certains Commissaires qu'il auoit ordonné pour les recepuoir & mettre à ses gaiges & soldes, pour le seruir en ses guerres. Et le lundy ensuiuant vingt & troiesme iour de Nouembre maistre Iehan Preuost retourna par deuers ledit seigneur de Charrolois, où le Roy l'auoit enuoyé porter les lettres de treues qu'il auoit faictes avecques luy, & pour rapporter

au Roy la responce que ledit seigneur de Charrolois auoit faicte audit Preuost touchant le fait desdites treues. Et le ieudy ensuiuant vingt-sixiesme iour dudit mois de Nouembre partie desdictes monstres furent faictes dehors Paris, deuant l'Eglise & Abbaye sainct Germain Desprez iusques sur la riuere de Seine, esquelles monstres y auoit grant nombre de gens à pié & à cheual, tous bien en point & armez, où estoient les Tresoriers de France, les Conseilliers & Clercs des Comptes, les Generaulx des Monnoyes & des Aydes, le Tresor, les Esleuz, & toute la Court de Parlement, tout ensemble. Apres y estoient tous les Praticiens & Officiers de Chastellet de Paris, en bien belle & grosse compaignie: & avec les compaignies dessusdictes estoient aussi tous ceulx estans sous l'estendart & guidon de la ville de Paris, qui estoient moult grant nombre de gens à pié & à cheual: & si y vindrent pour l'Euesque, Vniuersité, Abbez, Prieurs, & aultres gens d'Eglise de ladiete ville certaine quantité de gens en armes, & en icelles monstres y auoit grant nombre de gens bien armez. Et apres lesdictes monstres ainsi faictes, ledit Cardinal & Commissaires dessus nommez, maistre Iehan de Ladriesche Tresorier de France, maistre Pierre l'Orfeure seigneur Dermenonuille, & aultre Officiers du Roy partirent de la ville de Paris pour aler deuers le Roy, qui estoit entre le Mans & Aléçon, à tout moult grant armee: car il auoit qui le suiuiroit plus de cent mil cheuaulx, & plus de vingt mil hommes à pié, pour resister à l'armee desdits Bretons, & fist mener le Roy avec luy de son artillerie grant quantité

Q<sup>iiij</sup>

pour mettre le siege à Alençon.

Et en ces entrefaictes fut pourparlé de treues, qui tindrent le Roy & sadicte armee longuement sans riens faire, & en ce faisant mengerent & destruyrent tout le plat pays, bien à vingt ou trente lieues dudit lieu du Mans & d'Alençon. Et durant ce que dit est le dit seigneur de Charrolois qui ainsi auoit destruit lesdits Liegeois & leur pays, s'en retourna deuers sainct Quentin, & fist crier par tous les pays que toutes gens de guerre desdits pays s'en tirassent deuers S. Quentin, pour illec faire leurs monstres au quinziesme iour du mois de Decembre, sur bien grosses peines: & si fist aussi crier par tout le pays de Bourgongne que tous nobles & aultres gens suiuant les armes, feussent tous prest à Montsauion, pour illec prendre les gaiges & souldees dudit seigneur de Charrolois par les mains de ses Commissaires qu'il auoit ordonnez: & ce dedens le vingtiesme iour de Decembre prouchain ensuiuant, & pour partir dudit Montsauion & aler audit sainct Quentin par deuers luy pour le accompagner, & luy aider à secourir son tref-chier & amé frere monseigneur Charles de France & le Duc de Bretaigne, estans avecques luy, alencontre de aucuns leurs mal-vueillans, & telle substance portoit ledit cry. Pour occasion duquel cry les Marchans & facteurs des Marchans de Paris, qui estoient alez audit pays de Bourgongne pour faire leurs amplettes, s'en retournerent à Paris bien hastiuement, sans riens faire. Et de rechief apres toutes ces choses ledit de Charrolois fist mander à luy venir toutes ses gens de guerre audit sainct Quentin,

au quatriefme iour de Ianuier ensuiuant.

Et le lundy feste des saincts Innocens vingt-huitiefme iour de Decembre, vint & arriua à Paris monseigneur le Duc de Bourbon de par le Roy, pour mettre garnison en plusieurs villes, & garder les Bourguignons d'entrer és pays du Roy. Et vint & arriua auecques luy monseigneur le Marechal de Loheac, qui venoit à Paris, comme on disoit, pour estre Lieutenant de ladiète ville. Lequel de Loheac s'en partit deux iours apres pour aler à Rouen & aultres villes de Normandie, pour y mettre garde & ordre par le Roy, & illec demoura par certain temps. Et mondit seigneur de Bourbon depuis demoura à Paris par certain aultre temps. Pendant lequel fut festyé de plusieurs notables gens de ladiète ville, endementiers la ville d'Alençon qui estoit tenue par les Bretons, comme dit est deuant, fut renduë & mise és mains du Roy par le Conte du Perche fils du Duc d'Alençon qui tenoit le Chasteau dudit Alençon, & lesdits Bretons tenoient la ville. Mais durant ce le Roy ne partit point de ladiète ville du Mans, & durant qu'il y fut enuoya deuers mondit seigneur Charles audit pays de Bretagne le Legat du Pape, dont pourparlé est deuant, & Anthoine de Chabannes Conte de Dampmartin, le Tresorier de Ladriefche & aultres, pour cuider trouuer aucun bon expedient. Et en fin le Roy se condescendit que les trois Estats se tiendroient & assembleroient: & pour ce faire leur fut lieu assigné en la ville de Tours, pour illec eulx y trouuer au premier iour d'Auril mil quatre cens soixante-sept, & s'en reuint le Roy dudit pays du

Mans, & s'en ala aux Montils lez Tours, à Amboise & illec enuiron.

Et puis fut l'assemblee desdits trois Estats tenuë audit lieu de Tours, qui pour ceste cause y estoient alees: & illec le Roy present fut pourparlé & conclud sur la question pour laquelle ils estoient assemblees audit lieu de Tours iusques au iour de Pasques, qui fut mil quatre cens soixante huiët, que chacun d'eulx illec venus s'en retournerent en leurs maisons, apres la conclusion par eulx prinse sur le faict de ladicte assemblee. Et pour ceste cause y estoient venus le Roy premierement, le Roy de Cecile, monseigneur le Duc de Bourbon, le Conte du Perche, le Patriarche de Iherusalem, le Cardinal d'Angiers & plusieurs aultres seigneurs, Barons, Arceuesques, Euesques, Abbez, & aultres notables personnes & gens de grant façon, ensemble aussi les Ambassadeurs venus audit lieu pour ceste cause, de la pluspart de tout le Royaulme de France. Et par tous iceulx ainsi assemblees, & à grande & meure deliberation fut dit & conclud que au regard de la question d'entre le Roy & mondit seigneur Charles touchant son appanaige qu'il auroit & receueroit pour icelluy appanaige: & de ce se tiendroient pour bien content de douze mil liures tournois en assiette de terre paran, & tiltre de Conte ou Duché. Et en oultre que le Roy luyourniroit en pension par chascun an iusques à soixante mil liures tournois par chascun an: & tout ce sans preiudice aux aultres enfans, qui pour le temps aduenir pourroient venir à ladicte Couronne, de pouoir demander tel & semblable appanaige.

Pource



Pource que le Roy pour auoir paix & bonne amour avec sondit frere se eslargissoit à luy bailler si grant somme que de soixante mil liures tournois par an. Et entant que touchoit la Duché & pays de Normandie, monseigneur Charles ne l'auroit point : disans qu'il n'estoit pas au Roy de la bailler, ne desmembrer sa Couronne. Et que au regard du Duc de Bretaigne qui detenoit mondit seigneur Charles, & qui auoit prises les villes du Roy en Normandie, lequel on disoit auoir intelligence avecques les Anglois, anciens ennemis de la Couronne de France, fut dit & delibéré par lesdits trois Estats qu'il seroit sommé de rendre au Roy lesdictes villes, & ou cas que il en feroit reffus, & que le Roy seroit deuëment aduertí de ladicte alliance ausdits Anglois, que incontinent le Roy recourrast lesdictes villes à main armee, & de luy courir sus. Et que pour ce faire lesdicts trois Estats promirent de secourir & aider au Roy : c'est assauoir les gens d'Eglise de prieres & oroisons, & biens de leur temporel, & les nobles & populaire de corps & de biens, & iusques à la mort inclusiuement. Et que en tant que touchoit la Iustice de tout le Royaulme, le Roy auoit singulier desir de la faire courir par tout sondit Royaulme, & fut content que on esleust nobles personnes de tous estats pour y mettre remede & bonne ordre : & furent d'oppinion lesdits trois Estats que à ce faire monseigneur de Charrolois se deuoit fort employer, tant à cause de la proximité de lignaige qu'il a au Roy, comme aussi de Per de France. Et apres ladicte deliberation le Roy se partit de Tours & s'en ala à Amboise,

R

& puis apres enuoya son Ambassade par deuers l'assemblée estant à Cambray, affin de sçauoir leur vouloir & responce sur ladicte deliberation prinse par lesdits trois Estats ainsi assemblez comme dit est.

Apres ces choses le lundy cinquiesme iour de May mil quatre cens soixante huit, Dame Ambroise de Lore en son viuant femme de messire Robert Destoueuille Cheualier Preuost de Paris, ala de vie à trespas ce iour enuiron vne heure apres minuiet, laquelle fut fort plainte, pource qu'elle estoit noble Dame, bonne & honneste, & en l'ostel de laquelle toutes nobles & honnestes personnes estoient honnorablement receuës. Et ce mesme iour enuiron entre neuf & dix heures de nuit, se bouta le feu en l'un des moulins aux Musniers de Paris qui appartenoit au Prieur de saint Ladre, & fut tout le comble d'icelluy bruslé par vng paillart varlet monnier, qui auoit attachee vne chandelle contre le mur de son liêt, qui cheyt dedens icelluy liêt, & brusla tout reserué ledit paillart qui se sauua, & s'enfuit comme vng renard.

Le quinzième iour d'icelluy mois de May, furent faictes ioustes à Paris deuant l'ostel du Roy aux Tournelles, par quatre Gentilshommes de guerre de la compagnie du grant Seneschal de Normandie, qui auoient ordonne les lices & prepare le champ, en faisant assaïoir à tous qu'ils se trouueroient audit quinzième iour de May pour attendre les venans, rompans chascun trois lances à l'encontre d'eulx. Auquel iour y vindrent & comparurent les enfans de Paris, desquels & tout le premier y vint & arriva Johan Ra-

guier Grenetier de Soixons & Tresorier des guerres au Duché de Normendie, fils de Maistre Anthoine Raguier Conseillier & Tresorier des guerres du Roy: lequel Iehan Raguier vint & arriua à bien grant haste de la ville de Rouën où il estoit: pour estre & comparoistre ausdictes ioustes, & arriua le soir de deuant à sainct Ladre lez Paris, accompagné de plusieurs nobles hommes de la charge & compagnie de messire Iouachin Rouault Marechal de France, & aultres gens, iusques au nombre de vingt cheuaulx. Auquel lieu de sainct Ladre ils se tindrent secrettement & sans faire bruit iusques à lendemain qu'ils menerent & compaignerent ledit Raguier bien & honorablement, garny de trompettes & clairons qui faisoient de grans melodies iusques au lieu desdictes lices: & lequel Raguier accompagné comme dit est, auoit autour de luy quatre pietons vestus de liuree, & tousiours estans prez de luy & du coursier surquoy il estoit monté, lesquels estoient prests de le seruir & recueillir son bois: & estoient tous ceulx de sa compaignie habillez de hocquetons brodez à grans lettres d'or.

Et audit champ & dedens les lices se pourmena plusieurs tours attendant lesdicts quatre champions, ou l'un d'eulx, contre lesquels il se porta vaillamment: car il rompit cinq lances bien & nettement, & eust fait plus s'il eust pleu aux Commissaires ordonnez pour lesdictes ioustes. Et apres lesdictes lances ainsi rompuës s'en partit moult honorablement en foy pourmenant par lesdictes lices, & prenant congié des Iuges desdictes ioustes, & merçant les Dames, Damoi-

felles & Bourgoises qui illec estoient venuës, desquelles il acquist moult grant los. Et apres luy y vint & comparut vng esleu de Paris nommé Marc Senamy, & deux des fils messire Iegan Sanguin, qui aussi vindrent en ladicte iouste honnorablement, & ils firent tout le mieulx qu'ils peurent: mais ils n'en emporterent gueres de bruit. Et en apres y vint aussi & arriua vn nommé Charles de Louuiers Eschançon du Roy, qui moult bien & vaillamment si porta, en portant bien & honnestement son bois & sans aide, & rompit nettement plusieurs lances: & tellement se porta à la iournee que en la fin le prix luy fut donné, & demourerent lesdits quatre Gentilshommes dedens moult foulez, desquels les deux porterent le bras en l'escharpe, & le tiers eut la main blesee deffoubs le gantelet. Et par ainsi l'onneur fut & demoura ausdits enfans de Paris.

Et le Dimenche precedent qui fut huictiesme iour dudit mois de May, se firent aussi à Bruges en Flandres aultres ioustes deuant monseigneur le Duc de Bourgogne, qui aussi furent moult triomphantes: esquelles aussi vng enfant de Paris nommé Ierosme de Cambray, seruiteur dudit monseigneur le Duc, iousta, & illec se porta vaillamment & tellement qu'il en emporta l'onneur de ladicte iouste. Apres lesdites ioustes le Roy qui estoit à Amboise s'en partit pour aler à Paris, & en emmena avecques luy monseigneur de Bourbon, monseigneur de Lyon, monseigneur de Beaujeu, & aultres seigneurs, & se tint par aucun temps à Laigny sur Marne, à Meaulx & aultres villes illec en-

uiron. Et auant son partement dudit Amboise aduint que le iour veille d'Ascension nostre Seigneur, la terre trembla à Tours, audit lieu d'Amboise, & aultres lieux en Touraine. Et quant le Roy se partit de Laigny où il s'estoit tenu par aucunes iournees pour aler à Meaulx, il enuoya à Paris son mandement pour faire publier par les carrefours d'icelle ville, que tous nobles & gens suiuan la guerre feussent tous prests & en armes le huictiesme iour de Iuillet, pour aler & eulx trouuer où il leur seroit ordonné de par le Roy, & sur peine de confiscation de corps & de biens.

Et puis ces choses ainsi faictes le Roy s'en ala à Meaulx en Brie, & durant le temps qu'il y fut y eut vng homme natif du pays de Bourbonnois, qui pour aucun cas par luy commis, & aussi pour auoir reuelé les faits du Roy aux anciens ennemis les Anglois, fut decapité audit Meaulx le lundy vingt-septiesme iour de Iuing audit an soixante huit: Et auparauant le Roy enuoya à Paris le Prince de Pimont fils du Duc de Sauoye, pour bouter le feu en Greue. Et si mist en ladicte ville de Paris les prisonniers à deliurance, qui estoient en Parlement, en Chastellet & aultres prisons. Enuiron ce temps y eut vng nommé Charles de Meleun homme d'armes de la compagnie de monseigneur l'Admiral, lequel de Meleun estoit Capitaine de Vifson en Auuergne, qui auoit la garde de par le Roy du seigneur du Lau sur sa vie, audit lieu de Vifson, dont il eschappa, dequoy le Roy fut fort desplaisant: & pour ledit cas fist constituer prisonnier ledit de Meleun au Chasteau de Loches, auquel lieu & pour

R iij

icelluy cas fut decapité. Et apres luy, fut aussi decapité pour icelluy cas vng ieune fils nommé Remonnet qui estoit fils de la femme dudit Charles de Meleun en la ville de Tours: & si fut aussi pour icelluy cas decapité en la ville de Meaulx, le Procureur du Roy audit lieu de Vifson. Et puis le Roy s'en ala dudit lieu de Meaulx à Senlis & à Creil.

Audit temps les Bourguignons ou Bretons estans en Normendie, prindrent le seigneur de Meruille seant entre saint Saulueur de Diue & Caen, & luy firent rendre & mettre en leurs mains sadicte place, dedens laquelle y auoit plusieurs francs archiers, & incontinent qu'ils furent dedens tuerent & meurdrirent tout ce qu'ils y trouuerent, & puis pendirent ledit seigneur de Meruille, & pillerent tout ce qu'ils trouuerent, & puis ils bouterent le feu en ladicte place. Et apres le Roy se deslogea de Creil & s'en ala à Compiègne, où il fut depuis par aucun temps, & puis s'en retourna à Senlis: & d'illec s'en vint à Paris monseigneur de Bourbon le iour feste de Assumption nostre Dame. Et parauant le Roy auoit enuoyé par deuers le Duc de Bourgongne monseigneur de Lyon, monseigneur le Connestable & aultres seigneurs, pour tousiours se mettre en deuoir, & trouuer par tout bon moyen de paix, sans figure de guerre. Et ce nonobstant le Roy enuoya son armee au pays de Normendie, dont auoit la charge & conduicte monseigneur son Admiral, qui bien y besongna: car en moins d'un mois il chassa les Bretons estans dedens Bayeux. Et puis apres le samedi vingtiesme iour d'Aoust audit an mil quatre cens soi-

xante huiſt, meſſire Charles de Meleun ſeigneur de Normainuille qui auoit eſté grant maïſtre d'oſtel du Roy, & lequel nouuellement auoit eſté conſtitué priſonnier au Chateau de Gaillart en la garde du Conte de Dampmartin Capitaine dudit lieu, fut par le Preuoſt des Mareſchaulx fait ſon procez ſur les cas à luy impoſez. Et ledit iour fut tiré hors de ſa priſon & mené au marché d'Andely, où illec publiquement deuant tous, fut decapité & mis à mort. Et depuis ce le Roy ſe tint par certain long temps à Noyon, Compiègne, Chauny, & aultres places enuiron, iuſques au quinzième iour de Septembre que nouuelles luy furent illec apportees, que monſeigneur Charles ſon frere & le Duc de Bretagne s'eſtoient reünis & deuenus bons amis & bien-vueillans au Roy, & preſt mondit ſeigneur Charles de prendre la penſion de ſoixante mil liures tournois par an, iuſques à ce que ſon appanaige luy euſt eſté assigné ſelon ledit de pluſieurs Princes & ſeigneurs, que ledit monſeigneur Charles eſliroit pour certain, & auſquels il ſe vouloit rapporter : c'eſt aſſauoir à monſeigneur le Duc de Calabre & monſeigneur le Connestable de France. Et ledit Duc de Bretagne offrit bailler au Roy les villes que luy & ſes gens tenoient en Normendie, en luy rendant & reſtituant les aultres villes & places que les gens du Roy tenoient en Bretagne. Laquelle choſe le Roy luy accorda.

Et puis le Roy ſit ſçauoir ces choſes au Duc de Bourgogne qui eſtoit à tout ſon oſt aux champs près de Peronne, entre Eſcluſiers & Cappy, ſur la riuere de Somme. Deſquelles nouuelles il ne vouloit riens croi-

re iusques à ce qu'il en fust aultrement acertené par lesdits monseigneur Charles & Duc de Bretagne: laquelle chose luy fut depuis dicté & certiffée par le Heralut dudit Duc de Bretagne, mais ce nonobstant il ne s'en voulut aler, ne desemparer son ost: Et s'en ala auecques foudit ost tenir & edifier vng parc audit lieu, d'entre Esclusiers & Cappy le dos, au long de la riuiere de Somme. Et pendant certain temps qu'ils y furent, furent enuoyez par diuerfes fois audit Duc de Bourgongne de par le Roy plusieurs Ambassadeurs, comme monseigneur le Connestable, monseigneur le Cardinal d'Angiers, maistre Pierre Doriolle & aultres, pour tousiours cuider trouuer moyen de bonne amour & pacification du costé du Roy, qui tousiours la vouloit auoir, iaçoit-ce que les Capitaines & gens de guerre du Roy n'en estoient point d'oppinion: mais requeroient au Roy qu'il les laissast faire & qu'ils rendroient au Roy ledit Duc de Bourgongne & ceulx de sadicte compaignie, tout à son bon plaisir & voulenté. Laquelle chose il ne voulut souffrir, ne tollerer qu'on leur courut sus: mais leur deffendit de le faire & sus la hard. Et durant ce temps & iusques au douziesme iour d'Octobre ensuiuant mil quatre cens soixante huit, furent grans nouuelles que le Roy & ledit Duc de Bourgongne auoient fait vne treue iusques au mois d'Auril prochainement ensuiuant: & sur l'esperance de icelle treue le Roy delibera soy en retourner de Compiègne où il estoit, pour s'en venir à Creil & à Pontoise.

Et pour ceste cause enuoya ses fourriers audit lieu  
de



de Pontoise, qui y prindrent son logis : mais depuis il changea propos, & retourna hastiement dudit lieu de Compiengne à Noyon, ou peu de temps parauant y auoit esté. Pendant lequel temps Phelippe de Sa- uoye, Poncet de Riuiere seigneur Dulse, le seigneur du Lau & aultres qui s'estoient mis & meslez ensemble, firent moult de maulx : & cependant le samedi huiëtiefme iour du mois d'Octobre fut crié à son de trompe par les carrefours de la ville de Paris, que tous les nobles tenans fief ou arrierefief de la Preuosté & Viconté de Paris, feussent tous prests & en armes à Gonneffe, pour d'ilecques partir le lundy ensuiuant & aler ou mandé leur feroit : lequel cry esbahist beaucoup plusieurs de Paris, qui cuidoient bien que veu ledit cry il n'y auoit point de treue ne abstinence : Et puis le Roy qui estoit à Noyon s'en partit, & ledit Duc de Bourgongne s'en partit pour aler à Peronne. Auquel lieu le Roy s'en ala bien hastiement par deuers luy audit lieu de Peronne, & à bien petite compaignie : car il n'auoit avecques luy que ledit Cardinal d'Angiers & vng peu de gens de son hostel, monseigneur le Duc de Bourbon & aultres. Et ainsi priuément que dit est s'en ala iusques audit lieu de Peronne par deuers ledit Duc de Bourgongne, lequel luy fist grande reuerence, comme bien tenu y estoit, & puis parlerent ensemble longuement & furent fort bien contens l'un de l'autre, quelque rumeur qu'il y eust eue auparavant, & tellement pacifierent ensemble qu'ils firent entre eulx paix. Et iura ledit monseigneur de Bourgongne que iamaïs ne feroit riens contre le Roy,

& qu'il vouloit estre son subject & seruiteur, & viure & mourir pour luy. En faisant laquelle paix le Roy luy conferma le traicté d'Arras & plusieurs aultres choses, ainsi que depuis le Roy le manda & fist assauoir aux nobles, gens d'Eglise, à la Court de Parlement, & aultre populaire de ladicte ville de Paris, qui pour cause de ce, & par son ordonnance firent processions generales, chantans aux Eglises *Te Deum laudamus*, & aultres loüanges à Dieu. Les feux furent faits parmy les ruës, & tables dressees, donnans à boire à tous venans, & plusieurs aultres grans joyes en furent faictes en ladicte ville de Paris. Et en ces entrefaictes vint nouvelles que les Liegois auoient prins & tué leur Euesque & tous ses officiers, dont & dequoy le Roy, ledit monseigneur de Bourgongne, monseigneur le Duc de Bourbon & messeigneurs ses freres, & aultres, furent moult desplaisans & marris, & furent grans nouvelles que le Roy & ledit seigneur de Bourgongne yroient en personne pour pugnir & destruire lesdits Liegois. Et incontinent apres vindrent aultres nouvelles que ledit Euesque n'estoit point mort, ne prins, mais l'auoient iceulx Liegois contraint de chanter Messe: & depuis se tindrent iceulx Liegois bien contents de luy, & se rendirent tous à luy comme à leur vray seigneur naturel, en eulx offrant à luy à tout son bon plaisir faire, cuidans à ceste cause appaiser tout le mal tallent de auparauant.

En ce temps le Roy s'en ala à Nostre-Dame de Haulx en Almaigne, où il ne sejourna gueres, aussi Phelippe de Sauoye & aultres estâns avecques luy fi-

rent leur paix au Roy, par le moyen dudit seigneur de Bourgongne. Et apres que le Roy eut fait son voyage & pelerinaige audit lieu de Nostre-Dame de Haulx, il s'en ala à Namur par deuers ledit seigneur de Bourgongne, ou on luy fist deliberer d'aler avecques ledit de Bourgongne deuant la cité du Liege, où ils furent & demourerent depuis par aucun temps logez aux faulxbourgs d'icelle y tenans le siege, & avecques le Roy y estoient monseigneur de Bourbon, monseigneur de Lyon, monseigneur de Beaujeu, & monseigneur l'Euesque dudit Liege, tous freres. Lequel mondit seigneur du Liege estoit yssu hors d'icelle ville pour aler deuers mondict seigneur de Bourgongne, pour sçauoir s'il pourroit trouuer aucun bon appoinctement pour les habitans dudit Liege, en luy offrant par eulx luy bailler & deliurer ladicte ville & tous les biens de dedens, pourueu que les habitans d'icelle ville, hommes, femmes, & enfans, eussent leur vie sauue seulement, dont il ne voulut riens faire : mais au contraire fist serment que luy & tous ses satellites mourroient en la poursuite, où il auroit ladicte ville & tous les habitans d'icelle, pour en faire du tout à son plaisir & volenté, & retint par deuers luy ledit Euesque du Liege, sans vouloir souffrir qu'il s'en retournast en ladicte ville, nonobstant que ledit Euesque auoit promis & iuré ausdits du Liege de retourner par deuers eulx, & de viure & mourir avec eulx. Et tantost apres le partement dudit Euesque de ladicte ville & cité du Liege, & ce que lesdits Liegeois furent aduertis que leurdict Euesque estoit detenu par ledit

S ij

de Bourgongne, & ne s'en pouoit retourner en ladicte ville, iceulx Liegois firent plusieurs faillies sur lesdits Bourguignons & gens du Roy, & sur leurs compaignies. Lesquels Liegois quant aucuns en pouoient prendre les mettoient à mort, & gens & cheualx: mais non obstant toutes ces choses le Dimenche trenteiesme & penultiesme iour d'Octobre, audit an quatre cens soixante-huict, entre neuf & dix heures de matin, ledit Duc de Bourgongne fist ordonner de bailler & liurer assaut en icelle ville: ce qui fut fait, & y entrèrent iceulx Bourguignons sans aucune resistance, & y entra aussi le Roy & les Ducs de Bourgongne, monseigneur de Bourbon, mes seigneurs de Lyon, de Liege & de Beaujeu, freres. Et aussi dudit assaut la plus grant & saine partie des habitans de icelle cité s'enfuyrent & retrayerent, & laisserent vng peu de populaire, comme femmes, enfans, Prestres, Religieuses, & vieux & anciens hommes: qui tous y furent tuez & meurdres, & moult d'autres merueilleuses cruaultez & inhumanitez y furent faictes, comme ieunes femmes & filles forcees & viollees: & apres le desordonné plaisir pris d'elles, les tuer & meurdrir. Les Religieuses aussi forcer, petits enfans tuer, & Prestres consacrans Corpus Domini, aussi tuer & meurdrir dedens les Eglises. Et apres toutes ces choses faictes, roberent & pillerent toute ladicte ville & cité, & en apres la brulerent & ardirent, & getterent la muraille dedens les fossez.

Et apres toutes choses ainsi faictes que dit est, le Roy s'en retourna à Senlis & Compiègne où il manda aler par deuers luy toute sa Court de Parlement, sa Cham-

bre des Comptes, Generaulx des finances, & aultres  
ses officiers: ce qu'ils firent. Et eulx venus & arriuez  
par deuers luy, fist & ordonna plusieurs choses, &  
aussi pource qu'il n'auoit pas intention de seiourner  
audit lieu, il fist proposer par la bouche dudit Cardi-  
nal d'Angiers à tous les dessusdits Officiers tout ce qui  
par luy auoit esté accordé audit seigneur de Bourgon-  
gne, qui plus à plain estoit contenu & specifié en qua-  
rante deux articles, qui par ledit Cardinal furent de-  
clairees lors ausdits Officiers: en leur disant de par le  
Roy que son plaisir estoit que par sadiète Court de  
Parlement & tous aultres ses Officiers, feust fait & ac-  
comply tout ce qu'il auoit conclud & accordé avec-  
ques ledit de Bourgongne, & que tout luy feust du  
tout enteriné & accompli, sans aucun contredit ou  
difficulté, sur certaines grans peines que lors il expri-  
ma de bouche. Et puis le Roy s'en ala en aucuns lieux  
prés Paris, sans vouloir entrer dedens ladicte ville:  
mais aucuns grans seigneurs estans autour de luy y  
vindrent & y seiournerent, comme mes seigneurs de  
Bourbon, de Lyon & Beaujeu, freres, le Marquis du  
Pont, & aultres:

Et le samedi dixneufiesme iour de Nouembre au-  
dit an quatre cens soixante-huit, fut crieë & publiee  
à son de trompe & cry publique par les carrefours de  
Paris, ledit accord & vnion fait comme dit est, entre  
le Roy & mondit seigneur de Bourgongne. Et que  
pour raison du temps passé personne viuant ne feust si  
osé ou hardy de riens dire à l'opprobre dudit seigneur,  
feust de bouche, par escript, signes, painctures, ron-

deaulx, ballades, libelles diffamatoires, chançons, de geste, ne aultrement, en quelque maniere que ce peust estre. Et que ceulx qui seroient trouuez auoir fait, ou esté au contraire, feussent griefuement pugniz, ainsi que plus à plain ledit cry le contenoit.

Et ce mesme iour furent prinſes pour le Roy & par vertu de sa commission adressant à vng ieune fils de Paris, nommé Henry Perdriel, en ladicte ville de Paris, toutes les pies, iays, & chouettes, estans en caiges ou aultrement, & estans priuees, pour toutes les porter deuers le Roy, & estoit escript & enregistré le lieu où auoient esté prins lesdits oiseaulx: & aussi tout ce qu'ils scauoient dire, comme larron, paillart, fils de putain, va dehors va, Perrette donne moy à boire, & plusieurs aultres beaulx mots que iceulx oiseaulx scauoient bien dire, & que on leur auoit apprins. Et depuis encores par aultre commission du Roy adressant à Merlin de Cordebeuf, fut venu querir & prendre audit lieu de Paris tous les cerfs, biches, & grûes qu'on y peult trouuer, & tout fait mener à Amboise.

En apres le Conte de Fouez qui nouuellement estoit venu à Paris au mois de Decembre ensuiuant, deuint merueilleusement amoureux d'une moult belle bourgoise de Paris, nommee Estiennete de Befançon, femme d'un marchand de ladicte ville nommé Henry de Paris, qui estoit bon marchand & puissant homme: & si estoit ladicte bourgoise moult prisee & honnoree entre toutes les femmes de bien de ladicte ville, & fort priece & requise de estre & soy trouuer en tous banquets, festes & honnestes assemblees qui se

faisoient en icelle ville, communiqua avecques ledit Conte de Fouez de questions ioyeuses & amoureuses, & sur plusieurs requestes, offres, & aultres plaisans bourdes que luy fist & promist ledit Conte de Fouez, conuindrent tellement ensemble que le Dimenche douziesme iour dudit mois de Decembre audit an mil quatre cens soixante huit, icelle Estiennete se departit de son hostel de Paris qu'elle laissa & habandonna, ensemble sondit mary, ses enfans, pere & mere, freres & sœurs, & tous ses parens & amis, & s'en ala apres ledit seigneur de Fouez avecques aucuns de ses gens & seruiteurs, qui pour ce faire estoient demourez audit lieu de Paris & l'emmenerent à Blois, où estoit demouré à sejour ledit seigneur, attendant illec la venuë d'icelle Estiennete: Avecques lequel seigneur icelle Estiennete demoura par l'espace de trois iours, & puis s'en partit ledit seigneur de Fouez & s'en ala à Tours par deuers le Roy, & en fist mener avecques luy icelle Estiennete, qui fut illec bien recueillie par Martin Ponchier marchant & bourgeois de Tours, oncle d'icelle Estiennete. Et peu de temps apres fut ladiète Estiennete enuoyee à Fronteuault par deuers la Prieure dudit lieu, tante de ladiète Estiennete, ou depuis elle demoura par certain long temps apres. En apres le Roy se tint & sejourna à Tours, à Amboise, & illec enuiron, tousiours attendant que la Roynie deust accoucher que on disoit estre fort grosse, mais elle ne eut point d'enfant. Et apres ces choses le Roy ordonna certaine quantité des lances de son Ordonnance pour aler seruir le Duc de Calabre, pour recouurer son Roy-

aulme d'Arragon, & avecques lesdites lances y ordonna aussi aler huit mil francs archiers avecques grant quantité de son artillerie, où ils ne furent point: nonobstant ladicte ordonnance.

Et le mois de Feurier ensuiuant vindrent à Paris les Ambassadeurs de mondit seigneur de Bourgongne pour l'expedition des articles à luy accordees de par le Roy, & pour lesquels le Roy escripuit & chargea bien expressement au Preuost des Marchans & Escheuins, & tous aultres Officiers & gens notables de ladicte ville, que de tout leur pouoir ils festyassent fort & honnorablement lesdits Ambassadeurs. Laquelle chose fut faicte, & furent moult honnorablement & habondamment festiez: & premierement par ledit monseigneur le Cardinal d'Angiers, secondement par le premier President de la Court de Parlement, tiercement par maistre Jehan de Ladriesche President en la Chambre des Comptes & Tresotier de France, quatemement par monseigneur de Mery, & quintement & pour derniere fois par les Preuost des Marchans & Escheuins, & bourgeois de ladicte ville. Lequel festoy fut moult honorable, & durant lesdictes choses furent leurs lettres expediees par toutes les Cours de Paris, tous lesdicts articles ainsi à eulx accordees par le Roy, comme dit est. Et le ieudy seiziesme iour de Feurier audit an mil quatre cens soixante huit, aduint au Chastellet de Paris que vng nommé Charlot le Tonnelier, dit la Hote-varlet, Chauffetier demourant à Paris, qui auoit esté constitué prisonnier audit Chastellet de Paris, pour raison de plusieurs larcins dont  
on



on le chargeoit, qu'il denioit, fut ordonné par le Preuost de Paris & les Officiers du Roy audit Chastellet, que son procez fait sur les charges à luy imposees & conclud de ainsi le faire, dont il appella: & par Arrest fut renuoyé audit Preuost pour estre fait sondit procez. En l'amenant de sa prison en la chambre de la question dudit Chastellet faist vng cousteau qu'il apperceut sur son chemin, & d'icelluy se couppa la langue, & puis fut ramené en sa prison sans aultre chose faire pour ledit iour. Audit temps aduint que au pays de Holande & Zelande qui sont des pays de monsieur de Bourgongne, y vindrent & habonderent si grandes eauës, que l'eauë noya & emporta plusieurs villes & places desdits pays, pour raison de plusieurs escluses qui tenoient la mer, qui se rompirent.

Et à ceste cause y eut de grans dommaiges faits, & plus grant destruction comme on disoit, que ledit seigneur de Bourgongne n'auoit fait par fureur en la cité & habitans du Liege. Et apres que ledit Charlot Tonnelier dont est parlé deuant, qui ainsi s'estoit incisee la langue & fut guery, fut de rechief amené en la question prés d'estre estendu en la gehayne, pource qu'il ne vouloit cognoistre les cas à luy imposez, lequel apres qu'il eut esté longuement assis sur la sellete, dist qu'il diroit verité, & lors declaira tout au long sa vie & de moult grands & merueilleux larrecins, & si accusa moult de gens coupables à faire icelles, comme vng sien frere surnommé le gendarme, vng ferrurier, vn Orfeure, vn Sergent sieffé nommé Pierre Moynel, & plusieurs aultres qui pour lesdits cas fu-

T

rent constituez prisonniers, & sur ce interrogez qui depuis confesserent auoir fait plusieurs larrecins. Et apres toutes ces choses le mardy de la sepmaine peneuse le dit la Hote & son frere, le dit Sergent fieffé, le ferrurier, vng tondeur de grans forces, & vng freppier nommé Martin de Coulongne, par la sentence du Preuoist de Paris, furent condempnez à estre pendus & estranglez au gibet de Paris, dont ils appellerent en Parlement. Et par Arrest de la Court ladiète sentence fut confirmee au regard des quatre d'iceulx : c'est assauoir desdits de la Hote, son frere, dudit tondeur de grans forces, & dudit ferrurier, & le landemain qui fut mercredy, furent menez pendre au gibet : & au regard desdits freppier & Sergent fieffé, ils demourerent encore en la prison iusques apres les festes de Pasques. Et le vendredy sainct & aourné vint & yffit du Ciel plusieurs grans esclats de tonnoirre, espartissemens & merueilleuse pluye, qui esbahist beaucoup de gens, pource que les anciens dient tousiours que nul ne doit dire helas, s'il n'a ouy tonner en Mars. Et apres ce que dit est, le dit freppier nommé Martin de Coulongne fut rendu par ladiète Court de Parlement audit Preuoist de Paris, & fut enuoyé audit gibet le samedy veille de Quasimodo, mil quatre cens soixante-neuf.

Au mois d'Auril ensuiuant mil quatre cens soixante-neuf, maistre Iehan Balue Cardinal d'Angiers, qui en peu de temps auoit eu de moult grans biens du Roy & du Pape par le moyen du Roy, qui pour l'auancer & faire si grant comme de Cardinal, & auquel Cardinal le Roy se fioit moult fort, & faisoit plus pour luy

que pour Prince de son sang & lignaige. Et icelluy Cardinal non ayant Dieu en memoire, ne l'onneur & prouffit du Roy ne du Royaume deuant ses yeulx, mena le Roy iusques à Peronne, auquel lieu il le fist ioin-dre avec icelluy Duc de Bourgongne, & leur fist faire ensemble vne telle quelle paix, laquelle fut iuree & promise entre les mains dudit Cardinal, & puis vult conseilla & ordonna que le Roy yroit & accompaigneroit ledit de Bourgongne iusques en ladicte cité du Liege, que parauant s'estoient esleuez & mis sus pour le Roy contre ledit de Bourgongne, & pour luy porter dommaige. Et au moyen d'icelle allee du Roy deuant icelle cité, lesdits Liegois & icelle cité furent ainsi meurdri & destruis, tuez & fugitifs comme dit est deuant : mais qui pis est, le Roy, mes seigneurs de Bourbon, de Lyon, Beaujeu, & Euesque dudit Liege freres, & toute la seigneurie estant deuant ladicte cité furent en moult grant dangier d'estre morts & tous perils, qui eust esté fait la plus grant esclandre qui oncques feust au Royaulme de France depuis la creation d'icelluy. Et apres que le Roy s'en fut retourné deuers Paris pour s'en retourner à Tours & aultres lieux enuiron, & le garda d'entrer en ladicte bonne ville & cité de Paris, & le fist passer à deux lieues près d'icelle, en cuidant par luy à ceste cause mettre ladicte bonne ville & cité, ensemble les subiects d'icelle, en l'indignation du Roy. Et en faisant ledit voyage audit lieu de Tours & Angiers par le Roy, il fist content monsieur son frere de son appanaige, & luy bailla pour icelluy la Duchie de Guyenne & aultres choses,

dont il se tint à bien content du Roy, & voyant par icelluy Cardinal la paix & bonne vnion estre entre le Roy & son dit frere, cuida de rechief faire son effort & rebouter trouble & malueillance entre le Roy & autres seigneurs de son Royaulme, comme deuant auoit fait: car il enuoya & mist sus messaige especial avecques lettres & instrumens qu'il enuoyoit audit de Bourgongne, en luy faisant assauoir que ledit accord ainsi fait estoit du tout à sa confusion & destruction, & n'estoit fait à aultre fin que pour l'aler destruire incontinent que le Roy & son dit frere seroient assemblez. Et que pour soy garder contre eulx, luy estoit besoing & necessité qu'il se mist en armes comme deuant auoit fait, & qu'il assemblast plus grant armee que oncques n'auoit fait, & mouuoir guerre au Roy plus que iamais, & aultres grandes & merueilleuses diableries qu'il escripuoit audit de Bourgongne par vng sien seruiteur, qui de celsdictes lettres & instructions qu'il portoit fut trouué faisi, & promptement furent portees au Roy, lequel incontinent ces choses par luy sceuës fut icelluy Cardinal prins & faisi, & mené prisonnier à Montbason, où il fut laissé en la garde de monsieur de Torcy & aultres. Et apres furent prins & saisis en la main du Roy tous ses biens & seruiteurs, & furent lesdits biens prins par inuentaie, & luy furent baillez Commissaires pour l'interroguer sur les cas & charges à luy imposez: c'est assauoir messire Tanneguy du Chastel Gouverneur de Roussillon, messire Guillaume Cousinot, mondit seigneur de Torcy, & maistre Pierre Doriolle General des finan-

ces, tous lesquels besongnerent à l'interroguer & examiner sur lesdits cas & charges. Et en apres le Roy donna & distribua des biens dudit Cardinal à son plaisir, c'est assauoir sa vaisselle d'argent fut vendue & l'argent baillé au Tresorier des guerres pour les affaires du Roy, la tapisserie fut baillée audit Gouverneur de Roussillon, & la Librairie audit maistre Pierre Doriole, & vng beau drap d'or tout entier contenant vingt-quatre aulnes & vng quart, qui valoit bien douze cens escus, & certaine quantité de martre sebelines, & vne piece d'escarlade de Fleurance, furent baillez & deliurez à monsieur de Crussol, & ses robes & vng peu de mesnaige fut vendu pour payer les frais des Officiers & Commissaires qui auoient vacqué à faire le dit inuentaie.

Et durant ces choses le Roy de Cecille & la Roynie sa femme vindrent par deuers le Roy à Tours & Amboise, où illec furent moult honnorablement receuz de par le Roy. Et apres tout ce que dit est, le Roy, mondit seigneur de Bourbon, & aultres seigneurs s'en tirerent deuers Niort, la Rochelle, & aultres lieux enuiron, où ils trouuerent monsieur le Duc de Guyenne frere du Roy, & en icelluy voyaige moyennant la grace de Dieu & de la benoïste Vierge Marie, le Roy & mondit seigneur de Guyenne furent reünis & mis en bonne paix & amour l'vng avec l'autre, dont moult grant ioye fut incontinant espendue par tout le Royaulme. Et pour ceste paix fut dict & chanté en saincte Eglise le *Te Deum laudamus*, faict les feux par toutes les bonnes villes, Tables rondes

T iij

dressées, & de moult grans soulas, & esbatemens, & ioyes prins. Et puis apres le Roy s'en retourna à Amboise par deuers la Royne, qui comme bonne, honnesté & tres-noble Dame auoit fort trauaillé à traicter ladicte bonne paix & vnion, que nostre Seigneur par sa sainte grace & bonté vueille de bien en mieulx tousiours bien entretenir. Et puis fut deliberé par le Roy & son grant Conseil d'aler conquerir, prendre, & auoir la Conté d'Armignac, & mettre en la main du Roy, & promis de icelle bailler à mondit Seigneur de Guyenne. Et pour ce mettre à execution y enuoya le Roy grant quantité de son artillerie, de ses gens de guerre, & francs Archiers. Et pour ledit voyage faire, & preparer ladicte armee, le Roy s'en partit dudit lieu d'Amboise pour aler iusques à Orleans, où il seiourna cinq ou six iours, & puis s'en retourna audit lieu d'Amboise. Et peu de temps apres vint & arriua à Paris Monsieur de Chastillon grant Maistre Enquesteur, & general reformateur des eauës & forests, pour prendre, receuoir, & veoir les monstres des bannieres, des officiers, gens d'estat, & populaire de la ville de Paris.

Et le Samedy quart iour de Nouembre mil quatre cens soixante-neuf, fut leuë & publiee par les carrefours de Paris és lieux ordinaires en icelle ville l'alliance & bonne vnion faicte entre le Roy, & le Roy d'Espaigne, laquelle lecture & publication fut faicte par maistre Jehan le Cornu Cler de la Preuosté de Paris, és presences des Lieutenans Criminel & Ciuil de ladicte Preuosté, & de la plus part des Examineurs ordinai-

res & extraordinaires dudit Chastellet. Et depuis ce, le Roy, Monsieur de Bourbon, & autres Seigneurs d'entour de luy se tindrent à Amboise, & illec enuiron, & iusques au Samedy vingt-troisiesme iour de Decembre audit an mil quatre cens soixante-neuf, que Monsieur de Guyenne accompaigné des nobles de sa Duchie, en moult grant belle & noble compaignie, arriua par deuers le Roy en son chasteau des Môtis les Tours, qui de sa venue eust moult grant ioye, & aussi eurent la Royne, Madame de Bourbon, & autres Dames & Damoiselles de leur compaignie, qui incontinent qu'ils sceurent ladicte venue se partirent dudit lieu d'Amboise pour aler audit lieu des Montis, pour aler veoir & festier ledit Monsieur de Guyenne. Et en ces entrefaictes fut tout le pays d'Armignac mis & rendu es mains du Roy, & sans effusion de sang, & tout deliuré à Monsieur l'Admiral & Conte de Dampmartin, comme Gouverneur de ladicte armee pour le Roy. Et demourerent depuis le Roy, Monsieur de Guyenne, la Royne, Madame de Bourbon, & aultres de ladite compaignie, audit chasteau des Montis, faisans illec de moult grans chieres, & iusques à Noël. Et apres que mondit Seigneur de Guyenne s'en partist, & print congie du Roy & de toute sa compaignie, & s'en ala, & retourna à la Rochelle, à saint Jean d'Angeli, & aultres ses pays voisins, pour illec tenir ses Estats, & appointer de ses offices, & aultres affaires de sondit pays & Duchie de Guyenne. Et apres le Roy s'en reuint & retourna audit lieu d'Amboise, où il se tint depuis par aucuns temps, durant lequel il enuoya ses Am-

bassadeurs par deuers le Duc de Bretaigne, par lesquels ses Ambassadeurs il enuoyoit audit Duc de Bretaigne son ordre nouuellement mise & cree sus, afin que icelle il portast, & iurast tout ainsi & selon que lauoient prise & iuree plusieurs autres Princes & Seigneurs de ce Royaulme. Et iaçoit ce que le Roy luy eust fait cest honneur, neantmoins de prime face il la refusa, & ne la voulut prendre ne accepter. Et disoit on que c'estoit pource que auparauant ledit Duc de Bretaigne auoit prise la toison d'or, en soy declarant amy, frere, & alié du Duc de Bourgongne, pourquoy le Roy se tint pour mal content, & non sans cause. Et bien-tost apres le Roy ordonna certaine quantité de gens-d'armes de son ordonnance, & ses Archiers, avec partie de son artillerie pour faire guerre audit Duc de Bretaigne, & ses pays; mais auant le partement desdites gens de guerre d'aler audit pays de Bretaigne, fut donné delay audit Duc de Bretaigne de dix iours entiers, qui faillèrent le quinziesme iour de Feburier pour donner au Roy sa responce de tout ce qu'il auoit intention de faire, & comment il se vouloit avecques luy gouverner.

- Et le Mercredy treiziesme iour d'iceluy mois de Feburier furent leués & publices és carrefours de Paris le mandement patent du Roy signé Guillaume de Ciri-fay, par lequel le Roy mandoit au Preuost de Paris qu'il estoit deüement acertainé, que le Roy Edoüard d'Angleterre, & les Princes, Seigneurs, & populaire dudit Royaulme, que pour long temps auoient esté en grant guerre & diuision entre eulx, auoient fait leur paix & pacification entre eulx. Et que tous iceulx estans



estans assemblez en conseil auoient conclud, promis, & iuré de venir descendre en plusieurs & diuers lieux de ce Royaulme, en intention de y prendre, saisir, & gaster villes, places, pays, & forteresses, & destruire ledit Royaulme & les habitans d'icelluy, tout ainsi que autrefois il auoit fait. Pour lesquelles causes & voulant par le Roy de tout son pouoir & puissance obuier aux dampnees & fauses entreprises desdits Anglois, ordonna son ban & arriereban estre fait: & que par ledit Preuost de Paris toutes excusations cessant il contrainst vigoureusement & sans depport aucun, tous les nobles & non nobles, tenans en fief & arrierefief, preuilegez & non preuilegez, à estre tous en armes & habillement souffisant, & en personne, sans y prendre ne receuoir aucun au lieu d'eulx, dedens le premier iour de Mars ensuiuant, & sur peine de confiscation de corps & de biens, en deffendant de par le Roy par lesdictes lettres audit Preuost & tous aultres, de bailler ne recepuoir aucune excusation ou certification, pour iceulx tenant en fief ou arrierefief, sur peine de perdition de leurs offices, & de confiscation de corps & de biens, & nonobstant oppositions ou appellations: & aussi en declairant les deffailans ou reffusans estre ennemis du Roy, & auoir confisqué enuers luy corps & biens, sans iamais le leur remettre ou pardonner. Et ce mesme iour de mercredy vint nouuelles à Paris, que monsieur de Bourgongne auoit esté veu en la ville de Gant, portant à l'vrie de ses iambes la jartetiere & sur luy la croix rouge, qui estoit ordre & enseigne dudit Roy Edouart d'Angleterre: & à ceste cause se demon-

etroit & declairoit ennemy capital du Roy & du Royaume, & comme Anglois tenu & réputé.

En apres ledit seigneur de Bourgongne enuoya à Tours ses Ambassadeurs par deuers le Roy, lesquels depuis y demourerent par certain temps illec attendans leur expedition : durans ces choses le Viconte & seigneur de Villars en Poictou ala de vie à trespassement, lequel en son viuant auoit donnee & laissée sa succession au Roy, pour en iouyr par luy incontinant apres son trespas. Et pour icelle succession auoir & recueillir le Roy s'en partit pour aler audit pays de Poictou, pour prendre, faisir & auoir ladicte succession d'icelluy seigneur de Villars, à quoy faire le Roy y demoura tous le mois d'Auril. Audit mois d'Auril vng nommé maistre Pierre Durand, qui estoit nepueu dudit Cardinal d'Angiers, lequel par long temps auoit esté detenu prisonnier au Chasteau de Mailly, eschappa des prisons dudit lieu & s'en vint iusques à Paris, où il fut cogneu par vng Appoticaire nommé Chamberlin, & fut de rechief prins & faisi, & mené prisonnier és prisons de la Conciergerie du Palais Royal à Paris, où il fut detenu iusques au vingt-sixiesme iour d'Auril mil quatre cens soixante & dix apres Pasques, qu'il fut tiré & mis hors desdictes prisons de la Conciergerie, & baillé & deliuré és mains des sergens & seruiteurs du Preuost des Mareschaux, pour mener ou ordonné leur feroit.

Au mois de May ensuiuant mil quatre cens soixante & dix, le Conte de Vuarvich & le Duc de Clairance avec leurs femmes, qui dechassez auoient esté par le

Roy Edouard d'Angleterre , au moyen de certains grans debats & questions qui s'estoient meus entre eulx, se mirent eulx, leurs seruiteurs, & aultres gens qu'ils auoient peu recueillir en plusieurs manieres, surmer, iusques au nombre de quatre-vingts nauires, & s'en vindrent prendre terre en Normendie, iusques à Honnefleu & Harefle. Et illec ils trouuerent monsieur l'Admiral qui les recueillit, & bouta lesdits de Vuarvuich, de Clairance, le Conte de Vuafonfort, Dames & Damoiselles, avec vng peu de leur priuee mesgnee. Et au regard des nauires ils se retrahirent depuis, & ceulx estans dedens, és hables de Honnefleu & Barfleu : & en apres aussi se deslogerent les Dames & Damoiselles, & leur train, & s'en alerent à Valoignes, où leur logis leur fut ordonné. Et bien tost apres ces choses le Duc de Bourgongne sçachant ce que dit est, escripuit lettres missiues à la Court de Parlement, par lesquelles il leur mandoit qu'il auoit sceu que le Roy auoit recueilly ledit de Vuarvuich en aucunes villes de son Royaulme, és marches de Normendie, qui estoit alé contre l'appointement faict à Peronne entre le Roy & luy : en priant & exhortant ausdits de Parlement qu'ils voulussent demonstrier ces choses au Roy, affin qu'il ne fauorisast ledit de Vuarvuich & ceulx de sadiète compaignie, qui disoit estre son ennemy capital & dudit Royaulme, ou aultrement il le yroit querir quelque part qu'il le peust sçauoir en France, pour en faire à son bon plaisir : & nonobstant ce ledit de Vuarvuich seiourna & demoura depuis certain temps, c'est assauoir durant ledit mois de Iuing audit Honne-

fleu. Et durant ce temps plusieurs gens de guerre de l'ordonnance du Roy deslogerent de leurs garnisons, & s'en vindrent gaster tout le plat pays, loger & mettre en plusieurs villes & places sur les marches de Normandie & Picardie. Audit mois de Iuing aduint que deux hommes de guerre de ladicte ordonnance, sous la charge de monsieur le Connestable, tuerent & meurdrirent deux ieunes Clers du Tresorier des guerres en plaine Beaulse, pour auoir l'argent qu'ils portoient pour le payement des gens d'armes. Et peu de temps apres furent pris & saisis à Honnefleu, & d'illec menez par deuers mondit seigneur le Connestable en la ville de Meaulx, où il y a deux arbres, & sur deux diuers chemins furent pendus & estranglez. En ces entrefaictes le Roy se tint & seiourna à Tours, à Amboise, Vendosme, & aultres lieux près d'illec, par deuers lequel lesdits Anglois alerent. Et aussi y fut & ala la Roynie d'Angleterre, & le Prince de Galles son fils: & illec tous arriuez fut pourparlé entre eulx de la maniere pourquoy ils estoient illec tous venus & arriuez: & depuis s'en retournerent lesdits Anglois à Honnefleu, à Valongnes, sainct Lo, & aultres lieux en Normandie. Durant ce que dit est le Duc de Bourgongne fist prendre & mettre en sa main toute la marchandise qu'il auoit en ses pays, appartenant aux marchans de France, iusques à ce que les marchans de ses pays eussent eu restitution d'aucuns biens prins sur mer par lesdits Anglois.

Audit temps & le samedi dernier iour de Iuing mil quatre cens soixante & dix, enuiron entre deux &

trois heures de matin, la Roynie accoucha au Chasteau d'Amboise de vng beau fils, qui illec fut baptisé & nommé Charles par monsieur l'Arceuesque de Lyon, auecques le Prince de Galles fils de Henry jadis Roy d'Angleterre, & prisonnier detenu par Edoüart, qui se disoit Roy dudit pays: & la commere fut madame Jehanne de France, Duchesse de Bourbon. Et de ladicte natiuité fut grant joye faicte & espenduë par tout le Royaulme de Frâce, & en fut chanté en diuers lieux *Te Deum laudamus*, & aultres belles loüanges à Dieu, les feux faits parmy les ruës, tables rondes, & aultres grans joyes & esbatemens. Et tantost apres ladicte natiuité le Roy de Cecille, monsieur de Guyenne, monsieur de Bourbon, de Lyon, Beaujeu, & aultres, s'en alerent à Angiers, à Saumur, le pont de See, & aultres lieux illec enuiron, pour trouuer pacification & accord auecques le Duc de Bretagne sur aucune question qui estoit entre le Roy & le Duc dessusdit: & illec demourerent par certain temps, & iusques à tant que appoinctement se trouua & fut fait entre eulx, & puis le Roy s'en retourna par deuers la Roynie à Amboise. Apres ledit accord ainsi fait, furent enuoyez Ambassadeurs dudit Duc de Bretagne par deuers ledit de Bourgongne, & luy furent rendus le feel & aliance qui estoit entre eulx, dequoy ledit de Bourgongne se courrouça fort quant il apperceut l'accord du Roy & dudit Duc de Bretagne. Durant ce que dit est le Conte de Vuarvuich dont deuant est parlé, qui estoit au pays de Normendie, cuidant soy en retourner en son pays d'Angleterre, fut ordonné & estably

sur mer de par ledit de Bourgongne plusieurs beaulx & grans nauires de guerre, comme hur ques, gallees, & aultres nauires, en grant quantité, tous fort auitaillez & garnis d'artillerie & gens de guerre, d'Anglois, Bourguignons, Picars, & aultres, & singlerent en mer tellement qu'ils s'en vindrent arriuer & entrer sur la coste de Normendie, enuiron la fosse de Laire, cuidans trouuer & rencontrer ledit de Vvarvuich & sa compaignie pour les desconfire, & illec demourerent à l'encre par certain long temps, pendant lequel le Roy qui estoit à Amboise s'en partit & ala au mont S. Michiel en pelerinaige. Et apres icelluy fait & accomply s'en reuint & retourna à Auranches, Tombelaine, Constances, Caën, Honnefleu, & aultres places de Normendie, & illec sur le costé de la mer fist aussi arriuer & auitailler sa nef, la nef de monsieur l'Admiral, la nef de Colon, & aultres plusieurs beaulx nauires, dedens lesquels se mirent & bouterent lesdits de Clairance, de Vvarvuich, & ceulx de leur compaignie, avec aucuns francs archiers & aultres gens de guerre que le Roy leur auoit baïllez pour leur seureté & conduite. Et incontinent qu'ils furent ainsi montez que dit est près de partir & singler en mer, lesdits Bourguignons, Anglois, Picars, & aultres, voyant qu'ils auoient longuement esté à l'encre sans auoir riens fait, & mangé tous leurs viures, retirerent leursdictes an cres & s'en retournerent à leur Duc sur trayne boyau, & sans auoir riens fait, de quoy il eust bien tost ris son faoul, pource qu'ils auoient perdu grant temps, & si auoit beaucoup frayé & despendu à l'auitailllement.

desdictes nauires, & au fouldoy desdictes gens de guerre. Et ce fait ledict de Vvarvuich accompaigné comme dessus, entrerent en mer & eurent vent propre & à gré, tellement que en peu de temps ils vindrent arriuer audit Royaulme d'Angleterre, & descendirent & arriuerent icculx nauires à Pleume & Dertemuë à heure de nuit: Et tout incontinant qu'il eut mis le pié à terre il enuoya dix mil dedens ledit pays d'Angleterre par aucuns de ses gens, prendre & saisir vng Baron d'Angleterre qui estoit en son liect couché, & qui ne pensoit point à ladicte descenduë, & l'amenerent au matin par deuers ledit de Vvarvuich, auquel Baron incontinant luy arriuë fut mise la teste hors des espauls: & apres s'en ala hors audit lieu Dertemuë, Abrisco, où il fut bien recueilly, & illec auoit laissé son artillerie & de ses bagues, quant il s'en ala en Normandie. Et apres qu'il eut recouuré ses choses & auant qu'il fust trois iours, il vint & arriva par deuers luy plus de soixante mil hommes en armes, pour le seruir, viure & mourir pour luy, il se mist dessus les champs tousiours cherchant à trouuer ledit Edoüart, & fut plus de quinze iours apres ladicte descenduë auant que en France on peust auoir aucunes de ses nouvelles. Apres les choses dessusdictes le seigneur d'Argueil, fils du Prince d'Orhenge, qui estoit domestique & le plus prouchain dudit Bourguignon, qui estoit marié à la sœur de monsieur de Bourbon, s'en partit & embla d'antour dudit de Bourgongne, & s'en vint & retrahit par deuers le Roy qui bien le recueillit. Et quant ledit Duc sceust ledit partement, il cuida enrager &

creuer de dueil. En la presence de ladicte Ambassade de Bretagne ledit Duc de Bourgongne declaira ledit seigneur d'Argueil auoir confisqué enuers luy corps & biens, & puis fist arraser & abatre toutes les places & Chasteaulx qu'il auoit en ses pays. En apres le quatorziesme iour d'Octobre audit an mil quatre cens soixante & dix, le Roy enuoya ses lettres patentes à Paris, qui furent leuës & publiees par les carrefours d'icelle, presens les Lieutenans Ciuil & Criminel de la Preuosté de Paris, & plusieurs des Examineurs d'icelluy Chastellet. Et par lesdictes lettres estoit contenu l'alliance faicte du Roy & du Roy Henry d'Angleterre, en mandant par lesdictes lettres tous Anglois laisser venir & descendre en ce Royaulme, pour leurs affaires & marchandises, sans sauf conduits ne autre seureté comme les subiets de France, sauf en ce non compris Edoüart de la Marche, n'aguieres Roy dudit Royaulme d'Angleterre, ses aliez & complices. Et à ce iour & depuis vindrent certaines nouuelles en France que lesdicts de Clairance, Vvarvuich, qui ainsi estoient sur les champs & en armes audit Royaulme d'Angleterre, cuidans trouuer ledit Edoüart, prospererent illec tellement, que tous les Princes, Seigneurs, nobles, Prelats, bourgeois, & commune dudit pays d'Angleterre, & singulierement tout le populaire de Londres vindrent au deuant dudit Vvarvuich, & tournerent le dos audit Edoüart, & vindrent mettre à pleine deliurance ledit Henry, qui par long temps auoit esté detenu en captiuité de prison par ledit Edouart, & luy baillerent de rechief la possession & jouyssance dudit Royaulme, & fut



fut fait ledit de Vvarvuich Gouuernant dudit Roy-  
aulme, & puis s'en vindrent en la cité de Londres fai-  
sans grans chieres, & illec & aussi audit Royaulme fu-  
rent mis à pleine deliurance tous François qui illec  
estoit prisonniers & renuoyez en France, quitte-  
ment. Et si fist ledit de Vvarvuich prendre & saisir tous  
les biens aux subiects dudit de Bourgongne, & mettre  
en arrest & en ses mains. Et puis ledit Edoüart voyant  
qu'il estoit seul demouré & du tout habandonné, s'en-  
fuit & vuida hors ledit Royaume & s'en vint à recours  
audit Duc de Bourgogne son beau frere, & audit Roy-  
aulme d'Angleterre demoura sa femme & mesnaige.

En apres le Roy qui par long espace de temps n'e-  
stoit bougé de Tours & Amboise, meü de bonne de-  
uotion s'en partit & ala à Nostre-Dame de Celles en  
Poictou, où il sejourna vng peu & puis retourna au-  
dit lieu d'Amboise. Audit mois de Nouembre le Roy  
enuoya à Paris ses lettres patentes, par lesquelles il  
mandoit aux nobles, clers & lais de la ville de Paris,  
qu'ils feissent processions & louanges à Dieu & à la  
Vierge Marie, & toutes œuures cessans par l'espace  
de trois iours, en louant & merciât Dieu nostre Crea-  
teur, la Benoisite Vierge Marie, & tous les Saincts &  
Sainctes de Paradis, de la bonne victoire que auoit  
euë Henry de Lancastre Roy d'Angleterre de sondict  
Royaulme, alencontre de Edoüart de la Marche, qui  
longuement sur luy l'auoit vsurpé, à la faueur dudit  
Duc de Bourgongne. Et aussi de la bonne paix &  
vnion que faicte estoit entre le Roy & ledit Roy Hen-  
ry d'Angleterre, laquelle procession fut faicte & ac-

complie ainsi que le Roy l'eut mandé, & tout ainsi en fut fait par toutes les bonnes villes de ce Royaulme. En apres le Roy escripuit aultres lettres, par lesquelles il mandoit à Paris qu'il y enuoyoit la Roine d'Angleterre femme dudit Roy Henry, avecques son fils le Prince de Galles & sa femme, fille dudit Conte de Vvarvuich, avec la femme dudit de Vvarvuich mere de la femme dudit Prince de Galles, la Dame Vuilechere & aultres Dames & Damoiselles de la compaignie d'icelle Roine d'Angleterre. Laquelle Roine d'Angleterre y vint & arriua audit lieu de Paris, accompagnee comme dit est, & estoient à l'accompagner de par le Roy, les Contes d'Eu, de Vendosme, & de Dunois, de monsieur de Chastillon, & aultres plusieurs nobles hommes. Et furent & yssirent hors de ladicte ville de Paris pour aler & estre au deuant de ladicte Roine, & du commandement exprez du Roy, le Prelat & Euesque de ladicte ville, l'Vniuersité, la Court de Parlement, le Preuost de Paris & Supposts de Chastellet, le Preuost des Marchans & Escheuins, marchans, bourgeois, manans & officiers d'icelle ville, tous moult honnorablement & en habits honnestes, & en moult grant & merueilleux nombre. Et entra en icelle ville par la porte saint Iacques, & par toutes les ruës par où elle passa auoit de moult belles tapisseries & tentes au long desdictes ruës, depuis ladite porte par où elle passa iusques au Palais, où son logis luy fut moult honnorablement appresté. En ce temps fut amené à Paris toute la belle artillerie de Tours que le Roy y auoit, laquelle fut mise & descendue au Cha-

steau du Louure. Audit temps aussi le Roy escripuit aux Preuost & Escheuins de ladicte ville de Paris, que son plaisir, vouldenté & intention estoit de faire & tenir la feste de son ordre en ladicte ville de Paris. Et que pour ceste cause & pour estre à icelle feste y ameneroit tous les seigneurs de son sang, qui y viendroient & seroient à grant compaignie de gens, & que pour ceste cause les manās & habitans de ladite ville fussent contents qu'ils y feussent logez & hebergez par fourriers, ce qui leur fut accordé. En ce téps aussi qui estoit le mois de Decembre messire Artur de Longueual Cheualier, & aultres Gentilshommes entrèrent pour le Roy en la ville de saint Quentin en Vermendois, du bon vouldoir des habitans dudit lieu. Et puis le dixiesme iour dudit mois monsieur le Connestable vint & entra pour le Roy en ladicte ville, à tout deux cens lances & les archiers. Et d'icelle entree le quatorziesme iour dudit mois ensuiuant, maistre Jehan de Ladriesche Tresorier de France, maistre Robert Fessier, maistre Pierre de Boyeuual & aultres Officiers de mondit seigneur le Connestable, firent faire vng cry publique à son de trompe à la table de marbre au Palais Royal à Paris. En faisant sçauoir la prise & entree ainsi faicte audit saint Quentin par mondit seigneur le Connestable, & que de ce on merciaist Dieu en luy priant de donner bonne prosperité au Roy & audit Connestable, stipulant pour luy au recouurement de ses aultres villes & pays engagez, qu'il auoit intention de recouurer & mettre hors des mains de Charles, soy disant Duc en Bourgongne, & ainsi le contenoit ledit cry. Au mois

de Ianuier enfuiuant le Roy qui s'estoit party d'Amboise pour venir à Clery & Orleans, s'en partit pour venir au pays de Beausse & vint coucher au Puyset, & le landemain s'en ala au giste à Palaifeau près de Montleher, & le landemain vint à disner à Seaulx le grant en vng hostel qui appartient à maistre Iehan Baillet maistre des Requestes ordinaires de l'ostel du Roy, & d'illec s'en vint au giste à la ville de Paris en son hostel des Tournelles. Et auecques aussi y vindrent la Roine, madame de Bourbon, & aultres plusieurs Dames & Damoiselles en leur compaignie, & demoura le Roy à sa bonne ville de Paris iusques au samedi vingtsixiesme iour dudit mois qu'il s'en partit pour s'en aler à Senlis, à Compiègne & aultres lieux voisins ou estoit la pluspart de toute son armee, pour batailler contre ledit Duc de Bourgongne.

Et apres luy fut menee par eauë & par terre grant quantité de son artillerie, & menee à Compiègne, Noyon & ailleurs au pays de Picardie & Flandres. Et puis fut crié à Paris par les carrefours de ladicte ville à son de trompe, que tous les francs archiers de l'Isle de France, & aussi tous les nobles feussent tous prests & en leurs habillemens pour suiure & aler auecques le Roy en ladicte armee. Et durant ce temps fut fait à Paris moult grant quantité de pouldre à canon & serpentes, pour fournir à ladicte guerre. En ce temps auoient esté enuoyez de par le Roy sire Christofle Pailart seigneur des Comptes, & sire Jacques Hesselin Conterolleur du Grenier à sel à Paris, en la ville d'Auxerre pour sommer les habitans d'icelle de eulx & ladi-

ête ville rendre au Roy & de prendre illec garnison pour luy, & par lefdits Commissaires leur furent faites de moult belles remonstrances. Lesquels habitans demanderent ausdits Ambassadeurs terme iusques au Ieudy ensuiuant, pour auoir aduis entre eulx & de ce leur rendre responce. Pour laquelle responce attendre s'en alerent lefdits Ambassadeurs à Ioigny, distant d'illec de six lieuës, & y sejournerent iusques audit Ieudy, que iceulx habitans leur enuoyerent responce par vng homme de ladicte ville que l'en disoit estre sauetier: lequel leur dist & rendit responce que lefdits habitans d'Auxerre mandoient ausdits Commissaires qu'ils auoient mis & bouté avecques eulx dedens ladicte ville grande garnison de gens de guerre pour ledit Duc, & que au regard d'eulx ils estoient fermes & deliberez de viure & mourir pour ledit Duc, & garder ladicte ville pour luy. Et le iour que ladicte garnison y fut botee y fut tué & meurdry vng des bourgeois d'icelle ville nommé Guillemain Goutier qui fut dommaige: car il mourut pour la querelle du Roy soustenir. Et apres le partement du Roy de la ville de Paris pour aler à Compiègne & Senlis, se reduisirent pour le Roy les villes d'Amiens, de Roye & Montdidier, & puis le mardy quatriesme iour de Feurier furent faites à Paris processions generalles moult honorables. Et y fut la Roine, madame de Bourbon & toute leur noble compaignie, & alerent en la grant Eglise de Nostre-Dame, & de là à Nostre-Dame de recourance aux Carmes. Et là fut prié pour le Roy, la Roine & leur bonne prosperité. Et fut dit & declairé comment lefdictes

villes estoient renduës au Roy, & entre aultres la ville d'Abeuille, dont il n'estoit riens.

Audit temps furent prins à Paris & contrains tous manouvriers de bras, comme maçons, charpentiers de la grant congnee & aultres plusieurs, de aler esdites villes ainsi nouvellement reduictes au Roy, dont on bailla la charge au regard desdits pionniers à maistre Henry de la Cloche, Procureur du Roy au Chastellet de Paris, qui estoit bon & loyal François, qui les mena & conduisit iusques en ladicte ville de Roye, où illec fut fait de grans bouleuers, fossez, trenchees, & aultres belles fortifications: & aussi en furent faictes d'aultres en aultres villes & diuers lieux, & illec demourerent lesdits pionniers certain grant espace de temps, & iusques enuiron le iour de Pasques que le Roy donna & bailla treue pour certain temps avecques le Duc de Bourgogne, lequel estoit assiegé par les gens du Roy en son parc, qu'il tenoit entre Bapaulmes & la ville d'Amiens. Et là où il fut en telle misere & poureté qu'il estoit du tout & sondit ost à la disposition & volenté du Roy, pour en auoir du tout fait à son bon plaisir, n'eust esté ladicte treue. Et depuis la guerre encommencee iusques à ladicte treue y eut de grandes & merueilleuses desconfitures faictes par les gens du Roy sur les Flamens & Picars, tant sur ceulx qui auitailloient le parc desdits Bourguignons, que à cause de plusieurs belles faillies que les gens du Roy faisoient sur les tenans le party desdits Bourguignons. Et mesmement se fist de moult belles destrouffes en la Duché de Bourgogne & Contez de Charrolois &

Masconnois , où les gens du Roy y gaignerent de moult beaulx butins, & y prindrent de moult bons prisonniers, & moult grant nombre en y eut de tuez. Et auoient tout gaigné messeigneurs les Conte Daulphin d'Auuergne, de Comminge, le fire de Combronde de Charentez, messire Guillaume Cousinot, & moult d'autres nobles hommes, n'eust esté que le Roy leur manda qu'ils cessassent tout pour l'amour desdictes treues, qui moult en furent desplaisans, & moult de gens de façon ayman le Roy & son honneur. Et à ceste cause s'en firent à Paris des epitaphes qui furent mis & assis à saint Innocent, à l'oïtel de la ville & aultres lieux, en vituperant & en donnant grant charge à plusieurs seigneurs estans près du Roy. Et durant ladicte treue le Roy, monseigneur de Guyenne, & aultres seigneurs & nobles hommes d'autour d'eulx se tindrent à Han auecques monseigneur le Connestable. Auquel lieu durant ledit temps se firent de grandes alees & venuës des Ambassadeurs du Roy & de ceulx de mondit seigneur de Bourgongne, & illec demourerent par long temps sans riens conclure: mais en la fin fut fait treue entre le Roy & ledit Duc de Bourgongne durant vng an. Et pour appointer les differens du Roy & ledit Duc de Bourgongne y eut Ambassadeurs ordonnez, & pour appointer des debats & questions des gens de guerre de chascun des deux costez, & puis se departirent dudit lieu de Han, & s'en ala chascun en sa maison: & demourerent les gens de guerre du Roy en garnison és villes qui parauant ladicte treue auoient esté gaignees par le Roy.

En ce temps se murent de grans questions, noïses & debats au Royaulme d'Angleterre entre le Roy Henry de Lancastre Roy dudit Royaulme, le Prince de Galles son fils, le Conte de Vvarvuich, & aultres seigneurs dudit Royaulme, tenans ledit party dudit Henry contre ledit Edouard de la Marche, qui vsurpoit ledit Royaulme contre ledit Henry. Et y eut à cause de leurdit debat de moult grant meurdre fait de costé & d'autre, & dura ladicte guerre iusques au mois de Iuing mil quatre cens soixante & vnze, que nouuelles furent apportees au Roy audit lieu de Han, que ledit Edouart accompaigné de grant quantité de gens de guerre, tant Anglois, Austrelins, Flamens, Picars & aultres nations, que ledit de Bourgongne luy auoit enuoyez, se mist sur les champs alencontre de l'armee & puissance desdits Roy Henry, Prince de Galles, la Roine, ledit de Vvarvuich, & aultres Princes & seigneurs tenans ledit party de Henry. Et y eut les vngs contre les aultres de grans armes faïctes, & grant nombre de gens morts de chascun costé: mais en la fin ledit Edouart demoura victorien, tant par trahyson qui estoit du costé d'aucuns estans en l'armee dudit Henry, que autrement, & y mourut & fut tué ledit Prince de Galles qui fut moult grant pitié: car il estoit moult beau ieune Prince, & aussi y mourut ledit de Vvarvuich qui aussi fut vng grant dommaige: car il auoit singulier desir de bien seruir le Roy & le Royaulme: & pour lequel le Roy auoit frayé & despendu moult grant finance pour l'entretenement dudit Conte de Vvarvuich. Et de ladicte desconfiture fut le

Roy



Roy moult desplaisant : & puis apres ces nouuelles ouys se partit le Roy de ladicte ville de Han en Vermendois , & en emmena avecques luy mondit seigneur de Guyenne, le Conte de Dampmartin, le President des Comptes, & plusieurs aultres, & vint à Paris où il ne sejourna guieres : & durant qu'il y fut il fist grande & joyeuse feste , & fist cest honneur à ladicte bonneville & cité de Paris de luy mesmes bouter le feu au feu fait en la place de Greue d'icelle ville, la veille sainct Iehan Baptiste. Et puis s'en partit & s'en ala à Orleans, où le Prince de Piémont y deuint malade de maladie, dont il ala de vie à trespas audit lieu d'Orleans. En apres s'en ala le Roy à Tours & à Amboise veoir la Roine & monseigneur le Daulphin.

En ce temps dudit mois de Iuing mil quatre cens soixante & vnze, le Roy fut mal content des epitaphes & libelles diffamatoires qui ainsi auoient esté mis & attachees à l'esclandre dudit monseigneur le Connestable & d'aultres. Et pour sçauoir la verité de ceulx qui ce auoient faict, fist crier à son de trompe & cry publique par les carrefours d'icelle ville, que quelque personne qui sçauroit aucune chose desdits epitaphes, ou de ceulx qui les auoient faits, qu'ils le venissent incontinent dire & denoncer aux Commissaires sur ce ordonnez, & on donneroit trois cens escus d'or au denonciateur : & qui le sçauoit & ne le viendroit declarer, auroit le col couppe. Et pour suspection de ce fut mis & constitué prisonnier vng ieune escollier de Paris nomme maistre Pierre le Mercier, fils d'un lunetier du Palais, qui peu de temps apres fut deliuré non

Y

chargé du cas. Aussi y fut mis & constitué prisonnier maistre Henry Mariete, qui auoit esté Lieutenant Criminel de la Preuosté de Paris, tant pour raison desdicts libelles, que aussi pour aucunes iniures ou paroles par luy dictes, comme on disoit de maistre Jehan de Ladriesche Tresorier de France, & puis fut deliuré icelluy Mariete par la Court de Parlement, & mis hors des prisons de la Conciergerie, où il estoit detenu pour ceste mesme cause.

Au mois de Iuillet audit an soixante & vnze mourut monseigneur le Conte d'Eu, qui fut moult grant dommaige: car c'estoit vng notable, saige & bon seigneur, & qui de tout son pouoir auoit bien & loyalement seruy le Roy, & fort aimé le bien & vtilité du Roy & de son Royaulme, & fut mise ladicte Conté d'Eu en la main du Roy, & mise & baillée es mains de monseigneur le Connestable, à la grant desplaisance de monseigneur le Conte de Neuers frere de mondit seigneur d'Eu, & qui apres ladicte mort cuidoit bien jouïr de ladicte Conté d'Eu & des aultres terres dudit deffunct, comme son vray heritier.

Depuis ledit mois de Iuillet iusques au iour de Noël, ne fut riens fait audit Royaulme de France, sinon que les Ambassadeurs du Roy & de mondit seigneur de Bourgongne firent plusieurs alees & venuës les vngs avecques les aultres, pour pacifier & trouuer moyen de paix & accord entre eulx. En ladicte annce fut mortalité commune & vniuerselle par la pluspart dudit Royaulme, de maladie de flux de ventre & aultres maladies, à cause dequoy plusieurs gens de façon mouru-

rent en ladicte ville de Paris & ailleurs.

Audit an monseigneur de Guyenne qui s'en estoit retourné audit pays de Guyenne apres le retour d'Armians, deuint mal content du Roy, & manda venir à luy le Conte d'Armignac, qui auoit esté fugitif hors du Royaulme, & duquel le Roy auoit mis sadicte Conté en sa main. Lequel Conte vint par deuers mondit seigneur de Guyenne, & puis mondit seigneur luy rendit la pluspart de sadicte Conté contre le gré & volenté du Roy. En apres lesdits de Guyenne & Armignac, & aussi le Conte de Fouez & aultres assemblerent en leur pays gens de guerre, faignans de vouloir faire faire guerre au Roy: lequel pour ce leur empescher y enuoya sur la Marche dudit Guyenne cinq cens lances, & certain nombre de francs archiers, avecques grant nombre de son artillerie, qui despuis ce y fut & sejourna par long temps, pendant lequel vint & fut nouuelles que mondit seigneur de Guyenne estoit mort à Bourdeaulx, dont il n'estoit riens.

Audit temps aussi furent enuoyees par diuerfes fois de par le Roy Ambassades par deuers le Duc de Bourgogne, pour le fait de la treue d'entre eulx qui failloit le quatriesme iour de May mil quatre cens soixante & douze, & y estoient encores le premier iour de May le sire de Craon, maistre Pierre Doriolle, & aultres.

Et ledit premier iour de May mil quatre cens soixante & douze, fut fait à Paris vne moult belle & notable procession en l'Eglise de Paris, & fait vng preschement bien solempnel par vng Docteur en Theo-

logie nommé maistre Iehan Brete, natif de Tours: lequel dist & declaira entre aultres choses, que le Roy auoit singuliere confidence en la Benoitte Vierge Marie, prioit & exhortoit son bon populaire, manans & habitans de sa cité de Paris, que doreseuuant à l'eure de midy, que sonneroit à l'Eglise dudit Paris la grosse cloche chascun feust fleschy vng genoüil à terre, en disant Aue Maria, pour donner bonne paix au Royaulme de France, & apres ladicte procession faicte Reue rend pere en Dieu monseigneur l'Euesque de Paris cheut malade d'une maladie de laquelle ce mesme iour ala de vie à trespas, dont fut grant dommaige & fut fort ploré: car il estoit sainct, bonne personne & grant clerc. Et ce iour furent en son hostel Episcopal grant populaire de la ville de Paris, tant hommes que femmes pour le veoir mort en sa chappelle hault, estant au long de la grant salle fille dudit hostel. Et illec par ledit peuple fut moult piteusement ploré, & pour son ame deuotement prié, & au partir luy baisoient les pieds & les mains, & disoient la pluspart d'iceulx qu'ils creioient fermement que ledit Euesque feust sainct & bien aimé de Dieu, & le quinziesme iour dudit mois de May, le Roy enuoya lettres aux Preuost des Marchans & Escheuins & bourgeois de Paris: par lesquelles il leur faisoit sçauoir que ledit Euesque en son viuant luy auoit esté mauuais, & n'auoit pas aimé son prouffit, & qu'il auoit eu intelligence avecques le Duc de Bourgogne & aultres Princes & seigneurs qui auoient esté deuant la ville de Paris durant le bien publicque, & que pour leur donner faueur en icelle ville, auoit

suborné lesdits habitans. Et que pour ces causes & afin qu'il en feust memoire ordonna estre faicte & mise sur son corps vn epitaphe contenant les choses dessusdictes, lequel epitaphe fut fait faire par les dessusdits iusques à l'asseoir. En ce temps audit mois de May la treue d'entre le Roy & le Duc de Bourgongne qui failloit au quatriesme iour dudit mois, fut derechief continuee iusques au quinzieme iour de Iuing ensuiuant.

Audit mois de May le Duc de Calabre nepueu du Roy de Cecile & de Iherusalem, à qui le Roy auoit fait tant d'honneur de luy donner sa fille ainsee en femme & espouse, s'en ala hors de sa Duchie de Lorraine par deuers ledit Duc de Bourgongne pour traicter d'auoir & espouser sa fille, en delaisant en ce faisant ladicte fille du Roy sa femme, qui fut chose moult estrange à luy de ainsi faulser sa foy, & soy ainsi abaïsser de delaisser la propre fille ainsee du Roy son souuerain seigneur, pour cuider auoir & prendre la fille dudit de Bourgongne, subgect & vassal du Roy. Et parauant ces choses ledit de Bourgongne auoit fait & fait faire moult de guerre au Royaulme de France, à la faueur de mondit seigneur de Guyenne, feignant à ceste cause de luy donner & bailler ladicte fille dont il ne fist riens : mais fist tout le contraire en abusant iceulx seigneurs & plusieurs aultres, sous vmbre dudit mariage.

Et le ieudy quatorzieme iour dudit mois de May mil quatre cens soixante douze, aduint par male fortune que tout le comble & feste de l'Eglise Nostre-

Dame de Clery, & près d'Orleans, que le Roy auoit fait faire & edifier de nouuel, où il y auoit moult noble & belle couuerture tant de charpenterie de bois que d'ardoise & de ploms, fut toute arse & brouye, & tout tombé en bas & par terre, par ce que vng plombueur besoignant en icelle couuerture s'en deuala en bas, & laissa le feu ou il chauffoit les fers à foulder en icelle couuerture, sans aucune garde: & le quel feu le vent accueillit tellement qu'il s'en vola & dispersa au long d'icelle charpenterie & couuerture, en telle façon que sans y pouoir remedier tout fut brulé & ars.

Et ce mesme iour le Roy eut certaines nouuelles que luy fist assauoir monseigneur de Malicorne, seruiteur & bien fort amé de mondit seigneur de Guyenne, que sondit seigneur & maistre estoit allé de vie à trespas en la ville de Bourdeaulx. En icelluy mois monseigneur de Craon, maistre Pierre Doriolle general des finances, maistre Oliuier le Roux Conseillier & Maistre des Comptes, & aultres Ambassadeurs du Roy, par luy enuoyez par deuers ledit Duc de Bourgongne, retournerent deuers le Roy luy relater ce que fait auoient avecques luy, & de la treue qu'ils auoient ainsi faicte, qui deuoit durer iusques au quinziésme iour de Iuing ensuiuant. Durant laquelle treue & nonobstant icelle ledit de Bourgongne fist mettre ses gens de guerre sur les champs, & mener & asseoir son parc & artillerie entre Arras & Bapaulmes, en vng lieu qu'on nomme Hubuterne en Artois. Et pendant ce temps le Roy apres les nouuelles de la mort de mondit seigneur de Guyenne son frere, s'en partit du Pleffis du parc lez

Tours, & s'en tira audit pays de Guyenne, la Rochelle, sainct Iehan d'Angely, Bourdeaux, & aultres lieux voisins, & y mist & crea officiers nouueaulx de par luy. Et d'icelle Duché de Guyenne fist & establit gouuerneur monseigneur de Beaujeu frere de monseigneur le Duc de Bourbon.

Après ces choses ledit de Bourgongne en perseuerant tousiours en ses diableries, folles obstinations & mauuaistiez, comme deuant auoit fait. Le ieudy vnziesme iour de Iuing audit an soixante & douze, enuoya deuant la ville de Nesle dedens laquelle y auoit de par le Roy vng nommé le petit Picart, qui estoit Capitaine de cinq cens francs archers de l'Isle de France, qui estoient dedens ladicte ville, & par grant force & violence voulurent auoir ladicte ville & chasteau: & pour l'auoir y baillerent & liurerent de grans & diuers assaulx, ausquels Bourguignons fut vaillamment resisté par ledit Picart & ceulx de ladicte compaignie. Et iusques au vendredy qui estoit le landemain douziesme iour dudit mois de Iuing, que enuiron cinq heures de matin ledit Picart en la compaignie de la Contesse dudit lieu de Nesle yssirent hors de ladicte place pour aler par deuers le Bastard de Bourgongne, & aultres, ayans illec leur armee pour ledit de Bourgongne, pour cuider trouuer pacification & accord entre les gens du Roy & ledit de Bourgongne, qui traicta avecques eulx en telle maniere que lesdits Picart & ceulx de ladicte compaignie s'en iroient leurs vies sauues, en rendant ladicte place, en laissant leurs biens & harnois, à quoy faire ils furent contens. Et à

tant se departirent & s'en retournerent en ladicte ville de Nesle, & dirent aux dessusdits francs archiers leur composition, & comment ils deuoient tous laisser leurs biens cheuaulx & harnois, & eulx en aler leurs vies sauues. Pour laquelle chose incontinent apres plusieurs d'iceulx par l'ordonnance dudit Picard leur Capitaine, se despoüillerent & habandonnerent leursdits harnois, & en ce faisant & auant qu'ils feussent bien asseurez d'auoir lettres de leurs promesses & traictez, furent par aucuns dudit lieu de Nesle mis & boutez en icelle place lesdits Bourguignons, qui incontinent nonobstant ladicte promesse vindrent charger sur lesdits francs archiers ainsi des-habillez, sous vmbre d'icelle promesse, & plusieurs en tuerent & meurdrirent: & partie d'iceulx cuidans eux sauuer s'en alerent & retrayerent dedens l'Eglise dudit lieu de Nesle, ou depuis lesdits Bourguignons alerent les tuer tous & meurdrir. Et apres qu'ils furent tous ainsi tuez & meurdris, y suruint & se y trouua ledit de Bourgongne, qui tout à cheual entra dedens ladicte Eglise, en laquelle y auoit bien demy pied de hault de sang des pources creatures illec estans, qui à ceste heure estoient tous nuds gifans illec morts. Et quant ledit Bourguignon les vit ainsi abatus se commença à seigner & dire qu'il veoit moult belle chose, & qu'il auoit avecques luy de moult bons bouchiers. Et le lendemain ensuiuant qui fut le samedi treiziesme iour dudit mois, ledit petit Picart qui estoit prisonnier avec aultres de ceulx de ladicte compaignie furent pendus & estranglez, de l'ordonnance dudit de Bourgongne, & puis fist



fist arraser ladicte place & mettre le feu dedens. Et le Dimenche quatriesme de icelluy mois s'en partirent dudit lieu de Nefle & alerent deuant Roye, ou estoient enuiron quatorze cens archiers de la compaignie & charge Pierre Aubert Bailly de Meleun & de Nugon, & aussi y estoient pour Gentils-hommes & Capitaines Loisel de Balagny Capitaine de Beauuais, monseigneur de Mouy, le seigneur de Rubempré & aultres, qui bien auoient deux cens lances bien en point. Et iacoit-ce qu'ils feussent dedens ladicte ville que le Roy auoit fait remparer, bien auitailler & garnir de moult belles serpentines, ils se rendirent le mardy ensuiuant seiziesme iour d'icelluy mois à l'eure de midy, & laisserent illec ladicte artillerie, leurs cheuaulx & hernaïs, tout abillement de guerre, & toutes leurs bagues : où le Roy & eulx eurent dommaige de cent mil escus d'or & plus, & s'en reuindrent tous nuds & en pourpoint, vng baston en leur poing. Et demoura illec le dit Duc de Bourgongne depuis par certain temps, & d'illec s'en ala deuant la ville de Beauuais pour y mettre le siege, où il y arriua le samedi vingt-septiesme iour de Iuing audit an mil quatre cens soixante & douze, ou de plaine venue y donnerent vng fort assault, à quoy fut fort resisté par les bourgeois, manans & habitans d'icelle ville. Et celle mesme nuit y arriua Guillaume de Valee Lieutenant du Seneschal de Normandie, à tout deux cens lances, qui moult bien secoururent ceulx dudit lieu : car ils y arriuerent à l'eure du fort de leur assault, & tout incontinent monterent dessus la muraille, & firent reculer lesdits Bourgui-

Z

gnons. Et le lendemain ensuiuant y vint monseigneur de Crussol, Iouachin Rouault, la compagnie de monseigneur de Bueil, Guerin le Groing, monseigneur de Torcy, & aultres nobles de Normendie, qui tres-vailamment s'y contindrent. Et pendant ce temps furent bien secourus de ceulx de la bonne ville de Paris, tant de pionniers, pics, pelles, farines, vins, pouldres à canon, & aultres auitaillemens, qui firent tres-grant bien ausdits gens de guerre & aux habitans d'icelle ville. Et en ces entrefaictes y eut de belles & grandes escarmouches, ou plusieurs Bourguignons estans deuant icelle ville furent morts & tuez.

En ce temps aduint que aucuns des habitans d'Auxerre faillirent hors de leur ville pour aler courir es pays du Roy, pour prendre & mener audit lieu d'Auxerre, bœufs, vaches, & tout ce qu'ils pourroient trouuer pour eulx aitailler, & vindrent près de Ioinny, de Seignelay & illec enuiron : contre lesquels y alerent le baltard dudit Seignelay, le seigneur de Planicy & aultres, iusques au nombre de trois cens, qui vindrent rencontrer lesdits d'Auxerre, qui se mirent en bataille contre eulx. Et quant les dessusdits seigneurs les eurent ainsi veus, ils se frapperent dedens moult vigoureusement, & y en eut huiet vingts de morts & quatre vingts de prins, & le demourant se mist en fuite ou fut noyé. Audit temps pour raison de l'approuchement desdits Bourguignons ainsi venns à Beauuais, furent faictes à Paris de moult belles ordonnances, par sire Denis Hesselin Panetier du Roy nostre sire, Esleu de Paris, & Preuost des Marchans de ladicte

ville: comme de faire rediffier la muraille & gardes de dessus les murs, faire faire belles & grandes tranches, mettre en point les chaisnes, rediffier les fossez, bou-leuars & barrieres des portes, en faire murer d'aucu-nes, faire faire de moult belles serpentines toutes neu-ues, & d'aultres belles ordonnances y furent faictes.

Et le Ieudy second iour de Iuillet vint & arriua à Pa-ris le seigneur de Rubempré qui venoit de ladicte ville de Beauuais, & apporta lettres des Capitaines de ladi-cte ville adressans au seigneur de Gaucourt, Lieute-nant du Roy à Paris, aux Preuost des Marchans & Es-cheuins de ladicte ville de Paris. Par lesquelles leur estoit fait sçauoir que le Duc de Bourgongne & ceulx de son ost estoient en telle necessité de viures, que vng pain de deux deniers à Beauuais valoit audit ost trois soulds parisis, & que icelluy Duc de Bourgongne auoit intention de iouer au desespoir & auoir ladicte ville, pour y perdre la pluspart de tous ses gens: & pource prioient ausdits de Paris que on leur enuoyast de la menuë artillerie, des arbalestres, du traict & des viures. Laquelle chose fut faicte & enuoyee à eulx par le Ba-stard de Rochouart seigneur de Meru, qui y mena & conduisit les soixante arbalestriers de Paris, avecques traict, arbalestres, artillerie & viures. Et le ieudy neu-fiesme iour dudit mois de Iuillet, enuiron l'eure de sept heures au matin, apres que ledit de Bourgongne eut faict getter grant nombre & quantité de bombar-des & aultres artilleries contre les murs de ladicte ville, à l'endroit de la porte de l'ostel Dieu, vindrent & ac-coururent dedens les fossez de ladite ville grant quan-

tité desdits Bourguignons, qui y apportèrent grant nombre de bourrees, clayes & aultres mesfrain dedens lesdits fossez, & puis y dresserent eschelles, & moult vigoureusement assaillirent à l'endroit de la muraille & portail dudit hostel Dieu, dont auoit la garde & charge messire Robert Destouteuille Cheualier seigneur de Beyne & Preuost de Paris, qui moult honorablement & vaillamment si contint, & ceulx de ladicte compaignie. Et dura ledit assaut depuis ladicte heure de sept heures iusques apres vnze heures, durant lequel temps y eut grande quantité de Bourguignons tuez & abbatus morts de dessus lesdits murs dedens les fossez d'icelle ville, & de naurez grant nombre, & bien iusques au nombre de quinze à seize cens hommes, & plus largement y en eust eu de morts s'il y eust eu faille à y estre hors d'icelle ville: Mais toutes les portes d'icelle estoient murees du costé de l'ost desdits Bourguignons, pourquoy ne se peut faire ladicte faille, dont furent moult dolans les nobles seigneurs, Capitaines, gens d'armes & de traict, qui estoient dedens icelle ville en bien grant nombre, comme de quatorze à quinze mil combatans, dont auoit la charge & conduicte le Conte de Dampmartin, Iouachin Rouault Marechal de France, Salezar, Guillaume de Vallee, Mery de Coue, Guerin le Groing, les sire de Beyne & Torcy freres, & plusieurs aultres Gentils-hommes de conduicte & grant façon. Et durant ledit assaut moyennant la grace de Dieu ne fut point tué de gens du Roy plus de trois ou quatre personnes, & encores disoit on que ce auoit esté par leur oultrage. Et

au regard de toute l'artillerie qui fut tirée par lesdits Bourguignons durant le temps en icelle ville, iusques au neufiesme iour de Iuillet, n'en fut tué plus de quatre personnes. Et le landemain dudit assault enuiron le point du iour, fut de rechief enuoyé par ledit sire Denis Hesselin Preuost des Marchans, audit lieu de Beauuais grant quantité de trait à arbaleste, & des cordes pour y seruir, des pouldres à canon & couleurine, & des Chirurgiens pour penser & guerir les naurez.

Et le samedi vingt & vniesme iour dudit mois de Iuillet au matin, fut tiré hors des prisons du Chastellet de Paris vn Messaigier de l'ostel du Roy, qui auoit esté constitué prisonnier esdites prisons, pour ce qu'il auoit diot & publié au Palais & aultres plusieurs lieux de ladicte ville de Paris, que Monseigneur le Connestable auoit tiré dudit lieu de Beauuais aux champs les Capitaines estans dedens icelle, faingnant d'auoir conseil avecques eulx, à sçauoir qu'il estoit de faire pour la seureté & deffence d'icelle ville : & que ce pendant qu'il tenoit ledit conseil lesdits Bourguignons furent auitaillez en leur ost de grant quantité de viures, à quoy eust esté fait faire resistance par lesdits Capitaines, si n'eust esté ledict conseil. Desquelles parolles ainsi dictes par ledit Messaigier, qui sonnoient mal à la charge de mondit seigneur le Connestable, & que de ce se tint fort à mal content, fut ledit Messaigier baillé & deliuré par l'ordonnance du Roy à Maistre Milles Huissier d'armes de son Hostel, qui le mena & conduisit par deuers ledit Connestable, & si luy porta les charges

informations qui faictes auoient esté desdictes parolles.

Et le vendredy dixiesme iour dudit mois qui fut le landemain dudit assault, par vne trenchee qui fut faicte pour ystre hors dudit lieu de Beauuais, Salezart & aultres de sa compaignie entrèrent dedens le parc d'icelluy de Bourgongne enuiron le point du iour, ou furent tuez tous les Bourguignons qu'ils rencontrèrent : & en icelluy parcy furent bruslees trois tentes & tout ce qui estoit dedens, & en vne d'icelles y furent tuez deux hommes de grant façon, jaçoit-ce qu'ils promettoient de payer moult grant finance. Et pour ce que en iceluy ost fut fait grant cry & noise, en criant viue Salezart, lesdits de l'ost se assemblerent en bien grant nombre, parquoy il conuint audit Salezart se retraire audit lieu de Beauuais, & en s'en retrayant & ceulx de sa compaignie en'emmenèrent avecques eulx de bien belle artillerie, comme deux des chambres, des bombardes qui auoient batu & getté en bas la muraille de ladicte ville. Lesquelles chambres pour cause de hastiueté ils getterent dedens les fossez, & si bouterent dedens ladicte ville deux bien belles serpentines avec vng gros canon de cuiure nommé l'un des douze Pers, que le Roy à la journée au rencontre de Montlehery y perdit. Et fut ledit Salezart suiuy de bien prés, & fort batu & nauré, & son cheual aussi nauré de plusieurs coups de piques de Flandres & aultres, nonobstant qu'il reporta iusques audit lieu de Beauuais, ou le cheual mourut incontinent qu'il y fut arriué. Et depuis ladicte faillie n'aduint audit ost gueres de choses iusques

au vingt & vnielme iour dudit mois de Iuillet, que les bourgeois, manans & habitans de la ville d'Orleans, enuoyerent & firent passer parmy la ville de Paris la quantité de cent tonneaulx de vin du creu dudit lieu d'Orleans, qu'ils enuoyoient & donnoient ausdits seigneurs & gens de guerre estās audit Beauuais, pour les rafraischir & aider à bien besongner alencontre desdits Bourguignons. Et si leur renuoyerent encores grant quantité de trousses, de flesches à arc, artillerie, arbalestres, & des pouldres à canon. Et pour conduire les choses dessusdictes, y estoient en personne aucuns bourgeois dudit lieu d'Orleans, pour faire le present ausdits seigneurs & gens de guerre estans audit Beauuais, de par icelle ville d'Orleans.

En ce temps furent faictes les monstres en la ville de Paris, par les habitans d'icelle, par chascune dizaine & quartiers de ladicte ville, tous lesquels y furent en armes & par ordre: Lesquelles monstres furent veües & receües par le seigneur de Gaucourt Lieutenant du Roy en ladicte ville, maistre Iehan de Ladriesche President des Comptes, sire Denis Hesselin Panetier du Roy, Esleu sur le fait des Aides, & Preuost des Marchans de ladicte ville, lesquelles monstres il faisoit moult beau veoir, & plus eust fait se les arbalestriers couleuriniers, gens prinsés bannieres, & aultres gens de guerre en grant nombre, enuoyez de ladicte ville audit lieu de Beauuais, y eussent esté. En ce temps fut mis en termes que encores seroit prins parmy ladicte ville, iusques au nombre de trois mil combatans, qui seroient armez & souldoyez de par ladicte ville, ceulx

de Parlement, de Chastellet, la Chambre des Comptes, la Chambre des Monnoyes, le Chancelier, maître des Requestes, les Esleus & aultres, qui sembla estre moult grant charge aux habitans d'icelle, veu le grant nombre de gens que desia on auoit enuoyé audit Beauuais, & que aussi ladicte ville en demourroit moult affoiblie. Et furent ces choses moult honnorablement remonstrees par ledit sire Denis Hesselin aux Capitaines estans audit Beauuais, qui desdictes remonstrances se tindrent à bien contens, & se contenterent de ce qui leur auoit esté enuoyé, sauf qu'ils prièrent que encores on leur menast cent arbalestriers & couleuriniers, ce que fist ladicte ville. Et depuis le mercredi feste de la Magdelaine enuiron l'eure de trois heures du matin, ledit Duc de Bourgongne honteusement se desloga de son ost & s'en partit & s'en ala sans aultre chose faire, sinon que durant l'espace de vingt-six iours entiers qui fut deuant ladicte ville, il ne cessa de faire getter son artillerie contre ladicte ville nuit & iour, qui peu ou neant greuerent icelle ville, ne les habitans d'icelle, & y donna & fist donner deux grans & merueilleux assauts, ausquels y furent tuez & meurdrys bien grant nombre de ses gens de guerre, des plus grans qu'il eut en sa compaignie, & si perdit durant icelluy temps grant quantité de son artillerie, que ceulx de la garnison d'Amiens pour le Roy gaignerent dessus lesdits Bourguignons. Et depuis ledit partement desdits Bourguignons, ils s'en alerent boutant les feux és bleds & és villaiges par tout ou ils passoient, & vindrent deuant saint Valery lez le Crotoy, qui leur fut rendu



rendu par ceulx de dedens, pource qu'ils n'estoient pas assez de gens, & que la place n'estoit point de tenir cōtre sa puissance, & apres s'en ala à Eu qui pareillement luy fut renduë pour les causes que dessus. Et le mercredy vingt-neufiesme iour de Iuillet, monfieur le Conestable, monfieur le grant Maistre, & aultres Capitaines qui estoient dedens la ville de Beauuais, accompagnez de huiët cens lances, se partirent dudit lieu pour eulx tirer au pays de Caulx vers Arques & Moustieruillier, pour estre au deuant desdits Bourguignons qu'ils supposoient qu'ils y deuoient aler, ce que firent lesdits Bourguignons, & alerent mettre & asseoir leur parc entre ladicte place d'Eu & Dieppe, en vng villai-ge nommé Ferrieres. Et illec depuis y seiourna bien grant piece sans riens conquerir, sinon le neuf Chastel de Nicourt où ils se bouterent, pource que dedens ny trouuerent aucun qui leur contredist, & y furent par l'espace de trois iours, puis s'en alerent, & au partir y bouterent le feu & brulerent la ville & chastel, qui fut vng moult grant & piteux dommaige, car c'estoit vne moult belle ville de guerre & grande. Et en apres fist mettre & bouter ledit Bourguignon le feu à Longueuille, au Fahy, & aultres plusieurs lieux & villai-ges du Bailliage de Caulx, qui pour tout son vaillant n'eust sceu reparer. Et plus ne aultre vaillance ne fist que de bouter lesdits feux depuis son partement de ses pays iusques au premier iour de Decembre quatre cens soixante & douze. Durant ces choses le Roy qui estoit en Bretaigne à tout plus de cinquante mil combatans, ne fist que peu ou rien, pource qu'il fut mené

Aa

de belles paroles & par Ambassades, au moyen dequoy il cuidoit auoir bonne pacification & accord avec ledit de Bretagne, sans effusion de sang ne perdition de ses gens de guerre, que tousiours il a fort craint, plus sans comparaïson que ledit de Bourgongne, qui estoit trop cruel & plain de mauuaïse obstination, ainsi que en son temps la bien monstre & monstroït chascun iour. Et apres que ledit Duc de Bourgongne fut retourné dudit pays de Caulx, ou ainsi auoit bouté le feu comme dit est, & que deuant Arques & Dieppe fut si vigoureusement recueilly & batu, luy & ses gens, s'en partit d'icelluy pays & delibera de s'en aler deuant la bonne ville & cité de Rouen, ou plus que deuant fut bien receu. Et tellement que au moyen des faillies & grans vaillances que firent sur luy ceulx de dedens, luy conuint soy en retourner bien honteusement & à sa grant perte vers Habeuille, & fist courir lors le grant bruit de mettre le siege deuant la ville de Noyon, & icelle auoir par force, à quoy luy fut bien resisté par le sire de Crussol & aultres vaillans Capitaines pour le Roy, qui se vindrent loger dedens, & qui la fortifierent d'engins, de viures & aultres choses, pour repulser sa dampnée fureur, mais vng grant mal fut fait par son moyen : car lestdits Capitaines pour estre & demourer plus seurs en ladicte ville, firent bruler & abatre les faulxbourgs d'icelle ville, pour garder de y loger lestdits Bourguignons qui n'y vindrent point.

Audit temps messire Robert Destouteuille Cheualier Preuost de Paris, qui estoit dedens la ville de Beauuais avecques les nobles de la Preuosté & Viconté de

Paris, & certain nombre de francs archiers, s'en partit dudit lieu de Beauuais & s'en vint loger és faulxbourgs de la ville d'Eu, du costé d'Abbeuille. Et ce mesme iour aussi arriua d'aulture costé esdits faulxbourgs du costé de Dieppe, monsieur le Mareschal Iouachin, lesquels incontinent enuoyerent sommer les Bourguignons qui estoient dedens. Et tels effrois leur firent les gens du Roy qu'ils prindrent composition, qui estoit telle qu'ils s'en alerent tous, & si rendirent ladicte ville: c'est assauoir les Cheualiers chacun sur vng petit courtault, & tous les aultres Bourguignons qui estoient bien cent & plus, s'en alerent chascun vng baston en leur main, & laisserent tous leurs habillemens, biens, & cheuaulx, & si payerent dix mil escus, & puis ne demoura guieres que lesdicts Iouachin & Destouteuille, eulx & leurs gens s'en alerent deuant la ville de sainct Vualery qu'ils eurent par semblable condition, & payerent six mil escus, & puis s'en alerent à Rembures vn bien bel & fort Chasteau, où dedens estoient aucuns Bourguignons, qui vindrent au deuant dudiect Destouteuille & Iouachin, ausquels ils rendirent ledit chastel, moyennant que lesdits Bourguignons s'en alerent, eulx & leurs bagues sauues.

En ces entrefaictes aucuns tenans le party dudit de Bourgongne, comme le Conte de Roussi fils dudiect Connestable, & aultres de leur party, tindrent les champs au pays & marche de Bourgongne, & se vindrent esprendre & loger en la Conté de Tonnerre, où ils ne trouuerent aucune resistance. Et en gastant & destruisant pays vindrent iusques à Ioigny, qui fut fort

Aa ij

secouru par les gens du Roy & ne l'eurent point, & puis s'en alerent vers Troyes, boutans feux és granches & villaiges, & aultre vaillance ne firent. Et pendant qu'ils faisoient tels maulx, semblablement le faisoient le Conte Daulphin d'Auuergne, & aultres nobles hommes de sa compaignie au pays de Bourgongne pour le Roy, où ils mirent & bouterent aussi le feu en plusieurs des villes, villaiges, & lieux dudit de Bourgongne, & y firent du dommaige irreparable: mais c'estoit pour reuenge de ce que ledit Bourguignon auoit fait sur les villes, pays & subjets du Roy, comme mauuais qu'ils estoient à leur vray & souuerain seigneur.

Au mois de Septembre ensuiuant le Roy qui auoit esté par certain temps au pays de Bretaigne fist treue & abstinance de guerre, en laquelle treue estoient compris les amis & aliez d'iceluy de Bretaigne, lesquels il declaira estre ledit Duc de Bourgongne, qui aussi print & accepta ladiète treue ledit temps durant, aussi pour luy, ses amis & aliez, qu'il declaira estre l'Empereur d'Alemaigne, les Rois d'Angleterre, Escosse, Portugal, Espagne, Arragon, Cecille, & aultres Rois, iusques au nombre de sept, & plusieurs aultres Ducs & grans seigneurs. En ce temps accoucha d'vng fils la bonne Royne de France, que on appella monsieur de Berry, qui ne vesquit guieres.

Vers la fin du mois d'Octobre aduint que monsieur de Beaujeu, frere de monsieur le Duc de Bourbon, qui estoit alé par l'ordonnance du Roy au pays d'Armignac comme Gouverneur de Guyenne, lequel estoit

bien accompagné de grans seigneurs & nobles hommes, luy estans dedens la ville & cité de Lestore audit pays, fut par trayson pris & mis és mains dudit Conte d'Armignac, lequel au moyen d'icelle prise recouura ladiëte cité. Et puis apres icelle prise ledit d'Armignac deliura plus, des seigneurs estans avec ledit seigneur de Beaujeu qui depuis furent prins de par le Roy, pource qu'il auoit soupçon qu'ils eussent esté cause de la prise dudit seigneur de Beaujeu, & furent menez plusieurs au Chasteau de Loches. Et de ladiëte prise dudit de Beaujeu fut le Roy moult doulant, & pour le rauoir enuoya deuant icelle cité de ses gens de guerre & artillerie en grant nombre, & luy mesmes ala iusques à Poictiers, à la Rochelle, & au pays d'environ, & y estoit le iour saint Andry audit an soixante & douze, & puis s'en retourna à Angiers. Et à cause de ladiëte prise y eut vng gentilhomme seruiteur dudit monseigneur de Beaujeu, nommé Iehan Deymer, qui estoit prisonnier audit lieu de Loches, lequel fut escartellé en la ville de Tours, pource qu'il confessa auoir esté traistre au Roy & à son dit maistre : & à l'eure qu'il deust mourir parla moult honnorablement & publiquement deuant tous dudit seigneur de Beaujeu, en disant par luy qu'il estoit bon & loyal, & qu'il n'auoit rien sceu de ladiëte trahison : mais d'icelle en chargea fort le Cadet d'Alembret seigneur de sainte Basile, auquel ledit de Beaujeu auoit eu grant confidence, pource qu'il auoit esté nourry & eu moult de biens en la maison de Bourbon. Apres ces choses le Roy sejourna longuement en Poictou, & vers les marches de Bre-

taigne, & tant y demoura que appoinctement se fist entre le Roy & le Duc de Bretaigne, dont de ce faire se mesla fort Oudet de Rie seigneur de Lescun, à qui le Roy à ceste cause fist de grans biens, & parauant luy en auoit aussi fait, & en faisant ledit appointment le Roy bailla & deliura audit Duc de Bretaigne la Conté de Montfort, & certaine somme de deniers.

Et apres ledit accord ainsi fait, fut enuoyé par ledict Duc de Bretaigne le faire fortiffier & sçauoir par ses Ambassadeurs au Duc de Bourgogne, & pour rauoir deluy les seelez, que ledit Duc de Bretaigne luy auoit baillez en faisant l'aliencie d'entreulx.

Au mois de Feurier audit an quatre cens soixante & douze, le tiers iour dudit mois, aduint sur le point de six heures au soir que le temps estoit fort doulx & chault, qu'il descendit du Ciel deux grans clartez comme deux chandelles, passant deuant les yeulx des regardans, qui sembloit estre fort espouuentable, & en yssoit moult grant clarté, mais ce ne dura guieres. Le septiesme iour dudit mois de Feurier monsieur l'Euesque de Paris fils de monsieur de la Forest, fit son entree comme Euesque de ladicte ville, & y eut grande sollempnité gardee à son entree. Et apres le seruice fait en la grant Eglise, donna à disner aux gens d'Eglise, Vniuersité, Parlement, Chambre des Comptes, Generaux, Maistres des Requestes, Secretaires, Preuost des Marchans, Escheuins & bourgeois de ladicte ville, bien & honnorablement. En ce temps fut tiree de la ville de Lestore vne grosse serpentine en l'ost des gens du Roy estans deuant, laquelle d'vng seul coup tua le

maistre de l'artillerie du Roy & quatre aultres canonniers.

Audit temps fut prins prisonnier le Duc d'Alençon, par messire Tristan Lermite Preuost des Marechaulx, & mené deuers le Roy, pour occasion de ce que on disoit qu'il s'en estoit party de ses pays, cuidant s'en aler par deuers ledit de Bourgongne, pour luy vendre & deliurer toutes ses terres & seigneuries qu'il auoit au pays du Perche & Normendie, avecques ladicte Duchie d'Alençon.

Au mois de Mars ensuiuant mil quatre cens septante deux, le vendredy cinquiesme iour, le Conte d'Armignac estant dedens ladicte ville de Lestore, & qui audit iour auoit composition faicte avecques le Roy, par le moyen de messire Yues du Fau, que le Roy auoit enuoyé par deuers ledit de Armignac pour ceste cause, affin de soy en vider dudit lieu de Lestore, luy, sa femme & seruiteurs, leurs vies sauues, fut ledit de Armignac tué & meurdry par les gens du Roy, qui par assault entrèrent en icelle ville, pource que ledit de Armignac nonobstant sondit appointment, en alant à l'encontre voulut tuer & meurdrir aucun des gens du Roy qui entrèrent en icelle ville, sous couleur dudit traicte: lesquels quant ils virent que ledit de Armignac les vouloit ainsi traicter, crierent au Roy tenans illec le siege qu'ils les voulsissent secourir, ce qu'ils firent Et vindrent assaillir ladicte ville à l'endroit où elle auoit esté batuë, & par là entrèrent dedens le Seneschal de Lymosin & aultres en grant nombre, & tels qu'ils tuerent ledit de Armignac, toutes ses gens, & tous les

habitans de ladicte ville de Lestore, tellement que de tous n'en demeura que la Contesse d'Armignac & trois femmes, & trois ou quatre hommes, que tout ne fut tout meurdry & tout pillié.

Et par tant monsieur de Beaujeu & les aultres seigneurs & gentils-hommes que ledit d'Armignac tenoit prisonniers au lieu de Lestore, furent deliurez & s'en vindrent deuers le Roy. Et des choses dessusdictes en emporta au Roy vng des cheuaucheurs de son escurie nommé Iehan Dauuargne, dont le Roy fut moult joyeux, & pour ceste cause le fist & crea son Herault, & si luy donna cent escus d'or. Et aussi entra dedens ladicte ville le Cardinal d'Arras, qui moult vaillamment s'estoit porté deuant icelle en y tenant le siege pour le Roy, & apres fut toute la ville arse & tout getté dedens les fossez, & pour la desconfiture dudit lieu de Lestore & dudit d'Armignac en ala la nouvelle au Roy d'Arragon, qui estoit à Parpignan, lequel pour la cause dessusdicté & aussi que on luy rapporta que Phelippe monsieur de Sauoye s'en aloit à luy, pour luy faire la guerre & recouurer ladicte ville de Parpignan, qu'il auoit prise sur le Roy, & venoit illec à tout grant compaignie de gens de guerre, tant des pays de Sauoye, du Daulphiné que d'Armignac, s'en ala & departit dudit Parpignan & se retrahit en aultres lieux ses pays. Et puis le samedi matin quatorziesme iour dudit mois de Mars à l'eure de six heures, le Roy qui estoit au Plessis du parc, jadis nommé les Montils lez Tours, s'en partit à priuee compaignie & s'en ala à Bordeaux & à Bayonne. Et affin que homme viuant  
aultres



aultres que ceulx qu'il auoit ordonnez ne le suiuiſſent, ne alaſſent apres luy, fiſt tenir toutes les portes de Tours fermees depuis ladiſte heure iuſques à dix heures ſonnees, & ſi fiſt rompre vn pont près dudit lieu de Tours par où il eſtoit paſſé, afin que homme n'y paſſaſt, & fiſt illec auſſi demourer monſieur de Gaucourt Capitaine des Gentils-hommes de ſa maiſon, afin que perſonne n'alaſt apres luy.

Et le mercredy ſeptieſme iour d'Auril auant Paſques audit an ſeptante-deux, le Cadet d'Alebret fils du Conte d'Alebret, qui auoit eſté avec mondit ſeigneur de Beaujeu audit lieu de Leſtore, & qui auoit trahy & baillé ledit ſeigneur au Conte d'Armignac, fut icelluy Cadet pris priſonnier audit lieu de Leſtore apres la mort dudit d'Armignac, & amené en priſon à Poictiers, où illec fut fait ſon procez & condempné à eſtre decapité, le quel y fut ledit iour de mercredy Auril ſeptieſme, & incontinent qu'il eut le col couppé fut ſon corps & ſa teſte mis en vng cercueil couuert d'vng poille armoyé à ſes armes, & fut porté ledit corps enterrer par les quatre Mendiens dudit Poictiers, & luy fut fait vng moult beau ſeruice. Audit mois d'Auril fut fait de rechief treue entre le Roy & le Duc de Bourgongne iuſques à vng an prouchain enſuiuant, qui finiroit l'an ſoixante & quatorze.

L'an mil quatre cens ſoixante & treize, enuiron la fin d'Apuril, aduint que le Roy d'Arragon fiſt entrepriſe ſur la ville de Perpignan, & la print ſur monſieur du Lau qui en auoit la garde & la charge, mais le chateau demoura au Roy & à ceulx qui dedens eſtoient,

B b

& le tindrent depuis ladicte ville prise bien longuement, & iusques la conqueste faicte dudit lieu de Lestore, que apres icelle le Roy en enuoya son armee par deuant ladicte ville de Parpignan, deuant laquelle ils mirent le siege, & y assiegerent ledit Roy d'Arragon & son fils, & avec les nobles, seigneurs, Capitaines & Seneschaulx de ladicte armee, y estoit aussi monsieur le Cardinal d'Alby, qui moult bien & sagement se y gouuerna. Et deuant icelle ville tindrent le siege longuement, & iusques au mois de Iuin que le Roy y enuoya de rechief pour reconforter ladicte armee, quatre cens lances prises à Amiens & aultres villes voisines, & si y enuoya grant quantite d'artillerie & cannonniers. Au mois de Iuing audit an mil quatre cens soixante & quatorze le Duc d'Alençon que le Roy auoit fait prendre & mener prisonnier a Loches, fut mené à Paris au Chasteau du Louure, & y arriua le mercredy veille du saint Sacrement seiziesme iour dudit mois de Iuing, à l'eure d'entre neuf & dix heures au soir à l'arche de Bourbon, où il descendit illec des bateaulx qui le auoient amené de Corbueil, & y estoient à le conduire monsieur de Gaucourt, le sire de la Choleriere maistre de l'ostel du Roy, & avecques ce en leur compaignie y estoient cinquante archiers de la garde, & vingt-quatre Gentils-hommes de l'ostel du Roy, lesquels apres que leurdit seigneur eut esté mis & bouté audit Chasteau du Louure s'en retournerent deuers le Roy & le laisserent en la garde dudit seigneur de la Choleriere, & des archiers de ladicte ville de Paris, & est assauoir que le iour qu'il arriua fut mené lo-

ger en la ruë saint Honoré à l'enseigne du Lyon d'argent. Et ledit iour dudit Sacrement apres soupper aussi à ladicte heure d'entre neuf & dix heures au soir, fut mené & cōduit ledit seigneur audit chasteau du Louure. Et apres que ledit siege eust esté longuement tenu deuant ladicte ville de Parpignan, aduint que les gens du Roy au moyen de la grande & extreme chaleur qu'ils auoient & souffroient illec, & aussi qu'ils auoient grant souffreté de viures, prindrent treues lesdicts de Parpignan, & eulx vng peu de temps, pendant lequel chacun se auitailla & appointa de ce que besoing leur estoit, & en ces estrefaiçtes y furent enuoyez grant quantité de gens de guerre. Et pour y remettre le siege & fournir de viures ledit ost, le Roy y enuoya monsieur de Gaucourt, maistre Jehan Bourre, & le Changeur du Tresor, pour prendre viures & les payer, par tout ou recouurer en pourroient, pour mener audict Parpignan. Durant ce temps & au mois de Iuillet quatre cens septante trois, mourut vng des enfans du Roy nommé monsieur François de France, Duc de Berry, dont le Roy porta moult grant dueil, & par l'espace de six heures au Chasteau d'Amboise, que homme ne parloit à luy. Audit mois de Iuillet le Duc de Calabre mourut de pestilence à Nancy en la Duché de Lorraine, & incontinant apres son trespas fut nouuelles que vng Alemant qui auant son trespas auoit la conduicte de l'armee dudit de Calabre, print à prisonnier le Conte de Vaudesmons heritier de ladicte Duchie de Lorraine, à l'adueu & faueur du Duc de Bourgongne, pour laquelle cause & affin de rauoir ladicte Conté de

Bb ij

Vaudeſmons fut prins pour marque en ladicte ville de Paris vng ieune fils eſcollier, nepueu de l'Empereur d'Allemaigne. Audit mois de Iuillet fut ordonné vng grant conſeil eſtre tenu en la ville de Senlis entre les gens du Roy & ceulx du Duc de Bourgongne, pour appointer les differens d'entre eulx. Et y enuoya le Roy de ſon coſté le Conte Dampmartin qui y fiſt de grans pompes, monſieur le Chancellier, monſieur de Craon, monſieur le premier Preſident de Parlement, maistre Guillaume de Serifay Greffier Ciuil d'icelle Court, & maistre Nicole Bataille Aduocat en ladicte Court, leſquels y ſeiournerent par longue eſpace de temps, & iuſques au iour de my-Aouſt dudit an ſoixante & treize, ſans aucune choſe faire.

En ce meſme temps le Duc de Bourgongne miſt ſus ſon armee, & s'en ala à la Duché de Guerles, pour la ſubiuguer & mettre en ſes mains. Audit mois d'Aouſt, le Dimenche huietieme d'icelluy, le Roy eſtant dedens le Chasteau d'Alençon qui s'en aloit hors d'icelluy, aduint que par grant deſfortune ainſi qu'il yſſoit hors du Chasteau d'icelluy lieu chey deſſus luy, deſſus l'une de ſes manches, vne groſſe pierre de faix, dont & dequoy il fut en moult grant dangier de ſa perſonne, duquel dangier Dieu & la Benoiſte Vierge Marie & tous les ſaincts & ſainctes de Paradis, à la grace de laquelle il eſtoit moult enclin, en fut garenty & hors getté. Audit mois d'Aouſt le conſeil du Roy qui eſtoit en la bonne ville de Senlis avec les Ambaſſadeurs de Bourgongne & Bretagne, & qui auoient ſeiourné longuement, s'en departirent, & s'en ala & retourne

chacun en son lieu, sans riens faire de la matiere pour laquelle ils estoient alez. Et au regard du fait & disposition du temps de ladite annee, l'Esté fut moult chaut, & par especial depuis le mois de Iuing iusques au premier iour de Decembre, & plus chault & ardant que oncques n'auoit esté veu d'aage d'homme lors viuant, & à ceste cause furent les vins chaulx & ardans, & plusieurs d'iceulx deuindrent aigres & puants, & en fut grant quantité de perdus & gettez par les ruës, & ne fist point de froit, ne ne gella point qu'il ne fust la Chandeleur passée.

En ce temps pource qu'il estoit bruit que les Bourguignons tiroient vers Lorraine & Barrois, le Roy y enuoya cinq cens lances sous la conduite de monseigneur de Craon, qu'il fist son Lieutenant General, & y enuoya les nobles de l'Isle de France, de Normendie, & les francs archiers, qui furent logez en diuers lieux au pays de Champagne, & y demourerent plus de deux mois, & puis s'en retourna chacun en sa maison sans rien faire.

Audit temps ledit Bourguignon amena l'Empereur d'Alemaigne iusques à Luxembourg. Et fut ledit Empereur dedés la ville de Mets pour les enhorter de bouter ledit de Bourgogne en ladite ville, ce qu'ils ne voulurent pas faire, & s'en retourna ledit Empereur audit de Luxebourg, & de illeco s'en retourna en Alemaigne.

En ce temps ledict de Bourgongne enuoya à Venize pour emprunter de l'argent aux Veniciens, & de icelluy argent en souldoyer fix cents lances du pays, pour le temps & terme de trois mois, & pas-

Bb iij

ferent par la Duché de Milan & s'en vindrent au hault pays de Bourgongne avecques les subiets dudit Duc, pour ce qu'ils n'estoient pas assez forts pour greuer l'armee du Roy, qu'il auoit fait loger sur les marches dudit Duc de Bourgongne.

Audit temps le Roy maria son aînée fille, que parauant il auoit promise au feu Duc de Calabre, à monseigneur de Beaujeu, frere de monseigneur le Duc de Bourbon.

Audit temps les Bourguignons par trahison & emblee entrèrent au pays de Niuernois, & y prindrent des places de monseigneur de Neuers, comme la Roche Chastillon, & aultres. Audit temps se rassemblèrent à Compiengne les Ambassadeurs du Roy, qui au parauant auoient esté assemblez à Senlis, cuidans y trouuer l'Ambassade de Bourgongne qui auoient promis y venir, lesquels y firent longuement attendre lesdits Ambassadeurs du Roy, lesquels s'en retournerent à Paris pource que lesdits Bourguignons ny venoient point, & puis encores y retournerent le mois de Ianuier, & y estoient le quinzième iour dudit mois.

En ce temps fut nouuelles que ledit Duc de Bourgongne voyant qu'il n'auoit pas puissance de paruenir à destruire le Royaulme de France, ainsi que grant peine y auoit mis, conspira avecques vng nommé maître Ythier marchant, qui auoit esté seruiteur de monseigneur de Guyenne, & avecques vng nommé Iehan Hardy seruiteur dudit maître Ythier, qui s'en estoient retirez apres ledit trespas dudit de Guyenne deuers ledit de Bourgongne, de trouuer moyen de faire mou-

rir & empoisonner le Roy. De laquelle chose faire ledit Hardy print à luy la charge, & pour ce faire & accomplir luy furent baillez les poisons, en luy promettant faire moult de biens, & de luy donner cinquante mil escus pour distribuer à celluy ou ceulx qui feroient ladicte execution, & si fut deliuré argent audit Hardy pour faire ses despens en la poursuite. Lequel Hardy fol non ayant Dieu deuant les yeulx, & non voulant cognoistre que se ladicte execution eust esté accomplie, ou Dieu a bien pourueu, tout le tres-noble Royaulme de France estoit du tout perdu & destruit, s'en partit & tira là où le Roy estoit, & pour mettre sa damnee entreprise à execution, & non cognoissant que le Roy l'auoit recueilly & donné grant argent, s'adressa à vng des seruiteurs du Roy, ayant la charge en sa cuisine de faire saulces, & auquel ledit Jehan Hardy auoit eu cognoissance durant que ledit saulcier & Hardy auoient esté en l'ostel, & au seruice de mondit seigneur de Guyenne. Et luy declaira ledit Hardy de ladicte entreprise, en luy promettant vingt mil escus ou cas ou il vouldroit faire & accomplir ladicte charge, qui luy presta l'oreille, & dist qu'il n'y pourroit riens faire sans le moyen de Colinet queux du Roy, & qui aussi auoit esté & demouré avecques ledit Hardy & saulcier en l'ostel dudit seigneur de Guyenne. Endisant par ledit saulcier à icelluy Hardy qu'il parleroit audit queux, & y feroit ce qu'il pourroit, en disant oultre audit Hardy qu'il luy deliurast lesdictes poisons, pour les monstrier audit queux. Et bien tost après ledit saulcier & Colinet, qui de ce auoient parlé ensemble, en

alerent aduertir le Roy, dont il fut moult esbahy & espouuenté. Et dudit aduertissement furent lesdicts queux & faulcier moult honnorablement & prouffitablement guerdonnez du Roy. Et en toute diligence fut ledit Iehan Hardy suiuy, qui s'en retournoit deuers Paris, & fut prins vers Estampes & remené deuers le Roy, qui le interroga ou fist interroger sur les choses dessusdictes, & icelles luy confessa estre vrayes. Pourquoy & affin de y donner le iugement ordonné estre fait en pareil cas, s'en partit le Roy d'Amboise & s'en vint à Chartres, Meulenc, Creil, & aultres lieux és marches de Beauuoisin. Et après luy estoit mené ledit Hardy en vne basse charrete, où il estoit moult bien enfermé de gros fers, & enchaîné, & le conduisoit Iehan Blosset Escuyer, Capitaine de cent archiers de la garde de Monseigneur le Daulphin, & auoit avecques luy cinquante desdits archiers, tousiours estans autour deladiçte charrete. Et ainsi accompagné que dit est fut ledit Hardy enuoyé à Paris, pour estre deliuré au Preuost des Marchans & Escheuins de ladiçte ville, & y fut mené & y arriua le leudy vingtiesme iour de Ianuier quatre cens soixante & treize, enuiron l'eure de trois heures apres disner, que sire Denis Hesselin, Conseillier & maistre d'ostel du Roy, Preuost des Marchans & Esleu sur le faict des Aydes de ladiçte bonne ville, le ala recueillir és faulxbourgs de la porte saint Denis d'icelle ville, & avecques luy estoient les quatre Escheuins, le Clerc & sergens de l'ostel de ladiçte ville, & aultres notables habitans d'icelle: & accompaignoient lesdits Preuost & Escheuins avecques  
les



les archiers d'icelle ville, & par bel ordre. Et fut ledict Hardy ainsi accompaignié que dessus, & assis sur vne haulte chaire mise au dedens & au milieu d'une charrette, affin qu'il feust magnifesté & apperceu par le populaire d'icelle ville.

Ausquels & affin qu'ils ne feussent meus de mal faire ou iniurier ledit Hardy, pour l'enormité dudit cas, fut deffendu de le mutiler, blasphemer, ne iniurier. Et ainsi estant en ladicte charrette que dit est, fust amené tout au long de la grant rue saint Denis, & descendu audit hostel de la ville, & deliuré par ledict Blosset és mains & en la garde desdicts Preuost des Marchans & Escheuins, ausquels le Roy voulut leur attribuer l'honneur d'en auoir la garde, & faire faire son procez & icelluy mettre à execution.

Audit temps le Roy estoit à Creil, fist vng Edict touchant les gens d'armes de son Royaulme, par lequel il declaira que chascune lance n'auroit ne ne tiendroit que six cheuaulx. C'est assauoir la lance trois cheuaulx, pour luy son paige & le coustillier, & les deux archiers deux cheuaulx, & vn cheual pour le varlet, & qu'ils n'auroient plus de panniens à porter leurs harnois: & auecques ce ne seiourneroyent que vng iour en vng villaige. Et en oultre fut crié que nul marchand ne vendist ausdits gens de guerre, ne prestast aucuns draps de soye, ne camelots, sur peine de perdre l'argent que lesdits gens de guerre leur pourroient deuoir à cause de ce, & aussi que on ne leur vendist aucun drap de laine plus de trente-deux souls parisis l'aune.

Audit temps le Roy fist ordonnance sur le faict de

C c

ses monnoyes, & ordonna ses grans blans courir pour vnze deniers tournois, qui parauant ne valoient que dix; les targes vnze deniers tournois qui en valoient douze, l'escu trente soulds trois deniers tournois, & ainsi de toutes les aultres especes de monnoyes, tout fut changé. Audit temps enuiron le vingtiesme iour de Ianuier quatre cens soixante & treize, fut fait accord & appointment entre le Roy & monseigneur le Connestable, qui auoit prins & mis en sa main la ville de saint Quentin, & en mist hors le sire de Cretton, qui y auoit cent lances de par le Roy. Et par ledit accord demoura ledit Connestable audit saint Quentin, ainsi que auant auoit fait, & luy fut rendu Meaux & aultres places, dont il auoit esté desappointé, & si luy bailla on Commissaires pour culx informer de ceulx qui auoient parlé dudit Connestable, pour raison de ladicte prinse de saint Quentin, afin de les punir, & luy fut deliuré l'argent du souldoy de ses gens de guerre, qui empesché fut incontinent apres ladicte ville de saint Quentin prise. Audit temps le Roy vint des parties d'Amboise où il estoit, soy tenir à Senlis, & illecques enuiron, & cependant les Ambassadeurs du Roy & du Duc de Bourgongne qui communiquerent sur le faict de trouuer entre culx appointment de paix ou treues, & finablement fut ladicte treue continuée iusques à la my-May, en attendant plus ample appointment. En ce temps le Roy qui estoit à Senlis s'en vint loger à Ermenonuille en Xanters, appartenant à maistre Pierre l'Orfeure Conseillier des Comptes, & illec y seiourna enuiron vng mois, pendant

lequel temps monseigneur de Bourbon que le Roy auoit diuerſes fois mandé venir par deuers luy, y vint & arriua & ny demeura que dix ou douze iours, puis s'en retourna en ſon pays faire ſes Paſques ainſi que le Roy luy en donna le congié, auquel il promiſt incontinent apres Quaſimodo s'en retourner & reuenir.

En ce temps au mois de Mars, le ieudy 30. & penultieme iour dudit mois, Iehan Hardy, empoisonneur dont eſt parlé deuant, fut condempné par Arreſt de la Court de Parlemēt à eſtre trainé depuis l'uyſ de la Conciergerie du Palais iuſques à la porte dudit lieu, & de illec bouté en vng tombereau & mené deuant l'hoſtel de la ville de Paris deſſus l'eſchauffault pour ce illec drecié pour y eſtre eſcartellé, ainſi qu'il fut fait. Et condempné la teſte eſtre miſe & demourer deſſus vne lance deuant l'oſtel de ladiſcte ville, les quatre membres porter en quatre des bonnes villes des extremitez de ce Royaulme. Et à chaſcun deſdits membres eſtre miſe vne epitaphe pour faire ſçauoir la cauſe pourquoy leſdits membres y eſtoient mys & poſez. Et oultre condampné le corps eſtre brullé & mis en cendre deuant l'oſtel de ladiſcte ville, toutes les maiſons dudit Iehan Hardy arrafees & miſes par terre, meſmement le lieu de ſa natiuité gettee par terre, ſans iamais y eſtre fait edifice, & de y mettre epitaphe pour faire ſçauoir l'enormité du cas dudit Hardy, & pourquoy eſtoit faiſte ladiſcte demolition. Et fut ledit Hardy ainſi executé ledit iour de ieudy és preſences du ſeigneur de Gaucourt Lieutenant du Roy, du premier Preſident Boulenger, du Preuoſt de Paris, du Preuoſt des Marchans & Eſcheuins

de ladicte ville, du Procureur & le Clerc d'icelle, & plusieurs aultres notables personnes, & fut baillé audit Hardy pour la conduicte de son ame & conscience, vng notable Docteur en Theologie nommé maistre Iehan Huë. Et puis le samedi ensuiuant enuiron minuit, pourquoy ce fut il n'a point esté sceu, la teste dudit Hardy mise au bout d'une lance, fut ostee de dessus l'eschauffaut ou elle estoit, mise & gettee en vne caue près d'illec. Ledit iour vint & arriua à Paris vne moult belle Ambassade du Roy d'Arragon, qui fut recueillie par monseigneur le Conte de Pantheure, monseigneur de Gaucourt & aultres, qui bien festierent ladicte Ambassade en plusieurs lieux de Paris, & iusques au iour de Pasques fleuries que on cessa pour la sepmaine peneuse qui entra, de les festier. Et puis vint & arriua le Roy à Paris le samedi seiziesme iour d'Auril soixante & quatorze apres Pasques.

Et le mercredi ensuiuant vingtiesme iour dudit mois d'Auril mil quatre cens soixante & quatorze, le Roy ordonna que les monstres feussent faictes des officiers, bourgeois, manans & habitans de ladicte ville de Paris, ce qui fut fait. Et fut ladicte monstre faicte & monstree au dehors de Paris, depuis la Bastille saint Anthoine en alant au long des fossez iusques à la tour de Billy, & d'illec en bataille iusques à la grange aux Merciers. Et de l'autre costé aussi estoient en bataille les habitans de ladicte ville, qui estoit moult grande & belle chose à veoir. Et estimoit-on le nombre des armées de quatre vingts à cent mil hommes, tous d'une liuree de hocquetons rouges à belles croix blanches, &

fut tiré aux champs grant quantité d'artillerie de ladicte ville de Paris, qu'il faisoit moult beau veoir. Et à veoir ladicte monstre y estoit le Roy & l'Ambassade du Roy d'Arragon, qui tous faisoient grandes admirations de la quantité des gens de guerre qu'ils veirent yssir hors de ladicte ville. Et avecques le Roy estoit sa garde, ses gentils-hommes de sa maison, le Conte de Dampmartin, qui se y trouua moult fort pompeux, aussi y estoient Phelippe môseigneur de Sauoye Conte de Bresse, monseigneur du Perche, Sallezart & plusieurs aultres Capitaines, notables hommes & gens de nom. Et apres ladicte monstre faicte le Roy s'en ala au bois de Vinciennes soupper, & y mena avecques luy ladicte Ambassade d'Arragon, & peu de temps apres le Roy donna aux deux seigneurs chefs de ladicte Ambassade, deux hanaps couuerts à personnaiges tout de fin or, qui pesoient quarante marcs d'or fin, & coustèrent trois mil deux cens escus d'or, & puis s'en partit le Roy pour s'en retourner à Senlis, où il sejourna depuis par certain temps. Pendant lequel temps vint & arriua l'Ambassade de Bretagne qui s'en ala deuers le Roy, & des Alemaignes aussi arriua à Paris Ambassade, dont estoit chef le Duc de Bauiere, & avecques ladicte Ambassade de Bretagne y vint Phelippe des Essars seigneur de Thieux, maistre d'ostel du Duc de Bretagne, lequel auoit auparauant esté contre le Roy. Et le recueillit tres-bien le Roy & luy donna dix mil escus, & si le fist maistre Enquesteur & general Reformateur des Eauës & Forests és marches de Brie & Champagne, que tenoit monseigneur de Chastillon, à qui le Roy le

osta pour bailler audit Phelippe des Essars.

Audit temps que le Roy estoit à Senlis, à Ermenonville & illec enuiron, y vint & arriua l'Ambassade de Bourgongne qui y demoura assez longuement sans riens faire, & le Roy s'en ala à Compiengne, à Noyon, & aultres places d'enuiron. Et là le Connestable vint par deuers luy pour aucuns differens qui estoient entre le Roy & luy, & parlerent aux champs ensemble en vng villaige nommé où fut fait vng pont entre eulx deux, & chascun d'eux estoient garnis de gens de guerre pour la garde de leurs personnes. Et illec ainsi assemblez que dit est, parlerent de leursdits differens, mesmement pour raison de la prinse & retenue que faisoit ledit Connestable de la ville de saint Quentin, qu'il auoit prise & mise en sa main, & en dechassé & bouté dehors le sire de Creton, qui auoit la garde d'icelle ville de par le Roy, & la retenue de cent lances, qui tous par la force & contrainte dudit Connestable vuidèrent dehors de ladicte ville, dont le Roy fut bien mal content.

Et pour ceste cause le Roy fist arrester les deniers & descharges qui auoient esté leuees pour le payement dudit Connestable & des quatre cens lances de sa charge & retenue, pour le quartier d'Auril, May & Iuing, l'orsescheu, qu'il print ledit saint Quentin. Et apres ledit pourparlé ensemble, le Roy leua sa main dudit Arrest & fist tout le payement deliurer audit monseigneur le Connestable, & puis se departirent d'ensemble bons amis, & si fist illec la paix dudit seigneur & du Conte de Dampmartin, qui rien ne s'entredeman-

doient. Et audit partement le Roy pardonna tout audit monseigneur le Connestable, qui luy promist & iura de non luy faire iamais aultres faultes, mais que bien le seruiroit de là en auant alencontre de tout le monde, sans nul en excepter. En icelluy temps le Roy s'en retourna à Senlis, Ermenonuille, Ponts saincte Maixance & aultres lieux, & souuent & presque tous les iours aloit le Roy en l'Abbaye de la Victoire, prier & aouer la Benoisite Vierge Marie, illec requise, à l'honneur & louange de laquelle il fist faire audict Prieuré de biens grans dons en or content, qui bien monterent dix mil escus d'or.

Audit temps le Roy ayant en singuliere recommandation son populaire & gens de guerre, & pour escheuer effusion de sang par guerre, fist vne treue avecques son ennemy & aduersaire le Duc de Bourgongne pour vng an, finissant le premier iour d'Auril mil quatre cés soixante & quinze, combien que plusieurs Ambassades feussent venues par deuers luy de par l'Empereur d'Alcmaigne luy humblement prier & requerir qu'il ne feist point ladicte treue avecques ledit de Bourgongne. Et que par port d'armes ils le rendroient fugitif & en la mercy du Roy, & que toute la conqueste & proufit qu'ils pourroient faire & auoir sur ledit de Bourgongne, ils promettoient le bailler & donner au Roy sans riens luy couster du sien : mais nonobstant ce que dit est, fut ladicte treue faicte & accordee avecques ledit de Bourgongne à la grant desplaissance des trefbons & loyaulx subiects du Roy. Et nonobstant ladicte treue & au commencement d'icelle lesdits Bour-

guignons firent de grans oultraiges & dommages aux pays & subiects du Roy, estans alentour desdits Bourguignons, dont aucune reparation ne fut faicte par iceulx Bourguignons, laquelle chose demeura en grant esclandre de veoir le vassal du Roy ainsi oultrager les pays & subiects de son souuerain seigneur.

Au commencement du moys de Iuillet mil quatre cens soixante & quatorze, le Roy vint & arriua en sa bonne ville & cité de Paris, où il ne seiourna qu'une nuit, & le lendemain s'en ala à l'Eglise Nostre Dame, & de là en la saincte Chappelle du Palais, & disna en la Cóciergerie dudit Palais au logis & domicile de maistre Jehan de Ladriesche President des Cópates, & illec enuiron quatre heures apres midy s'en partit, & ala en vng bateau par la riuere depuis la pointe dudit Palais iusques à la tour de Nesle, où il monta à cheual & s'en ala à Chartres, à Amboise, & de là à Nostre Dame de Behuart en Poiçtou.

Audit an le Roy enuoya grand nombre de gens d'armes de son ordonnance, des francs archiers & aultres, & de son artillerie pour reconquerir le Royaulme d'Arragon, dont on disoit que Dieu leur donnast grace de y bien besongner & de retourner ioyeusement, car on dit communement que c'est le cymetiere aux François.

Audit temps le ieudy dixhuietiemes iour dudit mois de Iuillet soixante & quatorze, l'Arrest fut prononcé en la Court de Parlement par monseigneur le Chancelier nommé maistre Pierre Doriolle, du procès fait alencontre dudit d'Alençon, qui parauant auoit esté  
detenu



detenu prisonnier au Louure & audit Palais, & par icelluy Arrest fut ramené a fait les cas & crismes à luy imposez, & la condampnation jadis contre luy prononcee à Vendosme du temps du Roy Charles, dont Dieu ait l'ame. Et le pardon & grace que de ce luy auoit depuis fait le Roy de luy laisser la vie saulue, & que depuis il auoit encores continué de mal en pis cōme ingrat. Et tout dit & recité publiquement en icelle Court, fut ledit d'Alençon declairé par Arrest estre criminel de crisme de leze Majesté, & comme tel condampné a estre decapité & souffrir mort. Sauf sur ce le bon plaisir du Roy. Et toutes ses terres & seigneuries, & tous ses biens estre acquises & confisquées au Roy. Et luy fut le dictum dudit Arrest dit à sa personne par mondit seigneur le Chancelier, & bien tost apres fut ramené prisonnier en sa premiere prison dudit Louure, en la garde & conduicte de sire Denis Hesselin Esleu de Paris, & de ses gens pour luy, de sire Iacques Hesselin son frere Escuier de Escurie du Roy, & de sire Iehan de Harlay Cheualier du guet de nuit de ladicte ville, & autres ordonnez de par le Roy à la garde dudit seigneur. Apres ledit Arrest le Roy s'entira à Angiers & au pais d'environ, & fist mettre en sa main ladicte ville d'Angiers & aultres terres & seigneuries qui estoient & appartenoint au Roy de Cecile pour aucunes causes qui ad ce le meurent: Et au gouuernement & administration desdictes seigneuries & terres y fut mis & commis maistre Guillaume de Cerisay Greffier ciuil de la Court de Parlement. Et apres le Roy retourna par deuers le pais de Beaussé à

D d

Chartres & en Gastinois, au bois de Malez-herbes & aultres lieux voisins où il sejourna par certaine longue espace de temps, en chassant & prenant bestes sauuages, comme cerfs, sangliers, & aultres bestes dont il trouua largement. Et pour raison de la grant quantité des bestes qui y furent trouuees ayma fort ledit pays. Combien que en aultres choses il est maigre pays sec inutile & de petite valeur, & puis s'en partit le Roy, & s'en alla au Pont de Chamoys ou aussi il demoura par certain temps & iusques au jeudy sixiesme iour d'Octobre audit an septante quatre qu'il s'en partit, & ala iusques à Montereau au fould Dyonne. Et audit Pont de Chamois demoura mondit seigneur de Beaujeu, par deuers lequel s'en aloient par chascun iour les gens du grant Conseil en l'absence du Roy. En ce temps le Duc de Bourgongne qui s'en estoit party de ses pays pour aler faire guerre aux Alemans, ala en Alemaigne tenir & mettre le siege deuant la ville de Nuz, qui est vne bonne ville pres de Coulongne sur le Rin, où il sejourna bien longuement tenant le siege illec deuant avecques toute son armee & artillerie. Audit temps furent enuoyez en Bretagne Ambassadeurs de par le Roy; c'est assauoir Monseigneur le Chancelier Phelippe des Essars & aultres. Et au retour de ladicte Ambassade reuint & retourna dudit Bretagne Messire Pierre de Moruillier jadis Chancelier, qui s'en estoit alé avec feu Monseigneur de Guyenne, & depuis son trespas s'en estoit retraict audit pais de Bretagne. En ce temps les gens tenans le party dudit de Bourgongne, nonobstant ladicte tre-

ue prindrent la cité de Verdun en Lorraine, dont le Roy estoit seigneur & gardien. Et pour la rauoir le Roy enuoya trois cens lances & quatre mil francs archiers qui estoient accompaignez du seigneur de Craon & aultres. Audit temps aussi lesdits Bourguignons prindrent par emblee vne ville au pais de Niernois nommee Molins en Gibers ou pareillement le Roy enuoya des gens de guerre & de son artillerie. Et ne differra point ledit de Bourgongne que par ses pais & de son party nonobstant icelle treue de tousjours faire maulx & persecuter les gens seruiteurs, villes & sigeets du Roy.

En icelluy temps Edouart Roy d'Angleterre enuoya ses Heraulx par deuers le Roy le sommer de luy rendre & bailler les Duchez de Guienne & de Normendie qu'il disoit à luy appartenir, ou que en son refus il luy feroit guerre, ausquels Heraulx fut faicte & rendue responce. Et par iceulx le Roy enuoya audit Edouart le plus beau courcier qu'il eut en son escurie, & depuis ce le Roy luy enuoya encores par Iehan de Laislier Marechal de ses logis, vn asne, vng loup, & vng sanglier, & a tant s'en retournerent lesdits Heraulx en leurdict pays par deuers leur Roy. Au mois de Nouembre le Roy vint par deuers Paris, & fut logé à Ablon sur Seine, depuis au bois de Vinciennes, à Hauberuillier & aultres lieux, & puis d'illec se desloga & ala en la France soy logger en vng hostel appartenant à maistre Dreux Bude Audiencier, nommé le Bois le Conte, & messeigneurs de Lyon, de Beaujeu, & aultres seigneurs suiuan le Roy se logerent à Mictry en

D d ij

France. Et puis se desloga le Roy & ala avec les seigneurs deuant dits à Chasteau Thierry, où il demoura certaine espace de temps, & iusques enuiron le douziesme iour de Decembre qu'il retourna à Paris & y fist son Noël, & fut le Roy au seruice la veille de Noël en l'Eglise Nostre Dame de Paris. Le landemain de Noël qui estoit le iour saint Estienne, le Roy eut des nouuelles que les Anglois estoient en armes en grant nombre sur mer, & estoient vers les parties du mont saint Michiel. Et incontinent fist monter à cheual & enuoyer en Normendie les Archiers par luy mis sus de sa nouuelle garde, nommee la garde de monsieur le Dauphin.

En ce temps le Roy eut des nouuelles de son armee qu'il auoit enuoyee en Arragon, & comment ses gens auoient prins vne place près de Parpignan nommee Gonne, dedens laquelle y estoient aucuns Gentils-hommes & habitans d'icelle ville de Parpignan que on voulut faire mourir comme traistres, mais on differa pour ce qu'ils promirent dedens vng temps qu'ils nommerent, de faire reduire & mettre en l'obeyssance du Roy ladicte ville de Parpignan, laquelle chose ils ne firent point dedens le temps qu'ils auoient promis, parquoy en furent aucuns d'eulx decapitez. Et entre les aultres y eut vng nommé Bernard de Douis, qui eust le col couppe. Et bien tost apres fut fait appoinctement entre le Roy & lesdits d'Arragon, par lequel la Conté de Roussillon fut de rechief remise en la main du Roy.

Au mois de Ianuier soixante & quatorze, aduint

que aucuns larrons Bourguignons sans maistre ne adueu, se mirent sur les champs & vindrent courir es pays du Roy & iusques près de Compiengne, où ils prindrent & tuerent gens, & puis voulurent edifier vne place pour eulx retraire près de Roze, nommee Arson, où ils amenerent grant quantité de pionniers. Et quant le Roy en eut ouy les nouuelles il manda aux garnisons d'Amiens, Beauuais, & aultres lieux, avec la compagnie du grant maistre, & aussi des Arbalestriers & Archiers de Paris & aultres de ladicte ville, que messire Robert Destouteuille Preuost de Paris conduisoit, qu'ils allassent destruire lesdits Bourguignons & place, mais incontinent qu'ils en oyrent la nouuelle ils desemparerent tout, & s'enfuirent comme paillars qu'ils estoient.

Audit mois de Ianuier quatre cens soixante & quatorze, aduint que vng franc archier de Meudon près Paris, estoit prisonnier es prisons de Chastellet, pour occasion de plusieurs larrecins qu'il auoit faicts en diuers lieux, & mesmement en l'Eglise dudit Meudó. Et pour lesdits cas & comme sacrilege, fut condempné à estre pendu & estranglé au gibet de Paris nommé Montfaulcon, dont il appella en la Court de Parlement, où il fut mené pour discuter de son appel: par laquelle Court & par son Arrest fut ledit franc archier declairé auoir mal appellé & bien iugé par le Preuost de Paris, par deuers le quel fut renuoyé pour executer sa sentence. Et ce mesme iour fut remonstré au Roy par les Medecins & Chirurgiés de ladite ville que plusieurs & diuerses personnes estoient fort trauaillez &

molestez de la pierre, colicque, passion, & maladie du costé, dont pareillement auoit esté fort molesté le dit franc archier. Et aussi desdictes maladies estoit lors fort malade monsieur du Bocaige, & qu'il seroit fort requis de veoir les lieux ou lesdites maladies sont concrees dedens les corps humains, laquelle chose ne pouoit mieulx estre sceüe que inciser le corps d'vng homme viuant, ce qui pouuoit bien estre fait en la personne d'icelluy franc archier, que aussi bien estoit prest de souffrir mort, laquelle ouuerture & incision fut faicte au corps dudit franc archier, & dedens icelluy quis & regardé le lieu desdictes maladies. Et apres qu'ils eurent esté veüs fut recoufu, & ses entrailles remises dedens. Et fut par l'ordonnance du Roy fait tres-bien penser, & tellement que dedens quinze iours apres il fut bien guery, & eut remission de ses cas sans despens, & si luy fut donné avecques ce argent.

En ce temps le vingt-huictiesme iour dudit mois de Ianuier, le Roy ayant singuliere affection aux saincts faits & grans vertus de saint Charlemaigne, voulut & ordonna que ledit vingt-huictiesme iour feust faicte & solempnisee la feste dudit saint Charlemaigne, laquelle chose fut faicte & solempnisee en la ville de Paris, & ladicte feste gardee comme le Dimanche, & ordonné que d'oresenauant par chascun an ladicte feste seroit faicte ledit vingt-huictiesme iour de Ianuier. Au mois de Feburier ensuiuant furent les Alemans dedens la ville de Nux auitaillez par ceulx de la ville de Coulongne sur le Rin, & aultres Alemans de la partie de l'Empereur d'Alemaigne, nonobstant le

Duc de Bourgongne qui passé a long temps estoit demouré tenant le siege deuant la ville de Nux, & qui auoit fait arriuer plusieurs nauires pour cuider empescher que ledit auitaillement ne vint en icelle ville, mais nonobstant toute sa puissance & armée vint & entra ledit auitaillement en ladicte ville. Et furent toutes les nauires dudit Duc rompuës & mises en pieces dedens la riuere du Rin, & mors plus de six à sept mil Bourguignons estans dedens iceulx nauires. Et auparauant auoient eu & souffert lesdits Bourguignons de grans pertes & maux par lesdits de Nux.

Au mois de Mars ensuiuant pour ce que lesdits Bourguignons des parties de Flandres, Picardie, & aussi de ceulx estans par ledit Duc de Bourgongne logez à Roye, Peronne, Mondidier & aultres places tenans son party, estoient venus courir es pays & sur les subjects du Roy. Et en iceulx prins plusieurs prisonniers, viures & biens, & menez en leurs places contre la treue faicte entre le Roy & luy, se mirent aux champs plusieurs des compagnies de l'ordonnance du Roy estans es garnisons d'Amiens, Beauuais, saint Quentin, & aultres lieux, iusques au nombre de quatre cens lances, & aultres populaires qui pareillement alerent courir sur lesdits Bourguignons, & iusques dedens les faulxbourgs d'Arras, où ils coucherent vne nuit entiere. Et illec au moyen de certaine grande quantité de vents, fleaulx & aultres ostils, dont les gens du Roy auoient mené grant nombre avec eulx en charrettes & chariots, fut batu tout le grain estant & trouué es granches dudit pays de Bourgongne & Picardie. Et

icelluy bestail, gens prisonniers, & vtencilles, fait amener & conduire par Sallezart & aultres Capitaines dedens lesdites villes d'Amiens & Beauuais. Durant le temps le Roy ne bouga de Paris, & y fist son Karefme, faisant grant chiere, & si trouua sain & bien disposé comme il disoit.

Audit temps de Mars, aduint à Paris que vng ieune fils de Brigandinier, qui auoit esté nourry en partie par vng poissonnier d'eauë douce de la dicte ville nommé Iehan Pensart, meu de mauuais couraige & trahison, sçaichant que ledit Pensart auoit grant argent qui estoit venu & yssy de la vente du poisson qu'il auoit vendu durant le Karefme, & dont il deuoit la plus part à plusieurs Seigneurs & aultres notables hommes qui luy auoient vendu le poisson de la peschede leurs estangs. Et le quel argent ledit brigandinier auoit veu, & le lieu où icelluy Pensart le mettoit, vint & entra de nuit en l'hostel dudit Pensart, & apres la minuit passée vint ouurir luys dudit Pensart à tout trois Escossois qu'il auoit illec fait venir pour auoir ledit argent & desrober ledit Pensart, dont l'vng desquels Escossois estoit nommé Mer, dit Lescuier, & l'vn des aultres Thomas le Clerc, lesquels Escossois par le moyen dudit brigandinier crocheterent, prindrent & emporterent ledit argent montant en somme deux mil cinq cens liures tournois. Et pour le quel recouurer fut fait bien grant diligence, tellement que ledit iour dudit desrobement fut ledit brigandinier trouué tenant franchise aux Carmes de la dicte ville de Paris, duquel lieu il fut tiré hors & apporté



porté au Chastellet de Paris, pource qu'au moyen des fers dont il estoit enfermé il ne pouoit aler. Et illec il confessa que lesdits Escossois auoient eu tout ledit argent, pourquoy fut fait grant diligence de le recouurer, & eust esté ledit Mortemer prins & fait amener audit Chastellet, par l'ordonnance de Maistre Phelipes du Fource, n'eussent esté deux aultres Escossois de la garde du Roy qui voudrent tuer ledit maistre Phelippes & ses sergens, & fist eschapper ledit Mortemer. Et depuis ledit Thomas le Clerc trouué tenant franchise dedens sainte Katherine du Val des Escolliers, qui illec fut prins à grant port d'armes qu'il fist contre les gens dudit monseigneur le Preuost de Paris, dont il blessa plusieurs, & à la fin apres qu'il eust receu plusieurs playes fut amené esdictes prisons, où il confessa ledit larcin, à cause dequoy fut renduë partie de ladicte somme qu'il auoit mussée près de saint Estienne des Grez. Et pour ledit cas & aultres, par mondit seigneur le Preuost de Paris, eu sur ce opinion & deliberation de saiges, fut condamné à estre pendu & estranglé au gibet de Paris, dont il appella. Et depuis fut ledit appel vuide par la Court de Parlement, & renuoyé audit monseigneur le Preuost pour executer la sentence, laquelle fut mise à execution le Ieudy seiziesme iour dudit mois de Mars l'an soixante & quatorze, pour veoir laquelle gent furent iusques audict gibet sire Denis Hesselin, maistre Iehan de Ruel, comme commis par maistre Pierre de Ladehors à l'exercice de l'office de Lieutenant Criminel, pour occasion de la maladie dudit de Ladehors.

Ec

Audit temps fut la ville de Parpignan mise & reduicte en l'obeyssance du Roy, & s'en alerent ceulx de dedens qui s'en voulurent aler, eulx & leurs biens saufs, fors que l'artillerie qui dedens estoit, qui demoura au Roy, laquelle estoit moult belle & de grant valeur.

Le septiesme iour du mois d'April l'an mil quatre cens soixante & quinze fut publiee à Paris l'alliance d'entre l'Empereur & le Roy, & de l'ordonnance du Roy fut enuoyé publier deuant le logis de monsieur du Mayne, Duc de Calabre & l'Ambassade de Bretagne, qui estoit en ladicte ville, & apres par les carrefours d'icelle ville. Audit mois d'April vint par deuers le Roy deux Ambassades, l'une de Fleurance & l'autre de l'Empereur d'Alemaigne, qui furent moult honorablement receuz & festiez, tant du Roy que des aultres seigneurs d'antour luy. Audit mois de May le Roy se partit de Paris pour aler à Vernon sur Seine, auquel lieu l'attendoient monsieur l'Admiral, & les aultres Capitaines, pour conclure de la guerre, & ce qui estoit à faire pour la treue qui faillloit le dernier iour dudit mois d'April, & puis s'en retourna à Paris, où il arriua le vendredy quatorziesme iour dudit mois. Et le lundy vingt-cinquiesme iour dudit mois d'April s'en partit le Roy pour aler à Pons sainte Maixance, pour illec preparer de son armee, & en emmena pour le conduire & estre autour de luy avecques les Gentilshommes, sa garde & officiers de son hostel, huit cens lances fournies, & y fut mené & conduicte grant quantité d'artillerie, grosse & menuë, entre lesquelles

y auoit cinq bombardes, dôt les quatre auoient nom: c'est assauoir l'une Londres, l'autre Brebant, & la tierce Bourgen Bresse, & la quarte saint Omer. Et outre & par dessus la compaignie desdits de la garde Escossoise & Françoisse, & aultres Gentils-hommes & Officiers de l'ostel y fut & y ala grande compaignie des nobles & francs archiers de France & Normandie, & pour l'auitaillement de l'ost y furent enuoyez viures de toutes pars.

Et le lundy premier iour de May le Roy se partit de l'Abbaye de la Victoire où il estoit, pour aller audit Pons sainte Maixance pour faire ses approuches, & ordonner de la guerre en ce qui estoit affaire sur les Bourguignons, & fut enuoyé deuant le Tronquoy & Mondidier. Et le mardy deuxiesme de May vint & arriua à Paris monsieur de Lyon qui venoit de deuers le Roy, lequel fut estably Lieutenant du Roy au Conseil de Paris. Et le mercredy troisieme iour dudit mois feste de sainte Croix fut faicte vne moult belle procession generale audit lieu de Paris de toutes les Eglises. En laquelle faisant furent tous les petits enfans de Paris, chascun tenant vng cierge, & fut alé querir le saint Innocent & porté à nostre Dame. Et en ladicte procession estoient monsieur de Lyon, monsieur le Chancelier de Coste luy, & apres aloient monsieur de Gaucourt Lieutenant du Roy à Paris, les Preuost des Marchans & Escheuins de ladicte ville, les Presidens & Conseillers de Parlement, Chambre des Comptes, & aultres officiers d'icelle ville. Et apres le populaire aloient en grant & merueilleux nombre, que on esti-

Ee ij

moit à cent mil personnes ou mieux, & fut porté ledit saint Innocent en ladicte procession par monsieur le premier President, & par Nanterre President en ladicte Court de Parlement, & le President des Comptes de Ladriescche, & le Preuost des Marchans. Et pour conduire & mettre ordre en ladicte procession y estoient les archiers de la ville, & aultres gens ordonnez pour garder de faire bruit & noise en icelle procession. Et le mardy second iour de May audit an, le Roy qui auoit enuoyé sommer les Bourguignons tenans ledit Tronquoy furent d'iceulx Bourguignōs tué ceulx qui estoient alez faire ladicte sommation. Et pour ceste cause fist tirer son artillerie contre ledit lieu du Tronquoy, tellement que ledit iour à cinq heures apres midy y fut liuré l'assault fort & aspre, & fut emporté ladicte place d'assault, & furent tuez & pendus tous ceulx qui furent trouuez dedens, sauf & reserué vng nommé Motin de Caulers, que le Roy fist sauuer, & si le fist Esleu de Paris extraordinaire. Mais auant qu'ils fussent prins firent grant resistance iceulx Bourguignons contre les gens du Roy, & tuerent audit assault le Capitaine de Ponthoise, qu'on disoit estre vaillant homme, & aultres gens de guerre & francs archiers, & puis fut ledit lieu abatu & demoly. Et ledit iour de sainte Croix s'en ala l'armee du Roy mettre le siege deuant Mondidier, pource qu'ils furent refusans d'eulx rendre au Roy. Et le vendredy cinquiesme iour dudit mois d'Apuril audit an fut mise & reduicte en la main du Roy ladicte ville de Mondidier, & s'en allerent ceulx de dedens leurs vies saulues, & laisserent

tous leurs biens , & puis fut toute ladiète ville abatuë.

Le samedi ensuiuant sixiesme iour de May fut pareillement renduë la ville de Roye , & s'en alerent les Bourguignons de dedens, vies & bagues faulues , & puis fut aussi rendu le Chasteau de Moreul , pareillement que ceulx de Roye. Et en faisant telles executions que dit est sur ledit de Bourgongne & son pays par l'armee du Roy qui estoit si noble , telle & si belle compaignie & artillerie, que là où elle eust esté mence y auoit gens assez pour en brief temps prendre & mettre en la main du Roy toutes les villes & places de Bourgongne, tant Flandres, Picardie, que aultres lieux, car tout fuyoit deuant iceulx. Et pour rompre icelle armee fut le Roy aduertty par aucuns, & mesinement de par monsieur le Connestable , que besoing luy estoit de garder sa Duchie de Normendie, pour les Anglois que on luy disoit qu'il y deuoit descendre : & si luy fut dit par mondit seigneur le Connestable, au moins fut mandé ou escript qu'il fist hardiment ledit voyaige en Normendie, & qu'il ne se souciaist point d'Abbeuille & Peronne, & que cependant qu'il yroit les feroit reduire en sa main. Et le Roy croyât ces choses s'en ala audit pays de Normendie, & là mena auecques luy monsieur l'Amiral & cinq cens lances, auec les nobles & francs archiers, & à ceste cause se departit l'armee & s'en ala chascun en son logis. Et puis quant le Roy fut en Normendie trouua qu'il n'estoit nulles nouuelles desdits Anglois, & ala à Harfieu, Dieppe, Caudebet & autres places. Et cependant ne se fist riens à l'auantage du Roy, mais au contraire au moyen de

E c iij

ladiète alce en Normendie firent lesdits Bourguignós de grans maulx aux subiects & pays du Roy, qui y eurent de grans pertes, & puis s'en vint le Roy à nostre Dame Descouys, en vng hostel près d'illec nommé Gaillart-Bois, appartenant à Colon Lieutenant de monsieur l'Amiral, où il se tint par aucun temps, durant lequel eut nouuelles de monsieur le Connestable, de la venue & descendue que faisoient lesdits Anglois à Calais. Et aussi que mondit seigneur de Bourgongne s'estoit leué de deuant Nux, dont il disoit qu'il auoit la possession, & fait son appointment avecques l'Empereur. Lequel Empereur avec ledit de Bourgongne s'en venoit faire faire guerre au Roy, desquelles choses n'estoit rien, & fust trouué tout le contraire estre vray.

Durant ces choses fut prins vng Herault d'Angleterre nommé Scales, qui auoit plusieurs lettres qu'on escripuoit de par le Roy Edouart à diuerfes personnes, lesquelles lettres le Roy vist, & dict & certifia au Roy ledit Scales, que les Anglois estoient descendus à Calais, & que le Roy Edouart y deuoit estre le vingt-deuxiesme iour de ce present mois de Iuing, à tout douze ou treize mil combatans. Et si luy certifia oultre que ledit de Bourgongne auoit fait son accord avec ledict Empereur, & estoit retourné à Brucelles, dont de tout il n'estoit rien. Audit lieu Descouys fut aussi le Roy aduertý que mondit seigneur le Connestable auoit enuoyé à monsieur de Bourbon son seellé, pour suborner & tant faire, que mondit seigneur de Bourbon voulsist deuenir & estre contre le Roy, & de soy alier avecques ledit Duc de Bourgongne, de toutes lesquel-

les choses le Roy fut moult merueillé. Et incontinent par plusieurs & diuers messaiges, fut mandé par le Roy mondit seigneur de Bourbon venir à luy, & en la fin l'enuoya querir par monfieur l'Euesque de Mande, par lequel ledit seigneur de Bourbon auoit enuoyé au Roy le feellé dudit monfieur le Conneftable, des choses deuant dictes.

Audit temps le Roy eut nouuelles de mondit seigneur de Bourbon comment les gentils-hommes de ses pays, frâcs-archiers & aultres que mondit seigneur auoit enuoyez faire guerre pour le Roy à la Duchie de Bourgongne, par laquelle guerre le Roy auoit commis mondit seigneur à son Lieutenant general qu'ils auoient trouué lesdicts Bourguignons à Guy pres de Chasteauchinon, & illec chargerent sur iceux, lesquels ils desconfirent & y en eut de prins, de mors & s'en fuyrent grant quantité, entre lesquels Bourguignons y fut deffait deux cens lances de Lombardie, dont la plus part y moururent, & si y mourut le seigneur de Couches & aultres seigneurs. Et y furent prins de la Comté de Rouffi Marefchal de Bourgongne, le sire de Longy, le Bailly d'Auxerre, le sire de Lille, l'Enseigne du seigneur de Beauchamp, le fils du Comte de sainct Martin, Messire Loys de Montmartin, Messire Iehan de Digoigne, le seigneur de Rugny, le seigneur de Chaligny, les deux fils de monfieur de Viteaulx, dont l'un estoit Comte de Ioigny, & aultres, & fut la dicte destrouffe ainsi faite le mardy xx. iour de Iuing.

Audit mois de Iuing nonobstant les lettres ainsi enuoyees par mondit seigneur le Conneftable au Roy,

le Roy eut nouuelles de l'Empereur qu'il auoit fait refreschir ceulx de ladicte ville de Nux, & d'icelle auoit mis hors tous les naurez & malades, & les auoit auitaillez pour vn an entier, & mis gens tous nouueaulx, & partant mist ledit de Bourgongne à sa croix de pardieu, & que auecques ce auoit gaignee grant quantité de son artillerie, sa vaisselle d'argent & aultres bagues. Audit temps de Iuing le mardy xxvij. monsieur l'Admiral & ceulx de sa cōpaignie qui auoient esté ordonnez de par le Roy à faire le gast en Picardie & Flâdres, & de mettre à feu & à sang tout ce qu'ils trouueroient esdicts pays, vint ledit iour mettre ses embusches pres de la ville d'Arras. Et icelles mises enuoya enuiron quarante lances courir deuant ladite ville d'Arras, lesquels d'Arras cuidans desconfire lesdictes lances firent sur eulx grans saillies qui vindrent asprement courir sus ausdictes quarante lances, lesquelles se vindrent rendre esdictes embusches. Et apres eulx lesdits de Arras, tous lesquels furent enclos par ceulx desdites embusches, qui sur eulx chargerent & les mirent en fuite, & en fuyant y en eut de tuez de quatorze à quinze cens hommes, & y fut tué le cheual du sire de Romont fils de Sauoye & frere de la Royne, mais il se sauua. Le Gouverneur d'Arras nommé Iacques de S. Pol, & plusieurs aultres seigneurs & gens de nom y furent prins, que mondit seigneur l'Admiral mena deuant icelle ville pour les sommer de eulx rendre es mains du Roy leur souuerain seigneur, ou autrement qu'il feroit coupper les cols ausdits seigneurs prisonniers. Audit mois de Iuing le Roy qui auoit à son prisonnier



sonnier le Prince d'Orenge seigneur de Aerlay, & qui estoit à trente mil escus de finance, le deliura & donna ladicte finance, & en ce faisant deuint homme lige du Roy, & luy fist hommaige de ladicte Principaulté d'Orenge. Et partant le Roy le renuoya à ses despens en ses pays, & luy donna & oëtroya telle preeminence, qui se peult nommer par la grace de Dieu, puissance de faire monnoye d'or & d'argent de bon aloi, aussi bon que la monnoye du Daulphiné, donner aussi toutes graces, remissions & pardons, reserué de l'heresie & de crime de leze Majesté. Et si donna le Roy dix mil escus contens au seigneur qui auoit prins ledit Prince.

Audit mois de Iuing le Roy enuoya ses lettres patentes à Paris, par lesquelles il fist publier que les Anglois estoient descendus à Calais, & que pour resister il mandoit au Preuost de Paris de contraindre tous les nobles & non nobles, tenans fief & arrierefief, pour estre prest le lundy treiziesme iour de Iuillet, entre Paris & le bois de Vinciennes, pour d'illec partir & aler ou ordonné leur seroit, & nonobstant le preuilege & pour ceste fois seulement. En ensuiuant lequel cry furent enuoyez par ceulx de Paris plusieurs gens en armes, montez & habillez par deuers monditz seigneur le Preuost de Paris au pays de Soixonnois. Au mois de Iuillet ensuiuant le Roy qui seiourna en Normendie par aucun temps s'en retourna à Nostre Dame Descouys & à Gaillart-Bois près d'illec, ou aussi il seiourna vne piece, & puis s'en partit pour aler à nostre Dame de la Victoire, ou il fut aussi vne autre espace de temps,

F f

& puis s'en ala à Beauuais. Audit mois ledit Duc de Bourgongne qui auoit esté deuant la ville de Nux par l'espace de douze mois, s'en partit & s'en ala de nuict & honteusement de deuant icelle ville sans l'auoir peu conquerir, qui luy vint à moult grant blasme, & perte de gens & biens. Et puis s'en reuint à ses pays, où il trouua son frere le Roy Edouart d'Angleterre qu'il y auoit fait descendre, pour en continuant son mal & malice de rechief faire guerre au Roy & à ses pays & subiects. Audit temps se fist de grandes batteries & destructions de pays & terres dudit de Bourgongne, & y eut plusieurs villes, bourgs & villaiges ars & destruis. Et audit temps fut mandé par le Roy venir à luy monseigneur le Duc de Bourbon, qui auant qu'il y vint eut plusieurs lettres & messaiges, & puis vint par deuers le Roy, luy estant à Nostre Dame de la Victoire, & arriua en la ville de Paris mondit seigneur de Bourbon au mois d'Aoust, à moult belle & honnestre compagnie de nobles hommes, & bien fort triumpfans, & auoit bien avecques luy de sa compagnie cinq cens cheualx. Et s'en partit ledit Duc de Bourbon de ladite ville de Paris pour aler par deuers le Roy, le lundy quatorziesme iour d'Aoust, & fut vng peu d'espace de temps avecques le Roy, & puis s'en partit de Senlis pour aler à Cleremont.

Audit mois d'Aoust le Roy eut Ambassades de par le Roy d'Angleterre, qu'il s'estoit venu loger à Lyhons en SanTERS, qui communiquerent avecques le Roy d'aucunes matieres, avecques lequel pour parlér le Roy enuoya à Paris monseigneur le Chancelier, messei-

gneurs les gens des finances & aultres, pour auoir prest d'argent de ceulx de ladite ville, ausquels fut fait promesse & obligation de leur restituer leur prest dedens le iour de Toussaincts. Et fut presté de ladicte ville soixante & quinze mil escus d'or, qui furent baillee ausdits Anglois au moyen de certain traicté fait avecques eulx. Et si fut enuoyé au Roy grant quantité de gens en armes de par ladicte ville, montez & habillez aux gaiges & despens des officiers & aultres habitans de ladicte ville.

Audit mois d'Aoust le mardy vingt-neufiesme iour dudit mois, le Roy se partit d'Amiens, & aussi messeigneurs de Bourbon, de Lyon, & aultres nobles hommes, Capitaines, gens d'armes, officiers, & aultres gens, en moult grant & merueilleux nombre, que bien on estimoit estre cent mil cheuaulx, pour tous aler à Piquigny. Auquel lieu le Roy Edouart d'Angleterre vint parler au Roy, & en emmena avecques luy son avant-garde & arriere-garde, & demoura en bataille près dudit Piquigny. Et dessus le pont dudit Piquigny le Roy auoit fait dresser deux appentis de bois, l'vng deuant l'autre, dont l'vng estoit fait pour le Roy, & l'autre pour le Roy d'Angleterre. Et entre les deux appentis y auoit vne cloison de bois, dont la moitié par le hault estoit treillissée, tellement que chascun des deux Rois pouoient mettre leur bras par dedens ledit treillis. Et en l'un desdits appentis vint & arriua le Roy tout le premier, & incontinent qu'il y fut arriué s'en partit vng Baron d'Angleterre illec attendant la venue du Roy, qui ala dire au Roy d'Angleterre que le

Ff ij

Roy estoit ainfi arriué: lequel Roy d'Angleterre qui estoit en son parc loing d'une bonne lieue dudit Piquigny, accompagné de vingt mil Anglois, bien artilliez dedens sondit parc, s'en vint incontinent audit lieu de Piquigny, audit apprentis qui luy estoit appareillié. Et amena avecques luy pour l'attendre au ioignant d'icelluy apprentis, vingt-deux lances de sa compagnie, qui illec furent & demourerent dedens l'eauë à costé dudit pont, par tout le temps que le Roy & le dit Roy d'Angleterre furent & demourerent en icelluy apprentis. Durant lequel temps vint vne moult grande & merueilleuse pluye, qui fist moult de mal & perte aux seigneurs & Gentils-hommes du Roy, à cause des belles houffures & nobles habillemens qu'ils auoient preparez pour la venue dudit Roy Edouart d'Angleterre. Et lequel Roy d'Angleterre quant il vit & apperceut le Roy il se getta à vng genoil à terre, & depuis par deux fois se y getta avant que arriuer au Roy, lequel le receut benignement, & le fist leuer, & parlerent bien vng quart d'eure ensemble és presences de mesdits seigneurs de Bourbon, de Lyon, & aultres seigneurs & gens des finances, que le Roy auoit faict illec venir iusques au nombre de cent. Et apres ce qu'ils eurent parlé ensemble en general, le Roy fist tout reculler & parlerent à priuce ensemble, ou aussi ils furent & demourerent vne espace de temps. Et au departement fut publié que l'appoinctement estoit fait entre eulx tel qu'il s'en suit: c'est assauoir que treues estoient accordees entre eulx pour le temps de sept ans, qui commencerent ledit xxix. iour d'Aoust, l'an soixante &

quinze, & finieroient à pareil & semblable iour qui seroit mil quatre cents quatre vingts & deux. Laquelle treue seroit marchande, & pourroient aler & venir lesdits Anglois par tout le Royaulme, armez & non armez, pourueu qu'ils ne seroient en armes en vne compaignie plus de cent hommes. Et fut publicce ladicte treue à Paris, auenuës, & aultres lieux du Roy-aume de France. Et puis fut baillé audit Roy d'Angleterre soixante & quinze mil escus d'or, & si fist le Roy d'aultres dons particuliers à aucuns seigneurs d'autour dudit Edouart, & aux Heralx & trompettes de ladicte compaignie, qui en firent grant feste & bruit, en criant à haulte voix, largesse au tres-noble & puissant Roy de France, largesse, largesse. Et si promist encores audit Roy Edouart luy payer & donner par chascune desdites anneés cinquante mil escus, & si festoya bien fort le Duc de Clairance frere dudit Roy d'Angleterre, & luy donna de beaulx dons. Et puis le Roy Edouart retira tous ses Anglois qu'il auoit, tant de son ost que aultres qu'il auoit enuoyez à Abbeuille, Peronne & ailleurs, & fist trousser & baguer tout son bagage, & s'en retourna à Calais pour passer la mer & s'en aler en son Royaulme d'Angleterre. Et le conuoya iusques audit lieu de Calais maistre Helberge Euesque d'Eureux, & si laissa ledit Edouart au Roy deux Barons d'Angleterre, l'un nommé le seigneur de Hauart, & l'autre le grant Escuyer d'Angleterre, iusques à ce que le Roy eust eu aucune chose que ledit Edouart luy deuoit enuoyer du Royaulme d'Angleterre, & lesquels de Hauart & grant Escuyer estoient fort amis &

Ff iij

en la grace dudit Edouart, & qui auoient esté moyen de faire ladicte paix, treues, & autres traictiez entre iceulx Rois. Et furent iceulx Hauart & grant Escuyer fort festiez à Paris, & puis le Roy, mesdits seigneurs de Bourbon, Lyon, & aultres seigneurs qui estoient à Amiens, s'en retournerent à Senlis, où ils furent vne espace de temps. Et ordonna le Roy gens de sa maison pour mener & conduire lesdits de Hauart & Escuyer parmy la ville de Paris & aultres lieux, & entre aultres y ordonna & bailla la charge à sire Denis Hesselin son maistre d'Hostel & Esleu de Paris, qui en fist bien son debuoir, à l'honneur & loüange du Roy, & demourerent en ladicte ylle par l'espace de huit iours entiers, où ils furent bien fort festiez & menez iouer au bois de Vinciennes & ailleurs. Et entre aultres choses furent bien fort festiez aux Tournelles, en l'ostel du Roy, & pour ce faire leur fut enuoyé pour les honnestement entretenir, plusieurs Dames, Damoiselles & bourgoises, & puis s'en retournerent lesdits de Hauart & Escuyer par deuers le Roy, qui estoit à la Victoire près Senlis. Et audit mois le Roy qui estoit audit lieu de la Victoire, s'en ala vers le pays de Soixonnois, & à nostre Dame de Liece. En ce voyage print & reduisit en ses mains la ville de Saint Quentin que monseigneur le Cónestable auoit prinse sur luy, & bouté hors ceulx à qui le Roy en auoit baillé la charge, ainsi que dit est deuant. Et par auant ledict Cónestable s'en estoit alé, & en l'obeissance dudit de Bourgongne. Et après qui pis estoit auoit escript & mädé au Roy Edouart d'Angleterre apres le traicté par luy fait auecques le Roy, &

qu'il estoit retourné à Calais pour passer la mer, & retourner en Angleterre, qu'il estoit vng lasche deshonnouré & poure Roy d'auoir fait ledict traictié avecques le Roy sous vmbre des promesses qu'il luy auoit faictes, dont il ne luy tiendrait rien, & qu'en fin s'en trouueroit deceu. Lesquelles lettres ainsi audict Roy Edouart escriptes par ledit Conestable, il enuoya dudit lieu de Calais au Roy, lequel apparceut que ledict Conestable n'estoit point feal comme estre deuoit. Et puis fut donné congié par le Roy audit de Hauart & grant Escuier d'eux en retourner audit Royaume d'Angleterre, & leur fut donné de beaulx dons, tant en or qu'en vaisselle d'or & d'argent, & si fist le Roy publier à Paris qu'on leur laissast prendre des vins au pays de France, tant que bon leur sembleroit pour mener en Angleterre, en les payant.

Audit mois d'Octobre le Roy qui estoit à Verdun & aultres places enuiron la Duché de Lorraine, retourna à Senlis & à la Victoire, & y vindrent les Ambassadeurs de Bretagne qui firent la paix entre le Roy & ledit Duc de Bretagne, qui renonça à toutes aliances & scelez qu'il auoit fait & baillez contre le Roy. Et pareillement ledit monseigneur de Bourgongne print & accepta treues marchandes avecques le Roy, pareillement que la treue des Anglois.

Et le lundy seiziesme iour dudit mois d'Octobre audit an mil quatre cens soixante & quinze, fut publiee solempnellement au son de deux trompettes, & par les carrefours de ladicte ville de Paris ladicte treue marchande d'entre le Roy & mondit seigneur de

Bourgongne , pour le temps & terme de neuf ans, commençans le quatorziesme iour de Septembre audit an, & finissans à semblable iour l'an mil quatre cens quatre vingts & quatre. Par laquelle toute marchandise deuoit auoir cours par tout le Royaume de France, & ce temps durant chascun pouoit retourner en ses possessions immeubles. Et puis le Roy s'en retourna à sainct Denis, & puis à Saugny près Montlehery, & de là au bois de Males-herbes, & en apres à Orleans, à Tours, & à Amboise. Et le lundy vingtiesme iour de Nouembre audit an soixante & quinze, fut mené escarteller aux Halles de Paris par Arrest de la Court de Parlement, vng Gentil-homme natif de Poictou, nommé Regnault de Veloux, & fort familier de monseigneur du Maine, pour occasion de ce que ledit Regnault auoit fait plusieurs voyages par deuers diuers seigneurs de ce Royaulme, & conseillié de faire plusieurs traictiez, & porté plusieurs selles contre & au preiudice du Roy, du Royaulme, & de la chose publique. Et fut ledit Regnault par l'ordonnance de la dicte Court fort secouru pour le fait de son ame & conscience : car il luy fut baillé le Curé de la Magdeleine Penitancier de Paris, & moult notable Clerc, Docteur en Theologie, & deux grans Clercs de l'ordre des Cordeliers, & furent pendus ses membres aux quatre portes de Paris, & le corps au gibet.

Et pour ce que par le Roy d'une part & ses Ambassadeurs pour luy, & les Ambassadeurs de monseigneur le Duc de Bourgongne, au mois d'Octobre qui estoit passé dernier, en faisant par eulx la treue de neuf ans

entre



entre eulx deulx, dont est faicte mention, deuant auoit esté promis de par mondit seigneur le Duc de Bourgongne de mettre & liurer és mains des gens & Ambassadeurs du Roy ledit Connestable de France nommé monseigneur Loys de Luxembourg. Fut par ledit Duc de Bourgongne baillé & liuré ledit Connestable és mains de monseigneur l'Admiral bastart de Bourbon, de monseigneur de saint Pierre, de monseigneur de Boucaige, de maistre Guillaume de Cerisay, & aultres plusieurs. Et par tous les dessus nommez en fut mené prisonnier en la ville de Paris, & mené par dehors les murs d'icelle du costé des champs, à l'entree de la Bastille saint Anthoine. Laquelle entree ne fut point trouuee ouuerte, & pource fut ordonné & amené ledit monseigneur le Connestable passer parmy la porte saint Anthoine au dedens de ladicte ville, & mis en ladicte Bastille. Et estoit ledit monseigneur le Connestable vestu & habillé d'une cappe de camelot doublee de veloux noir, dedens laquelle il estoit fort embrunché, & estoit monté sur vng petit cheual à cours crains fort veluës. Et audit estat apres ce qu'il fut descendu audit lieu de la Bastille, trouua illec monseigneur le Chancelier, le premier President, & les aultres Presidens en la Court de Parlement, & plusieurs Conseillers d'icelle Court. Et aussi y estoit sire Denis Hesselin Maistre d'ostel du Roy nostre Sire, qui tous illec le receurent, & apres s'en departirent, & le laisserent en la garde de Phelippe Luillier, Capitaine dudit lieu de la Bastille. Et auquel lieu de la Bastille ledict monseigneur l'Admiral present mondit seigneur le

Gg

Connestable, ausdits Chancellier, Presidens & aultres dessus nommez, profera & dist telles ou semblables parolles, en effect & substance: Messeigneurs qui cy estes tous presens, vuez cy monseigneur de saint Pol, lequel le Roy m'auoit chargé d'aler querir par deuers monseigneur le Duc de Bourgongne, qui luy auoit promis le luy faire bailler, en faisant avecques le Roy son dernier appointment de la treue d'entre eulx. En fournissant à laquelle promesse le me a faict bailler & deliurer, pour & au nom du Roy. Et depuis l'ay bien gardé iusques que ie le mets & baille en vos mains, pour luy faire son procez le plus diligemment que faire le pourrez: car ainsi m'a chargé le Roy de le vous dire, & à tant s'en partit ledit monseigneur l'Admiral dudit lieu de la Bastille. Et apres que ledit Connestable eut ainsi laissé es mains des dessus nommez, monseigneur le Chancellier, premier & second Presidens de Parlement, & aultres notables & faiges personnes, en bien grant nombre, à faire ledit procez vacquerent & entendirent à bien grant diligence & sollicitude à faire ledit procez, & en faisant icelluy interrogerent ledit seigneur de S. Pol sur les charges & crimes à luy mis sus & imposez, ausquels interrogatoires il respôdit de bouche sur aucuns points, lesquels interrogatoires & cōfessions furēt mis au net, & enuoyez deuers le Roy.

Et le lundy quatriesme iour de Decembre audit an soixante & quinze, aduint que vng Herault du Roy nommé Montjoye, natif du pays de Picardie, & qui faisoit la pluspart de sa residence avecques ledit seigneur de saint Pol, luy estant Connestable, vint &

arriua luy & vng sien fils en la ville de Paris, par deuers maistre Iehan de Ladriesche President des Comptes & Tresorier de France, natif du pays de Brebant, pour luy apporter lettres de par le Conte de Merle, sa femme & enfans, affin de secourir & aider par luy en ce que possible luy seroit audit Connestable pere dudit Conte de Merle: lesquelles lettres ledit maistre Iehan de Ladriesche ne voulut pas receuoir d'icelluy Herault, sinon en la presence de monseigneur le Chancelier, & des gens du Conseil du Roy. Et à ceste cause ledit maistre Iehan de Ladriesche mena & conduisit ledit Herault iusques au logis dudit monseigneur le Chancelier, affin que par luy lesdictes lettres feussent veuës, & ce que dedens y estoit contenu: mais pource que ledit Iehan de Ladriesche demoura longuement au Conseil avecques icelluy monseigneur le Chancelier & autres, ledit Montjoye & son fils s'en retournerent en leur logis, & illec monterent incontinent à cheual & s'en alerent au giste à Bourgel. Combien que à leur partement ils dirent à leur hoste que se aucun les demandoit, qu'il dist qu'ils s'en estoient alez au giste au bourg la Roync. Et quant ledit de Ladriesche cuida trouuer ledit Herault pour auoir lesdictes lettres, ne le trouua point, pourquoy fut hastiuemēt enuoyé apres ledit Herault iusques au bourg la Roync, où il ne fut point trouué: mais fut trouué par deux archiers de la ville de Paris audit lieu de Bourgel, & par eulx ramené le Dimenche tiers iour de Decembre audit an, lequel fut mené & conduit iusques en l'ostel d'icelle ville, & illec deuant les gens & Conseil à ce ordonnez, fut le-

dit Montjoye & foudit fils, chascun à part interrogué, & furent leurs depofitions redigees & mifes par efcrit par le sire Denis Heffelin. Et apres ce furent lefdits Montjoye & foudit fils mis & laiffez en la garde de Denis Baudart, archier de ladite ville & en fon hoftel, auquel il fut & demoura par l'efpace de vintg-cinq iours, & illec bien & diligemment gardé avec foudit fils, par trois des archiers de ladiète ville.

Audit temps au commencement du mois de Decembre, fut amené le Conte de Rouffi qui prifonnier eftoit dedens la groffe tour de Bourges, iufques au Pleffis du parc, autrement dit le Montils lez Tours, où le Roy eftoit. Et illec fut parlé à luy, & luy fift plufieurs grans remonftrances des grandes folies efquelles par long temps il eftoit entremis, & comment il auoit du Roy durant ce qu'il auoit esté & soy porté fon enemy, & fait plufieurs grans & enormes mauux à fes villes, pays & fubgects, comme Marefchal de Bourgongne pour le Duc. Et comment villainement & honteufement il auoit esté prins prifonnier par les gens de guerre du Roy, qui pour luy eftoient en armes audit pays de Bourgongne fous la charge de monfeigneur le Duc de Bourbonnois.

Et par ledit de Rouffi baillee fa foy au feigneur de Combronde, & comment il auoit achaté de mondit feigneur le Duc vingt & deux mil efcus d'or. Et luy fift le Roy de grans paours & effrois, dôt ledit feigneur de Rouffi cuida auoir froide ioye de fa peau: mais en conclusion le Roy le mift à quarante mil efcus de rançon, & luy fut par luy donné terme de les trouuer & rap-

porter deuers le Roy dedens deux mois apres ensui-  
uans, pour tous termes & delais, & que aultrement &  
ou il y auroit faulte dedens ledit terme, qu'il feust as-  
seuré qu'il mourroit. Et depuis ces choses fut procedé  
par toute diligence à faire le procez dudit Connesta-  
ble, par mesdits seigneur le Chancelier, Presidens &  
Conseillers Clers & Lais de la Court de Parlement,  
desdits de saint Pierre & aultres, à ce faire ordonnez  
& appelez.

Lequel procez veu fut par eulx conclud, tellement  
que le mardy dix-neufiesme iour de Decembre audict  
an mil quatre cens septante cinq, fut ordonné que le-  
dit Connestable seroit mis & tiré hors de sa prison &  
amené en la Court de Parlement, pour luy dire & de-  
clarer le dictum donné & conclud alencontre de luy,  
par icelle Court de Parlement, & fut à luy ledit iour de  
mardy en la chambre & logis d'iceluy Connestable en  
ladiète Bastille saint Anthoine, où il estoit prison-  
nier, ledit monseigneur de saint Pierre qui de luy  
auoit la garde & charge : Lequel en entrant en la  
chambre luy fut par luy dit, Monseigneur que faiçtes  
vous, dormez vous, lequel Connestable luy respon-  
dit, nenny, long temps a que ne dormy : mais suis icy  
ou me voyez pensant & fantasiant. Auquel de saint  
Pierre dist qu'il estoit necessité qu'il se leuaist pour ve-  
nir en ladiète Court de Parlement, par deuant les sei-  
gneurs d'icelle Court, pour luy dire par eulx aucunes  
choses qu'ils luy auoient à dire touchant son faiçt &  
expedition, ce que bonnement ne pouuoit mieulx  
faire en ladiète Court: En luy disant aussi par ledit de

sainct Pierre qu'il auoit esté ordonné que avecques luy & pour l'accompaigner y feroit & viendrait monseigneur Robert Destouteuille, Cheualier Preuost de Paris, dont de ce ledit Conestable fut vng peu espouuenté, pour deux causes que lors il declaira. La premiere, pour ce qu'il cuidoit que on le vouldist mettre hors de la possession dudit Phelippe Luillier, Capitaine d'icelle Bastille, avecques lequel il s'estoit bien trouué, & l'auoit fort agreable, pour le mettre es mains dudit Destouteuille qu'il reputoit estre son ennemy, & que s'il y estoit doutoit qu'il luy fist desplaisir, & aussi qu'il craignoit le populaire de Paris, & de passer parmy eux. A toutes lesquelles doubtes ainsi faictes par ledit Conestable, luy fut solu & dit par ledit seigneur de S. Pierre que ce n'estoit point pour luy changer son logeis, & qu'il le meneroit seulement audit lieu du Palais, sans luy faire aucun mal, & à tant s'en partit dudit lieu de la Bastille, monta à cheual & ala iusques audit Palais, tousiours au milieu desdits Destouteuille & de sainct Pierre, qui le firent descendre aux degrez deuant la porte aux Merciers d'icelle Court de Parlement. Et en montant esdits degrez trouua illec le seigneur de Gaucourt & Hesselin, qui le saluerent & luy firent le bien venant, & icelluy Conestable leur rendit leur salut. Et puis apres qu'il fut monté le menerent iusques en la tour criminelle dudit Parlement, où il trouua monseigneur le Chancelier qui à luy s'adressa, en luy disant telles paroles, Monseigneur de sainct Pol vous auez esté par cy-deuant & iusques à present tenu & réputé le plus saige & le plus constant Cheualier de ce Royau-

me, & puis doncques que tel auez esté iusques à maintenant, il est encores mieulx requis que iamais que ayez meilleure constance que oncques vous n'eustes, & puis luy dist monseigneur il fault que vous ostiez d'autour de vostre coll'ordre du Roy, que y auez mise. A quoy respondit ledit de S.<sup>t</sup> Pol, que volentiers il le feroit. Et de fait mist la main pour la cuider oster: mais elle tenoit par derriere à vne espingle, & pria audit de saint Pierre qu'il luy aidast à l'auoir, ce qu'il fist, & icelle baïsa & bailla audit monseigneur le Chancelier, & puis luy demanda ledit monseigneur le Chancelier ou estoit son espee que baillée luy auoit esté en le faisant Connestable. Lequel respondit qu'il ne l'auoit point, & que quant il fut mis en arrest que tout luy fut osté, & qu'il n'auoit riens auecques luy aultrement qu'ainfi qu'il estoit quant il fut amené prisonnier en ladicte bastille, dont par mondit seigneur le Chancelier fut tenu pour excusé. Et a tant se departit mondit seigneur le Chancelier, & tout incontinent apres y vint & arriva maître Jehan de Ponpaincourt President en ladite Court, qui luy dist aultres parolles telles que s'ensuiuent. Monseigneur vous sçauiez que par l'ordonnance du Roy vous auez esté constitué prisonnier en la bastille saint Anthoine, pour raison de plusieurs cas & crimes à vous mis sus & imposez. Aufquelles charges auez respondu & esté ouy en tout ce que vous auez voulu dire, & sur tout auez baillé vos excusations; & tout veu à grant & meure deliberation, Je vous dis & declare, & par Arrest d'icelle Court, que vous auez esté crimineux de crime de leze Majesté, & comme tel

estes condemné par icelle Court à souffrir mort dedens le iourd'huy, c'est à sçauoir, que vous serez decapité deuant l'ostel de ceste ville de Paris, & toutes vos seigneuries, reuenues, & aultres heritages & biens de claires acquis & confisquez au Roy nostre Sire, duquel dictum & sentence il se trouua fort perpleux, & non sans cause, car il ne cuidoit point que le Roy ne sa iustice le deussent faire mourir. Et dist alors & respondit, Ha, à Dieu soit loué, veez cy bien dure sentence, le luy supplie & requiert qu'il me dône grace de bien le congnostre au iourd'huy. Et si dist oultre à monsieur de S. Pierre! Ha, a monsieur de S. Pierre, ce n'est pas cy ce que m'aués tousiours dit, & a tant se retrahit. Et lors ledit monsieur de S. Pol fut mis & baillé es mains de quatre Docteurs en Theologie, dont l'vng estoit Cordelier nommé maistre Iehan de Sordun, l'autre Augustin, le tiers Penitencier de Paris, & le quart estoit nommé maistre Iehan Huë Curé de S. Andry des Ars, Doyen de la faculté de Theologie audiect lieu de Paris, auxquels & à mondit seigneur le Chancelier, il requist qu'on luy baillast le corps de nostre Seigneur, ce qui ne luy fut point accordé, mais luy fut fait chanter vne Messe deuant luy, dont il se contenta assés. Et icelle dicte luy fut baillé de l'eau benoiste & du pain benoist dont il menga, mais il ne bust point lors depuis, & ce fait demoura avec lesdicts Confesseurs iusques à entre vne & deux heures apres midy dudit iour qu'il descendit dudit Palais & remonta à cheual pour aler en l'ostel de ladicte ville, où estoient faits plusieurs eschafaulx pour son execution. Et avecques luy y estoient le



le Greffier de ladicte Court, & Huissiers d'icelle. Et audit hostel de la ville descendit & fut mené au Bureau dudit lieu, contre lequel y auoit vn grant eschaffault drecié, & au ioingnant d'icelluy on venoit par vne alee de bois à vng aultre petit eschaffault, là où il fut executé. Et en icelluy bureau fut illec avec feldits Confesseurs faisant de grans & piteux regrets, & y fist vng testament tel quel, & sous le bon plaisir du Roy, que ledit sire Denis Hesselin escripuit sous luy. En faisant lesquelles choses il demoura audit bureau iusques à trois heures dudit iour, qu'il yrist hors d'icelluy bureau, & s'en vint getter au bout dudit petit eschaffault & mettre la face, les deux genoils flechis deuant l'Eglise nostre Dame de Paris, pour y faire son oroison, laquelle il tint assez longue en douloureux pleur & grant contrition, & tousiours la croix deuant ses yeux, que luy tenoit maistre Iehan Sordun, laquelle souuent il baisoit en bien grant reuerence, & moult piteusement plourant. Et apres ladicte oroison ainsi faicte, & qu'il se fut leué debout, vint à luy vng nommé petit Iehan fils de Henry Cousin, lors maistre executeur de la haulte Iustice, qui apporta vne moyenne corde dont il lia les mains dudit de saint Pol; ce qu'il souffrit bien benignement. Et en apres le mena ledit petit Iehan & fist monter dessus ledit petit eschaffault, dessus lequel il se arresta & tourna le visaije par deuers ledit Chancelier de Gaucourt Preuost de Paris, seigneur de S. Pierre Greffier Ciuil de ladicte Court, dudit sire Denis Hesselin, & autres Officiers du Roy nostre sire, estans illec en bien grant nombre, en leur criant mercy pour

H h

le Roy, & leur requerant qu'ils eussent son ame pour recommandee. Non pas comme il leur dist qu'il n'entendoit pas qu'il leur coustast riens du leur. Et aussi se retourna au peuple estant du cousté du sainct Esperit, en leur suppliant aussi de prier pour son ame, & puis s'en ala mettre à deux genoulx dessus vng petit carreau de laine aux armes de ladicte ville, qu'il mist à point & le remua de l'vng de ses pieds, où il fut illec diligemment bandé par les yeulx par ledit petit Iehan, tousiours parlant à Dieu & à seldits confesseurs, & souuent baissant ladicte croix. Et incontinent ledit petit Iehan faist son espee que sondit pere luy bailla, dont il fist voller la teste de dessus les espaules, si tost & si transiuelement que son corps cheyt à terre aussi tost que la teste, laquelle teste incontinent apres fut prise par les cheueulx par icelluy petit Iehan, & mise lauer en vng seau d'eau estés prés d'illec, & puis mise sur les appuyes dudit petit eschaffault & monstre aux regardans ladicte execution, qui estoient bien deux cens mil personnes & mieulx. Et apres ladicte execution ainsi faicte ledit corps mort fut despoüillé & mis avec ladicte teste, tout enseuely dedens vng beau drap de lin, & puis boucé dedens vng cercueil de bois, que ledit sire Denis Hesselin auoit fait faire. Et le quel corps ainsi enseuely, que dit est, fut venu querir par l'ordre des Cordeliers de Paris, & sur leurs espaules l'emporterent inhumer en leur Eglise. Et ausquels Cordeliers ledit Hesselin fist bailler quarante torches pour faire le conuoy dudit corps, apres lequel il fut & le conuoya iusques audit lieu des Cordeliers, & le landemain y fist aussi

faire vng beau seruice en ladicte Eglise, & aussi en fut fait seruice à sainct Iehan en Greue, là où aussi sa fosse auoit esté faicte cuidant que on luy deust enterrer, & y eut esté mis ce n'eust esté que ledit Sordun dist à icelluy de sainct Pol, que en leurdicte Eglise y auoit enterree vne Contesse de sainct Pol, & qu'il deuoit mieux vouloir y estre enterré que en nulle aultre part, dont icelluy de sainct Pol fut bien content, & pria à ses Iuges que sondit corps feust porté ausdits Cordelliers. Et est vray que apres ladicte sentence ainsi declairee appert audit deffunct de sainct Pol que dit est, fut tout son procez bien au long declairé au grant parc de ladicte Court, & à huis ouuers. Auquel procez fut dict & declairé de moult merueilleux & enormes cas & crimes auoir esté faits & perpetrez par ledit de sainct Pol, & en iceulx maux soy estre entretenu, continué & maintenu par long temps, & par diuerfes fois. Et entre les aultres choses fut dit & recité comment lesdits de Bourgongne & de sainct Pol auoient enuoyé de la partie d'icelluy de Bourgongne, messire Phelippe Bouton, & messire Phelippe Pot Cheualiers, & de la partie dudit Connestable Hector de l'Escluse par deuers monsieur le Duc de Bourbon, affin de esmouuoir mondit seigneur de Bourbon de soy esleuer & estre contre le Roy, & soy departir de sa bonne loyauté, ausquels fut dit pour ledit seigneur par la bouche du seigneur de Fleurac son Chambellan, qu'ils s'abusoient, & que ledit seigneur aimeroit mieulx mourir que d'estre contre le Roy, & n'en eurent plus pour ceste fois. Et que depuis ce ledit de l'Escluse y retourna

H h ij

de rechief, qui dist audit monseigneur de Bourbon que ledit Connestable luy mândoit par luy, que les Anglois descendroient en France, & que sans difficulté à l'aide dudit Connestable ils auroient & emporteroient tout le Royaulme de France. Et que pour escheuer sa perdition & de ses villes & pays, ledit seigneur de Bourbon voulsist estre & soy alier avec ledit de Bourgogne, & luy dist en ce faisant que luy en viédroit de grant prouffit. Et où il ne voudroit faire que bien luy en conuenist, que s'il luy en prenoit mal, qu'il ne feroit pas à plaindre. Lequel mondit seigneur de Bourbon dist & respondit audit de l'Escluse qu'il n'en feroit riens, & qu'il aimeroit miculx estre mort & auoir perdu son vaillant, & deuenir en aussi grant captiuité & poureté que oncques fut Iob, que de consentir faire, ne estre fait, quelque chose que ce feust, au dommage, au preiudice du Roy, & à tant s'en retourna ledict Hector sans aultre chose faire. Et par auant ces choses mondict seigneur de Bourbon enuoya au Roy lesdictes lettres de seellé dudit Connestable, par lesquelles apparoit la grande trahison dudit Connestable, & plusieurs aultres grans cas, trahisons, & mauuaitiez que auoit confessees à fondit procès ledit Connestable bien au long declairees en iceluy procès que ie laisse icy pour cause de briefueté. Et si est verité que ledit Cónestable apres ce qu'il eut esté cōfessé & qu'il vouloit venir audit eschafaut, dist & declaira à seldits Cōfesseurs qu'il auoit dedens son pourpoing soixante dix demy escus d'or qu'il tira hors d'iceluy, en priant audit Cordelier qu'il les

donnaſt & distribuſt pour Dieu, & en aulmoſne pour ſon ame & en ſa conſcience, lequel Cordelier luy diſt qu'ils ſeroient bien emploiez aux pources enfans Nouices de leur maiſon, & autant luy en diſt ledict Confeſſeur Auguſtin. des enfans de leur maiſon. Et pour tous les appaiſer diſt & reſpōdit icelluy deſſunct Conneſtable à leſdits Confeſſeurs qu'il prioit à tous leſdits quatre Confeſſeurs que chaſcun en preniſt là quatre partie, & que en leurs conſciences le distribuſſent là où ils verroient qu'il ſeroit bien employé. Et en apres tira vng petit anneau d'or ou auoit vng diamant qu'il auoit en ſon doy, & pria audit Penitācier qu'il le donnaſt & preſentaſt de par luy à l'imaige noſtre Dame de Paris, & le miſt dedens ſon doy, ce que ledit Penitācier promiſt de faire. Et puis diſt encores audit Cordelier Sordun, beau pere veez cy vne pierre que i'ay longuement portee en mon col, & que i'ay moult fort aymee pource quelle a grāde vertu, car elle reſiſte contre tout venin, & preſerue auſſi de route peſtilence, laquelle pierre ie vous prie que portez de par moy à mon petit ſils, auquel direz que ie luy prie qu'il la garde bien pour l'amour de moy, laquelle choſe luy promiſt de le faire. Et apres ladicte mort mondit ſeigneur le Chancellier interroga leſdits quatre Confeſſeurs, ſ'il leur auoit aulcune choſe baillé, qui luy dirent qu'il leur auoit baillé leſdits demy eſcus, diamant, & pierre, deſſus declairez. Lequel monſeigneur le Chancellier leur reſpondit, que au regard d'iceux demy eſcus & diamant, ils en feiſſent ainſi que ordonné l'auoit, mais que au regard de ladicte pierre, qu'elle ſeroit baillée

H h iij

Et de ladicte execution ainsi faicte que dit est, en fut fait vng petit epitaphe tel qui s'ensuit.

*Mil quatre cens l'annee de grace,  
Soixante quinze en la grant place,  
A Paris que l'on nomme Greue.  
L'an qui fut fait aux Anglois treue,  
De Decembre le dix-neuf,  
Sur vn eschaffault fait de neuf:  
Fut amené le Conestable,  
A compaignie grant et notable:  
Comme le veult Dieu & raison,  
Pour sa tres-grande trahison.  
Et là il fut decapité,  
En ceste tres-noble cité.*

Et apres ladicte execution ainsi faicte dudit Conestable, fut le samedi vingt-troiesme iour dudit mois de Decembre, fait publier à Paris à son de trompe & cry publique le desappointement des Generaulx maistres des Monnoyes, pour les causes contenuës audit mandement. Et au lieu d'eulx le Roy mist & establist quatre personnes seulement: c'est assauoir sire Germain de Merle, & Nicolas Potier, Denys le Breton, & Symon Aulorran. Et fut ordonné que les escus d'or du Roy, qui parauant auoient eu cours pour vingt-quatre sols parisis & trois tournois, auroient cours pour trente-cinq vnzains, vaillans vingt-cinq sols huiet deniers parisis. Et que on feroit des aultres escus d'or qui auroient vng croissant, au lieu de la cou-

ronne qui estoit és aultres escus, qui vauldroient trente-six vnzains, du prix de vingt & six sols six deniers tournois, & des douzains neufs de douze tournois pour piece. Et le dit iour de samedi par la permission du Roy furent aler querir & assembler le corps qui pendu estoit au gibet de Paris de Regnault de Veloux, & la teste qui mise estoit au bout d'une lance és Hales de Paris, avecques ses membres attachez à quatre potences aux portes de Paris, & fut tout assemblé ensemble. Et puis furent portez inhumer & enterrer au Conuent desdits Cordeliers de Paris, auquel lieu luy fut fait son service & honnorablement, pour le salut & remede de son ame, tout au coust, mises & despens des parens & amis dudit deffunct Regnault de Veloux.

Et le mardy ensuiuant iour saint Estienne apres Noël, audit an septante-cinq, fut & comparust pardeuant l'ostel de ladicte ville de Paris vng Cheualier Lombart, nommé messire Bouffille, qui auoit esté desfié d'estre combatu à oultrance en lice de pie, par vng aultre Cheualier natif du Royaulme d'Arragon, qui audit iour y deuoit comparer, mais il ny vint point. Et pour auoir contre luy tel deffault que de raison par ledit Bouffille, s'en vint par deuers le Conte de Dampmartin illec ordonné Iuge de par le Roy de la question d'entre lesdictes deux parties. Et vint en icelle place ledit Bouffille tout armé de son harnois, & en l'estat qu'il deuoit combattre, sa hache au poing, & deuant luy faisoit porter son enseigne, & auoit trois trompettes, & apres luy auoit plusieurs seruiteurs, dont l'vng luy portoit encores vne aultre hache d'armes. Et apres

qu'il eut ainsi parlé audit de Dampmartin & fait sadi-  
cte requeste, il se retrahit & s'en retourna en son ho-  
stellerie, ou pend l'enseigne du grant Godet près du-  
dit hostel de la ville.

Et le ieudy vingt-huictiesme iour de Decembre au-  
dit an quatre cens soixante-cinq, enuiron l'eure de six  
heures de nuit monsieur d'Alençon dont est parlé de-  
uant, & qui auoit esté longuement detenu prisonnier  
audit Chasteau du Louure, en fut mis dehors par la  
permission du Roy, qui octroya à ses gardes que on le  
mist en ladicte ville en vng hostel de bourgeois, où ils  
verroient estre bon, & il fut mené loger en l'ostel feu  
maistre Michel de Laillier, & y estoient à le mener du-  
dit Louure iusques audit hostel, ledit sire Denys Hes-  
selin, Jacques Hesselin son frere, sire Iehan de Harlay  
Cheualier du Guet, & aultres personnes en armes: Et  
deuant ledit seigneur estoient portees quatre torches.

Au mois de Janvier ensuiuant dudit an soixante-  
cinq, fut publicc à son de trompe par les carrefours de  
Paris les lettres patentes du Roy nostre Sire, qui con-  
tenoient comme de tous anciens temps il auoit esté per-  
mis aux Rois de France par les saincts Peres Papes, que  
de cinq ans en cinq ans, ils peussent faire assemblee de  
tous les Prelats du Royaulme de France, pour la refor-  
mation & affaires de l'Eglise, ce qui de long temps  
n'auoit esté fait: pour laquelle chose & aussi que le Roy  
voulant les droitz de l'Eglise estre gardez & observez,  
vult & ordonna qu'il tiendroient la Concile de l'Eglise  
en la ville de Lyon, ou aultre lieu près d'illec, pour-  
quoy il vouloit, mandoit & ordonnoit, que tous  
Arceuesques,



Arceuesques, Euesques, & aultres constituez en dignité, feussent residens chascun en leurs benefices & si en alassent demourer, pour estre tous prest & appareillez à aler ou ordonné leur feroit, & où ils n'auroient ce fait dedens six mois apres ladicte publication, que tout leur temporel feust saisi & mis en la main du Roy. Et apres ledit cry, fut fait de rechief publier comme de pieça le Roy pour luy subuenir à aucuns ses affaires, & pour la necessité de son Royaulme, eust mis & ordonné vng escu à estre leué & payé sur chascune pipe de vin, à mener dehors du Royaulme, & qui en feroit tyré, & de toutes aultres denrees à la valeur, qui par aucun temps auoit esté delaissee à cueillir. Lequel ayde d'vng escu sur chascune pipe de vin seulement, & non point sur aultre marchandise, fut de rechief mis sus par toutes les extremittez du Royaulme. Et à ce faire & recueillir maistre Laurens Herbelot Conseiller dudit Seigneur, & Denys Cheualier jadis Notaire au Chastellet de Paris, non obstant que de ceste mesme charge le Roy y auoit pieça ordonné maistre Pierre Iouuelin Correcteur des Comptes, qui de ce en demoura deschargé.

Au moys de Feburier audit an mil quatre cens soixante cinq le Roy qui estoit à Tours & à Amboise s'en partit pour aler au pays de Bourbonnois & d'Auuergne, & de là s'en ala faire sa neufuaine à nostre Dame du Puy, & de la en Lyonnois, & au pays du Daulphiné. Et luy estant audit lieu du Puy eut nouuelles que les Suisses auoient rencontré le Duc de Bourgongne & son armee, qui vouloient entrer audit pays de Suif-

se. Et comment ils auoient mis ius ledit de Bourgongne, & des gens de son armee, bien de seize à dixhuiet mil hommes, & si gaignerent toute son artillerie par la maniere qui s'en suit. Apres que le Duc de Bourgongne eut prins Granssons où il y a ville, il s'en ala au long du lac de Verdon, en tirant deuers Fribourg, & trouua moyen d'auoir deux chasteaulx qui sont sur les montagnes à l'entree de Saxe; mais les Suisses qui bien sçauoient la venue, & la prise qu'il auoit fait desdicts deux chasteaux, & dudit Gransson, s'approucherent. Et le Vendredy au soir deuant le iour des brandons, trouuerent iceulx Suisses moyen de enclore lesdits deux chasteaulx en façon telle que ceulx qui estoient dedens n'en pouuoient faillir, & mirent leurs embusches entre & assez pres desdicts deux chasteaux en vng petit bois pres de là où les Bourguignons auoient mises leurs batailles. Et le lendemain ensuiuant veille desdicts brandons au bien matin, ledit Duc de Bourgongne passa auecques ses gens & son artillerie. Et incontinent qu'il fut passé lesdits Suisses qui n'estoient que enuiron de quatre à six mil couleuriniers, & tout à pied, qui se prindrent à tirer & bouter le feu dedens leurs bastons, dont ils firent tel & si bon bruit, que les chefs de l'auantgarde dudit de Bourgongne y furent tous tuez, & ainsi tourna en fuite toute ladicte auant-garde. Et tantost après chargerent lesdits Suisses si estroit que la bataille tourna en fuite. Et non obstant ce que ledict de Bourgongne fist son pouuoir de ralier ses gens pour resister à la fureur desdicts Suisses. Finablement luy fut force de tourner en fuite, & s'en

eschappa à grant peine & dangier de sa personne, & luy cinquiesme en cheuauchant & fuyant sans arrester, & fouuant, regardoit derriere luy vers le lieu ou fut faicte sur luy ladite destrouffe, iusques à Ioigné, où il y a huiët grosses lieuës, qui en valent bien seize de France la iolie, que Dieu saulue & garde. Et y furent mors à ladicte rencontre la plus part des Capitaines & gens de renom de l'armee dudit de Bourgongne. Et fut faicte ladicte destrouffe le Samedy deuxiesme iour de Mars audit an soixante & quinze, où il y eut grant meurdre fait desdits Bourguignons. Et apres ce que ledit de Bourgongne s'en fut ainsi honteusement fuy que dit est, & qu'il eut perdu toute son artillerie, sa vaisselle, & toutes ses bagues, lesdits Suisses reprindrent lesdicts deux chasteaulx, & firent pendre tous les Bourguignons qui dedens estoient. Et aussi reprindrent la ville & chastel de Gransson, & firent despendre tous les Alemans que ledit de Bourgongne y auoit fait pendre, qui estoient en nombre cinq cens & douze, & les firent mettre en terre sainte. Et puis firent pendre les Bourguignons qui estoient dedens ledict Gransson és mesmes lieux, & des licols dont ils auoient pendus les Alemans ou Suisses.

Audit mois de Mars, & audit an soixante cinq, le Roy qui auoit enuoyé Monsieur de Beau-jeu auecques grant quantité de gens de guerre assieger mondit seigneur le Duc de Nemours, que lors estoit à Carlat en Auvergne, se mist & rendit mondit seigneur de Nemours és mains de monseigneur de Beau-jeu qui le mena par deuers le Roy, estant lors au pays du Daul-

phiné & Lyonnois. Et fut ledit de Nemours del'Ordonnance du Roy mené prisonnier au chasteau de Vienne. Et durant qu'il fut ainfi assiegé au chasteau de Carlat, madame la femme filles de Charles d'Anjou Conte du Maine, accoucha d'enfant en icelluy lieu de Carlat. Et tant pour la desplaissance de sondit seigneur & mary que du mal d'enfant, ala de vie à trespas, dont ce fut grant dommaige, car on la tenoit bien bonne & honnelle Dame. Et apres ces choses fut mené ledit seigneur de Nemours à Pierre Assise lez Lyon.

Au mois d'Apuril audit an, le Conte de Cambobache Lombart ou Millenois, qui auoit la conduicte de deux cens lances de Lombardie qu'il auoit amenees audit Duc de Bourgogne, luy tenant le siege deuant la ville de Nux, & qui depuis s'estoit trouué avec ledit de Bourgogne à la destrouffe sur luy faite pres de Granffon, se partit ledit de Cambobache dudit de Bourgogne, & ala par deuers le Duc de Bretagne, duquel il se disoit estre parent, & faignant pour luy aler en pelerinage à saint Iacques en Galice, lequel Duc de Bretagne le recueillit tres-bien, & luy donna del'argent. Et illec ledit Cambobache disoit dudit de Bourgogne qu'il estoit tres-cruel & inhumain, & que en toutes ces entreprises ny auoit point d'effect, & ne faisoit que perdre temps, gens, & pays, par ses folles obstinations.

Au mois de May ensuiuant l'an mil quatre cens soixante seize, & apres la rencontre sur ledit Bourguignon faite par lesdits Alemans pres dudit Granffon. Ledit de Bourgogne delibera de poursuiure & con-

tinuer sa poursuite sur & alencontre desdits Alemans, & d'aler deuant la ville de Strabourg y mettre le siege, laquelle chose bonnement il ne pouoit faire sans auoir ayde & secours de gens, & aussi auoir argent de ses pays. Et à ceste cause y enuoya son Chancellier nommé maistre Guillaume Gonnet, & autres deleguez avecques luy iusques au nombre de douze en aucuns de ses pays & villes pour leur dire & remontrer la destrouisse ainsi sur luy faicte par lesdits Alemans ou Suisses. Et que non obstant icelle son intention estoit de tirer auant, & estre vengié desdits Suisses, pour lesquelles choses luy falloit auoir argent & gens, & qu'ils luy voulussent ayder du sixiesme de leur vaillant, & de six hommes, l'un puissant de porter armoies, ausquels douze ainsi deleguez de luy que dit est fut rendue & faicte responce de Gant, Bruges, Brucelles, l'isle des Flandres, & aultres que au regard dudit de Bourgongne ils le reputoient leur vray & naturel seigneur, & que pour luy feront leur possibilité. En disant par eulx que se il sentoient aucunement empresse desdits Alemans ou Suisses, & qu'il n'eust avecques luy assez de gens pour s'en retourner franchement en ses pays qu'il le leur fist assauoir, & qu'ils exposeroient leurs corps & leurs biens pour l'aler querir pour le ramener saulvement en lesdits pays. Mais que pour faire plus de guerre pour luy, n'estoient point deliberez de plus luy ayder de gens, ne d'argent.

Durant ces choses le Roy demoura à Lyon faisant grant chiere, & vint par deuers luy le Roy de Cecille son oncle, auquel il fist moult bel recueil à l'arriuer par

deuers luy audit lieu de Lyon; & luy mena veoir la foire qui estoit audit lieu, avecques les belles bourgeoisies & dames dudit Lyon. Aussi y vint & arriua vng Cardinal nepueu du Pape qui auoit fait aucuns excez en Auignon contre le Roy & monseigneur l'Arceuesque de Lyon Legat d'Auignon. Lequel Cardinal demoura par long temps autour du Roy auant que de luy peust auoir son expedition. Et puis tout le dit debat fut appointé entre le Roy, le dit Legat d'Auignon, & le dit Cardinal.

Audit temps le Roy de Cecile appoincta, voulut & accorda avecques le Roy, que apres sa mort la Conté de Prouence retourneroit de plain droit au Roy, & seroit vnüe à la Couronne. Et en ce faisant la Royne d'Angleterre fille dudit Roy de Cecile, yeufue du feu Roy Henry d'Angleterre, qui estoit prisonniere au Roy Edouart d'Angleterre, fut par le Roy rachetee, & pour sa rançon en fut payé audit Edouart cinquante mil escus d'or. Et à ceste cause ladicte Royne d'Angleterre ceda & transporta au Roy tout le droit qu'elle pouoit auoir en ladicte Conté de Prouence, moyennant aussi certaine pension à vie, que le Roy luy bailla par chacun an, durant le cours de la vie d'icelle Royne.

En ce temps le samedi treiziesme iour du mois de Iuing mil quatre cens soixante & seize, le Seneschal de Normendie Conte de Mauleurier, fils de feu messire Pierre de Breze, qui fut tué à la rencontre de Montlehery. Lequel Seneschal qui s'en estoit alé à la chasse près d'vng villaige nommé Romiers les Dourdan, à luy appartenant, & avecques luy y auoit mené mada-

me Charlotte de France sa femme, fille naturelle dudit feu Roy Charles, & de Damoiselle Agnès Sorel. Aduint par male fortune apres que ladicte chasse fut faicte, & qu'ils furent retournez soupper & au giste audit lieu de Romiers, ledit Seneschal se retrahit seul en vne chambre, pour illec prendre son repos de la nuit, & pareillement ladicte femme se retrahit en vne autre chambre. Laquelle meue de lescherie desordonnee, comme disoit sondit mary, tira & amena avecques elle vn gentilhomme du pays de Poictou nomme Pierre de la Vergne, lequel estoit Veneur de la chasse dudit Seneschal, & lequel elle fist coucher avec elle, laquelle chose fut dicte audit Seneschal par vng sien seruiteur & maistre d'ostel, nomme Pierre l'Apoticaire. Lequel Seneschal incontinent print son espee & vint faire rompre l'uy's où estoient lesdits Dame & Veneur, lequel Veneur il trouua en chemise, auquel il bailla de son espee dessus la teste & au trauers du corps, tellement qu'il le tua. Et ce fait s'en ala en vne chambre, ou retrait, au ioingnant de ladicte chambre, où il trouua ladicte femme mucee dessous la couste d'vng liect où estoient couchez ses enfans, laquelle il print & la tira par le bras à terre. Et en la tirant abas luy frappa de ladicte espee parmy les espaulles, & puis elle descendue à terre & estant à deux genoulx luy trauerfa ladicte espee parmy les mammelles & estomach, dont incontinent elle ala de vie à trespas, & puis l'enuoya enterrer en l'Abbaye de Coulons, & y fist faire son seruice. Et fist enterrer ledit Veneur en vng iardin au ioingnant de l'ostel où il auoit esté occis.

En apres le Roy estant à Lyon, qui aupres de illec auoit grant quantité de son armee, eut certaines nouvelles que le Duc de Lorraine qui estoit au pays de Suisse avecques les Suisses, Barnes, Alemans, & Lorrains pour desconfire ledit de Bourgongne, qui par sa folle obstination & outrecuidance estoit entré audit pays de Suisse, & avecques luy mené grande quantité d'artillerie, gens de guerre, & marchands fuiuans son ost qu'il auoit parqué & mis en forme de siege deuant vne petite ville dudit pays de Suisse nommee Morat. Et le samedi vingt-deuxiesme dudit mois de Iuing audit an quatre cents soixante & seize, enuiron l'eure d'entre dix & onze de matin, ledit Duc de Lorraine acompaigné comme dit est, s'en vint assaillir ledit de Bourgongne, & de prime venue iceluy de Lorraine desconfit toute l'auant-garde dudit de Bourgongne, qui estoient douze mil combatans & miculx, dont auoit la charge & conduicte monseigneur le Conte de Romont qui à bien grant haste trouua moyen de soy sauuer, & mettre en fuitte luy douziesme. Et puis se boutterent les gens de guerre dedens ledit Morat avecques les aultres de ladicte armee de mondit seigneur de Lorraine dedens le parc dudit de Bourgongne où ils tuerent tout ce qui y fut trouué, & sans misericorde aucune. Et fut ledit bourg contrainct de se retraire avecques vng peu de gens de guerre de son armee qui se sauuerent. Et depuis sondit parc s'enfuit sans arrester, souuent regardant derriere luy iusques à loigné, qui est bien distant dudit lieu où fut ladicte desconfiture de quinze à seize lieues Françoises: & illec



& illec perdit tout son vaillant, qui y estoit comme or, argent, vaisselle, ioyaulx, tapisserie, toute son artillerie, tentes, paueillons : & generallyment tout ce qu'il y auoit mené, & apres ladite desconfiture lesdits Alemans & Suysses considerant le grant seruice à eulx fait par ledit de Lorraine, luy donnerent & deliurerent touteladiète artillerie & parc dudit de Bourgongne, pour la recompense de son artillerie qu'il auoit perduë audit lieu de Nancy, que icelluy de Bourgongne par violence & vouloir desordonné sans aucun tiltre, auoit prinse & emportee hors d'icelle ville. Et en ladiète desconfiture moururent vingt-deux mil sept cens hommes qui y furent trouuez morts, tant dedens ledit parc que dehors, pour le rapport fait des Heraulx & poursuiuans qui par ladiète estimation faire se transférerent audit lieu. Et apres ladiète desconfiture ainsi faicte que dit est, ledit de Lorraine & Suisses firent leur suite apres ledit de Bourgongne, & tuerent depuis plusieurs aultres Bourguignons qui aussi se retiroient audit lieu de Ioigné, & depuis firent bouter les feux & destruire toute la Conté de Romont en Sauoye, où ils tuerent tout ce qui y fut par eulx trouué, & sans misericorde aucune.

Apres ces choses ainsi faictes ledit seigneur de Lorraine se retrayt à Strasbourg audit pays de Suisse, & d'illec apres s'en partit à tout quatre mil combatans de ladiète armee, & ala mettre le siege deuant sa ville de Nancy, ou dedens estoient bien de mil à douze cens combatans pour ledit de Bourgongne, lequel siege il mist & ordonna deuant ladiète ville de Nancy. Et

KK

apres qu'il eut ce fait s'en retourna audit lieu de Suisse, & depuis retourna audit siege à tout grant quantité d'aultres gens de guerre.

En apres le Roy par long temps s'estoit tenu à Lyon & illec enuiron, s'en retourna au Plessis du parc lez Tours, où estoient la Royne, & monseigneur le Dauphin, où il sejourna vng peu de temps & puis s'en ala rendre graces à nostre Dame de Behuart, de ce que ses besoignes s'estoient bien portees durât sondit voyage dudit lieu de Lyon, & si enuoya argent en plusieurs & diuers lieux où est reuerce la Benoisie glorieuse Vierge Marié. Et entre aultres lieux donna & enuoya à nostre-Dame de Ardenbourg en Flandres deux cens escus d'or, & en soy retournant dudit Lyon fist venir apres luy deux Damoiselles dudit lieu iusques à Orleans, dont l'une estoit nommee la Gigonne, qui aultre fois auoit esté mariee à vng marchant dudit Lyon. Et l'autre estoit nommee la Passe-fillon, femme aussi d'un marchant dudit Lyon, nommé Anthoine Bourcier. Et pour l'onesteté desdits deux femmes, leur fist & donna le Roy de grans biens: car il maria la Gigonne à vng ieune fils natif de Paris, nommé Gieffroy de Caulers. Et pour ledit mariage donna argent & des offices audit Gieffroy. Et au mary de Passe-fillon donna l'office de Conseillier en sa Chambre des Comptes à Paris, au lieu de maistre Iehan de Reilhac, auquel pour ceste cause elle fut ostee. Et puis laissa la conduite desdites deux femmes à les mener à Paris dudit lieu d'Orleans à Damoiselle Ysabeau de Caulers femme de maistre Phelipe le Begue Correcteur en la Chambre

des Comptes à Paris. En apres le Roy s'en ala dudiect lieu d'Orleans à Amboise & à Tours, par deuers la Royne & monseigneur le Daulphin. Et depuis en pelerinaige à Nostre Dame de Behuart, & aultres saincts lieux. Et apres s'en retourna audit Plessis du parc, & aultres lieux voisins.

En apres ladiecte desconfiture faicte desdits Bourguignons audit lieu de Morat, & que le siege eut esté ainsi mis deuant ledit Nancy que dit est, par ledit Duc de Lorraine, fut icelle ville remise en ses mains, & s'en alerent lesdits Bourguignons estans dedens par composition, eulx & leurs biens saufs. Et apres ce que ledit seigneur de Lorraine eut ainsi recouuré ladiecte ville de Nancy, & de nouuel auitaillee, & mis gens pour la garde d'icelle, ne demoura pas vng mois apres que ledit Duc de Bourgongne qui s'estoit retraiect en vne ville nommee Riuieres, qui estoit près de Salins en Bourgongne, & qui auoit assemblé & fait amas de gens le plus qu'il auoit peu, s'en vint de rechief mettre le siege deuant ladiecte ville de Nancy. Et daultre part s'en ala ledit Duc de Lorraine audit pays de Suisse pareillement faire son amas de gens, pour reuenir secourir ses gens dudit Nancy & leuer ledit siege.

Apres ces choses le Roy de Portingal qui preten- doit à luy appartenir les Reaulmes de Seuille & Castille, ensemble toutes les Espaignes, à cause de sa femme, se partit de sondit Royaulme de Portingal & vint descendre es marches de Frâce, & puis vint à Lyon, & de là à Tours par deuers le Roy, pour luy requerir aide & secours de gens, pour luy aider à recouurer lesdits Roy-

KK ij

aulmes. Et fut receu du Roy moult benignement & honorablement, & apres ce qu'il eut esté audit lieu de Tours par certaine espace de temps, où il fut fort festoyé & entretenu de plusieurs Seigneurs & nobles hommes estans avecques le Roy, & tout au cousts & despens du Roy. Ledit Roy de Portingal print congie du Roy & s'en ala à Orleans, où il luy fut fait honneste recueil, & apres s'en partit dudit Orleans & vint en la bonne cité de Paris, dedens laquelle il fit son entree, & y arriua le samedi vingt huictiesme iour de Novembre quatre cens soixâte & seize, enuiron l'eure d'entre deux & trois apres midy, & y entra par la porte saint Jacques. Et pour aler au deuant de luy & le recueillir aux champs iusques au molin à vent, y furent tous les Estats de Paris, & par ordre, en honnestes & riches habits, tout ainsi que ce eust esté pour faire l'entree du Roy. Et premierement yssirent hors Paris pour aler à luy, les Preuost des Marchans & Escheuins de ladicte ville, qui pour ladicte venue furent vestus de robes de drap de damas blanc & rouge, fourrees de martres, lesquels estoient accompaignez des bourgeois & officiers de ladicte ville. En apres y fut aussi messire Robert Destouteuille Preuost de Paris, qui estoit accompaigné de ses Lieutenans Ciuil & Criminel, & tous les Officiers du Roy & Praticiens du Chastellet, qui se y trouuerent en grant nombre & honnestes habits. En apres y vint monseigneur le Chancelier Doriolle, messeigneurs les Presidens & Conseilliers de la Court de Parlement, les Coseilliers & Gens des Coptes, les Generaux sur le fait des Aydes & Monnoyes & du Tresor,

avecques grant quantité de Prelats, Euesques & Arceuesques, & aultres notables hōmes, en moult grant & honneſte nombre. Et ainſi accompaigné que dit eſt, fut mené & conduit iuſques à la porte ſainct Iacques, où illec en entrant par icelle dedens ladicte ville trouua de rechief leſdits Preuoſt des Marchans & Eſcheuins, qui luy preſenterent vng moult beau poiſle ou ciel, qui eſtoit armoyé par les coſtez aux armes du Roy, & au meillieu y eſtoient les armes d'Eſpaigne, & puis ſe bouta deſſoubs icelluy poiſle. Et luy eſtant ainſi deſſoubs, vint & fut conduit iuſques à ſainct Eſtienne des Grecs, où il trouua là les Recteur, Suppoſts & Bedeaux de l'Vniuerſité de Paris, qui propoſerent deuant luy ſa bien-venue. Et ce fait ſ'en vint iuſques en l'Egliſe de Paris, où il fut receu par le Prelat d'icelle moult honnorablement. Et apres ſon oroïſon faiſtes'en vint au long du pont Noſtre-Dame, & trouua à l'entree du marché-palu cinquante torches allumees, qui le conduiſirent autour dudit poiſle. Et au bout dudit pont Noſtre Dame à l'endroit de la maiſon d'un couſturier nommé Motin, y fut trouué vng grant eſchaffault, où eſtoient diuers perſonnaiges, qui eſtoient ordonnees pour ſadite venue. Et d'illec ſ'en ala deſcendre en ſon logis, qui luy fut ordonné en la ruë des Prouaires, en l'oſtel de maïſtre Laurens Herbelot marchant & bourgeois de ladicte ville, où il fut bien recueilly. Et là luy furent faiſts pluſieurs beaulx preſens tant de ladicte ville que d'ailleurs, & fut veoir tous les beaulx lieux & eſtats de Paris. Et premierement fut mené en la Court de Parlement, qui fort triompha à

ceiour de sa venue: car toutes les Chambres y furent tenduës & parees, & en la grant Chambre y trouua monseigneur le Chancelier Doriolle, messeigneurs les Presidents, Prelats, Conseilliers, & aultres Officiers, tous honnestement vestus. Et deuant luy y fut plaidoyé & publié vne matiere en Regalle par maistre François Haslé Archidiacre de Paris & Aduocat du Roy en ladiëte Court, & contre luy estoit pour Aduocat maistre Pierre de Breban Aduocat en ladiëte Court & Curé de saint Eustace, lesquels deux Aduocats il faisoit moult bel oyr. Et apres ladiëte plaidoirie luy furent monstrees les Chambres & lieux de ladiëte Court. Et par aultres iournees fut en la grant salle del'ostel de l'Euesque de Paris, pour illec veoir faire vn Docteur en la faculté de Theologie, & apres ala voir le Chastellet, les prisons & chambres, qui toutes estoient tenduës, & tous les Officiers chacun en son estat vestus de beaulx & honnestes habits. En apres le Dimenche premier iour de Decembre audit an quatre cens soixante & seize, alerent passer par deuant son logis toute l'Vniuersité de Paris, & toutes les facultez & subjets d'icelle, & puis s'en vindrent chanter vne grant Messe à saint Germain Lauxerrois, & par tout où il aloit par ladiëte ville estoit mené & conduit par monseigneur de Gaucourt, Lieutenant du Roy audit lieu de Paris, qui luy donna en sa maison vng moult beau & riche soupper où y furent grant nombre de gens notables d'icelle ville, tant hommes que femmes, Dames & Damoiselles & aultres.

Audit mois d'Octobre aduint à Tours que vng

nommé Iehan Bon natif du pays de Galles, qui auoit belle pension du Roy, & qui l'auoit marié à vne femme de Mante qui auoit bien du sien, conspira par l'enthortement du Duc de Bourgongne, comme il confessa, de empoisonner & mettre à mort monseigneur le Daulphin, aisné fils du Roy. Et pour ledit cas qu'il confessa estre vray, fut condempné par le Preuost de l'ostel du Roy à estre decapité. Et en le voulant executer luy fut demandé par ledit Preuost s'il vouloit plus rien dire, lequel respondit que non, sinon qu'il pleust au Roy d'auoir sa femme & ses enfans pour recommandees. Et alors luy fut dit par ledit Preuost qu'il choisist de deux choses l'une: c'est assauoir de mourir, ou d'auoir les yeulx creuez. Lequel choisit d'auoir les yeulx creuez, ce qu'il luy fut fait faire par ledit Preuost, & puis fut deliuré à sa femme, laquelle le Roy voulut qu'elle eust la pension de sondit mary durant sa vie.

Au mois de Decembre audit an soixante & seize, feste de S. Iehan és festes de Noël, aduint par male fortune que le Duc de Milan fut tué & meurdry par vng Gentilhomme du pays, qui ledit iour en faignant de vouloir parler à luy dedens la grant Eglise dudiect Milan, où il se pourmenoit avecques vne Ambassade qui estoit venue par deuers luy, vint secrettement luy bouter vng cousteau parmy la fente de sa robe dedens le petit ventre, ou le mist soubdainement par trois ou par quatre fois, & sans dire mot cheyt soudainement à terre tout mort, & fut fait ledit fait pour raison de ce que ledit Gentil-homme, ses parens & amis auoient mis & employé tout leur vaillant pour

payer le vaccant d'une Abbaye pour vn de leurs parés. Auquel ledit Duc de Milan l'auoit ostee pour bailler la à vng aultre: & pource qu'il ne voulut delaisser & en souffrir iouyr leurdit parent, icelluy Gentil-homme apres ce qu'il eut de ce fait plusieurs requestes audit Duc de Milan, qui ne luy vouloit accorder, fit & commist ledit homicide à la personne dudit Duc de Milan dedens ladicte Eglise. En laquelle aussi incontinent ce fait fut tué & meurdry, & vng aultre de ladicte ville qui acompaignoit ledit Gentil-homme qui aussi auoit deliberé de tuer ledit Duc de Milan, pour ce qu'il luy detenoit & maintenoit sa femme, contre son gré & volenté, estant avecques luy, & par la sentence des nobles dudit pays, des iuges & aultres notables personnes dudit Milan, fut dit & deliberé que tous les hommes, femmes & enfans, du costé & ligne de icelluy gentil-homme, & celluy de ladicte compaignee quelque part qu'ils seroient trouuees, seroient tuees & meurdries, & leurs maisons & seigneuries demolies & gettees par terre & arrasez, mesmement les arbres portans fruitz à eulx appartenans desracinez, & mise la racine dessus: ce qui fut fait.

Audit mois de Decembre quatre cens soixante & seize, mourut & ala de vie à trespas madame Agnez de Bourgongne, au Chasteau de Moulins en Bourbonnois, laquelle eut espous feu Prince de tres-noble memoire monseigneur Charles, en son viuant Duc de Bourbonnois & d'Auuergne, dont est issuë tres-noble & tres-honneste lignié, tant masles que femelles, comme tres-hault & puissant Prince monseigneur Iean



**Jean Duc de Bourbonnois & d'Auvergne**, qui espousa tres-excellente Princesse madame Jehanne de France fille aisnee du Roy Charles septiesme de ce nom, monseigneur Loys seigneur de Beaujeu qui mourut jeune, monseigneur Charles Arceuesque & Conte de Lyon Primat de France, Cardinal de Bourbon, m<sup>o</sup>seigneur Pierre seigneur de Beaujeu qui espousa l'aisnee fille du Roy de France lors fils dudit Roy Charles, monseigneur l'Arceuesque du Liege, Iacques monseigneur qui mourut à Bruges, madame Jehanne qui fut espousee au Prince d'Orenge seigneur d'Arlay, madame Marguerite femme de Phelippe monseigneur de Saouye seigneur de Bresse, & laquelle deffuncte dame vesquit sainctement & longuement, & son trespas fut fort plaint & ploré de tous ses enfans, parens, serui-  
 teurs & amis, & de tous aultres habitans esdits pays de Bourbonnois & d'Auvergne, en benoist repos gise son ame. Elle gist en l'Eglise de Souigny.

Et apres que ces choses eurent esté ainsi faictes que dit est, le Duc de Bourgongne qui auoit mis le siege deuant la ville de Nancy en Lorraine, pour icelle auoir comme deuant auoit eüe, mit les gens qui estoient dedens icelle ville pour ledit Duc de Lorraine en telle necessité qu'ils n'auoient plus que menger, & par grât contraincte de famine se estoient mis en composition d'eux rendre es mains dudit Duc de Bourgongne. Le Dimenche veille des Roys cinquiesme iour de Ianuier audiect an lxxvj. vint & arriua ledit monseigneur de Lorraine acompaigné de xij. à xiiij. mil Suisses, Alemans & aultres gens de guerre pour leuer ledit siege,

Ll

combatre ledit de Bourgongne, & remuer ledit Nancy, dont en aduint ce qui s'ensuit: C'est assaouir que quatre iours auant la iournee & venue dudit de Lorraine deuant Nancy, qui fut le cinquiesme de Ianuier veille des Roys quatre cens lxxvj. le Conte de Campbasts, le sire Ange & le seigneur de Montfort laisserent le Duc de Bourgongne, & l'abandonnerent en sondit parc. Et le mercredy deuant la bataille ou iournee, icy luy Conte de Campbasts en emmena bien auecques luy neuf vingts hommes d'armes, & le samedi ensuiuant les deux aultres Capitaines dessus nommez en emmeneret bien six vingts hommes d'armes, qui tous vouloient estre François: mais on dissimula de les receuoir pour la treue, & fut ordonné par aucuns à qui ils s'adresserent, qu'ils s'en iroient en Lorraine: Laquelle chose ils firent reserué vne partie qui demoura pour garder Condé, qui est vne place sus la riuere de Mezelle, par où tous les viures dudit Duc de Bourgongne passioient, qui venoient du val de Mets & du pays de Luxembourg, & s'en tira ledit seigneur de Campbasts deuers monseigneur de Lorraine, & l'aduertit de tout le fait dudit de Bourgongne, & incontinent s'en retourna luy & ses gens audit lieu de Condé, qui n'est que à deux lieuës dudit lieu de Nancy. Et ledit iour de samedi quatriesme iour dudit mois de Ianuier, ledit monseigneur le Duc de Lorraine arriua à saint Nicolas de Varengueille & les Suisses avec luy, qui bien estoient dix mil cinq cens de vray compte fait, & d'aultres Alemans y auoit beaucoup, sans les Lorrains & aultres gens de guerre.

Et le Dimenche ensuiuant cinquiesme iour dudit mois enuiron huiët heures de matin, desemparèrent & partirent lesdits seigneurs de Lorraine & de Suisse, & vindrent à Neufuille, & oultre vng estanc près d'illec firent leurs ordonnances, & en effect lesdits Suiffes semirent en deux bandes, dont le Conte d'Abstain & les Gouverneurs de Fribourg & de Zurich auoient l'une, & les aduouez de Berne l'autre, & enuiron midy marcherent tous à vne fois: c'est assauoir vne bande deuers la riuere, & l'autre tout le grant chemin à venir deuers ledit Neufuille audit Nancy. Ledit Duc de Bourgongne s'estoit ja mis hors de son parc & en bataille, & au deuant & deuers luy y auoit vng ruisseau qui passe à vne Maladerie nommee Lamagonne, & estoit ledit ruisseau entre deux fortes hayes des deux costez, entre luy & lesdits Suiffes. Et sur le grant chemin par ou venoient l'une des bendes d'iceulx Suiffes, auoit ledit Duc de Bourgongne fait asseoir le plus fort de son artillerie. Et ainsi que les deux bandes marchoient & qu'elles furent à vng grant traict d'arc des Bourguignons, descharga sur iceulx Suiffes, & n'y fist quelque dommaige. Laquelle bende des Suiffes laissa ledit chemin & tira au dessus vers le bois, & fist tant qu'elle fut au costé dudit Duc de Bourgongne, au plus hault du lieu.

En faisant ces choses ledit Duc de Bourgongne fist tourner ses Archiers, qui tous estoient à pié deuers iceulx Suiffes, & ordonna deux esles de ses hommes d'armes pour batailler, dont en l'une estoit Iacques Galiot Capitaine Italien, & à l'autre estoit le souuerain

de Flandres, nommé messire Ioffe de Lalain. Et si tost que lesdits Suisses se trouuerent au dessus & au costé dudit Duc de Bourgongne: tout à vng coup se tournerent le visage vers luy & son armee, & sans arrester marcherent le plus impetueusement & orgueilleusement que iamais gens firent. Et à l'approucher pour ioindre deschargerent leurs couleurines à main, & à la dicte descharge qui n'estoit pas des Generaulx des finances, tous les gens de piet dudit de Bourgongne se mirent en fuite. La bande desdits Suisses qui estoit deuers la riuere marcherent quant & quant celle dudit Galiot & de ceulx qui estoient avecques luy, & frapperent lesdits Suisses dedens eulx tellement qu'ils furent incontinent deffaits. L'autre esle desdits Bourguignons tourna pareillement sur l'autre bande desdits Suisses, mais ils les recueillirent bien: & si tost que lesdits gens dudit Duc de Bourgongne qui estoient à pied, se mirent en fuite, tous les gens de cheual picquerent apres, & tirerent pour passer au pont de Brides à demie lieuë de Nancy, qui estoit le chemin à tirer vers Thionuille & Luxembourg. Et le quel pont ledit de Cambasts auoit empesché, & y estoit luy & ses gens, & aultres gens d'armes tous en armes, & auoit fait mettre des chariots au trauers dudit pont. Et ainsi que la foule desdits Bourguignons y arriuoit, trouua illec empeschement, monsieur de Lorraine & ses gens qui le suiuiot au dos, & pource que on gardoit ledit pont & qu'il estoit en bataille, lesdits Bourguignons furent contrains de eux ietter aux guez de la riuere. Et là fut la grant desconfiture & plus la moitié que

au champ de la bataille: car ceulx qui se gettoient en l'eauë estoient incontinent tuez par lesdits Suiffes qui y vindrent, & ceulx de l'autre partie se noyoient eulx mesmes, & tout le demeurant fut pris ou mort, & bien peu s'en sauua. Et aucuns quant ils virent l'embusche dudit pont se tirerent vers les bois, & là les gens du pays si les fuiuoient & les prenoient & tuoient, & à quatre lieuës enuiron on ne trouuoit que gens morts par les champs & chemins, & dura la chasse sur lesdits Bourguignons iusques à plus de deux heures de nuit, que monsieur de Lorraine s'enquist de tous costez qu'estoit deuenu ledit Duc de Bourgongne, & s'il s'en estoit fouy ou s'il estoit pris, mais à l'eure ne furent sceuës aucunes nouuelles: & tout incontinent fut enuoyé par ledit de Lorraine homme propre en la ville de Mets par deuers vng qui estoit nommé Iehan Dais, Clerc de ladiëte ville de Mets, pour sçauoir si ledict Duc de Bourgongne estoit point passé, & le landemain ledit Iehan Dais manda dudit lieu de Mets audit seigneur de Lorraine, que seurement il n'estoit point passé, & ne sçauoit-on qu'il estoit deuenu, & qu'il n'auoit point tiré vers Luxembourg. Et le landemain qui fut lundy iour des Rois, le dit Conte de Cambast môstra vng paige qui auoit esté prins, qui auoit nom Baptiste, natif de Rome, de la lignee de ceulx de la Coulompne, qui estoit avec le Conte de Chalon Neapolitain, lequel estoit avec ledit Duc de Bourgongne. Et apres qu'il eust esté interrogué fut icelluy paige mené à grant compaignie de gens de guerre, au lieu ou ledit de Bourgongne gisoit mort, lequel estoit tout nud.

Et en icelluy lieu le mardy ensuiuant de ladicte bataille au matin, ledit Paige monstra clairement ledit Duc de Bourgongne mort & tout nud, & enuiron luy quatorze hommes tous nuds, les vngs assez loings des autres. Et auoit ledit Duc de Bourgongne vng coup de baston nommé hallebarde, à vng cousté du milieu de la teste par dessus l'oreille iusques aux dents, vng coup de picque à trauers des cuisses, & vng aultre coup de picque par le fundement, & fut cogneu manifestement que c'estoit le Duc de Bourgongne à six choses. La premiere & la principale fut aux dents de dessus, lesquelles il auoit autrefois perduës par vne cheute. La seconde fut d'une cicatrice à cause de la playe qu'il eut à la iournee de Montlehery en la gorge, en la partie dextre. La tierce à ses grans ongles qu'il portoit plus que nul aultre homme de sa Court, ne aultre personne. La quarte fut d'une playe qu'il auoit en vne espau-le, à cause d'vng escarboucle que autrefois y auoit eüe. La cinquiesme fut à vne fistule qu'il auoit au bas du ventre en la pennilliere du costé dextre. Et la sixiesme fut d'vng ongle qu'il auoit retrait en l'orteil. Et ausdits enseignes donna son iugement. pour tout vray vng sien Medecin Portingalois, nommé maistre Mathieu, que c'estoit ledit Duc de Bourgongne son maistre, & aussi le dirent pareillement ses varlets de Chambre, le grant Bastard, messire Oliuier de la Marche, son Chapelain, & plusieurs autres de ses gens prisonniers dudit monseigneur de Lorraine.

Et apres que ledit de Bourgongne ainsi trouué eut esté porté audit lieu de Nancy, & illec lauë & mondé

& nettoyé, il fut mis en vne chambre bien close où il n'y auoit point de clarté, laquelle fut renduë de veloux noir & estendu le corps dessus vne table, habillé d'vng vestement de toille depuis le col iusques' aux pieds, & dessus sa teste fut mis vng oreillier de veloux noir, & dessus le corps vng poille de veloux noir, & aux quatre cornets auoit grans cierges, & aux pieds, la croix & l'eauë benoïste. Et ainsi habillé qu'il estoit le vint veoir mondit seigneur de Lorraine vestu de dueil, & auoit vne grant barbe d'or venant iusques à la seinture, en signification des anciens preux, & de la victoire qu'il auoit sur luy eue. Et à l'entree dist ces mots en luy prenant l'vne des mains de dessus ledit poille, Vos ames ait Dieu, vous nous auez fait moult de maulx & douleurs. Et à tant vint prendre l'eauë benoïste & en getta dessus le corps, & depuis y entrèrent tous ceulx qui le voudrent voir, & puis le fist ledit Duc de Lorraine enterrer en sepulture bien & honnorablement, & luy fist faire moult beau seruice.

Et incontinent apres ladicte desconfiture & mort dudit de Bourgongne, ledit monseigneur de Lorraine & aultres seigneurs & Capitaines, se mirent à conseil & ordonnerent que aucuns d'eulx yroient en la Duché de Bourgogne, en la Conté & aultres lieux qui se tenoient pour ledit de Bourgogne, pour tous les reduire & mettre en la main du Roy, laquelle chose fut incótement faicte sans resistance, & pareillement ceulx de la Conté d'Auxerre se rendirent & firent serment au Roy. En ladicte bataille moururent la pluspart de tous les gens de bien de ladicte compaignie, & y fu-

rent prins le grant Bastard de Bourgongne, lequel depuis ledit monseigneur de Lorraine mena au Roy, luy estant en Picardie, Le Bastard Baudouin de Bourgongne & plusieurs aultres grans seigneurs prisonniers.

Après ces choses & que le Roy eut esté deuement acertené de ladicte mort dudit de Bourgongne, & des choses dessusdictes, il se partit de Tours pour aler en pelerinaige à sa deuotiō, & après s'en retourna à Chartres, à Villeperceur, à Haubervillier, à Nostre Dame de la Victoire, & après à Noyon & à Compiengne. Et ce-pendant se reduisirent à luy plusieurs villes & places tenuës & occupees par ledit de Bourgongne, comme Montdidier, Peronne, Abbeuille, Monstreuil sur la mer, & aultres places estans près d'Arras, mais lesdits d'Arras ne voudrent point obeyr de prime face & se fortifierent en ladicte ville, de gens de guerre, viures & artillerie. Et furent enuoyez de par eulx au Roy plusieurs Ambassadeurs, qui tindrent la chose en treue, pendant laquelle le Roy fist le plus grant amas d'artillerie, pouldres, pionniers, gens de guerre, & aultres preparatoires que iamais on auoit veu, tousiours attendans quelle conclusion prendroient lesdits d'Arras, ou de appointemēt ou de guerre. Et pour faire les frais des choses dessusdites fut faict de grans emprunts à Paris & aultres bonnes villes de ce Royaulme. Et après le Roy trouua moyen d'auoir & mettre la cité dudit Arras en sa main, dedens laquelle il entra le mardy quatriesmē iour de Mars l'an soixante & seize, & fist fortifier & redifier ladicte cité contre ladicte ville d'Arras,



d'Arras, dedens laquelle y auoit vng tas de gens illec venus de plusieurs lieux tenans le party de Bourgogne, & mesmement des villes qui nouuellement s'estoient reduictes au Roy. Et illec sans auoir chief ne hommes de conduicte se fortifierent fort, & firent de grans blasphemés au Roy, comme faire gibets en ladicte ville & sur les murs, & y pendre croix blanches, monstrier leur cul & aultres villenies. Et s'entretindrent en leurs folles imaginations iusques à vng peu de temps apres, que vindrent deuers le Roy en ladicte cité aucuns manans dudit lieu de Arras, pour auoir de luy aucune bonne pacification, avecques lesquels non obstant qu'ils feussent de faulx & mauuaise obstination, & que en icelle eussent trop perseueré: le Roy fut content avec eulx que ladicte ville d'Arras seroit mise en sa main comme souverain, & par deffault de homme, droits & deuoirs non faits. Et que les fruiçts & reuenues de ladicte ville & appartenances seroient recueillis par ses Commissaires, laquelle reuenue se pourroit prendre par lesdits Commissaires, & sous la main du Roy par icelle Damoiselle de Bourgogne, & iusques à ce qu'elle luy eust baillée homme. Et que au regard de ladicte ville d'Arras le Roy n'y mettroit puissance gens d'armes, sans le bon gré & vouloir des habitans dudit lieu. Apres lequel appointment ainsi fait le Roy enuoya audit lieu monseigneur le Cardinal de Bourbon, monseigneur le Chancelier, messire Guyot Pot Bailly de Vermendois, messire Phelippes de Creuecœur seigneur Desquerdes, Gouverneur de ladicte ville, & aultres nobles hommes, pour prendre

Mm

& recepuoir les sermens des habitans dudit Arras, laquelle chose fut faicte : mais en icelle faisant lefdits habitans d'Arras en aucune partie se rebellerent, & vindrent en l'Abbaye de saint Vuaſt, où estoient assis à disner lefdits seigneurs Cardinal & aultres nommez, en armes & fort effrayez, crians, tuez, tuez, dont tous lefdits seigneurs eurent la plus grant paour & frayeur qu'ils eurent oncques en leur vie, mais il n'y eut point de mauuais mal fait pour ceste fois. Et apres ces choses & qu'ils furent retournez en la cité d'Arras, le Roy s'en partit & ala faire ses Pasques à Therouenne, & apres s'en ala à Hedin où il eut la ville : mais aucuns paillars tenans le party de Bourgongne s'en alerent mettre & bouter dedens le Chastel & parc dudit Hedin, auquel lieu le Roy fist tirer de son artillerie, & incontinent y fist vne grant bresche, par laquelle les gens du Roy y entrèrent. Et en celle mesme heure ceulx de dedens eurent composition de rendre ledit lieu, & eulx en aler, eulx & leurs bagues sauues.

L'an mil quatre cens soixante dix-sept, apres ce que ledit lieu de Hedin eust esté ainsi pris que dit est, aduint que aucuns habitans dudit Arras faignans de vouloir aler deuers le Roy, obtindrent sauf-conduit de monseigneur l'Admiral qui le leur bailla, mais pource qu'il luy sembloit qu'ils auoient aultre imagination que d'aler deuers le Roy, les fist suivre & trouua on qu'ils aloient en Flandres par deuers ladicte Damoiselle de Bourgongne, pour laquelle cause ils furent pris & ramenez audit Hedin, ausquels fut fait leur procez. Et par iceulx trouuez qui ausdits voyage en mauuaise in-

tion, pour laquelle cause furent decapitez audit lieu de Hedin iusques au nombre de dixhuiet, entre lesquels y estoit vng nommé M. Oudart de Bucy Procureur General de ladicte ville d'Arras & de la Conté d'Artois, auquel fut le col couppé dedens vng chapperon d'escarlata fourré de letiffes, & ladicte teste avec ledit chapperon mise & bouttee au bout d'vng cheuron, auquel fut fort cloué ledit chapperon, affin qu'il ne feust emblé ensemble ladicte teste, & contre ledit cheuron y auoit vng escripteau ou estoit escript. Cy est la teste maistre Oudart de Bucy, Conseillier du Roy en sa Court de Parlement à Paris. Et apres ladicte execution faicte le Roy s'en ala à Nostre Dame de Boulongné sur la mer, & pour raison des dessusdicts ainsi decapitez, le Roy eut grande malueillance contre ladicte ville d'Arras, & declaira lors qu'elle seroit destruite: Et pour ce faire y enuoya manouuriers, gens de guerre, artillerie, viures, & aultres choses, & y fut mis le siege fort & aspre. Et tira l'artillerie dedens icelle ville d'Arras vers la fin du mois d'April, que le Roy retourna en ladicte cité d'Arras, ou incontinent fist tirer ladicte artillerie, tant bombardes que aultres, à cause dequoy toute la ville fut fort fouldroyee, & fut fort abatu le bouleuert que ceulx d'Arras auoient faict contre ladicte cité, tellement qu'on veoit de ladite cité parmy le bouleuert tout au long de ladite ville d'Arras. Et tellement que apres ces choses lesdits habitans dudit Arras furent fort espouuentez, & curdoient bien mourir, & trouuerent le moyen d'enuoyer deuers le Roy pour de luy obtenir sa bonne grace & misericor-

M m ij

de , lequel le leur bailla & octroya, combien qu'il l'auoit habandonnee aux nobles hommes & francs archiers estans pour luy deuant icelle, qui se tindrent à mal contens de la composition que leur auoit donnee le Roy veu fondit habandonnement. Et que les dessusdits en perfeuerât de mal en pis auoient iniurié le Roy, tué de ses gens & fait moult de maulx, parquoy leur sembloit bien que le Roy ne les prendroit point à mercy. Et les gens du Roy au moyen dudit appointement entrèrent dedens ladicte ville d'Arras le Dimanche quatriesme iour de May mil quatre cens soixante & dix-sept.

Et apres la composition ainsi faicte dudit lieu d'Arras, s'en partit le Roy & vint à la Victoire. Ainsi s'en partit monseigneur l'Admiral, les Gentils-hommes & francs archiers de Normendie, pour eulx en aler chacun en leur maison. Et le Roy estant audit lieu de la Victoire eut nouvelles que cinquante archiers de son ordonnance estoient alez à Peronne, pour y mettre & loger cinq prisonniers de par le Roy, ausquels ils auoit fait refus d'y entrer, pourquoy il s'en partit & ala audit Peronne cuidant qu'on y voulsist faire aucune rebellion, où il fut depuis par aucun temps que aultres nouvelles luy furent apportees que les Flamens & aultres tenans leur parry estoient sur les champs pour nuire au Roy & ses pays, pourquoy incontinent le Roy fist publier son arriereban, & que tout homme noble & non-noble, preuilegié & non preuilegié, & pour ceste fois feust tout prest & en armes pour le servir & resister à leur fureur. Et fut ledit cry publié à Paris le Di-

menche dix-huictiesme iour de May audit an mil quatre cens soixante & dix-sept. En apres le Roy s'en ala à Cambray, où il fut receu par composition, & illec fut receu par certain temps, & s'y refreschirēt ses gens d'armes iusques au iour de la Trinité. En ce temps le Roy enuoya les lettres patentes adressans aux Gens tenans la Court de Parlement à Paris, par lesquelles leur mandoit tous en general aler & eulx transporter en la ville de Noyon, avec aussi les maistres des requestes de l'ostel du Roy, pour avecques le Roy & aultres seigneurs de son sang & lignage, qui seroient illec veoir prendre conclusion & fin sur le fait du procez fait alencontre dudit de Nemours, qui par long temps auoit esté detenu prisonnier en la Bastille saint Anthoine à Paris, laquelle chose firent lesdits de Parlement, & partirent de Paris pour aler audit lieu de Noyon, le lundy second iour de Iuing pour estre le landemain audit Noyon, ainsi que mandé leur estoit par lesdictes lettres.

Audit temps & au mois de Iuing le samedy quatorziesme iour d'icelluy mois vng qui auoit esté de l'ostel du Roy, & qui auoit falsifié son signet & celluy d'vng des Secretaires, & à ceste cause auoit faict & signees plusieurs lettres & baillies en diuerfes villes de ce Royaulme, où il auoit au moyen d'icelles prins plusieurs sommes de deniers au nom du Roy, & icelles à luy applicquées, fut pour ledit cas audit delinquant son procez fait de par le Preuost de l'ostel du Roy ou son Lieutenant, & depuis enuoyé audit lieu de Paris, auquel lieu & pour ledit cas fut pillorié & mittré, & puis fla-

stre au front, le poing couppe, & banny du Royaulme de France, & ses biens & heritaiges declairez & acquis confisque au Roy.

Audit mois de Iuin aduint que le seigneur de Craon à qui le Roy auoit baillé la charge de son armee, pour aler en la Contrée de Bourgongne faire guerre à l'encontre du Prince d'Orenge, pour aucunes iniures à luy faictes par ledit de Craon, qui n'estoit pas de pareille maison de luy. Et pour foy venger d'icelle iniure, & aussi le Roy qui auoit baillé le Gouvernement du pays audit Prince, & qui auoit esté aussi au moyen de faire mettre ledit pays en la main du Roy, & l'auoit de ce deschargé pour bailler audit de Craon, s'en courrouça fort & trouua moyen de faire retourner contre le Roy les pays, villes, & places qui à la requeste s'estoient reduictes à luy. Et auctres & en sa compaignie se mist & bouta vng Cheualier dudit pays de Bourgongne, nommé messire Claude de Vauldray, qui soustindrent la guerre contre ledit de Craon, iusques à certain temps que ledit de Craon sceust que ledit d'Orenge estoit en vne ville nommée Guy, où il vint mettre le siege & y demoura par deux iours que ledit seigneur de Chasteauguyon frere dudit d'Orenge, & autres, vindrent pour le secourir, dont fut aduerty ledit de Craon, qui s'en ala mettre en bataille contre ledit seigneur de Chasteauguyon, & y eut grant hurtibilis à ladite rencontre, & de couste & d'autre y mourut de gens de façon quatorze ou quinze cens combattans. Et de ladicte desconfiture y furent faictes par l'ordonnance du Roy processions generales à Paris, en

l'Eglise saint Martin des champs.

Au mois de Juillet ensuiuant audit an soixante dix-sept, le Duc de Guerles qui estoit venu loger près de Tournay à tout quatorze ou quinze cens Alemans, & vint cuider bouter le feu es fauxbourgs dudit Tournay & foy loger au pont de pierre près de ladicte ville, vindrent dommager icelle, fut fait saillie par deux fois sur ledit de Guerles, ou à la premiere saillie il fut tellement qu'il y mourut, & son corps apporté en la ville de Tournay. Et puis à la seconde saillie y firent sur ceulx de son armee de trois à quatre cens lances de l'ordonnance du Roy, avec aucuns particuliers de ladicte ville, lesquels mirent en fuite tous lesdits Alemans & Flamens, & bien tuerent deux mil, & de sept à huit cens prisonniers. Et de ladicte desconfiture en fut chanté en l'Eglise de Paris *Te Deum laudamus*, & fait faire des feux parmy les ruës de ladicte ville.

Audit an mil quatre cens soixante & dix-sept, le lundy quatriesme iour d'Aoust, messire Jacques d'Armignac Duc de Nemours & Comte de la Marche, qui auoit esté constitué & amené prisonnier de la Bastille saint Anthoine, à rebelle semblable quatriesme iour d'Aoust en l'année precedente, poit aucuns cas, delits, & crimes par luy commis & perpetrez, durant lequel temps de son emprisonnement en icelluy lieu de la Bastille, luy furent faits plusieurs interrogatoires sur lesdictes charges, ausquels il respondit de bouche & par escript, tant par deuant messeigneurs le Chancelier de France nommé maistre Pierre D'officelle, que aulcres des Presidens & Conseillers de la Court de Parlement par

plusieurs & diuerses iournees. Et encores par certains grans Clers du Royaulme, demourans en diuerses citez & villes dudit Royaulme, pource mandez & assemblez de l'ordonnance du Roy en la ville de Noyon, avec & en la compagnie desdits de Parlement. Et en la presence de monseigneur de Beaujeu illec representant la personne du Roy, fut tout veu & visité la procedure par ladicte Court, faicte alencontre dudit de Nemours, ensemble aussi les excusations par luy faites & baillees seruans à sa saluation. Et tout par eulx veu cōclurent audit procez, tellement que ledit iour de lundy quatriesme iour d'Aoust fut audit lieu de la Bastille messire Jehan le Boulengier premier President audit Parlement, accompaignié du Greffier Criminel de ladicte Court, de sire Denis Hesselin maistre d'ostel du Roy, & autres, qui vindrent dire & declairer audit de Nemours, que veuës les charges à luy imposees, ses confessions & excusations par luy sur ce faites, & tout veu & consideré, à grande & meure deliberation, luy fut dit par ledit President & par la Court de Parlemēt, qu'il estoit crimineux de crime de leze-Majesté, & comme tel condempné par Arrest d'icelle Court à estre ledit iour decapité es Halles de Paris, ses biens, feigneuries & terres acquises & confisquées au Roy. Laquelle execution fut ledit iour faicte à l'eschaffaut ordonné esdictes Halles, à l'eure de trois heures apres midy, qu'il eut illec le col couppe, & puis fut ensepuely & mis en bierre & deliuré aux Cordeliers de Paris, pour estre inhumé en ladicte Eglise, & vindrent querir ledit corps es Halles iusques enuiron de sept à huit vingts



vingts Cordeliers à qui furent deliurees quarante torches pour mener & conduire ledit corps dudit seigneur de Nemours en leurdicte Eglise.

Audit mois le Roy qui estoit à Therouenne enuoya partie de son armee pour combattre & mettre hors de leur parc certaine quantité de Flamens qui estoient parquez en vng lieu nommé le blanc fossé, lesquels Flamens quant ils ouyrent nouuelles de la venue du Roy & son armee, s'enfuirent & deparquerēt, & audit desparquement faire frapperent nos gens sur les defusdits Flamens, desquels en y eut bien tué deux mil. Et depuis furent suiuis iusques bien loing dedens le pays de Flandres, & passerent lesdits gens du Roy au mont de Cassel, à Fiesnes & aultres places, qui furent prises & arrasees, & en tuerent encores bien aultres deux mil. Et desdictes desconfitures en furent faictes de moult belles processions en la ville de Paris.

Audit mois d'Aoust l'an mil quatre cens septante-sept, aduint que vng ieune fils Bourreau à Paris nommé petit Iehan, fils de maistre Henry Cousin maistre Bourreau en ladicte ville de Paris, qui desia auoit faict plusieurs exploits de Bourreau: Et entre les aultres auoit executé & couppe le col de messire Loys de Luxembourg Connestable de France, fut tué & meurdry ledit petit Iehan en ladicte ville de Paris, au pourchas d'vng menuisier qui estoit nommé Oudin du Bust natif du pays de Picardie, qui auoit conceu haine mortelle contre ledit petit Iehan, pour raison & cause de ce que ledit petit Iehan auoit frappé ou batu long temps parauant ledit du Bust, pour aucune noise qu'ils eurent

N n

ensemble, à cause de ce que ledit Menuisier du Bust luy demandoit la grosse & feel d'une obligation, en quoy ledit petit Iehan estoit obligié à icelluy Oudin du Bust, & de laquelle obligation ledit petit Iehan auoit payé le principal, & ne restoit que ledit grossement & feel.

Et pour estre ledit du Bust vengé dudit petit Iehan, se associa ledit du Bust de trois ieunes compaignons demourans à Paris. L'vng d'iceux nommé Lempereux du Houlx Sergent à verge. L'autre Iehan du Foing Fontenier & plombreur. Et l'autre nommé Regnault Goris Orfeure fils de Martin Goris Courtier de Geolierie. Tous lesquels quatre de guet à pens & propos delibéré, vindrent assaillir ledit petit Iehan qu'ils trouuerent au coing de la rue de Garnelles près de l'ostel du Moulinet, & vint le premier à luy ledit Empereux du Houx soubz fiance amiable, qui le print par dessoubz le bras en le tenant fermement, en luy disant qu'il n'eust point de paour des dessusdits, & qu'ils ne luy feroient point de mal. Et en luy disant ces choses vint ledit Regnault Goris qui frappa ledit petit Iehan d'une pierre par la teste dont il chancela, & lors ledit Empereux le lascha, & incontinent vint à luy ledit Iehan du Foing que luy bailla d'une jauceline au trauers du corps dont il cheyt mort en la place, & depuis qu'il fut mort ledit Dubust luy vint coupper les jambes, & à tant se departirent les quatre dessusdits, & s'en alerent bouter en franchise aux Celestins de Paris. Auquel lieu la nuit ensuiuant furent prins & tirez dehors par l'ordonnance & commandement de messire Robert Destouteuille,

Cheualier Preuost de Paris, & gens de son Conseil, pource que par information leur apparut dudit guet à pens & propos deliberé, dequoy lefdits Celestins appellerent, & par la Court de Parlement fut l'appel vuidé & dit qu'ils ne iouyroient point des priuileges de l'Eglise. Et apres comme Clers furent requis par l'Euesque de Paris comme ses Clers. Aussi pareillement fut dit par Arrest de Parlement qu'ils ne jouyroient point du preuilege de Clerc, & furent renuoyez par deuant ledit Preuost, par la sentence duquel ils furent tous condempnez à estre pendus & estranglez, dont ils appellerent en la Court de Parlement. Lequel conferma ladicte sentence qui fut executee, & furent tous quatre pendus au Gibet de Paris, par les mains dudit maistre Henry pere dudit petit Iehan, qui pour tant fut vengié de la mort de son dit fils, le ieudy veille de monseigneur sainct Iehan decollasse, vingt huitiesme iour dudit mois. Et furent pendus en la maniere qui s'ensuit, & tout ioignant l'vng de l'autre : c'est assauoir ledit Empereux le premier, Iehan du Foing le second, Regnault Goris le tiers, & ledit Iehan du Bult le quatriesme & dernier. Et est assauoir que lefdits Empereux, du Foing & Goris, estoient trois beaulx ieunes hommes, & en oultre pour ledit cas fut batu de verges & banny du Royaulme de France vng ieune fils Cordonnier, qui auoit conspiré de la mort dudit petit Iehan : mais point ne s'estoit trouué à icelle.

Audit temps le Roy qui estoit au pays de Picardie, se partit dudit pays, & y laissa pour son Lieutenant general monseigneur le Bastard de Bourbon Admiral de

France, pour la conduite de la guerre & garde de tout le pays. Et au regard des gens de guerre de l'ordonnance du Roy & aultres estans pour luy esdits pays, on leur bailla & assigna l'en leur logis en la cité & ville d'Arras, Tournay, Lens, la Bassée, & aultres lieux sur les frontieres de Flandres & autres pays qui encores se tenoient pour ladiète Damoiselle de Flandres fille dudit Duc de Bourgongne. Et apres toutes ces choses ainsi faites & ordonnees le Roy s'en vint à nostre Dame de la Victoire veoir la belle Dame illec a ouree, & puis apres s'en tira à Paris où il ne sejourna gueres, & y estoit le iour de la feste saint Denis. A la reuerence duquel Saint il deliura tous les prisonniers estans en ses prisons de Chastellet de Paris, & puis s'en ala à Tours, à Amboise & aultres lieux voisins où il se tint par assez longue espasse de temps, durant lequel les Bourguignons & aultres ennemis du Roy sous les charges & compagnies du Prince d'Orange, messire Claude de Vouldray & aultres estans en la Conté de Bourgongne, firent & porterent de grans guerres aux gens du Roy estans pour luy audit pays, & en fut fait de grans desconfitures sur lesdits gens du Roy, tant en la ville du Grey sur Sosne & ailleurs, ou lesdits gens du Roy s'estoient logez. Et y tuerent lesdits Bourguignons des Gentils-hommes de l'ordonnance du Roy, sous les charges & compagnies de Sallezart & de Conyngan, Capitaine des Escossois, en bien grant nombre.

En ladiète année le Roy ayant en singuliere recommandation les saints faits de saint Loys & S. Charlemagne, ordonna que leurs Imaiges de piarre pieça

mis & assis en deux des pilliers de la grant salle du Palais Royal à Paris, du rang des aultres Rois de France, feussent descendus, & voulut iceulx estre mis & posez au bout de ladiète grant salle au dessus & au long de la Chappelle estant au bout de ladiète grant salle, ce qui fut fait. Et en furent payez les deniers que l'ouuraige cousta à faire, par Robert Cailletel Receueur des Aydes en ladiète ville de Paris.

Au mois de Decembre audit an, le Roy pour tousiours accroistre son artillerie, voulut & ordonna estre faictes douze grosses bombardes de fonte & metal de moult grande longueur & grosseur, & voulut icelles estres faictes : c'est assauoir trois à Paris, trois à Orléans, trois à Tours, & trois à Amiens. Et durant ledit temps fist faire bien grant quantité de boules de fer es forges estans es bois près de Creil, dont il bailla la charge à maistre Jehan de Reilhac son Secretaire. Et pareillement fist faire es carrieres de Peronne grant quantité de piarres à bombarde. Et aussi faire dedens les bois grant nombre de cheuretes & tauldis de bois, avecques des eschelles à assaillir villes & forteresses, pour auoir & prendre les villes de Flandres & Picardie, qui encores audit temps estoient à reduire.

Audit temps aduint au Royaulme d'Angleterre que pour ce que le Roy Edouart dudit Royaulme fut acertené que vng sien frere qui estoit Duc de Clarence, auoit intention de passer la mer & aler descendre en Flandres, pour donner aide & secours à sa sœur Duchesse en Bourgongne, veufue dudit deffunct le dernier Duc, fist icelluy Roy Edouart prendre & consti-

N n iij



Panier, & d'une aultre femme dissoluë qui chargeoiët ledit Daniel de les auoir efforcees, & en elles faict & commis l'ord & villain peché de Sodome. Et apres que par ladicte Court & par la Iustice du Preuost de Paris eust esté vacqué par long temps à besongner audit procez, icelles femmes se desdirent desdictes charges, en confessant par elles, que icelles charges auoient faictes à la petition & requeste dudit Panier & d'un nommé Ianuier, comme ennemis dudit Daniel, & pour eulx vengier de luy. Pourquoy lesdictes deux femmes par sentence du Preuost de Paris furent condempnees à estre batuës nuës, & bannies du Royaulme de France, leurs biens & heritages confisquées au Roy, surquoy premierement seroient prins les dommages & interests dudit Daniel Panier, premiere-ment & auant toute œuvre. Laquelle sentence fut prononcee & apres executee par les carrefours de Paris, le mercredy vnziesme iour de Mars audit an quatre cens soixante & dix-sept.

Audit an & mois de Mars, le Roy qui estoit à Tours s'en vint vers Paris loger à Ablon sur Seine, en vng hostel appartenant à Marc Senamy Esleu de Paris, où il ne sejourna que deux iours, puis vint à Paris & coucher en son hostel des Tournelles, & d'illec le lendemain matin s'en alla en l'Eglise de Paris faire son oraison à la Benoisste Vierge Marie. Et icelle faicte s'en ala coucher à Louures & és lieux voisins, où il sejourna vng peu de temps, & apres ala à Hesdin, Amiens & aultres lieux de Picardie, où le seigneur de Hauart de par le Roy Edoüart d'Angleterre y vint, & communi-

qua de trouuer accord entre le Roy & les Flamens. Et du costé du Roy y fut commis le seigneur de S. Pierre & aultres. Et durant ce temps le Roy fist tousiours passer son armee audit pays de Picardie, tant ceulx de son ordonnance que nobles, archiers de retenuë, & aultres gens de guerre en bien grant nombre.

Audit temps au mois de Mars quatre cens soixante & dix-huict apres Quasimodo, vint & arriua à Paris madame d'Orleans, monseigneur le Duc d'Orleans, vng jeune enfant fils du Duc de Cleues nepueu d'icelle Dame, madame de Nerbone fille du feu Duc d'Orleans & femme de monseigneur le Viconte de Nerbonne fils du Comte de Fouez, le fils du Comte de Vendosme & aultres plusieurs seigneurs, gentilshommes, dames & damoiselles qui moult bien furent festoices par deux fois en ladicte ville de Paris. Pour la premiere fois par monseigneur le Cardinal de Fouez en l'ostel d'Estampes pres la bastille. Et la seconde fois par monseigneur le Cardinal de Bourbon en son hostel à ladicte ville de Paris, qui y donna à soupper à icelle dame, à toute ladicte compaignie & plusieurs aultres, le mardy dernier iour de Mars audit an quatre cens lxxviij. Et fut ledict soupper moult honorable plantureux & bien & honnestement seruy de tout ce qu'il estoit possible de trouuer, avecques chantres & plusieurs instrumens melodieux, farces, mommeries & aultres honnestes ioyeusetees. Et fut l'affiete dudit soupper en la gallerie doree, reserué madicte dame de Nerbonne qui estoit fort grosse, qui pour son aise auoir avec monseigneur son mary, & iusques au nombre



bre de huiſt ſoupperent en vne chambre baſſe dudit hoſtel au logis de Iehan de Roye Secretaire de monſieur le Duc de Bourbon, & garde dudit hoſtel de Bourbon.

Au mois d'Auril audit an mil quatre cens lxxviij. fut ſceu par Guerin le Groin Baillif de ſainct Pierre le Monſtier, & Robinet du Queſnoy, leſquels & chaſcun de eulx auoient charge de cent lances de l'ordonnance du Roy, & qui eſtoient en garniſon au pays de Picardie, que les Flamens venoient à Douay pour apporter argent à ceulx dudit lieu pour leurs gaiges & ſouldees, & auſſi pour les affaires de ladicte ville. Leſquels Capitaines ſe mirent aux champs pour gagner ledit argent, ce qu'ils firent, & ruerent ius ceulx qui le portoient, & en tuerent aucuns, & pluſieurs priſonniers y furent prins.

Et pour ce que ceux de ladicte ville de Douay & de l'Iſle les Flandres, eurent certaines nouuelles de ladicte deſtrouſſe, ſe mirent aux champs pour reſcourre ledit argent & priſonniers. Et nonobſtant qu'ils feuffent moult grant nombre, noſdits gens ſe ſauluerent parmy eulx, en tuerent quatre vingts & mieulx, & en emporterent ledit argent par eulx gagné. Et n'y mourut point des gens du Roy plus de vingt-fix ou vingt-ſept hommes.

Au mois de May audit an mil quatre cens ſoixante & dix-huiſt, le Roy qui eſtoit au pays de Picardie ne fiſt guere de choſes, ſinon de gagner & auoir par ſa puiſſance vne petite ville nommee Condé, qui eſtoit tenuë par les Bourguignons, laquelle eſtoit fort nui-

O o

sante à aitailler, & porter viures à ceulx de la cité de Tournay. Dedens laquelle ville y auoit des gens de guerre du party du Duc en Auteriche qui se laisserent battre, mais en fin quant ils apperceurent le grant ost qui leur estoit apparant, ils prindrent composition avec le Roy de luy bailler ladicte ville & le chasteau, à quoy le Roy les receipt, & s'en alerent eulx & leurs biens faufs.

En ladicte annee vint à Paris vng Cordelier natif de ville Franche en Beauuiolois, pour prescher à Paris, & illec blasmer les vices, & y prescha bien lóguement, disant & publiant les vices dont les creatures estoient entachees. Et par ses parolles y eut plusieurs femmes qui s'estoient donnees aux plaissances des hommes & aultres pechez qui de ce se retrayrent, & aulcunes d'icelles se mirent & rendirent en Religion, en delaisant leurs plaissances & voluptez ou par auant s'estoient demenees: & si blasma tous les estats, & si prescha de la iustice, du gouuernement du Roy, des Princes & seigneurs de ce Royaulme, & que le Roy estoit mal seruy, & qu'il auoit autour de luy des seruiteurs qui luy estoient traistres, & que s'il ne les mettoit dehors qu'ils le destruiroiet & le Royaulme aussi. Desquelles choses en vindrent nouuelles au Roy, parquoy ordónna qu'on luy deffendist le prescher. Et pour ceste cause vint à Paris maistre Oliuier le Dain Barbier du Roy, pour luy faire deffendre le prescher, ce qui luy fut interdit: ce qui fut à la grant desplaisance de plusieurs homes & femmes qui fort s'estoient rendues enclins à le suyure & oyr ses parolles & predications. Et pour

doubte qu'on ne le print ne que on ne luy feist aucun opprobre, le furent veiller nuit & iour dedens le Conuent des Cordeliers dudict lieu de Paris. Et si disoit on que plusieurs femmes y aloient curieusement de nuit & de iour, qui se garnissoient en leurs patois de pierres, cendres, coulteaulx mucees, & aultres ferremens & bastons pour frapper ceulx qui luy voudroient nuire ou empescher ladicte predication, & qu'ils luy disoient qu'il n'eust point de paour, & qu'ils mouroient auant que esclande luy aduenist.

Durant ces choses s'en ala en Picardie vng Legat de par le Pape, pour remonstrer au Roy & au Duc d'Au-teriche le grant mal que faisoient les Turcs infidelles alencontre de la Chrestienté, en les exhortant de faire paix entre eulx, & de eulx deliberer d'eulx exposer à la deffence de ladicte Chrestienté, & destruire lesdits infideles. Au moyen dequoy fut vng peu cessée ladicte guerre, en esperant trouuer accord en leursdits debats; mais nonobstant ce ne cesserent point les Bourguignons de la Duché & Conté de Bourgongne, de tousiours faire guerre ausdits pays & à l'armee que le Roy y auoit enuoyee, & de prendre sur les gens du Roy, villes, chasteaulx, & places par le Roy recourees, & y tuerent des gens du Roy & francs archiers bien grant nombre.

Et le mardy vingt-sixiesme iour de May fut crié à son de trompe & cry publicque par les carrefours de Paris, côme de toute ancienneté il soit de coustume, & qu'il ne loise à nuls de quelque estat qu'ils soient, de faire assemblees de gens en la ville de Paris sans le con-

gié & licence du Roy ou de sa Iustice. Et que ce neantmoins au moyen de certains sermons & predications puis n'agueres faits en ladicte ville, par frere Anthoine Fradin de l'ordre des Cordeliers, plusieurs personnes se sont assemblees & venuës au Conuent desdits Cordeliers, pour illec garder ledit Cordelier, auquel n'auoit esté fait aucun opprobre par le Roy ne sa Iustice, mais y auoient esté enuoyez seulement aucuns des Conseillers du Roy pour le interroguer sur aucunes choses & matieres secretes, dont le Roy en vouloit sçauoir la verité. Et illec s'estoient tenus nuit & iour près de icelluy frere Anthoine, & pour le garder, si comme ils disoient. Laquelle chose estoit en grant esclandre, parquoy & par l'aduis de la Cour de Parlement & Preuost de Paris estoit interdit & deffendu à toutes personnes de quelque condition qu'ils feussent de non plus faire lesdictes assemblees en ladicte Eglise des Cordeliers, ne ailleurs, sur peine de confiscation de corps & de biens. Et que au regard de ceulx qui ainsi estoient assemblez audit lieu des Cordeliers, incontinent apres le cry se departissent & alast chascun en sa maison sur lesdictes peines, & aux maris qu'ils feissent deffence à leurs femmes de plus aler ne eulx tenir ausdictes assemblees. Apres lequel cry ainsi fait que dit est, fut par grant derision crié par plusieurs des escoutans, que ce n'estoit que folie, & que le Roy ne sçauoit riens des choses dessusdictes, & que c'estoit mal fait d'auoir ordonné de faire ledit cry.

Et le lundy premier iour de Iuing audit an, par le premier President de Parlement, & aultres qui se di-

soient auoir charge du Roy, fut dit & declairé audit frere Anthoine Fradin qu'il estoit à tousiours banny du Royaulme de France, & que pour ce faire il vuydast incontinent & sans arrester hors d'icelluy Royaulme, ce qu'il fist, & vuyda le landemain de ladicte ville de Paris, qui fut mardy second iour dudit mois de Iuing mil quatre cens lxxviij. Et quant ledit frere Anthoine partit dudit lieu des Cordeliers de Paris y auoit grant quantité de populaire, crians & souppirans moult fort son departement, & en estoient tous fort mal contens. Et du couroux qu'ils en auoient, disoient de merueilleuses choses, & y en eut plusieurs, tant hommes que femmes qui le suiuiroient hors de la ville de Paris iusques bien loing, & puis apres s'en retournerent.

Audit temps le Roy qui estoit alé au pays de Picardie, en intention d'auoir & mettre en ses mains & obeissance les villes, places & pays que tenoit le defunct Duc de Bourgongne au iour de son trespas, comme appartenans au Roy, & à luy acquises par la rebellion & desobeissance du deffunct Duc de Bourgongne, & qui pour icelles auoir y auoit mené la plus belle & grande quantité d'artillerie & gens d'armes de son ordonnance, francs archiers & nobles hommes, qui oncques fut veüe en France. Et demoura longuement audit pays cuidant tousiours auoir les Flamens & le Duc Maximien d'Aueriche, qu'ils appelloient leur seigneur, sous vmbre duquel auoir fut enuoyé deuers le Roy luy estant à Cambray & en la cité d'Arras, Ambassadeurs dudit Duc d'Aueriche, qui pour-

O o iij

parlerent de bailler au Roy paisiblement les Contees d'Artois & de Boulongne, l'Isle, Douay, & Orchies, sainct Omer, & aultres villes, avecques la Duché de Bourgongne entiere. Et soubz vmbre desdictes promesses le Roy leur bailla la jouyssance de Cambray, Quesnoy le Conte, Bouchain, & aultres villes. Et pour estre plus près du Roy pour communiquer des choses dessusdictes, s'en vint loger & parquer ledit Duc d'Auteriche, luy & son ost, que on disoit estre vingt mil combatans & mieulx, entre Douay & Arras. Et illec tindrent le Roy en belles parolles soubz vmbre desdictes promesses, iusques en la fin dudit mois de Iuing, que le Roy n'eut aucune chose de ce qui luy auoit esté promis. Et si auoit eu liberalement du Roy icelluy Maximien lesdictes villes, cuidant que de son costé feust entretenu ce que promis luy auoit, dont il ne fist riens, & ny eut aucune conclusion sur ce prinse.

Durant ledit mois de Iuing, l'armee que le Roy auoit enuoyee en la haulte Bourgongne pour recouurer ses villes contre luy rebellees, & dont auoit la charge le Gouverneur de Champagne nommé d'Amboise, prospera fort, & regaignerent & mirent és mains du Roy la ville de Verdun, Monfauion, & Semur en Lauxois, tant par assault que par cōposition. Et apres alerent mettre le siege deuant la ville de Beaulne, où ils furent depuis par aucun temps, & iusques au commencement du mois de Iuillet ensuiuant, & audit an lxxviij. que ladicte ville de Beaulne se rendit au Roy par composition és mains dudit Gouverneur: tellement qu'ils eurent leurs vies & biens saufs, & payerent

en ce faisant par forme d'amende pour leurs defaultes quarante mil escus, & si furent condempnez à rendre & restituer tout le vin & aultres debtes qu'ils pouuoient deuoir aux marchans de Paris, & aultres marchans du Royaulme, tant en vin par eulx vendu & non liuré, que d'argent à eulx baillé & presté. Et au regard des gens de guerre ils s'en alerent par ladicte composition franchement & quittement, eulx & leurs biens saufs.

Audit mois de Iuillet furent & se transporterent en ladicte ville d'Arras par deuers le Roy illec estant, vne grande Ambassade dudit Duc Maximien d'Autriche, & aussi des habitans des villes & pays de Flandres: Lesquels furent oys par le Roy & son Conseil, & sur ce qu'ils voulurent dire à grande & meure deliberation, fut appointé entre le Roy & lesdits Maximien & Flamens, que la guerre qui lors estoit audit pays cesseroit iusques à vng an, pendant lequel yroient seurement de chascun des deux costez toutes personnes de l'vng party en l'autre, & que toute marchandise auroit son plain cours. Et à tant s'en departit le Roy, & s'en vint loger vers Paris, & ne entra point en la ville, pour cause de ce que on luy dist que on s'y mouroit, & s'en ala prés de Vendosme, où il se tint par aucun téps. Et apres ala à Behuart, & aultres pelerinaiges à sa deuotion.

En ladicte annee & au retour dudit pays le Roy fist de grans dons à plusieurs Eglises & diuers saincts: car il vint veoir la Benoisie Vierge Marie de la Victoire prés Senlis, où il donna deux mil francs, qu'il vult

estre employez à faire des lampes d'argent deuant l'autel de ladicte Vierge. Et aussi fist couvrir d'argent la chasse de monseigneur saint Fiacre où il fut employé de sept à huit vingts marcs d'argent. Et en oultre pour sa grande & singuliere confidence que de tout temps il a eu à monseigneur S. Martin de Tours, vult & ordonna estre faitvng grant treillis d'argent tout autour de la chasse dudit saint Martin, lequel y fut fait, & pesoit de seize à dix-sept mil marcs d'argét, qui cousta auant que estre prest & tout assis, bien deux cens mil francs. Et est assauoir que pour finer de ladicte grande quantité d'argent à faire les ouuraiges dessusdits, furent ordonnez commissaires pour prendre & saisir toute la vaisselle qu'on pouoit trouuer à Paris & aultres villes, laquelle vaisselle fut payee raisonnablement: mais non obstant ce, en fut grande quantité mucee & ne fut plus veuë es lieux où elle auoit acoustumé de courir. Et à ceste cause de là en auât quant on aloit aux nopces franches & aultres, ou on auoit accoustumé dy en veoir largement, ny estoient trouuez que beaulx verres & esguieres de verre & feugiere.

En icelluy temps le Roy fist faire grant assemblee des Prelats, gens d'Eglise, de grans Clers, tant des Vniuersitez de Paris, Montpelier, que d'aultres lieux, pour eulx trouuer & assembler en la ville d'Orleans, pour subtillier & trouuer moyen de rauoir la Pragmatique, & que l'argent des vaccans & benefices ne fussent plus portez à Rome, ne tyrez hors de ce Royaume. Et pour ceste cause se tint ladicte assemblee ainsi estant à Orleans, où presidoit pour le Roy monseigneur de Beau-  
jeu,



jeu, monseigneur le Chancelier & aultres du Conseil du Roy. Lequel monseigneur le Chancelier en la presence de monseigneur de Beaujeu dist & declaira les causes pourquoy ladicte assemblee estoit ainsi faicte audit Orleans, & les causes qui mouuoient le Roy d'auoir fait faire icelle assemblee, laquelle proposition fut responduë par maistre Iean Hue, Doyen de la faculté de Theologie pour ladicte Vniuersité de Paris, qui en ce faisant fist de grandes remonstrances & parla fort & hardiement, pource qu'il estoit aduoué de par lesdits de l'Vniuersité de Paris. Et aussi y parla pour ladicte Vniuersité de Montpellier vng aultre grant Clerc, qui aussi parla moult bien. Et apres que icelle assemblee eut illec esté certaine espace de temps, le Roy vint à sa deuotion en l'Eglise nostre Dame de Clercy, & apres sa deuotion faicte ala audit lieu d'Orleans, où il ne sejourna que demie iournee. Et apres qu'il s'en fut retourné tout ledit Conseil ainsi assemblé que dit est, sans conclure se departit, & ala chascun dont il estoit party pour y venir, & fut ledit Conseil remis à Lyon au premier iour de May apres ensuiuant.

En apres le Roy estant audit pays de Touraine, enuoya ses lettres closes à ses bons Bourgeois de Paris, leur faisant sçauoir quant il auoit enuoyé ses Ambassadeurs par deuers le Roy de Castille & de Leon, sur aucuns differens qui estoient entre le Roy & luy, affin de trouuer aucun bon accord entre eulx sur lesdits differens, lesquels ses Ambassadeurs estoient retournez dudict voyage, & auoient rapporté que ledit Roy de Castille estoit bien content du Roy, & luy auoit promise &

P p

iurce bonne amour & vraye aliance: pourquoy le Roy voulant de ces choses estre loué & regrécié Dieu nostre Createur & la Benoisite Glorieuse Vierge Marie, mandoit ausdits de Paris que de ce ils feissent processions generalles à Paris, & que les feux en feussent faits parmy les ruës de ladicte ville: Laquelle chose fut faicte. Et furent icelles processions faictes, qui alerent de Nostre Dame à madame sainte Geneuiefue au mont de Paris, & y fut illec presché par le Prieur des Carmes, qui illec declaira bien au long & honorablement l'intention & contenu desdictes lettres du Roy.

En ladicte année au mois d'Octobre, aduint au pays d'Auuergne que en vne Religio de moines noirs, appartenant à monseigneur le Cardinal de Bourbon, y eut vng des Religieux dudit lieu qui auoit les deux sexes d'homme & de femme, & de chascun d'iceulx se aida tellement qu'il deuint gros d'enfant, pourquoy fut prins & faisi, & mis en Iustice & gardé iusques à ce qu'il fut deliuré de son postume, pour apres icelluy venu estre fait dudit Religieux ce que Iustice verroit estre à faire.

Audit pays aduint aussi que vng Gentilhomme dudit pays d'Auuergne nourrissoit vng lyon, qui luy eschappa & le perdit par aucun temps, qu'il ne sçauoit où il estoit deuenue. Laquelle beste s'en ala à l'escart & sur aucuns chemins, là où mengea & deuoura plusieurs creatures, tant hommes que femmes, pour cause de quoy grant nombre de gens dudit pays se mirent sur les champs pour le tuer, & y ala aussi sondit maistre, & tant firent qu'ils trouuerent ladicte beste. Laquelle en-

tre autres personnes reconneut & vint à sondit maître, & incontinent fut tuee & meurdrie. Et pareillement aussi audit pays y fourdit vne fontaine en lieu ou iamais n'en auoit point eu, & illec deuint la terre mouuant & tremblant merueilleusement.

Audit an lxxviii. au mois de Nouembre, vng nommé Symon Courtois, que le Roy auoit fait son Procureur general par toute la Conté d'Artois, au moyen de la treue qui estoit entre le Roy & les Flamens, se partit de la ville d'Arras faingnant aller en ses affaires au pays de Flandres. Auquel pays s'en ala par deuers la Contesse dudit Flandres, femme de Maximien d'Autriche, par deuers laquelle & non content de l'honneur à luy fait par le Roy de l'auoir ainsi créé sondit Procureur general en ladicte Conté, dist à icelle Contesse qu'il estoit bien son seruiteur, comme ses autres parens auoient esté, & qu'elle vouldist prendre de luy le serment & creer sondit Procureur, & de raison elle luy reuouldroit, & aimoit mieux qu'elle feust & demourast en ses mains que en celles du Roy. Lesquelles choses qui furent sceuës par le Gouverneur dudit Arras pour le Roy, fut ledit Symon Courtois prins & faisi, & mené deuers le Roy à Tours, où il confessa tout ce que dit est dessus. Et à ceste cause il fut decapité.

Audit an lxxviii. le lundy deuant les Rois, aduint que plusieurs officiers du Roy en son artillerie, firent assortir vne grosse bombarde qui en ladicte annee auoit esté faicte à Tours, pour illec essayer & esprouuer, & fut acculee la queue d'icelle aux champs deuant la Bastille saint Anthoine, & la gueulle d'icelle en tirant

P p ij



vers le pont de Charenton. Laquelle fut chargée pour la première fois & tira tres-bien, & porta la pierre d'icelle de volée iusques à la Iustice dudit pont de Charenton. Et pour ce qu'il sembla aux dessusdits qu'elle ne s'estoit pas bien deschargée de toute la pouldre qui mise & boutée auoit esté dedens la chambre d'icelle bôbarde, fut ordonné par les dessusdits que encores seroit chargée de nouveau; & que de rechief seroit tirée pour seconde fois, & que auant ce elle seroit nettoyée dedens la châtre d'icelle auant que d'y mettre la poudre, ce qui fut fait, & fut faite charger & boutée sa boule qui pesoit 500. liures de fer, dedens la gueule d'icelle bôbarde, à laquelle gueule estoit vng nommé Jehan Maugue fondeur, qui icelle bombe auoit faicte: laquelle boule en rollant au long de la volée contre le tampon de la chambre de icelle bombe, se deschargea incontinent, sans sçauoir dont le feu y vint. A cause de quoy elle tua & meurdrit & mist en diuerses pieces ledit Maugue, & iusques à quatorze aultres personnes de Paris, dont les testes, bras, iambes & corps, estoient portez & gettez en l'air, & en diuers lieux. Et ala aussi ladicte boule tuer & mettre en pieces & lopins, vng pauvre garçon oyseleur qui tendoit aux champs aux oyseaulx. Et de la pouldre & vent de ladicte bombe, y en eut quinze ou seize aultres personnes qui tous en eurent plusieurs de leurs membres gastez & brulez, & en mourut plusieurs depuis. Et tellement que de ceulx qui y moururent ledit iour, que de ceulx qui furent happez dudit vent, en mourut en tout de vingt-deux à vingt-quatre personnes. Et apres le

trespas dudit Maugue fondeur de ladicte bombarde, son corps fut recueilly, ensepuey, & mis en biere, & porté à sainct Merry à Paris son patron, pour y faire son seruice, & fut crié par les carrefours de Paris que on priaist pour ledit Maugue, qui nouuellement estoit allé de vie à trespas entre le ciel & la terre, au seruice du Roy nostre Sire.

En ladicte annee le mardy second iour de Mars, le corps d'vng nommé Laurens Garnier de la ville de Prouins, qui auoit par Arrest de la Cour de Parlement esté pendu & estranglé au gibet de Paris vng an & demy par auant ledit iour, pour occasion de ce qu'il auoit tué & meurdry vng Collecteur ou Receueur de la Taille dudit lieu de Prouins, & duquel cas il auoit obtenu remissiõ qui ne luy fut point enterinee par ladicte Court, fut au pourchas d'vng sien frere fait despendre dudit gibet par Henry Cousin Executeur de la haulte Iustice audit lieu de Paris. Et illec fut ensepuey ledit corps & mis en vne biere couuerte d'vng cercueil, & dudit gibet mené dedens Paris par la porte Sainct Denys, & deuant icelle biere aloient quatre crieurs de ladicte ville sonnant de leurs clochetes, & en leurs poitrines les armes dudit Garnier, & autour d'icelle biere y auoit quatre cierges & huit torches, qui estoient portees par hommes vestus de dueil & armoyez comme dit est. Et en tel estat fut mené passant parmy ladicte ville de Paris iusques à la porte saint Anthoine, ou fut mis ledit corps en vng chariot couuert de noir, pour mener inhumer audit Prouins. Et l'vng desdits Crieurs qui aloit deuant ledit corps, crioit bonnes

P p iij

gens dictes vos patenostres pour l'ame de feu Laurés Garnier en son viuant demourant à Prouins, qu'on a nouuellement trouué mort sous vng chesne, dictes en vos patenostres que Dieu bonne mercy luy face.

En ladicte annee audit mois de Mars le ieudy xviii. iour dudit mois, vng Gentilhôme nommé Oriole natif du pays de Gascongne, qui auparauant auoit eü la charge & conduicte de par le Roy de cent lances de son ordonnance, laquelle charge & ordonnance le Roy auoit nouuellement fait casser avecques aultres, laquelle chose il print à desplaissance. Et à ceste cause fut rapporté que ledit Oriole parloit mal & vsoit de menasses, & que avecques ce aussi qu'il mist en deliberation avecques le Lieutenant de sa compaignie, de delaisser le Roy & son seruice, & aler seruir en guerre son aduersaire le Duc en Auteriche. En quoy faisant commettoit crime de leze Majesté enuers son souuerain seigneur, pour lesquels cas & aultres furent iceulx Oriole & sondit Lieutenant decapitez en la ville de Tours ledit iour de ieudy. Et apres ladicte execution faicte furent portez par maistre Denis Cousin Exécuteur de la haulte Iustice, & qui auoit executé ledit Oriole & sondit Lieutenant, leurs testes & partie de leurs membres attachez & mettre aux portes d'Arras, & Béthune, au pays de Picardie.

Audit an & mois de Mars fut aussi prins prisonnier à Paris vng nommé le seigneur de Mauues, qui aussi auoit esté cassé de la charge de cent lances, dont aussi auoit eü la charge pour le Roy, & fut prins en l'ostel du Cornet près saint Iehan en Gréue par Phelippe

Luillier Escuyer Capitaine de la Bastille S. Anthoine, & par luy ou par aultres mené prisonnier audit lieu de Tours par deuers le Roy qui lors y estoit. Et depuis fut deliuré comme ignorant des cas à luy impofez.

Au mois d'Auril quatre cens foixante & dix-neuf apres, le Roy qui estoit au pays de Touraine delibera du fait de sa guerre, & de ce qui estoit de faire touchant le fait d'icelle, pource que la treue qui sur ce auoit esté entre luy d'une part & le Duc en Auteriche d'autre part, estoit presque faillie. Et que par ledit d'Auteriche n'auoit esté aucune Ambassade enuoyé deuers luy pour accord faire entre eulx sur leurs differens. Et pour conclure de ce qu'ils auoient à faire apres la fin d'icelle treue.

Au mois de May ensuiuant nonobstant que ladicte treue ne feust empirée ne faillie, les manans & habitans de la ville de Cambray mirent & bouterent les Picars, Flamens, & aultres ennemis du Roy tenans le party dudit Duc en Auteriche dedens ladicte ville de Cambray. Et d'icelle en dechasserent & mirent dehors les gens de guerre qui estoient dedens le Chasteau de ladicte ville de par le Roy, nonobstant que ladicte ville le Roy auoit laissée & baillée en la garde & confidence du seigneur de Fiennes, & incontinent apres vindrent de trois à quatre cens lances desdits Flamens & Picars, deuant la ville & chastel de Bouchain, dedens laquelle n'y auoit en garnison pour le Roy que seize lances qui se retrahirent dedens ledit chastel, pource qu'ils apperceurent que les habitans dudit Bouchain auoient deliberé de mettre lesdits ennemis du Roy de-

dens leur ville, incontinent qu'ils y feroient arriuez, ce qu'ils firent. Et incontinent eulx arriuez vindrent lefdits habitans assaillir lefdits gens du Roy, que par force ils prindrent & les tuerent tous dedens ledit chasteau, & de tous ceulx qui y estoient n'en eschappa que vng seul, lequel s'enferma dedens vne chambre, & par vng tuyau des chambres aisees se laissa cheoir dedens les fossez & se faulua: desquelles entreprises & choses ainsi faictes, le Roy en fut fort mal content, & non sans cause, veu que ladicte treue rompuë & entreprises dessusdites ne se faisoient point pour aucune faulte ou coulpe, que eussent fait les gens de guerre du Roy sur lefdits ennemis.

Et à ceste cause le Roy enuoya certain grant nombre d'artillerie en la Duché & franche-Conté de Bourgongne, auecques grant nombre de nobles hommes & francs archiers du Royaulme de France, par deuers le Gouverneur de Champaigne, qui estoit Gouverneur & Lieutenât General du Roy audit pays de Bourgongne, pour recouurer ledit pays & mettre de rechief en sa main. Et y besongnerent lefdits Gouverneur & ceulx de sa compaignie si vaillamment que par assault & port d'armes ils gaignerent d'assault le chastelet de Rochefort, & tuerent tous ceulx qui estoient dedens, en pillant tout ce qu'ils y trouuerent. Et de là s'en alerent deuant la cité de Dole, qui fut fort batuë d'artillerie, & apres fut assaillie tellement qu'elle fut prise d'assault, à cause dequoy plusieurs gens de façon & bons marchans y moururent, & si fut ladicte ville arrasee & mise par terre.

Au



Au mois de Iuing ensuiuant messire Robert Destouteuille, Cheualier seigneur de Beine, qui auoit esté Preuost de Paris par l'espace de xliij. ans, ala de vie à trespas audit lieu de Paris. Et en son lieu le Roy donna ledit office de Preuost de Paris à Iacques Destouteuille, fils dudit deffunct Preuost, en faueur de ce qu'il disoit que ledit deffunct l'auoit bien & loyaument seruy à la rencontre de Montlehery & aultres diuers lieux.

Durant ces choses le Roy estant à Montargis oyt les nouuelles des choses dessusdictes, dont il fut fort ioyeux, & lors se partit & s'en ala à Nostre Dame de la Victoire près Senlis y faire ses offrandes, & de là s'en vint au bois de Vinciennes où il ne seiourna que vne nuyt. Et d'illec se partit & print son chemin pour aler à Prouins, & de là au pays de Champaigne, à Langres & aultres lieux, & cependant fut chargé à Paris par la riuere de Seine moult grant nombre de belle & grosse artillerie, entre laquelle y auoit seize grosses bombardes toutes de fonte, & grant quantité de pouldres & salpestre pour mener à Chalons en Champaigne, à Bar le Duc, & d'illec aler conquerir la Duché de Luxembourg, mais ledit voyage fut rompu & n'en fut riens fait.

Et le Samedy tiers iour de Iuillet audit an lxxix. vint & arriua à Paris vne moult belle & honneste Ambassade du pays d'Espaigne, que menoit & conduisoit pour le Roy l'Euesque de Lobes, Abbé de S. Denis en France. Et les furent recepuoir aux champs hors de ladicte ville les Preuost des Marchans & Escheuins de ladicte ville, & aultres estats d'icelle ville, & apres leur

Q q

entree faicte en icelle ville s'en alerent à Sainct Denis, où ils furent fort festiez par ledit Abbé dudit lieu, & aussi audit lieu de Paris par aucuns des gens & officiers du Roy estans en icelle.

En icelle annee lxxix. arriva en France vng ieune Prince du Royaulme d'Escoce nommé le Duc d'Albanie frere du Roy d'Escoce, qui par ledit Roy estoit dechassé hors dudit Royaulme, lequel s'en vint au Roy à reffuge, qui luy fist faire grant honneur à l'entree qu'il fist à Paris: car au deuant de luy furent aux champs par la porte Sainct Anthoine, sur le chemin alant au bois de Vinciennes, tous les estats de Paris avecques & en la compagnie de Monseigneur de Gaucourt, qui comme Lieutenant du Roy le recueillit bien honorablement. Et d'illec fut amené & conduit dedens Paris & mené loger en la rue Sainct Martin, à l'enseigne du coq, où depuis il fut longuement logé, & ses gens & compagnie tout aux despens du Roy, combien que de sa compagnie & gens de nation n'auoit avecques luy que de dix à douze cheuaux, & le fist le Roy accompagner par messeigneurs de Monypigny Cheualier, le seigneur de Congressault, qui estoit aussi Escossois.

Au mois d'Aoust ensuyuant les Picars, Flamens, & aultres ennemis du Roy, estans logez és pays de Flandres & aultres villes contraires au Roy, se mirent sur les champs tendans affin de trouuer & combattre les gens du Roy, & vindrent pour ce faire près de la ville de Therouenne, laquelle ville tenoient les gens du Roy, & lesquels ennemis cuidoient auoir & emporter ladiète ville par force & violence. Et apres leur ve-

nuë la battirët fort de leur artillerie, à quoy il fut vaillamment refistë & contredit par monseigneur de S. Andry, comme Lieutenant de cent lances de monseigneur le Duc de Bourbon, & aultres Capitaines & nobles hommes del'ordonnance du Roy. Et dudit exploict en furent aduertis les aultres gens de guerre estans pour le Roy en garnison esdits pays de Picardie, tous lesquels pour secourir lefdits de Therouenne & ladicte ville, se assemblerent & mirent sus les chäps & vindrent trouuer lefdits Picars, Flamens, & aultres gens de guerre ennemis du Roy, à enuiron vnelieuë près dudit Therouenne: lesquels ennemis & aduersaires estoient grant nombre, comme lx. mil combattans, qui estoient menez & conduits par ledit Duc en Auteriche, le Comte de Romont & aultres seigneurs tenans ledit party, desquels vindrent frapper les gens du Roy estans en garnison audit Therouenne, avecques plusieurs des compagnies des lances que le Roy auoit en Picardie, dont auoit la conduite le seigneur des Querdes & aultres Capitaines avecques luy, tous lesquels par grant vigueur & honnesté couraige frapperent dedens lefdits aduersaires & ennemis, & tellement qu'ils deffirent toute l'auantgarde dudit Duc en Auteriche, à cause dequoy y eut grant occision des gens dudit Duc, & y perdirent beaucoup de biens, & furent menez chassans. Et pour ce que aucuns francs archiers du Roy qui suiuoient ladicte chasse se mirent à piller le bagaige, & aultres biens laissez par lefdits aduersaires, ainsi chassez comme dit est, vint sur lefdits francs archiers & aultres gens de guerre le Conte de

Q q ij

Romont, qui bien auoit de quatorze à quinze mil piétons picquiers, qui tuerent partie desdits francs archiers & aultres gens de guerre. Et tant y en mourut des deux costez, qu'on disoit & estimoit les morts de quatorze à quinze mil combatans, dont en y eut desdits Bourguignons, Picars & Flamens, de morts enuiron de vnz à douze mil combatans, sans les prisonniers, dont les gens du Roy prindrent grant quantité : c'est assauoir comme de neuf cens à mil prisonniers, entre lesquels y fut pris vng des fils du Roy de Poulaine, & vng aultre ieune fils qu'on disoit estre le mignô dudit Duc en Auteriche, avec grant nombre de gens de bonne & grande maison, & tous bons prisonniers. Et au regart des gens de l'armee du Roy y mourut le Capitaine Beauuoisien & Vuaste de Mompédon, Bailif de Rouën, & des gens de guerre de l'ordonnance du Roy y mourut enuiron trois cens archiers de ladicte ordonnance, sans les francs archiers.

Et apres ladicte desconfiture ainsi faicte que dit est, ledit Duc en Auteriche, le Conte de Romont & aultres de leur compaignie se ralierent & vindrent deuant vne place nommee Malaunoy, dedens laquelle estoit vng Capitaine Gascon nommé le Capdet Remonnet, & avecques luy de sept à huit vingts lacquets arbalestriers aussi Gascons, laquelle place par lesdits d'Auteriche & Romont fut assaillie. Et par lesdits Gascons fut fort resisté, mais en fin furent emportez d'assault, & y moururent la pluspart desdits lacquets, & les aultres se getterent dedens les fossez. Et au regard dudit Capdet il fut prins prisonnier & mené pour assurance

deuers ledit d'Auteriche, lequel nonobstant ladicte assurance & trois iours apres ladicte prise, & de sang froit & rassis ledit d'Auteriche le fist pendre & estrangler. Et pour vengeance faire de sa mort le Roy tres-mal content d'icelle fist pendre iusques au nombre de cinquante des meilleurs prisonniers que ses gens d'armes eussent en leurs mains, & par le Preuoist des Mareschaulx lequel les fist pendre: c'est assauoir sept des plus especiaux prisonniers, au propre lieu ou le Capdet Remonnet auoit esté pendu, dix aultres prisonniers deuant Douay, dix aultres deuant S. Omer, dix deuant la ville d'Arras, & dix deuant l'Isle. Et estoit ledit Preuoist acompaigné pour faire faire ladicte execution, de huit cens lances & six mil francs archiers, tous lesquels apres icelle execution faicte s'en alerent coste la Conté de Guynes, & en reuenant iusques en Flandres, prendrent dix-sept places & maisons fortes, & tuerent & bruslerent tout ce qu'ils trouuerent, & en emmenerent beufs, vaches, cheuaulx, iusques és aultres biens, & apres s'en retournerent en leursdictes garnisons.

Audit temps fut prins sur mer par Coulon & aultres escumeurs de mer en Normendie pour le Roy, iusques à quatre vingts nauires de Flandres, qui estoient alez querir des seigles en Pruce pour aitailler le pays, & tout le harenc de la pesche d'icelle annee, où il fut fait la plus grant desconfiture qui passé à cent ans fut faicte sur mer, à la grande confusion & destruction desdits Flamens.

En l'annee mil quatre cens quatre vingts passerent la mer d'Angleterre pour venir en France par deuers

Qq iij

le Roy, le seigneur de Hauart, vng Prothonotaire, & aultres Ambassadeurs Anglois, pour le fait de l'entretènement de la treue d'entre le Roy & le Roy d'Angleterre, lesquels Ambassadeurs furent bien receus du Roy, & leur fist on bonne chiere & grant, & s'en retournerent apres leur expedition. Et leur fut donné par le Roy de l'or content & de belle vaisselle d'argent.

En ladicte annee mil quatre cens quatre vingts, le Roy bailla lettres de commission à maistre Jehan Auin Conseillier en sa Court de Parlemēt, & à Jehan Doyac de la ville de Cusset en Auvergne, pour faire sur monseigneur de Bourbon ses villes, pays, officiers, & bons subiects, plusieurs dampnez exploicts & nouuelletez, que lesdits Commissaires prindrent ioyeusement à faire, cuidans destruire & porter dommaige audit monseigneur le Duc, contre Dieu & raison & sans cause: mais pour complaire à la volenté du Roy qui le menoit, affin de destruire ledit seigneur & mettre en exil. Et par lesdits Commissaires en ensuiuant leurdicte commission firent adiourner à comparoir personnellement en la Court de Parlement à Paris, la pluspart des officiers d'icelluy monseigneur le Duc, comme son Chancelier, son Procureur general, le Capitaine de sa garde, & autres plusieurs en grant nombre, qui y comparurent au iour à eux assigné, ou par Commissaires d'icelle Court furent examinez. Et pour ce faire longuement detenus en arrests en ladicte ville, alencontre desquels maistre François Hale Aduocat du Roy en ladicte Court de Parlement, lesquels pour son plaisir faire contre Dieu & raison, le seruice de corps & d'a-

me. Et apres par ladicte Court furent ellargis & renuoyez en leurs maisons.

Et apres ces choses ainsi faiçtes fut aussi adiourné à comparoir en ladicte Court maistre Jehan Herbert Euesque de Constances pour respondre à plusieurs crimes & cas à luy imposez, où il vint & comparut, & fut sur ce interrogué, & puis par Arrest de ladite Court fut fait constitué prisonnier és prisons de la Conciergerie, & tous ses biens & temporel mis en la main du Roy.

En ladicte annee au mois d'Aoust fut fait treue avec le Duc en Auteriche pour sept mois, dont les trois mois deuoient estre marchans, les trois aultres d'astinence de guerre, & le septiesme mois de repentailles.

En ladicte annee au mois de Septembre le lundy quart iour dudit mois, vng Legat du Pape nommé le Cardinal de saint Pierre ad Vincula qui estoit venu en France, & arriua en la ville de Paris où il fut honnorablement receu par tous les estats de Paris, qui alerent au deuant de luy par la porte saint Iacques. Et par tout son chemin où il passa par ladicte ville estoit tout tendu de tapisserie iusques à l'Eglise Nostre Dame de Paris, où il fist illec son oroison. Et apres icelle faiçte s'en ala en son logis qui luy estoit ordonné au Colliege de saint Denys près les Augustins. Et l'accompaignoit & estoit tousiours près de luy tres-noble, tres-Reueréd pere en Dieu monseigneur le Cardinal de Bourbon.

Et le landemain qui fut mardy sixiesme iour dudit mois, maistre Oliuier le diable dit le Dain, Barbier du Roy, festoya lesdits Legat, Cardinal de Bourbon, & moult d'aultres gens d'Eglise, & nobles hommes, tant

plantureusement que possible estoit. Et apres disner les mena au bois de Vinciennes esbatre & chasser aux Dains dedens le parc dudit bois, & apres s'en reuint chascun en son hostel.

Et le ieudy ensuiuant veille de la Natiuité de la Benoisie Vierge Marie & vendredy ensuiuant, ledit Legat fut aux Vespres & Messe en l'Eglise Nostre Dame de Paris, ou moult de gens de tous estats furent en la dicte Eglise, pour veoir faire ledit seruice audit Legat, qui le fist bien & honnorablement.

Et le Dimanche ensuiuant douziesme iour dudit mois, ledit Legat ala disner & soupper en l'ostel de Bourbon à Paris, ou mondit seigneur le Cardinal de Bourbon le festoya, & y mena ledit Legat plusieurs Archeuesques, Euesques, & aultres seigneurs & Gentilshommes, ou estoient l'Archeuesque de Besançon & celui de Sens, les Euesques de Chartres, celui de Neuers, celui de Tonne, celui d'Amiens, celui d'Alec, & aultres, le seigneur de Cultron, Moireau Maistre d'ostel du Roy, & plusieurs aultres Gentils-hommes & gens d'Eglise, où ils furent moult hōnorablement festoyez.

Et le lundy apres ensuiuant xiiij. iour dudit mois, ledit Legat se partit de Paris & s'en ala à S. Denis en France, où aussi il fut festoyé par l'Abbé de S. Denis, & dudit S. Denis s'en ala au pays de Picardie & Flandres, pour cuider communiquer avecques les Flamens & Picars, & essayer de faire aucun accord entre le Roy & eulx sur leurs differens, où il fut depuis par long temps, la pluspart d'iceluy sejourant à Perōne, cuidant auoir leur accèps d'entrer audit pays de Flandres, ou le Roy y enuoya



enuoya aussi maistre François Haslé, le Preuost de Paris & aultres, qui sans y riens faire retournerent à Paris. Et aussi retourna ledit Legat audit lieu de Paris le ieu-  
dy deuant Noël vingt & vnielme iour de Decembre  
mil quatre cens quatre vingts, lequel Legat ala voir  
monseigneur le Cardinal de Bourbon, avec lequel il  
souppa & coucha, & le landemain s'en partit dudit  
hostel par la porte doree, & passa la riuere iusques en  
l'ostel de Neelle, où il monta à cheual avec ses gens qui  
illecl'attendoient. Et s'en ala iusques à Orleans où il se-  
journa certain temps, pendant lequel le Roy fist deli-  
urer le Cardinal Balue, & s'en ala audit Orleans deuers  
ledit Legat. Et en ce temps se tint le Roy au pays de  
Touraine où il demoura par la pluspart de l'yuer, &  
iusques à enuiron les Rois qu'il s'en ala à Poictiers &  
aultres lieux, & puis s'en retourna à Tours & aux for-  
ges, vers la fin du mois de Ianuier.

En ce temps le Roy fist casser & abatre tous les francs  
archiers du Royaulme de Frâce, & en leur place y voult  
estre & demourer pour seruir en ses guerres les Souys-  
ses & picquiers. Et fit faire par tous coustelliers grant  
quantité de picques, hallebardes, & grans dagues à lar-  
ges roüelles.

En ladiète annee l'yuer commença tard, & ne gela  
point qui ne feust le landemain de Noël iour saint  
Estienne, & dura iusques au huietieime Feburier, qui  
font six sepmaines, durât lequel temps fist la plus gran-  
de & aspre froidure que les anciens eussent iamais veu  
faire en leurs vies, & furent les riuieres de Seine, Mar-  
ne, Yonne, & toutes aultres riuieres affluans en ladiète

R r

riuere de Seine, prises & geles si tres-fort que tous charrois, gens, & bestes passoient par dessus la glace. Et au desgel desdictes riuieres en aduint plusieurs grans maux & dommages, à cause desdictes glaces qui en emporterent plusieurs ponts estants sur lesdictes riuieres, & les glaçons firent de grans dommages: car ils rompirent & emporterent grant quantité de basteaulx, dont parties en alerent frapper contre les ponts Notre Dame, sainct Michel d'icelle ville de Paris, lesquels basteaulx sauuerent plusieurs grans heurs que eussent fait lesdits glaçons contre lesdits ponts, qui furent en bien grant dangier d'estre abatus. ~~Et~~ pour la paour que en eurent les demourans sur lesdits ponts, desemparement lesdits ponts, eulx & leurs biens, iusques le dangier en feust passé, & lesquels glaçons rompirent sept des pieux du moulin du Temple. Et à ceste cause ne vint point de bois à Paris par la riuere de Seine, & fut bien chier, comme de sept à huit sols pour le moule: mais pour secourir le poure peuple, les gens des villaiges amenerent en ladicte ville à cheuaulx & charrois grant quantité de bois vert. Et eust esté ledit bois plus chier se les Astrologiens de Paris eussent dit verité, pource qu'ils disoient que ladicte grande gelee dureroit iusques au huietieme iour de Mars, & il desgella trois sepmaines auant, mais despuis ledit desgel le temps fut fort froit iusques bien auant le mois de May, à cause de quoy plusieurs bourgeois des vignes qui estoient trop auancees furent perdus & gelez, & les fleurs des arbres & les fouches en diuers lieux perdues & gellees.

Durant ledit yuer & iusques au mois d'Apuril, que

faillloit la treue entre le Roy & les Flamens, ne fut riens fait de costé ne d'aultre, pource que lesdits Flamens enuoyerent leur Ambassade deuers le Roy à Tours, auxquels il donna expedition & continua les treues d'vng an, esperant que durant icelluy se trouueroit quelque bon expedient de paix finale.

Audit temps les Ambassadeurs du Roy Edouart d'Angleterre vindrent par deuers le Roy, pour le faict de la treue, & print le Roy la peine d'aler deuers eulx iusques à Chasteau Regnault, où le Roy les ouyst sur la matiere pourquoy ils estoient venus: Et illec furent expediez par le Roy & puis s'en retournerent en Angleterre. Et apres leur partement fut dit & publié que la treue d'entre lesdits deux Rois estoit continuee pour bien long temps.

Audit an mil quatre cens quatre vingts au mois de Mars, le Roy estant en son hostel du Pleffis du parc lez Tours, fut merueilleusement malade d'vne maladie qui soudainement le print, dont fut dit depuis qu'il fut en grant dangier de mort, mais moyennant l'ayde de Dieu la santé luy fut rendüe, & reuint en conualescence.

En l'annee mil quatre cens quatre vingts & vng, le Roy vult & ordonna que certain camp de bois qu'il auoit fait faire pour tenir les champs contre ses ennemis, feust drecié & mis en estat en vne grant plaine près le pont de l'Arche, pour illec le veoir, & dedens icelluy certaine quâtité de gens de guerre armez avec halebardiers & picquiers que nouuellement auoit mis sus, dõt il auoit donné la conduite desdits gens de guerre à mes-

R r ij

fire Phelipe de Creuecueur, Cheualier seigneur des Querdes, & à maistre Guillaume Picquart Baillif de Rouen, dedens lequel camp il vult que lesdits gens de guerre feussent par l'espace d'vng mois pour sçauoir comment ils se conduiroient dedens, & pour sçauoir quels viures il conuiendroit auoir à ceulx qui seroient dedens ledit camp, durant le temps qu'ils y seroient. Et pour aler audit camp que le Roy auoit ordonné estre prest dedens le quinziesme iour de Iuing, le Roy s'approcha près de Paris, & fist la feste de Pen-thecouste à Nostre Dame de Chartres, & d'illec s'en ala audit pont de l'Arche, & de là audit camp, qui fut choisi & assis entre ledit pont de l'Arche & le pont S. Pierre, partie duquel camp tel qu'il pouoit contenir fut fossoyé au long de ce qui en fut dressié, & dedens fut tendu des tentes & pauillons, & aussi y fut mis de l'artillerie & de tout ce qui y estoit requis. Et par ladite portion ainsi dressée, qui fut fort agreable au Roy, fut fait iugement quel auitaillemét il faudroit auoir pour fournir tout icelluy camp, quant il seroit du tout emply de ce que le Roy auoit intention de y mettre & bouter. Et apres ces choses & que le Roy l'eut bien veu & visité, s'en vint à bien content, & s'en partit pour s'en retourner audit lieu de Chartres, Selome, Vendosme, & à Tours, & en renuoya toutes les compaignies qui estoient venus audit camp par son ordonnance, chascun en sa garnison.

En ladicte annee le Duc de Bretagne enuoya acheter à Milan certaine quâtité de harnois, comme cuirasses, sallades, & aultres harnois, qui furent enfardelez en

fardeaux en façon de draps de foye & aultres marchandises fort enuolopez de cotton. Et tellement que à remuer les fardeaux ne faisoient point de noise, lesquels fardeaux qui se porterent sur mulets arriuerent aux montaignes d'Auuergne, laquelle marchandise de harnois les gens & commis de Doyac prindrent, & incontinent fut mandé au Roy qui donna lesdits harnois audit Doyac & aultres ses fatalites.

En ladicte annee toutes les vignes presque vniuersellement par tout le Royaulme de France faillirent, & ne rapporterent que vng peu de chose, & le vin qui creust en ladicte annee ne valut guieres, & si se vendit bien chier. Et à ceste cause le vin de l'annee precedente qui aussi ne valoit guieres fut vendu moult chier: car le vin qui au commencement d'icelle annee qui ne fut vendu à detail & tauerne que quatre deniers tournois, fut vendu douze deniers tournois la pinte. Et par aucuns marchans bourgeois de Paris & d'ailleurs qui auoient gardé du vin, creu autour de Paris, comme de Champigny sur Marne & aultres lieux voisins, le vendirent bien chierement: car plusieurs en vendirent à detail deux sols parisis la pinte, qui estoit audit prix trente six liu. tournois le muy. Et aduint que au moyen de ce que lesdictes vignes faillirent comme dit est, & que le vin ne valut guieres, plusieurs marchans s'en alerent chercher les bons en diuerfes regions loingtaines, lesquels marchans firent amener en la ville de Paris, qui fut pareillement chier vendu, comme six & sept blancs la pinte. Et lesquels vins furent alez querir iusques es fins & mettes des dernieres villes d'Espaigne.

R r iij

En ladicte annee les garnisons pour le Roy estans au pays de Picardie, tenans frontieres sur lesdits Flamens, nonobstant la treue firent de grans courses les vngs contre les aultres, en faisant mauuaise guerre: car tous les prisonniers de guerre prins de chascun desdits costez, sans misericorde aucune estoient pendus quant prins estoient, sans aucun en mettre à rançon.

Audit temps le Roy qui auoit esté malade à Tours, s'en partit dudit lieu de Tours, & s'en ala à Touars, où aussi y deuint tres fort malade, & y fut en tres grât dangier de mort. Parquoy & affin de recouurer sa santé enuoya faire maintes offrandes, & donner de bien grans sommes de deniers en diuerses Eglises de ce Royaume, & fist de grâdes fondations. Et entre les aultres fondations fonda en la sainte Chappelle du Palais Royal à Paris vne haulte Messe, pour y estre dicte chascun iour en l'onneur de môseigneur S. Iean, à l'eure de sept heures de matin, laquelle il ordonna estre chantee par huit chantres qui estoient venus du pays de Prouence, lesquels auoient esté au Roy René de Cécile, & de sa chappelle, qui s'en vindrent apres le trespas dudit feu Roy René leur maistre deuers le Roy, qui les recueillit côme dit est. Et fonda ladicte messe de mil liures parisis, prises sur la ferme & coustume du poisson de mer qui se vent és Halles de Paris.

Et apres ce que dit est & que le Roy eut esté ainsi malade, il se voüa d'aler en pelerinaige à monseigneur S. Claude, ce qu'il entreprint de faire, & s'en vint à Nostre Dame de Clery faire ses offrandes, & puis se partit d'illec pour aler accomplir sondit voyaige. Et pour

estre feurement de sa personne y mena avecques luy huit cens lances, & plusieurs aultres gens de guerre qu'on estimoit bien à six mil combatans. Et auant son partement du pays de Touraine ala à Amboise veoir monseigneur le Daulphin son fils que iamais n'auoit veu, au moins que bien peu, & au departement luy donna sa benediction, & le laissa en la garde de monseigneur Pierre de Bourbon seigneur de Beaujeu, lequel il fist son Lieutenant general par tout son Royaume durant sondit voyaige. Et lors declaira le Roy à monseigneur le Daulphin qu'il vouloit qu'il obeist à mondit seigneur de Beaujeu, & qu'il fist tout ce qu'il luy ordonneroit, & tout ainsi que si luy-mesmes luy commandoit.

En ladicte annee durant le voyage de saint Claude, fut le blé moult chier vniuersellement par tout le Royaume de France, & mesmement au pays de Lyonnois, Auuergne, Bourbonnois, & aultres pays voisins. Et à ceste cause y mourut grant quantité de peuple, tant de maladie que de famine, qui fut merueilleusemēt grande par toutes contrées, & se ce n'eussent esté les grandes aumosnes & secours de ceulx qui auoient des blez, la mort y eust esté moult douloureuse. Nonobstant ce se partirent desdits pays plusieurs pources gens qui alerent à Paris & en plusieurs aultres bonnes villes, & furent mis en vne grange ou maison à sainte Katherine du val des Escolliers, où illec les bons bourgeois & bonnes bourgeois de Paris les aloient songneusement penser. Et depuis furent menez à l'ostel Dieu de Paris, où ils moururent tous ou la plus part: car quant ils cui-

doient mangier ils ne pouoient, pource qu'ils auoient les conduits retraits par auoir esté trop sans mengier.

En l'an mil quatre cens quatre vingts & deux, le ieu-  
dy iour de May, enuiron l'eure de quatre à  
cinq heures, de tres-noble, puissante, saincte & des  
bonnes viuans l'exemplaire: c'est assauoir ma tres-re-  
doubtee Dame madame Iehan de France, femme &  
espouse de monseigneur Iehan Duc de Bourbonnois  
& d'Auuergne, expira & rendit l'ame à Dieu en son  
chateau de Molins en Bourbonnois, par le moyen  
d'une forte fieure, si merueilleuse que l'art de Medeci-  
ne n'y peut pourueoir, & fut son corps inhumé en l'E-  
glise de Nostre Dame dudit Molins. Laquelle Dame  
fut fort ploreë & lamentee, tant par mondit seigneur  
son espoux & mary, ses seruiteurs & gens de ses pays, &  
par tous aultres du Royaulme de France, qui ladicte  
Dame auoient veüe & eu cognoissance, pour les gran-  
des vertus & biens dont estoit par grace remplie.

Et auparauant icelle annee ala aussi de vie à trespas  
au pays de Flandres, madame la Contesse de Flandres  
& Artois, fille du feu Duc Charles de Bourgongne,  
femme du Duc en Auteriche, & niepce de messei-  
gneurs de Bourbon: de laquelle yssirent deux enfans,  
c'est assauoir vng fils & vne fille, lesquels demourerent  
en la garde des Flamens en la ville de Gant.

En cest edite annee mil quatre cens quatre vingts &  
deux de ladicte maladie de fieure & raige de teste, mou-  
rurent en diuers lieux moult de norables & grans per-  
sonnaiges, tant hommes que femmes. Et entre aultres  
moururent les Archeuesques de Nerbonne & Bourges,  
l'Euesque



l'Euesque de Lisieux, & maistre Iehan le Boulengier premier President en la Court de Parlement, & aussi messire Charles de Gaucourt Cheualier, qui auoit esté Lieutenant pour le Roy en sa ville de Paris, lequel fut fort plaint: car il estoit vng bon & honnesté Cheualier, beau personnaige, saige homme & grant clerc. Et de ladicte Court de Parlement moururent plusieurs des Conseilliers & Aduocats d'icelle, & entre aultres mourut vng nommé maistre Nicolle Bataille, que'on disoit estre le plus grant Legiste du Royaulme de France, bonne personne & fort plaissant, qui fut fort plaint & non sans cause. Et disoit on qu'il mourut par le courroux qu'il print de sa femme qui fut fille de maistre Nicole Erlaut, en son viuant Tresorier du Daulphiné, combien qu'elle eust de sondit mary tout le plaisir que femme en pouoit auoir, & d'elle auoit eu douze enfans en mariage, & auoit ledit deffunct au iour de sondit trespas quarante quatre ans d'aage. Laquelle femme se conduisit en la lescherie de sa pute charougne avecques ribaulx particuliers, durant sondit mariage. Et entre aultres entreuint en sadicte lescherie vng ieune garçon fils d'une vendereffe de poires & poisson de mer des Halles de Paris, nommé Regnault la Pie, lequel auoit aultrefois eue grant familiarité autour du Roy, comme son varlet de chambre, & depuis auoit esté mis dehors de son seruice par ses faultes & abus, dont l'accusa Oliuier le diable dit le Dain, aussi son compaignon, comme barbier, varlet de chambre du Roy. Laquelle femme le print en son amour desordonnee, & pour l'entretenir en vendit & engaiga de ses bagues &

sf

vaisselle de fondit mary, & si print aussi de l'argent de fondit mary larcineusement, pour l'entretènement de fondit paillard: de toutes lesquelles choses fondit mary en fut aduerty, qui en print si tres-grant courroux que à cause d'iceluy il ala de vie à trespas, qui fut moult grant dommaige. Au Royaulme des Cieulx gisefel'ame de luy en bon repos.

Et apres que le Roy eut fait & accompli son voyage audit lieu de saint Claude, il s'en retourna fort malade à Nostre Dame de Clery, là où il fit sa neufuaine, & apres icelle faicte moyennant la grace & bonté de la Benoisite Vierge Marie illec requise, & à laquelle il auoit sa singuliere confidence & deuotion, reuint en assez bonne conualescence, & fut fort alegé de ses maulx. Durant & pendant le temps que le Roy estoit audit lieu de Clery y mourut beaucoup de gens, tant de son Hostel que d'autres, & entre les autres y mourut vng Docteur en Theologie que nouuellement il auoit fait son Conseiller & Ausmonier, qui estoit natif de Tours fils d'vng Bouchier de ladicte ville, & se nommoit ledit Docteur maistre Marrin Magistri.

En apres le Roy qui estoit audit lieu de Clery s'en partit & s'en ala à Mehun sur Loire, à saint Laurens des Eauës & illec enuiron, & y fut iusques près la feste Nostre Dame de my-Aoust qu'il se partit dudit saint Laurens & retourna de rechief audit lieu de Clery, à la feste & solempnité de la Nostre Dame de my-Aoust.

En ladite annee au commencement de Iuillet se mirent sus vne belle & honnestre Ambassade du pays de Flandres, pour venir deuers le Roy audit lieu de Clery,

où ils arriuerent, & illec parlerent au Roy, auquel ils firent remonstrer & à son Conseil, les causes pour lesquelles ils estoient venus deuers luy, de par les nobles hommes, gens d'Eglise, & populaire dudit pays de Flandres. Lesquelles causes estoient tendans afin qu'il pleust au Roy auoir bon appoinctement avecques luy pour lesdits Flamens, qui ne tendoient à aultre fin que d'auoir paix finale avecques le Roy. Lesquels Ambassadeurs furent du Roy tres-bien & honnestement receus & recueillis, & leur fut de par luy donné expedition, dont iceulx Ambassadeurs furent tres-bien contents. Et ce fait ils s'en retournerent audit pays de Flandres, & furent conduits & menez de par le Roy en la ville de Paris par monseigneur de saint Pierre, qui les fist bien festoyer par le Preuost des Marchans & Escheuins d'icelle ville de Paris, bien & honnestement: & puis apres s'en retournerent à Gant & aultres villes de Flandres, dont ils estoient partis. Et ainsi que ladite Ambassade s'en retournoit, le Roy auoit fait mettre sus les champs grant partie de ses gens de guerre qu'il auoit en garnison au pays de Picardie, dont auoit la charge & conduite le seigneur des Querdes: laquelle compaignie il faisoit beau veoir, car elle estoit fort belle. En laquelle compaignie auoit quatorze cens lances fournies, tres-bien accompaignedes de six mil Suisses, & aussi de huit mil picquiers. Tous lesquels gens de guerre ainsi assemblez que dit est, s'en alerent à grant triumphe & bruit mettre le siege deuant la ville d'Aire, qui est vne tres belle place & bien assise, près de saint Omer & Therouenne, dedens laquelle ville

y auoit plusieurs gens de guerre de par le Duc en Autriche. En laquelle place, tout incontinent que les gens du Roy y furent arriuez la battirent moult fort d'artillerie, dont & de quoy les manans d'icelle ville furent & se trouuerent fort espouuentez : mais aucuns des gens de guerre illec estans, qui auoient bonne intelligence avecques ledit seigneur des Querdes pour le Roy, de luy bailler ladicte place & ville, firent composition pour icelle ville, qui estoit telle qu'elle seroit mise en la main du Roy. Et fut faicte ladicte composition par vng Cheualier nommé le seigneur Descontrans, qui estoit du pays de Picardie, & lequel auoit la garde de ladicte ville de Aire de par ledit Duc en Autriche. Et mist ladicte place en la main du Roy, en luy faisant le serment de le seruir bien & loyaulment, dont & pour bien le recompenser le Roy luy donna la charge de cent lances, & si luy fut oultre baillé & donné trente mil escus en or content.

En ladicte annee és mois d'Aoust & Septembre, vng Cheualier du pays du Liege nommé messire Guillaume de la Marche, dit le Sanglier Dardaine, fist & cōspirera guerre mortelle alencontre de tres-noble Prince & tres-Reuerend pere en Dieu monseigneur Loys de Bourbon, Euesque de ladicte cité de Liege, qui auoit parauant nourry ledit Sanglier Dardaine, pour le tuer & meurdrir. Et apres ce fait de mettre & faire Euesque dudit Liege le frere dudit Sanglier. Et pour faire par icelluy Sanglier sa dampnee entreprise, le Roy luy fist deliurer argent & gens de guerre en grant nombre. Au moyen desquels, & aussi de certain nombre de

mauuais garçons, larrons, pipeurs & pillars, qu'il print & assembla tant en la ville de Paris, que en aucuns des villaiges voisins d'icelle ville, iusques au nombre de deux à trois mil. Lesquels il fist vestir & habiller de robes rouges, & à chascune desdites robes dessus la manche fenestre y fist mettre vne hure de sanglier. Et estoient lesdits mauuais garçons legierement armez: & ainsi le dit Sanglier les mena iusques audit pays du Liege. Et luy illec arriué trouua façon & moyen d'auoir intelligence avecques aucuns traistres Liegeois de ladicte ville, à l'encontre de leur seigneur, de dechasser, tuer & meurdrir leur dit Euesque, & le mettre hors de la cité, avecques ce qu'il auoit de gens: ce que firent lesdicts Liegeois, & sous vmbre d'une amitié fainte qu'ils disoient auoir à leur dit Euesque, luy dirent que force estoit qu'il alast assaillir son dit ennemy, & que lesdits habitans le suiuiroient en armes, & viuroient & mourroient pour luy, & qu'il n'y auroit point de faulte que ledit Sanglier & sa compaignie demourroient desconfits & destruits. Lequel monseigneur du Liege inclinant à leur requeste faillit de ladicte cité du Liege, & ala avecques eulx aux champs tout droit où estoit ledit de la Marche: lequel quant il vit ledit Euesque se decouurit de l'embuche où il estoit, & s'envint tout droit audit monseigneur l'Euesque. Et quant lesdits traistres habitans du Liege virent leur dit Euesque es mains du dit de la Marche son ennemy, luy tournerent le dos, & sans coup ferir s'en retournerent en ladicte cité de Liege. Et incontinent ledit monseigneur de Liege qui n'auoir aide ne secours que de ses seruiteurs & familiers, se

trouua fort esbahy : car ledit de la Marche qui estoit sailly de sadiète embusche, s'en vint à luy, & sans aultre chose dire luy bailla d'une taille sur le visaige, & puis luy mesmes le tua de sa propre main : & apres ce fait icelluy de la Marche fist mener & getter ledit Euesque, & estendre tout nud en la grant place deuant l'Eglise saint Lambert, maistresse Eglise de ladiète cité de Liege, où illec fut manifestement monstré tout mort aux habitans de ladiète ville, & à vn chascun qui le vouloit veoir. Et tantost apres ladiète mort y arriuerent cuidans le secourir le Duc d'Aueriche, le Prince d'Orange, le Conte de Romont & aultres gens de guerre, lesquels quant ils sceurent la mort dudit Euesque, s'en retournerent sans riens faire, à l'occasion d'icelle.

En ladite annee au mois d'Octobre, le Roy se trouua fort malade en son hostel du Plessis du parc lez Tours, à cause de laquelle maladie eut grant paour de mourir. Et pour ceste cause se fist porter à Amboise par deuers monseigneur le Daulphin, auquel il fist plusieurs belles remonstrances, en luy disant qu'il estoit malade d'une maladie incurable, en le exhortant que apres son trespas il voulsist auoir aucuns de ses seruiteurs pour bien recommandez. C'est assauoir maistre Oliuier le diable dit le Dain, son Barbier, & Iehan de Doyac Gouverneur d'Auuergne, en disant qu'il auoit esté bien seruy d'eulx, & que ledit Oliuier luy auoit fait plusieurs grans seruices, & qu'il ne feust riens de luy, si n'eust esté ledit Oliuier. Et aussi qu'il estoit estranger & qu'il se seruist de luy, & qu'il entretenist en son seruice & aux offices & biens qu'il luy auoit donnez.

Luy recommanda aussi monseigneur du Bouchaige, & messire Guyot Pot Bailly de Vermandois, & luy enchargea qu'il creust leur conseil : car ils les auoit trouuez saiges & de bon conseil. Et si dist oultre à mondit seigneur le Daulphin, qu'il confermast tous les officiers qu'il auoit faits en leurs offices, & que principalement il eust son poure peuple pour recommandé, lequel il auoit mis en grande poureté & desolation, & plusieurs aultres choses luy remonstra, que depuis il fist manifester en plusieurs des bonnes villes de son Royaulme & en la Court de Parlement. Et si luy dist oultre que pour la conduite de la guerre il se seruiust du seigneur des Querdes, & lequel il auoit trouué en tous ses affaires bon, loyal & notable Cheualier, & de bonne & grâde conduite, & ce fait s'en retourna au Montils.

Audit temps le Roy fist venir grant nombre & grât quantité de ioueurs de bas & doulx instrumens, qu'il fist loger à saint Cosme près Tours, où illec ils se assemblerent iusques au nombre de six vingts. Entre lesquels y vint plusieurs bergers du pays de Poictou, qui souuent iouerent deuant le logis du Roy, mais ils ne le veoient point : affin que ausdits instrumens le Roy y prenrist plaisir & passe-temps, & pour le garder de dormir. Et d'vng aultre costé y fist aussi venir grant nombre de bigots, bigottes, & gens de deuotion, comme hermites & saintes creatures, pour sans cesser prier à Dieu qu'il permist qu'il ne mourust point, & qu'il le laissast encores viure.

En ce temps és mois d'Octobre & Novembre se firent de grans alees & venuës par les Flamens de la ville

de Gant, & qui vindrent en Ambassade deuers le Roy. Lequel pour les oyr y commist maistre Iehan de la Vacquerie qui estoit du pays de Picardie, & lequel il auoit nouuellement fait & créé son premier President en sa Court de Parlement à Paris, pour consulter de la matiere: C'est assauoir de bonne paix & vnion estre faite entre le Roy & lesdits Flamens. Et aussi auecques ledit President y ordonna & commist le Roy ledict monseigneur des Querdes & aultres, & tellement fut communiqué par lesdites parties tant d'vng costé que d'autre, qu'ils firent & traicterent ladiète paix. En laquelle faisant se debuoit faire le mariage de monseigneur le Daulphin & de la fille du Duc en Aulteriche, qui estoit en la possession & garde desdits Flamens de Gant, dont de ce le Roy fut fort ioyeux, & eut ladite paix & vnion pour bien agreable. Et pour l'onneur d'icelle en fut chanté par tout le Royaulme, *Te Deum laudamus*, & si en furent faits les feux en la ville de Tours. Et incontinent ces choses faites fut grant bruit que lesdits Flamens s'estoient partis dudit lieu de Gant pour amener ladiète fille. Laquelle pour la bien & honnestement recueillir, le Roy y auoit ordonné mesdames de Beaujeu, sa fille ainsee, madame de Dunois sœur de la Roïne, madame de Touars, madame l'Amiralle, & plusieurs aultres Dames, Damoiselles & gentils femmes, que on cuidoit qu'ils deussent venir & arriuer en la ville de Paris le huitiesme iour de Decembre. Mais ladiète venue sejourna pour aucuns menus differens qui suruindrent du costé desdits Flamens, & iusques ad ce que lesdits differens eussent esté vuidez.

En



En ladicte annee les Roys d'Escoffe & d'Angleterre eurent grant guerre l'vng contre l'autre, & entre-  
rent lesdicts Escossois bien auant audit Royaulme  
d'Angleterre, lequel ils dommaigerent moult fort. Et  
nonobstant que lesdicts Escossois estoient cent mil  
hommes en bataille plus que n'estoient les Anglois,  
toutesfois affin qu'ils ne frappassent l'un sur l'autre,  
se mist & fut fait appoinctement entr'eux par le moy-  
en du Duc d'Albanie frere dudit Roy d'Escoffe, qui  
querelloit contre icelluy Roy d'Escoffe son frere. La-  
quelle querelle d'entr'eux estoit telle que ledict Duc  
d'Albanie disoit que sondit frere vsurpoit sur luy le-  
dict Royaulme, pource que lesdicts Roy d'Escoffe &  
Duc d'Albanie qui estoient freres, estoient venus &  
yssuez sur terre d'une ventree, & que d'icelle ledit Duc  
d'Albanie qui estoit le premier yssu, & que par ainsi  
il auoit acquis droit d'ainesse deuant sondit frere au-  
dit Royaulme. Et à ceste cause ceulx qui menoient  
ladicte guerre pour ledict Roy d'Escoffe firent com-  
position avecques lesdicts d'Albanie & Anglois qui  
estoient ensemble, tellement qu'ils ne frapperent  
point les vngs contre les autres, & s'en retourna cha-  
cun au lieu dont il estoit party.

En ladicte annee au mois de Ianuier vindrent & ar-  
riuerent en la ville de Paris les Ambassadeurs de Flan-  
dres, qui auoient moyenné la paix d'entre le Roy &  
les Flamens, au moyen du mariage de monseigneur le  
Daulphin & de Damoiselle Marguerite d'Autriche,  
Contesse de Flandres, fille dudit Duc en Autriche: au

T t

deuant desquels & pour les receuoir en la ville de Paris, de par le Roy y furent monseigneur l'Euesque de Marceille Lieutenant pour le Roy en icelle ville de Paris, accompaigné du Preuost des Marchans & Escheuins, bourgeois & habitans d'icelle ville, & d'vng Docteur de la ville de Paris nommé Scourable, qui fist vne moult honorable proposition par deuant lesdits Flamens, qui moult s'en tindrent pour bien contens. Et le landemain qu'ils furent arriuez en ladicte ville, qui fut le Dimenche quatriesme iour de Ianuier, furent lesdits Ambassadeurs Flamens en l'Eglise Nostre Dame de Paris oyr la Messe. En laquelle Eglise de Nostre Dame y furent faictes processions generalles, & y prescha ledit Scourable, qui y fist vne moult belle collation, dont tous ceulx qui l'ouyrent furent moult bien contens. Et de ladicte venue & publication de ladicte paix en fut chanté en icelle Eglise, *Te Deum laudamus*, fait les feux, & aussi de grans chieres parmy les ruës de ladicte ville. Et furent ledit iour de Dimenche iceulx Ambassadeurs au partir de ladicte Eglise de Nostre Dame, menez dîner en l'ostel de ladicte ville de Paris, là où illec ils furent moult bien festoyez. Et le landemain lesdits Ambassadeurs se partirent dudit lieu de Paris & s'en alerent par deuers le Roy.

Et d'icelle venue & bonne paix en furent resiouys & joyeux tres-noble & tres-Reuerend pere en Dieu monseigneur le Cardinal de Bourbon, qui à l'occasion d'icelle bonne paix fist faire en son hostel de Bourbon à Paris, vne moult belle moralité, sortie, & farce, ou

moult de gens de la ville alerent pour les veoir iouer, qui moult priferent ce qui y fut fait. Et eussent les choses dessusdictes esté plus triumpantes se n'eust esté le temps qui moult fut plouuieux & mal aduenant, pour la belle tapisserie & le grant appareil fait en la Court dudit hostel. Laquelle Court fut toute tendue de la tapisserie de mondit seigneur le Cardinal, dont il en auoit grande quantité & de belle.

Après lesdits ieux ainsi faits que dit est, lesdits Ambassadeurs s'en partirent de Paris le lundy ensuiuant, comme dit est, & s'en alerent à Amboise, où ils furent moult honorablement receus de par le Roy, & y virent par deux fois monseigneur le Dauphin, qui les recueillit moult honnestement. Et à leur departement de Tours, où ils furent depuis, le Roy leur fist donner pour leur deffroy trente mil escus au soleil, & de belle vaisselle d'argent largement, & puis iceulx Ambassadeurs s'en retournerent à Paris, où ils firent publier en la Court de Parlement les articles faictes pour ladicte paix: c'est assauoir publiquement & en pleine Court, à huis ouuers. Et après ladicte lecture faicte leur furent iceulx articles confermez par ladicte Court. Et au departement d'icelle Court maistre Guillaume le Picard, Baillif de Rouen, mena & conduisit lesdits Ambassadeurs & aultres Officiers du Roy, estans illec en son hostel assis audit lieu de Paris, en la rue de Quiquempois, où illec il donna à dîner à toute la compaignie, & y furent moult plantureusement festoyez, à vng iour de mardy quatriesme iour de Feurier en ladicte

T t ij

annee mil quatre cens quatre vingts & deux.

Audit mois de Feurier le Roy escripuit lettres à tous les estats de Paris, par lesquelles il les prioit tres-instamment qu'ils se voulsissent transporter en l'Eglise monseigneur saint Denys, luy faire priere qu'il veille estre intercesseur & moyen enuers nostre Saulueur Iesus-Christ, qu'il voulsist permettre que le vent de bise ne courust point, pource que par le rapport de tous Medecins, auoient esté d'opinion que ledit vent de bise quant il venteroit feroit moult de maux, tant à la santé des corps humains, que des biens de terre. Et par l'ordonnance du Roy furent tous lesdits estats de Paris à diuers iours audit lieu de saint Denis, faire processions & chanter lesdictes Messes.

Et le samedi dixneufiesme iour d'Auril mil quatre cens quatre vingts & trois apres Pasques, monseigneur de Beaujeu & madame sa femme vindrent à Paris, pour eulx aler en Picardie recepuoir madame la Daulphine des mains des Flamens, qui par le traictié de la paix la debuoient mettre és mains de mondit seigneur de Beaujeu pour le Roy. Et fist ladicte Dame de Beaujeu son entree en la ville de Paris, comme fille du Roy, & y fist des mestiers nouveaulx. Et estoient lesdits Seigneur & Dame bien honnestement accompaignez de grans seigneurs & Dames, comme le seigneur d'Albret, le seigneur de saint Valier, & aultres nobles hommes, madame l'Admiralle & aultres Dames & Damoiselles, lesquels sejournerent à Paris par trois iours, durant lesquels monseigneur le Cardinal de

Bourbon les festoya moult honnorablement.

Audit mois d'Auril le Roy Edouart d'Angleterre mourut audit Royaulme d'une apoplexie qui le print. Aultres dient qu'il fut empoisonné en buuant du bon vin du creu de Challuau, que le Roy luy auoit donné, duquel il but en si grande habondance qu'il en mourut: combien que on a dit depuis que il vescu iusques à ce qu'il eust fait Roy en son lieu son fils ainsné.

Audit mois & an mourut aussi madame Marguerite de Bourbon, femme de Phelipe monseigneur de Sauoye, Contesse de Bresse, de maladie qui longuement luy dura, & d'icelle maladie on n'y peut mettre remede qu'elle n'en mourust etique, dont fut grant dommaige: car elle estoit en son viuant moult honneste & bonne Dame, & pleine de grans biens & vertus.

Au mois de May le samedi tiers iour d'icelluy mois, par l'ordonnance & commandement du Roy, tous les estats de Paris, comme le Preuost, Iuge ordinaire, avecques les Supposts & Praticiens du Chastellet dudict lieu, la Court de Parlement, la Chambre des Comptes, les Generaulx des Aydes & Monnoyes, la Chambre du Tresor & les Esleus, avecques les Preuost des Marchans & Escheuins d'icelle ville, alerent en belle procession dudict lieu de Paris iusques au lieu & en l'Abbaye de monseigneur saint Denys en France, pour illec prier pour la bonne prosperité du Roy, de la Royne, monseigneur le Daulphin, & les seigneurs du sang, & aussi pour les biens de terre.

T t iij

Au mois de Iuing ensuiuant le lundy second iour dudit mois, enuiron cinq heures du soir, fist son entree en la ville de Paris madame la Daulphine, accompagnee de madame de Beaujeu, madame l'Admiralle, & aultres Dames & gentils femmes. Et entrerent à ladicte heure audit lieu de Paris par la porte saint Denis, où estoient preparees pour sa venue trois beaulx eschaffaulx, en l'vng desquels tout en hault estoit vng personnaige representant le Roy comme souuerain. Au second estoient deux beaulx enfans, vng fils & vne fille, vestus de damas blanc, faisans & representans monseigneur le Daulphin, & madiete Damoiselle de Flâdres. Et au tiers estaige au dessoubs estoient deux personnaiges, de mondit seigneur de Beaujeu & de madame sa femme. Et à chascun d'iceulx personnaiges à costé estoient les escussions des armes desdicts Seigneurs & Dames. Et si y auoit aussi quatre personnaiges: c'est assauoir l'vng de labour, l'autre de Clergie, l'autre marchandise, & l'autre noblesse, qui tous dirent vng couplet à icelle entree. Et est assauoir que par tout ou madiete Damoiselle de Flandres passa, tout fut tendu par les rues, & y furent encores faits plusieurs beaulx personnaiges, tous consonans ausdicts monseigneur le Daulphin & madame la Daulphine. Et pour honneur de ladicte venue furent mis hors & deliurez tous prisonniers de ladicte ville de Paris. Et y fut fait nouueaulx mestiers.

Et le vendredy septiesme iour dudit mois de Iuing, enuiron l'eure d'entre huit & neuf heures du soir, se

leua grant tonnoire audit lieu de Paris. Et à vng des esclats dudit tonnoire qui fut à ladicte heure, vint icelluy tonnoire enflamber & mettre le feu au clochier de madame sainte Geneuiefue au mont de Paris, lequel brusta toute la charpenterie dudit clochier, qui estoit demouree par l'espace de neuf cens ans, fondit toutes les cloches dudit clochier, & le plomb dont il estoit couuert, où il y auoit par estimation cent mil liures de plomb & plus, & y eut vng grant dommage, qui estoit pitie à voir.

Au mois de Iuillet audit an mil quatre cens quatre vingts & trois, fut fait & solempnisé la feste des nopces de mondit seigneur le Daulphin & Damoiselle Marguerite de Flandres, en la ville d'Amboise. Et y auoit & estoient presens plusieurs nobles & notables personnaiges de ce Royaulme, enuoyez des citez & bonnes villes dudit Royaulme, & par l'ordonnance du Roy.

En ladicte annee mil quatre cens quatre vingts & trois le Roy delibera d'auoir & luy estre portee la sainte Ampolle qui estoit en l'Eglise saint Remy de Reims, & qui auoit esté apportee par grace diuine dès l'an cinq cens par vne Coulombe Blanche au bon saint Remy de Reims, pour en oindre & sacrer à Roy de France le Roy Clouis, qui fut le premier Roy Chretien, lequel mourut en ladicte annee, & gist en l'Eglise sainte Geneuiefue au mont de Paris. Et par ainsi estoit demouree ladicte sainte Ampolle audit lieu de saint Remy neuf cens quatre vingts & trois

ans qu'elle en fut tiree & mise hors de son lieu, & apportee à Paris par Claude de Montfaucon gouverneur d'Auuergne à ce commis par le Roy. Et arriua à Paris le dernier iour de Iuillet, & fut apportee en grande reuerence & processions reposer en la sainte Chappelle du Palais Royal à Paris, où elle y demoura iusques à lendemain au soir premier iour d'Aoust quelle fut emportee dudiect lieu de Paris au Roy en son hostel des Montils lez Tours, avec les Verges de Moyse & Aaron, & la Croix de la Victoire qui aussi fut enuoyee par grace diuine au bon Roy saint Charlemagne pour obtenir victoire alencontre des infideles. Lesquelles Verges & Croix auoient tousiours esté audiect lieu de la sainte Chappelle à Paris avecques les saintes relicques estans illec au premier iour d'Aoust qu'ils en furent avecques ladiecte sainte Ampolle par l'Euesque de Seers & aultres Commissaires à ce ordonnez de par le Roy emportez.

Audiect an le lundy vingt-cinquiemes iour dudict mois d'Aoust le Roy deuint fort malade en son hostel des Montils lez Tours, tellement qu'il perdit la parole & tout entendement, & en vindrent les nouuelles à Paris le mercredy vingt-septiesme iour dudiect mois qu'il estoit mort, par vnes lettres que en escripuit maistre Iehan Briçonnet: Ausquelles lettres fut foy adioustee, pour ce que lediict Briçonnet estoit homme de bien & de credit. Et à ceste cause les Preuost des Marchans & Escheuins de la ville de Paris pour pourueoir aux affaires d'icelle ville, firent mettre garde aux por-

tes



tes de ladicte ville pour garder que hommen'en yssist ne y entraist. Et à ceste cause fut bruit tout commun parmy ladicte ville de Paris que le Roy estoit ainsi mort, dont il n'estoit riens, & s'en reuint, but, parla, & menga tres-bien, & vesquit iusques au samedy au soir ensuiuant trentiesme & penultiesme iour dudit mois d'Aoust enuiron l'eure de entre six & sept au soir qu'il rendit l'ame. Et incontinent fut le corps habandonné de ceulx qui l'auoient seruy en la vie.

Et apres ledit trespas son corps depuis qu'il fut appareillé comme on a de coustume de faire, fut porté inhumer dudit lieu des Montils en l'Eglise nostre-Dame de Clery, pource qu'il voulut & ordonna en son viuant que ainsi feust faict, & ne vult estre mis auecques les deffuncts tres-nobles Roys de France ses predecesseurs en l'Eglise & Abbaye de sainct Denis en France. Et ne voulut iamais dire la raison qui le auoit meu ad ce. Mais aucuns pensoient que ce feust pour la cause de l'Eglise où il fist moult de biens, & aussi pour la grande deuotion qu'il auoit à la Benoisie Vierge Marie, priece audit lieu de Clery. Lequel deffunct Roy en son viuant à cause d'aucuns personaiges qui estoient à l'entour de sa personne, comme Oliuier le diable dit le Dain, son Barbier, Iehan de Doyac, & aultres plusieurs, lesquels il croit plus que gens de son Royaulme, fist durant son regne beaucoup de iniustices, maulx & violences: & tellement qu'il auoit mis son peuple si au bas, que au iour de son trespas estoit presque au desespoir: car les biens qu'il prenoit

Vu

338 LES CHRONIQ. DV ROY LOYS XI.  
sur fondir peuple donnoit & distribuoit aux Eglises,  
en grans pensions, en Ambassades, & gens de bas estat  
& condition: Aufquels pour les exaulcer ne se pouoit  
tenir de leur donner argent, biens & possessions; en  
telle façon qu'il auoit donné & aliéné la pluspart du  
Demaine de son Royaulme. Et nonobstant qu'il eut  
durant sondit Regne plusieurs affaires, toutesfois il  
mist en telle subgection ses ennemis, qu'ils vindrent  
tous par deuers luy à mercy, & fut si craint & doubté,  
qu'il n'y auoit si grant en son Royaulme, & mesme-  
ment ceulx de son sang, qui dormist ne reposast seure-  
ment en sa maison. Et auant sondit trespas fut moult  
fort molesté de plusieurs maladies: Pour le guerir des-  
quelles maladies furent faictes pour luy, par les Medecins  
qui auoient la cure de sa personne, de terribles &  
merueilleuses medecines. Lesquelles maladies luy puis-  
sent valloir au salut de son ame, & luy donne son Para-  
dis par sa misericorde, celuy qui vit & regne au siecle  
des siecles. Amen.

*Deo gratias.*













